



















# বাংলা দেশের ইতিহাস

শ্রীরমেশচন্দ্র মজুমদার, এম-এ, পি-এইচ-ডি.

ঢাকা বিশ্ববিদ্যালয়ের ভূতপূর্ব ভাইস-চ্যান্সেলর

Shri Ramesh Chandra Majumdar  
Jharkhand, Howrah  
Publication No. 1000 Call No. 1000

জেনারেল প্রিন্টার্স প্রাইভেট লিমিটেড

১১৯, ধর্মতলা স্ট্রীট, কলিকাতা

প্রকাশক: শ্রীসুদ্রেশচন্দ্র দাস, এম-এ  
জেনারেল প্রিন্টার্স ব্যাণ্ড পারিশাস' লিঃ  
১১৯, ধর্মতলা ষ্ট্রীট, কলিকাতা

প্রথম সংস্করণ

ফাল্গুন, ১৩৫২

মূল্য ৫/- পাঁচ টাকা মাত্র

জেনারেল প্রিন্টার্স ব্যাণ্ড পারিশাস' লিমিটেডের  
মুদ্রণ বিভাগে [ অবিনাশ প্রেস- ১১৯ ধর্মতলা ষ্ট্রীট,  
কলিকাতা ] শ্রীসুদ্রেশচন্দ্র দাস এম-এ কর্তৃক মদ্রীক্ষিত

## উৎসর্গ পত্র

অতি শৈশবেই

যাঁহার ক্রোড়চ্যুত হইয়াছিলাম

সেই

পরমারাধা পুণ্যকলে স্বর্গগতা জননী

বিশ্বমুখী দেবী

ও

মাতৃহীন হইয়াও যাঁহার করুণায়

মাতৃস্নেহ হইতে বঞ্চিত হই নাই

সেই

পূত-চরিত্রা স্বর্গীয়া মাতৃকল্পা

গঙ্গামণি দেবীর

পবিত্র স্মৃতির উদ্দেশে জন্মভূমির

এই ক্ষুদ্র ইতিহাস উৎসর্গ করিয়া

কৃতার্থ হইলাম।

জননী ও জন্মভূমি স্বর্গ হইতেও

শ্রেষ্ঠ।





## ভূমিকা

প্রাচীন ভাবতবাসীগণ সাহিত্যের নানা বিভাগে বহু গ্রন্থ প্রণয়ন করিয়াছেন, কিন্তু নিজেদের দেশের অতীত কাহিনী লিপিবদ্ধ করিবার জন্ত তাঁহাদের কোন আগ্রহ বা উৎসাহ ছিল না। পণ্ডিতপ্রবর কল্লণ রাজতরঙ্গিনী নামক গ্রন্থে কাশ্মীরের ধারাবাহিক ইতিহাস রচনা করিয়াছেন। কিন্তু এই শ্রেণীর আর কোন গ্রন্থ অতীবধি ভারতবর্ষে আবিষ্কৃত হয় নাই। ইহার ফলে ভারতের প্রাচীন যুগের ইতিহাস একরকম বিলুপ্ত হইয়া গিয়াছিল। উনবিংশ শতাব্দীতে ইউরোপীয় পণ্ডিতগণ ভারতের প্রাচীন লিপি, মদ্রা ও অন্ধ্রা প্রদেশে আবিষ্কার করিয়া হিন্দুযুগের ইতিহাস উদ্ধারের চেষ্টা করিয়া কালক্রমে অনেক নতবাসীরা তাঁহাদের প্রবৃত্ত পথে অঙ্গুলসন্ধান কার্যে অগ্রসর হইয়াছেন। তাহাদের সমবেত চেষ্টার ফলে যে সমৃদ্ধ তথ্য আবিষ্কৃত হইয়াছে তাহাতে প্রাচীন যুগের ইতিহাসের কাঠামো রচনা করা সম্ভবপর হইয়াছে।

বাংলাদেশের প্রাচীন ইতিহাস সম্বন্ধে আমাদের অজ্ঞতা যে কতদূর গভীর ছিল ১৮০৮ খৃষ্টাব্দে ফোর্ট উইলিয়ম কলেজের অধ্যাপক পণ্ডিত ডাক্তার জন্স রচিত ‘রাজতরঙ্গ’ অথবা ‘বাজাবলী’ গ্রন্থ তাহা প্রকৃষ্ট প্রমাণ। বাংলার প্রাচীন ইতিহাস সম্বন্ধে বাঙ্গালী জাতির স্মৃতি ও জনশ্রুতি যে কতদূর বিকৃত হইয়াছিল, এবং পাঁচ ছয় শত বৎসরের মধ্যে বাঙ্গালী জাতির ঐতিহাসিক স্মৃতি কিরূপে সমলে ছিন্ন হইয়া গিয়াছিল এই গ্রন্থখানি পাড়লেই তাহা বেশ বোঝা যায়।

পরবর্তী একশত বৎসরে পুরাতন আলোচনার ফলে বাংলার প্রাচীন ইতিহাস সম্বন্ধে আমাদের জ্ঞান যে কতদূর অগ্রসর হইয়াছিল ওরমাংসাদ চন্দ্র প্রণীত ‘গৌড়রাজমালা’ গ্রন্থখানি তাহার প্রমাণ স্বরূপ গ্রহণ করা যাইতে পারে। এদেশের অনেক—বিশেষত প্রাচীনপণ্ডীগণ—পুরাতত্ত্বকে ‘পাথুরে প্রমাণ’ বলিয়া উপহাস অথবা অবজ্ঞা করিয়া থাকেন। কিন্তু প্রাচীন ইতিহাসের উদ্ধারে ইহার মূল্য যে কত বেশী ‘রাজাবলী’র সহিত ‘গৌড়রাজমালা’র তুলনা করিলেই তাহা বুঝা যাইবে।

‘গৌড়রাজমালা’ আধুনিক বিজ্ঞান-সম্মত প্রণালীতে লিখিত প্রথম বাংলার ইতিহাস। ১৩১৯ সনে ইহা প্রকাশিত হয়। ইহার দুই বৎসর পরে ওরাখালদাস বন্দ্যোপাধ্যায় প্রণীত ‘বাঙ্গালার ইতিহাস’ প্রকাশিত হয়। নামে ‘বাঙ্গালার ইতিহাস’ হইলেও ইহা প্রকৃত পক্ষে বাংলা ও মগধের ইতিহাস।

উল্লিখিত দুইখানি গ্রন্থেই কেবলমাত্র রাজনৈতিক ইতিহাস আলোচিত হইয়াছে। বাংলার একখানি পূর্ণাঙ্গ ইতিহাস লিখিবার কল্পনা অনেকবার হইয়াছে। ১৯১২ খৃষ্টাব্দে বাংলার গভর্ণর লর্ড কারমাইকেল ইহার স্বত্বপাত করেন, এবং পরবর্তী ত্রিশ বৎসরে আরও দুই একজন এইরূপ চেষ্টা করিয়াছিলেন। কিন্তু ইহা ফলবতী হয় নাই। ওদীনেশচন্দ্র সেন

এই উদ্দেশ্য সাধনের জন্ত ‘বৃহৎ বঙ্গ’ নামে দুই খণ্ডে সম্পূর্ণ একখানি বৃহৎ গ্রন্থ প্রণয়ন করেন ( ১৩৪১ সন )। কিন্তু অনেক মূল্যবান তথ্য থাকিলেও এই গ্রন্থ বাংলার ঐতিহাসিক বিবরণ হিসাবে বিদ্বজ্জনের নিকট সমাদর লাভ করে নাই।

ঢাকা বিশ্ববিদ্যালয় হইতেই সর্বপ্রথমে বাংলার একখানি পূর্ণাঙ্গ ইতিহাস প্রকাশিত হয়। আমার সম্পাদনায় তিন বৎসর হইল ইহার প্রথম খণ্ড বাহির হইয়াছে। ইহাতে হিন্দুযুগের শেষ পর্য্যন্ত বাংলার ইতিহাস আলোচিত হইয়াছে। এই গ্রন্থ ইংরেজীতে লিখিত। যখন ইহার প্রথম পরিকল্পনা হয় তখন আমার ইচ্ছা ছিল যে ইংরেজী গ্রন্থ বাহির হইবার পরই ইহার একখানি বাংলা অনুবাদ প্রকাশের ব্যবস্থা করা হয়। কিন্তু এই গ্রন্থ রচনায় বহু বিলম্ব হওয়ার ফলে ইহার প্রকাশের পূর্বেই আমি ঢাকা বিশ্ববিদ্যালয় হইতে অবসর গ্রহণ করি। বিশ্ববিদ্যালয়ের বর্তমান কর্তৃপক্ষগণ যে সত্তর ইহার বঙ্গানুবাদের কোন ব্যবস্থা করিবেন তাহার কোন সম্ভাবনা দেখা বাইতেছে না। সুতরাং বাংলা ভাষায় বাংলার রাজনৈতিক, অর্থনৈতিক ও সামাজিক ইতিহাস এবং বাঙ্গালীর ধর্ম, শিল্প ও জীবনযাত্রার অগ্ৰাণু বিভাগের মোটামুটি বিবরণ সম্বলিত একখানি ক্ষুদ্র গ্রন্থের বিশেষ প্রয়োজন অনুভব করিয়া এই ইতিহাস লিখিতে প্রবৃত্ত হই। ঢাকা বিশ্ববিদ্যালয় হইতে প্রকাশিত বাংলার ইতিহাস যে এই গ্রন্থের আদর্শ ও প্রধান উপাদান তাহা বলাই বাহুল্য।

এই গ্রন্থ সাধারণ বাঙ্গালী পাঠকের জন্য, সুতরাং ইহাতে সূক্তি ভর্ক দ্বারা ভিন্ন ভিন্ন মতের নিরাস ও প্রমাণপঞ্জী-যুক্ত পাদটীকা সম্পূর্ণরূপে বর্জন করিয়াছি। যাহারা এই সমুদয় জানিতে চাহেন তাহারা ঢাকা বিশ্ববিদ্যালয় হইতে প্রকাশিত ইংরেজী গ্রন্থখানি পাঠ করিতে পারেন। ইংরেজী ভাষায় অনভিজ্ঞ পাঠকের পক্ষে এই সমুদয় অনাবশ্যক, কারণ এ সম্বন্ধে প্রবন্ধ ও গ্রন্থগুলি প্রায় সবই ইংরেজী ভাষায় লিখিত।

হিন্দুযুগের বাংলাদেশ সম্বন্ধে যে সমুদয় তথ্য এ যাবৎ আবিষ্কৃত হইয়াছে তাহারই সারমর্ম সংক্ষিপ্ত আকারে বাঙ্গালী পাঠকের নিকট উপস্থিত করিতেছি যাহারা ইংরেজী ইতিহাসখানি পাঠ করিয়াছেন বা করিবেন তাহাদের পক্ষে এই গ্রন্থ সম্পূর্ণ অনাবশ্যক। কিন্তু যাহাদের ঐ গ্রন্থ পাঠের সুযোগ, সুবিধা অথবা সময় নাই, তাহারা ইহা পাঠ করিলে প্রাচীন বাংলার ইতিহাস সম্বন্ধে কতকটা ধারণা করিতে পারিবেন। অবশ্য এই ইতিহাসের অতি সামান্যই আমরা জানি। কিন্তু এই গ্রন্থ পাঠে যদি বাঙ্গালীর মনে দেশের প্রাচীন গৌরব সম্বন্ধে ক্রীণ ধারণাও জন্মে এবং বাঙ্গালী জাতির অতীত ইতিহাস জানিবার জন্ত কৌতুহল ও আগ্রহ বৃদ্ধি পায় তাহা হইলেই আমার শ্রম সার্থক মনে করিব।

৪নং বিপিন পাল রোড,

কলিকাতা।

পৌষ, ১৩৪২

শ্রীরমেশচন্দ্র মজুমদার

# সূচী

ভূমিক:	...	...	...	
প্রথম পরিচ্ছেদ—বাংলা দেশ				
নাম ও সীমা	...	...	...	১
প্রাকৃতিক পরিবর্তন	...	....	...	২
প্রাচীন জনপদ	...	...	...	৫
বঙ্গ	...	...	...	৫
পুণ্ড্র ও বরেন্দ্রী	...	...	...	৬
রাঢ়া	....	....	...	৭
গৌড়	....	....	...	৭
দ্বিতীয় পরিচ্ছেদ—বঙ্গালী জাতি				
বঙ্গালী জাতির উৎপত্তি	....	....	...	৮
আর্য্য প্রভাব	....	...	...	১১
তৃতীয় পরিচ্ছেদ—প্রাচীন ইতিহাস	...	...	...	১৪
চতুর্থ পরিচ্ছেদ—গুপ্ত-যুগ				
গুপ্ত শাসন	...	...	...	১৮
স্বাধীন বঙ্গরাজ্য	...	...	...	২১
গৌড় রাজ্য	...	...	...	২২
শশাঙ্ক	...	...	...	২৩
পঞ্চম পরিচ্ছেদ—অরাজকতা ও মাৎস্যন্যায়				
গৌড়	...	...	...	২৯
বঙ্গ	...	....	...	৩১
ষষ্ঠ পরিচ্ছেদ—পাল সাম্রাজ্য				
গোপাল	....	...	...	৩৩
ধর্ম্মপাল	...	....	...	৩৪
দেবপাল	...	...	....	৪১
সপ্তম পরিচ্ছেদ—পাল সাম্রাজ্যের পতন				৪৭
অষ্টম পরিচ্ছেদ—দ্বিতীয় পাল সাম্রাজ্য				
মহীপাল	....	....	....	৫৫
বৈদেশিক আক্রমণ ও অভ্যর্থিত্রোহ	....	....	....	৫৯

নবম পরিচ্ছেদ—তৃতীয় পাল সাম্রাজ্য

বরেন্দ্র বিদ্রোহ	....	...	....	৬২
রায়পাল	....	....	....	৬৩

দশম পরিচ্ছেদ—পাল রাজ্যের ধ্বংস

৬৯

একাদশ পরিচ্ছেদ—বর্ষ্যরাজবংশ

৭২

দ্বাদশ পরিচ্ছেদ—সেনরাজবংশ

উৎপত্তি	....	...	....	৭৬
বিজয়সেন	...	....	....	৭৮
বল্লালসেন	...	....	....	৮১
লক্ষ্মণসেন	....	....	....	৮৩
তুরস্ক সেনা কর্তৃক গোড় জয়	...	....	....	৮৭
সেন রাজ্যের পতন	...	....	....	৯৩

ত্রয়োদশ পরিচ্ছেদ—পাল ও সেনরাজগণের কাল নির্ণয়

৯৮

চতুর্দশ পরিচ্ছেদ—বাংলার শেষ স্বাধীন রাজ্য

দেববংশ	....	....	....	১০২
পট্টিকেয়া রাজ্য	...	....	....	১০৫

পঞ্চদশ পরিচ্ছেদ—রাজ্য শাসন-পদ্ধতি

প্রাচীন যুগ	....	....	....	১০৬
গুপ্ত সাম্রাজ্য ও অব্যবহিত পরবর্তী যুগ	....	....	....	১০৭
পাল সাম্রাজ্য	....	....	....	১০৯
সেনরাজ্য ও অন্যান্য খণ্ডরাজ্য	...	....	....	১১২

ষোড়শ পরিচ্ছেদ—ভাষা ও সাহিত্য

বাংলা ভাষার উৎপত্তি	....	....	....	১ ৪
পালযুগের পূর্বোক্ত সংস্কৃত সাহিত্য	....	....	...	১১৫
পালযুগে সংস্কৃত সাহিত্য	....	....	....	১১৮
সেনযুগে সংস্কৃত সাহিত্য	....	...	....	১২৫
বাংলা ভাষা ও সাহিত্য "	...	...	....	১২৮
বাংলা লিপি	....	....	....	১৩২

সপ্তদশ পরিচ্ছেদ—ধর্ম

প্রথম খণ্ড—ধর্মমত				
আর্যধর্মের প্রতিষ্ঠা	....	....	....	১৩৪
বৈদিক ধর্ম	....	....	...	১৩৫

পৌরাণিক ধর্ম	....	...	....	১৩৬
বৈষ্ণব ধর্ম	....	...	...	১৩৭
শৈব ধর্ম	....	....	....	১৩৮
অন্যান্য পৌরাণিক ধর্ম সম্প্রদায়	....	...	....	১৩৯
জৈন ধর্ম	....	...	...	১৪০
বৌদ্ধধর্ম	....	...	....	১৪১
সহজিয়া ধর্ম	....	....	....	১৪৪
বাংলার ধর্মমত	....	....	....	১৪৯

### দ্বিতীয় খণ্ড—দেবদেবীর মূর্তি পরিচয়

বিষ্ণু মূর্তি	....	....	....	১৫৩
শৈব মূর্তি	....	....	....	১৫৬
শক্তি মূর্তি	....	....	....	১৫৮
অন্যান্য পৌরাণিক দেবমূর্তি	....	....	....	১৬১
জৈন মূর্তি	....	....	....	১৬২
বৌদ্ধ মূর্তি	....	....	...	১৬৩

### অষ্টাদশ পরিচ্ছেদ—সমাজের কথা

জাতিভেদ	...	...	...	১৬৬
ব্রাহ্মণ	...	...	...	১৭২
করণ-কায়স্থ	...	...	....	১৭৬
অঘষ্ঠ বৈষ্ণ	....	....	....	১৭৭
অগ্র্য জাতি	....	....	....	১৭৮
পূজা-পাক্ষণ এবং আমোদ উৎসব		....	....	১৭৯
বাঙ্গালীর চরিত্র ও জীবনযাত্রা		....	....	১৮২

### উনবিংশ পরিচ্ছেদ—অর্থনৈতিক অবস্থা

কৃষি	....	....	....	১৮৭
শিল্প	....	....	....	১৮৮
বাণিজ্য	....	....	....	১৮৯
প্রাচীন মুদ্রা	....	....	....	১৯০

### বিংশ পরিচ্ছেদ—শিল্পকলা

স্থাপত্য-শিল্প	....	....	....	১৯২
তুপ	....	...	...	১৯৩
বিহার	....	...	...	১৯৫

মন্দির	...	...	...	১৯৬
ভাস্কর্য্য	..	...	...	২০০
প্রাচীন যুগ	....	...	...	২০০
পাহাড়পুর	...	...	...	২০১
পালযুগের শিল্প	...	...	...	২০৫
চিত্র-শিল্প	...	...	...	২১১
বাংলার শিল্পী	...	...	...	২১২
একবিংশ পরিচ্ছেদ—বাংলার বাহিরে বাঙ্গালী				২১৪
দ্বাবিংশ পরিচ্ছেদ—বাংলার ইতিহাস ও বাঙ্গালী জাতি				২২৪
নিবেদনঃ	...	..	...	২৩৬

## রাজা ও রাজবংশের কাল-বিজ্ঞাপক সূচী


খৃষ্টাব্দ ( আনুমানিক )

৪র্থ ও ৫ম শতাব্দী	—গুপ্ত সাম্রাজ্য
৫২৫	—গোপচন্দ্র, স্বাধীন বঙ্গরাজ্যের প্রতিষ্ঠাতা
৫৫০	—ধর্মাদিত্য
৫৭৫	—সম্রাটচরদেব
৬০০—৬৩৮	—শশাঙ্ক
৬৫০—৭০০	—খড়্গা বংশ
৭৫০—১১৬০	—পাল বংশ ( ৯৮ পৃঃ দেখ )
১০৭৫—১১৫০	—বর্ম্ম বংশ
১০৯৫—১১৫০	—সেন বংশ ( ৯৫ ও ১০০ পৃঃ দেখ )
১২০০—১২২৫	—রণবন্ধু মল্ল ত্রিহরিকালদেব
১২২৫—১৩০০	—দেব বংশ





માર્ગદર્શક









# প্রথম পরিচ্ছেদ

## বাংলা দেশ

### ১। নাম ও সীমা

ভারতবর্ষের প্রায় প্রতি প্রদেশেরই সংজ্ঞা ও সীমা কালক্রমে পরিবর্তিত হইয়াছে। শাসন কার্য্যের সুবিধার জন্য এক ইংরেজ আমলেই একাধিকবার বাংলা দেশের বিভিন্ন অংশ বিভিন্ন প্রদেশের অন্তর্ভুক্ত হইয়াছে। বর্তমান কালে যে ভূখণ্ড বাংলা দেশ বলিয়া পরিচিত চল্লিশ বৎসর পূর্বেও তাহার অতিবিক্ত অনেক স্থান এই প্রদেশের অন্তর্ভুক্ত ছিল। আবার তাহার কিছুদিন পরেই বাংলা দেশ দুইভাগে বিভক্ত হইয়া দুইটি বিভিন্ন প্রদেশে পরিণত হয়। সুতরাং এই পরিবর্তনশীল বাজনৈতিক বিভাগের উপর নির্ভর করিয়া কোন প্রদেশের সীমা ও সংজ্ঞা নির্ণয় করা যুক্তিযুক্ত নহে। মোটের উপর যে স্থানের অধিবাসীরা বা তাহার অধিক সংখ্যক লোক সাধারণত বাংলা ভাষায় কথাবার্তা বলে তাহাই বাংলা দেশ বলিয়া গ্রহণ করা সমীচীন। এই সংজ্ঞা অনুসারে বাংলার উত্তর সীমায় হিমালয়ের পাদদেশে অবস্থিত কয়েকটি পার্বত্য জনপদ বাংলার বাহিবে পড়ে। কিন্তু আসামের অন্তর্গত খ্রীহট্ট, কাছাড় ও গোয়ালপাড় এবং বিহারের অন্তর্গত পূর্ণিয়া, মানভূম, সিংহভূম ও সাঁওতাল নবাবাব কতকাংশ বাংলার অংশ বলিয়া গ্রহণ করিতে হয়। প্রাচীন হিন্দু যুগেও এই সমুদয় অঞ্চলে একই ভাষার ব্যবহার ছিল কিনা তাহা সঠিক বলা যায় না। কিন্তু আপাতত আর কোনও নীতি অনুসারে বাংলা দেশের সীমা নির্দেশ করা কঠিন। সুতরাং বর্তমান গ্রন্থে আমরা এই বিস্তৃত ভূখণ্ডকেই বাংলা দেশ বলিয়া গ্রহণ করিব।

প্রাচীন হিন্দু যুগে সমগ্র বাংলা দেশের কোন একটি বিশিষ্ট নাম ছিল না। ইহার ভিন্ন ভিন্ন অঞ্চল ভিন্ন ভিন্ন নামে পরিচিত ছিল। উত্তর বঙ্গে (বর্তমান রাজসাহী বিভাগ) পুণ্ড্র ও বরেন্দ্র (অথবা বরেন্দ্রী), পশ্চিম বঙ্গে (বর্তমান বিভাগ) রাঢ় ও তাম্রলিপ্তি এবং দক্ষিণ ও পূর্ববঙ্গে (প্রেসিডেন্সি, ঢাকা ও চট্টগ্রাম বিভাগ) বঙ্গ, সমতট, হরিকেল, ও বঙ্গাল প্রভৃতি দেশ ছিল। এতদ্বিধা উত্তর ও পশ্চিম বঙ্গের কতকাংশ গোড় নামে সুপরিচিত ছিল। এই

সমুদয় দেশের সীমা ও বিস্তৃতি সঠিক নির্ণয় করা যায় না এবং ভিন্ন ভিন্ন সময়ে তাহার বৃদ্ধি ও হ্রাস হইত।

মুসলমান যুগেই সর্বপ্রথম এই সমুদয় দেশ একত্রে বাংলা অথবা বাঙ্গালা এই নামে পরিচিত হয়। এই বাংলা হইতেই ইউরোপীয়গণের ‘বেঙ্গলা’ (Bengala) ও ‘বেঙ্গল’ (Bengal) নামের উৎপত্তি। মুঘল সাম্রাজ্যের যুগে ‘বাঙ্গালা’ চট্টগ্রাম হইতে গর্হি পর্য্যন্ত বিস্তৃত ছিল। আইন-ই-আকবরী প্রণেতা আবুল ফজল বলেন যে “এই দেশের প্রাচীন নাম ছিল বঙ্গ; প্রাচীনকালে ইহার রাজারা ১০ গজ উচ্চ ও ২০ গজ বিস্তৃত প্রকাণ্ড ‘আল’ নির্মাণ করিতেন—ইহা হইতেই ‘বাঙ্গাল’ এবং ‘বাঙ্গালা’ নামের উৎপত্তি”। এই অনুমান সত্য নহে। প্রাচীনকালে বঙ্গ ও বঙ্গাল দুইটি পৃথক দেশ ছিল এবং অনেকগুলি শিলালিপিতে এই দুইটি দেশের একত্র উল্লেখ দেখিতে পাওয়া যায়। সুতরাং বঙ্গ দেশের নাম হইতে ‘আল’ যোগে অথবা অশ্রু কোন কারণে বঙ্গাল অথবা বাংলা নামের উদ্ভব হইয়াছে ইহা স্বীকার করা যায় না। বঙ্গাল দেশের নাম হইতেই যে কালক্রমে সমগ্রদেশের বাংলা এই নামকরণ হইয়াছে এ বিষয়ে কোন সন্দেহ নাই। প্রাচীন বঙ্গাল দেশের সীমা নির্দেশ করা কঠিন, তবে এককালে দক্ষিণ ও পূর্ববঙ্গের তটভূমি যে ইহার অন্তর্ভুক্ত ছিল সে বিষয়ে সন্দেহ নাই। বর্তমানকালে পূর্ববঙ্গের অধিবাসীগণকে যে বাঙ্গাল নামে অভিহিত করা হয় তাহা সেই প্রাচীন বঙ্গাল দেশের স্মৃতিই বহন করিয়া আসিতেছে।

অপেক্ষাকৃত আধুনিক যুগে গোড় ও বঙ্গ এই দুইটি সমগ্র বাংলা দেশের সাধারণ নাম স্বরূপ ব্যবহৃত হইয়াছে। কিন্তু হিন্দু যুগে ইহার বাংলা দেশের অংশ বিশেষকেই বুঝাইত, সমগ্র দেশের নামস্বরূপ ব্যবহৃত হয় নাই।

## ২। প্রাকৃতিক পরিবর্তন

উত্তরে হিমালয় পর্বত হইতে দক্ষিণে বঙ্গোপসাগর পর্য্যন্ত বিস্তৃত সমতলভূমি লইয়া বাংলাদেশ গঠিত। পূর্বে গারো ও লুসাই পর্বত ও পশ্চিমে রাজমহলের নিকটবর্তী পর্বত ও অল্পচল মালাভূমি পর্য্যন্ত এই সমতলভূমি বিস্তৃত। ক্ষুদ্র ও বৃহৎ বহুসংখ্যক নদনদী এই বিশাল সমতলভূমিকে সূজলাসুফলা-শস্ত্রশ্রামলা করিয়াছে। পশ্চিমে গঙ্গা ও পূর্বে ব্রহ্মপুত্র এবং ইহাদের অসংখ্য শাখা উপশাখা ও উপনদীই বাংলা দেশের প্রাকৃতিক বৈচিত্র্য সম্পাদন ও ইহার বিভিন্ন অংশের সীমা নির্দেশ করিয়াছে। প্রাচীন হিন্দু যুগে এই সমুদয়

নদনদীর গতি ও অবস্থিতি যে অনেকাংশে বিভিন্ন ছিল সে বিষয়ে কোন সন্দেহ নাই। কারণ গত তিন চারি শত বৎসরের মধ্যেই যে এ বিষয়ে গুরুতর পরিবর্তন হইয়াছে বাংলার কয়েকটি বড় বড় নদীর ইতিহাস আলোচনা করিলেই তাহার বিশিষ্ট প্রমাণ পাওয়া যায়।

অনুচ্চ রাজমহল পর্বতের পাদদেশ ধৌত করিয়া গঙ্গানদী বাংলা দেশে প্রবেশ করিয়াছে। পর্বত ও নদীর মধ্যবর্তী এই অতি সংকীর্ণ প্রদেশ পশ্চিম হইতে আগত শত্রুসৈন্য-প্রতিরোধের পক্ষে বিশেষ সুবিধাজনক। এই কারণেই তেলিয়াগড় ও শিকরাগলি গিরিসঙ্কট পশ্চিম বাংলার আত্মরক্ষার প্রথম প্রাকাররূপে চিরদিন গণ্য হইয়াছে এবং ইহার অনতিদূরেই ইতিহাস-প্রসিদ্ধ গোড় (লক্ষ্মণাবতী), পাণ্ডুয়া, তাণ্ডা ও রাজমহল প্রভৃতি নগরের পত্তন হইয়াছে।

ষোড়শ শতাব্দীর পূর্বে রাজমহলের পাহাড় অতিক্রম করার পরে গঙ্গা নদীর স্রোত বর্তমানকালের অপেক্ষা অনেক উত্তর দিয়া প্রবাহিত হইত এবং প্রাচীন গোড় নগর খুব সম্ভবত ইহার দক্ষিণে অবস্থিত ছিল।

বর্তমানকালে প্রাচীন গোড়ের প্রায় ২৫ মাইল দক্ষিণে গঙ্গানদী দুই ভাগে বিভক্ত হইয়াছে। এখন ইহার অধিকাংশ জলরাশিই বিশাল পদ্মানদী দক্ষিণ-পূর্ব দিকে বহন করে। আর যে ভাগীরথী দক্ষিণ দিকে অগ্রসর হইয়া কলিকাতার নিকট দিয়া সমুদ্রে পড়িয়াছে—তাহার উপরিভাগ শুষ্কপ্রায়। কিন্তু প্রাচীন কালে গঙ্গানদীর প্রধান প্রবাহ সোজা দক্ষিণে যাইয়া ত্রিবেণীর নিকটে ভাগীরথী, সরস্বতী ও যমুনা এই তিন ভাগে বিভক্ত হইয়া সাগরে প্রবেশ করিত। ভাগীরথী অপেক্ষা সরস্বতী নদীই প্রথমে বড় ছিল। ইহা সপ্তগ্রামের নিকট দিয়া প্রবাহিত হইয়া তমলুকের (প্রাচীন তাম্রলিপ্ত) নিকট সমুদ্রে মিশিত এবং রূপনারায়ণ, দামোদর ও সাঁওতালপরগণার অনেক ছোট ছোট নদী ইহার সহিত সংযুক্ত হইয়া ইহার স্রোত বৃদ্ধি করিত। এই সরস্বতী নদী ক্ষীণ হওয়ার ফলেই প্রথমে তাম্রলিপ্ত ও পরে সপ্তগ্রাম, এই দুই প্রসিদ্ধ বন্দরের অবনতি হয়। ক্রমে ভাগীরথী সরস্বতীর স্থান অধিকার করে এবং ইহার ফলে প্রথমে জুগলী ও পরে কলিকাতার সমৃদ্ধি বৃদ্ধি হয়। ভাগীরথীরও অনেক পরিবর্তন হইয়াছে। কলিকাতার পরে পশ্চিমে শিবপুর অভিমুখে না গিয়া শত বৎসর পূর্বেও ইহা সোজা দক্ষিণ দিকে কালীঘাট বারুইপুর, মগরা প্রভৃতি স্থানের মধ্য দিয়া প্রবাহিত হইত।

কেহ কেহ অনুমান করেন যে পাঁচ ছয় শত বৎসর পূর্বে পদ্মা নদীর

অস্তিত্বই ছিল না। কিন্তু ইহা সত্য নহে। সহস্রাব্দিক বৎসর পূর্বেও যে পদ্মা নদী ছিল তাহার বিশিষ্ট প্রমাণ আছে। প্রথমে পদ্মা অপেক্ষাকৃত ক্ষুদ্র নদী ছিল। কিন্তু ষোড়শ শতাব্দীর পূর্বেই ইহা বিশাল আকার ধারণ করে। পদ্মানদীর প্রবাহ-পথের বহু পরিবর্তন হইয়াছে এবং তাহার ফলে বহু সমৃদ্ধ জনপদ ও প্রাচীন কীর্ত্তি বিনষ্ট হইয়াছে। সম্ভবত পূর্ব পদ্মা চলনবিলের মধ্য দিয়া বর্তমান ধলেশ্বরী ও বুড়ীগঙ্গার খাত দিয়া প্রবাহিত হইত। বুড়ীগঙ্গা এই নামটি হয়ত সেই যুগের স্মৃতি বহন করিতেছে। অষ্টাদশ শতাব্দীতে পদ্মার নিম্নভাগ বর্তমান কালের অপেক্ষা অনেক দক্ষিণ দিয়া প্রবাহিত হইত এবং ফরিদপুর ও বাখরগঞ্জ জিলার মধ্য দিয়া চাঁদপুরের ২৫ মাইল দক্ষিণে দক্ষিণ-সাবাঙ্গপুরের উপরে মেঘনার সহিত মিলিত হইত। মহারাজ রাজবল্লভের রাজধানী রাজনগর তখন পদ্মার বামতীরে অবস্থিত ছিল। এই নগরীর নিকট দিয়া কালীগঙ্গা নদী পদ্মা হইতে মেঘনা নদী পর্য্যন্ত প্রবাহিত হইত। ঊনবিংশ শতাব্দীর মধ্যভাগে পদ্মার জলশ্রোত এই কালীগঙ্গার খাত দিয়া যাইতে আরম্ভ করে এবং ইহার নাম হয় কীর্ত্তিনাশ। তার পর পদ্মার আরও পরিবর্তন হইয়াছে এবং এখনও হইতেছে।

ব্রহ্মপুত্র নদী পুরাকালে গাড়া পাহাড়ের পাশ দিয়া দক্ষিণ-পূর্ব মুখে ময়মনসিংহ জিলার মধুপুর জঙ্গলের মধ্য দিয়া ঢাকা জিলার পূর্বভাগে সোনারগাঁও নিকট ধলেশ্বরী নদীর সহিত মিলিত হইত। নারায়ণগঞ্জের নিকটবর্ত্তী নাজুল-বন্দে প্রাচীন ব্রহ্মপুত্রের শুষ্কপ্রায় খাতে এখনও প্রাতি বৎসর লক্ষ লক্ষ হিন্দু অষ্টমী স্নানের জন্ত সমবেত হয়। বর্ত্তমানে ব্রহ্মপুত্রের জলপ্রবাহ সোজা দক্ষিণে গিয়া গোয়ালন্দের নিকট পদ্মার সহিত মিলিত হইয়াছে। এই অংশের নাম যমুনা।

তিস্তা ( ত্রিশ্রোতা ) উত্তর বঙ্গের প্রধান নদী। প্রাচীনকালে ইহা জল-পাইগুড়ির নিকট দিয়া দক্ষিণ দিকে তিনটি বিভিন্ন শ্রোতে প্রবাহিত হইত। সম্ভবত এই কারণেই ইহা ত্রিশ্রোতা নামে পরিচিত ছিল। পূর্বে করতোয়া, পশ্চিমে পুনর্ভবা এবং মধ্যে আত্রৈয়ী নদীই এই তিনটি শ্রোত। আত্রৈয়ী নদী চলনবিলের মধ্য দিয়া করতোয়ার সহিত মিলিত হইত। করতোয়া এখন শুষ্কপ্রায় কিন্তু এককালে খুব বড় নদী ছিল এবং ইহার তীরে বাংলার প্রাচীন রাজধানী পুণ্ড্রবর্ধন নগরী অবস্থিত ছিল। করতোয়ার জল পবিত্র বলিয়া গণ্য হইত এবং ‘করতোয়া-মাহাত্ম্য’ গ্রন্থ এই পুণ্য-সলিলা নদীর প্রাচীন প্রসিদ্ধির পরিচায়ক। ১৭৮৭ খৃষ্টাব্দে ভীষণ জলপ্লাবনের ফলে ত্রিশ্রোতার মূল নদী পূর্বখাত পরিত্যাগ করিয়া দক্ষিণ-পূর্বদিকে অগ্রসর হইয়া ব্রহ্মপুত্র নদের সহিত



মিলিত হয়। এইরূপে বর্তমান তিস্তা নদীর সৃষ্টি হয় এবং করতোয়া, পুনর্ভবা ও আত্রৈয়ী ধ্বংসপ্রায় হইয়া ওঠে। প্রাচীন কৌশিকী (বর্তমান কুশী) নদী এককালে দক্ষিণ-পূর্ব মুখে সমস্ত উত্তর বঙ্গের মধ্য দিয়া প্রবাহিত হইয়া ব্রহ্মপুত্র নদে মিলিত হইত। ক্রমে পশ্চিমে সরিতে সরিতে ইহা এখন বাংলা দেশের বাহিরে পূর্ণিয়ার মধ্য দিয়া রাজমহলের উপরে গঙ্গানদীর সহিত মিলিত হইয়াছে।

এই সমুদয় সুপরিচিত দৃষ্টান্ত হইতে দেখা যাইবে যে গত পাঁচ ছয় শত বৎসরের মধ্যে বাংলার নদনদীর স্রোত কত পরিবর্তিত হইয়াছে। ইহার পূর্বে প্রাচীন হিন্দুযুগেও যে অনুরূপ পরিবর্তন হইয়াছে তাহাও সহজেই অনুমান করা যায়। সুতরাং সে যুগে এই সমুদয় নদ নদীর গতি ও প্রবাহ কিরূপ ছিল সে সম্বন্ধে নিশ্চিত করিয়া কিছুই বলা চলে না। হিন্দু যুগের বাংলা দেশের ইতিহাস পাঠকালে একথা সকলকেই মনে রাখিতে হইবে যে কেবল মাত্র বর্তমান কালের নদ নদীর অবস্থানের উপর নির্ভর করিয়া এ বিষয়ে কোন রূপ সিদ্ধান্ত করা যুক্তিযুক্ত হইবে না।

নদনদীর গতি ও প্রবাহ ব্যতীত অন্য প্রকার প্রাকৃতিক পরিবর্তনেরও কিছু কিছু প্রমাণ পাওয়া যায়। সুন্দরবন অঞ্চল যে এককালে সুসমৃদ্ধ জনপদ-পূর্ণ লোকালয় ছিল এরূপ বিশ্বাস করিবার কারণ আছে। ফরিদপুর জিলার অন্তর্গত কোটালিপাড়ার বিল অঞ্চলে যে খৃষ্টীয় ষষ্ঠ শতাব্দীতে প্রসিদ্ধ নগরী দুর্গ ও বন্দর ছিল শিলালিপিতে তাহার প্রমাণ পাওয়া যায়। গঙ্গা পদ্মা ও ব্রহ্মপুত্র নদী উচ্চতর প্রদেশ হইতে মাটি বহন করিয়া দক্ষিণ ও পূর্ববঙ্গের বদ্বীপে যে নূতন ভূমির সৃষ্টি করিয়াছে তাহার ফলেও অনেক গুরুতর প্রাকৃতিক পরিবর্তন হইয়াছে। সুতরাং নদ নদীর ন্যায় বাংলার স্থলভাগও হিন্দু যুগে এখনকার অপেক্ষা অনেকটা ভিন্ন রকমের ছিল।

## ৩। প্রাচীন জনপদ

পূর্বেই বলা হইয়াছে যে হিন্দু যুগে সমগ্র বাংলা দেশের বিশিষ্ট কোনও নাম ছিল না এবং ইহার বিভিন্ন অংশ বিভিন্ন নামে পরিচিত ছিল। ইহার মধ্যে যে কয়টি বিশেষ প্রসিদ্ধি লাভ করিয়াছিল নিম্নে তাহার সংক্ষিপ্ত বিবরণ দিতেছি।

### অসম

এই প্রাচীন জনপদ বর্তমানকালের দক্ষিণ ও পূর্ববঙ্গ লইয়া গঠিত ছিল। সাধারণত পশ্চিমে ভাগীরথী, উত্তরে পদ্মা, পূর্বে ব্রহ্মপুত্র ও দক্ষিণে সমুদ্র ইহার

সীমারেখা ছিল, কিন্তু কোনও কোনও সময় যে ইহা পশ্চিমে কপিশা নদী ও পূর্বে ব্রহ্মপুত্রের পূর্বতীর পর্য্যন্ত বিস্তৃত ছিল তাহার প্রমাণ আছে। শিলালিপিতে ‘বিক্রমপুর’ ও ‘নাব্য’—প্রাচীন বঙ্গের এই দুইটি ভাগের উল্লেখ দেখিতে পাওয়া যায়। বিক্রমপুর এখনও সুপরিচিত। নাব্য সম্ভবত বরিশাল ও ফরিদপুরের জলবহুল নিম্নভূমির নাম ছিল, কারণ এই অঞ্চলে নৌকাই যাতায়াতের প্রধান উপায়।

সমতট ও হরিকেল কখনও সমগ্র বঙ্গ এবং কখনও ইহার অংশ বিশেষের নামস্বরূপ ব্যবহৃত হইত। হেমচন্দ্র তাঁহার অভিধানচিন্তামণি গ্রন্থে বঙ্গ ও হরিকেল একার্থবোধক বলিয়া গ্রহণ করিয়াছেন কিন্তু মঞ্জুশ্রীমূলকল্প নামক বৌদ্ধগ্রন্থে হরিকেল, সমতট ও বঙ্গ ভিন্ন ভিন্ন ভূখণ্ডের নাম। অপর দিকে ছয়েন সাং সমতটের যে বর্ণনা করিয়াছেন তাহাতে ইহাকে বঙ্গদেশের সহিত অভিন্ন বলিয়াই মনে হয়। বঙ্গাল-দেশও বঙ্গের এক অংশেরই নামান্তর। ইহার বিষয় পূর্বেই আলোচিত হইয়াছে। চন্দ্রদ্বীপ বঙ্গের অন্তর্গত আর একটি প্রসিদ্ধ জনপদ। ইহা মধ্যযুগের সুপ্রসিদ্ধ ‘বাকলা’ হইতে অভিন্ন এবং বাখরগঞ্জ জিলায় অবস্থিত ছিল। বৃহৎসংহিতায় উপবঙ্গ নামক জনপদের উল্লেখ আছে। ষোড়শ অথবা সপ্তদশ শতাব্দীতে রচিত দিগ্বিজয়প্রকাশ নামক গ্রন্থে যশোহর ও নিকটবর্তী ‘কানন’ প্রদেশ উপবঙ্গের অন্তর্ভুক্ত বলিয়া বর্ণনা করা হইয়াছে।

### পুণ্ড্র ও বরেন্দ্রী

পুণ্ড্র একটি প্রাচীন জাতির নাম। ইহারা উত্তরবঙ্গে বাস করিত বলিয়া এই অঞ্চল পুণ্ড্রদেশ ও পুণ্ড্রবর্দ্ধন নামে খ্যাত ছিল। এককালে পুণ্ড্রবর্দ্ধন নামক ভুক্তি (দেশের সর্বোচ্চ শাসনবিভাগ) গঙ্গা নদীর পূর্বভাগে স্থিত বর্তমান বাংলা দেশের প্রায় সমস্ত ভূখণ্ডই বুঝাইত—অর্থাৎ রাজসাহী, প্রেসিডেন্সি, ঢাকা ও চট্টগ্রাম, বাংলার এই চারিটি বিভাগ কোন না কোন সময়ে পুণ্ড্রবর্দ্ধন ভুক্তির অন্তর্গত ছিল। পুণ্ড্রদেশের রাজধানীর নামও ছিল পুণ্ড্রবর্দ্ধন। প্রাচীন কালে ইহা একটি প্রসিদ্ধ নগরী ছিল। বগুড়ার সাত মাইল দূরে অবস্থিত মহাস্থানগড়ই প্রাচীন পুণ্ড্রবর্দ্ধন নগরীর ধ্বংসাবশেষ বলিয়া পণ্ডিতেরা অনুমান করেন, কারণ মৌর্য যুগের একখানি শিলালিপিতে এই স্থানটি পুণ্ড্রনগরী বলিয়া উল্লিখিত হইয়াছে।

বরেন্দ্র অথবা বরেন্দ্রী উত্তরবঙ্গের আর একটি সুপ্রসিদ্ধ নাম। বামচরিত কাব্যে বরেন্দ্রীমণ্ডল গঙ্গা ও করতোয়া নদের মধ্যে অবস্থিত বলিয়া বর্ণিত হইয়াছে।

### রাঢ়া

ভাগীরথীর পশ্চিম তীরস্থিত রাঢ় অথবা রাঢ়াদেশ উত্তর ও দক্ষিণরাঢ়া এই দুই ভাগে বিভক্ত ছিল। অজয় নদী এই দুই ভাগের সীমাবেধা ছিল। রাঢ়াভূমি দক্ষিণে দামোদর এবং সম্ভবত রূপনারায়ণ নদী পর্য্যন্ত বিস্তৃত ছিল। কোনও প্রাচীন গ্রন্থে গঙ্গার উত্তর ভাগও রাঢ়াদেশের অন্তর্ভুক্ত বলিয়া বর্ণিত হইয়াছে। কিন্তু সাধারণত রাঢ়াদেশ গঙ্গার দক্ষিণ ও পশ্চিমভাগেই সীমাবদ্ধ ছিল। রাঢ়ার অপর একটি নাম সুন্দা।

রাঢ়ার দক্ষিণে বর্তমান মেদিনীপুর অঞ্চলে তাম্রলিপ্তি ও দণ্ডভুক্তি এই দুইটি দেশ অবস্থিত ছিল। তাম্রলিপ্তি বর্তমান কালের তমলুক এবং দণ্ডভুক্তি সম্ভবত দাঁতন। এই দুইটি ক্ষুদ্র দেশ অনেক সময় বঙ্গ অথবা রাঢ়াব অন্তর্ভুক্ত বলিয়া গণ্য হইত।

### গৌড়

গৌড় নামটি সুপরিচিত হইলেও ইহার অবস্থিতি সম্বন্ধে সঠিক কোন ধারণা করা যায় না। পাবিনি-সূত্রে গৌড়পুরেব এবং কোটিলীয় অর্থশাস্ত্রে গৌড়িক স্বর্ণের উল্লেখ আছে। ইং হইতে গৌড় নামক নগরী অথবা দেশের প্রাচীনত্ব প্রমাণিত হয় কিন্তু বাংলাদেশের কোন অংশ গৌড় নামে অভিহিত হইত তাহার নির্ণয় করা যায় না। খুব সম্ভবত মুর্শিদাবাদ অঞ্চলের একটি ক্ষুদ্র বিভাগ প্রথমে গৌড়-বিষয় ( জিলা ) নামে পরিচিত ছিল। এই বিষয়টির নাম হইতেই গৌড়দেশ এই নামের উৎপত্তি হইয়াছে। শিলালিপির প্রমাণ হইতে অনুমিত হয় যে ষষ্ঠ শতাব্দীতে এই দেশ সমুদ্রের নিকটে ছিল। সপ্তম শতাব্দীতে মুর্শিদাবাদের নিকটবর্তী কর্ণসুবর্ণ গৌড়ের রাজধানী ছিল এবং এই দেশের রাজা শশাঙ্ক বিহার ও উড়িষ্যা জয় করিয়াছিলেন। সম্ভবত এই সময় হইতেই গৌড় নামটি প্রসিদ্ধি লাভ করে। প্রবোধচন্দ্রোদয় নাটকে রাঢ়াপুরী গৌড়ের অন্তর্গত বলিয়া বর্ণিত হইয়াছে। মুসলমান যুগের প্রারম্ভে মালদহ জিলার লক্ষ্মণাবতী গৌড় নামে অভিহিত হইত। বাংলার পরাক্রান্ত পাল ও সেন রাজগণের গৌড়েশ্বর এই উপাধি ছিল। হিন্দুযুগের শেষ আমলে বাংলা

দেশ গোড় ও বঙ্গ প্রধানত এই দুই ভাগে বিভক্ত ছিল। অর্থাৎ প্রাচীন রাঢ় ও বরেন্দ্রী গোড়ের অন্তর্ভুক্ত হইয়া গিয়াছিল। মুসলমান যুগের শেষভাগে গোড়দেশ সমস্ত বাংলাকেই বুঝাইত।

কাশ্মীরের ইতিহাস রাজতরঙ্গিনীতে পঞ্চগোড়ের উল্লেখ পাওয়া যায়। কোন কোন গ্রন্থে বঙ্গদেশীয় গোড়, সারস্বত দেশ (পঞ্জাবের পূর্বভাগ), কাশ্মুকুজ, মিথিলা ও উৎকল—এই পাঁচটি দেশ একত্রে পঞ্চগোড় বলিয়া অভিহিত হইয়াছে। সম্ভবত গোড়েশ্বর ধর্মপালের সাম্রাজ্য হইতেই এই নামের উৎপত্তি।

অষ্টম শতাব্দীতে রচিত অনর্ঘরাজব নাটকে গোড়ের রাজধানী চম্পার উল্লেখ আছে। কেহ কেহ অনুমান করেন যে এই চম্পানগরী বর্ধমানের উত্তর-পশ্চিমে দামোদর নদের তীরে অবস্থিত ছিল। কিন্তু অসম্ভব নহে যে এই চম্পা প্রাচীন অঙ্গদেশের রাজধানী প্রসিদ্ধ চম্পানগরী হইতে অভিন্ন। কারণ একাদশ শতাব্দীর একখানি শিলালিপিতে অঙ্গদেশ গোড়রাজ্যের অন্তর্ভুক্ত বলিয়া উল্লিখিত হইয়াছে।

## দ্বিতীয় পরিচ্ছেদ

### বাসালী জাতি

#### ১। বাঙ্গালী জাতির উৎপত্তি

সর্বপ্রথম কোন সময়ে বাংলাদেশে মানুষের বসতি আরম্ভ হয় তাহা জানিবার কোন উপায় নাই। পৃথিবীর অষ্টাশ্র দেশে আদি যুগের মানব প্রস্তর নির্মিত যে সমুদয় অস্ত্র ব্যবহার করিত তাহাই তাহাদের অস্তিত্বের প্রধান প্রমাণ ও পরিচয়। সাধারণত এই প্রস্তরগুলি দুই শ্রেণীতে বিভক্ত করা হয়। সর্বপ্রাচীন মানুষ প্রথমে যে সমুদয় পাষণ-অস্ত্র ব্যবহার করিত, পরবর্তী যুগে সে সকল পালিস ও স্মৃগঠিত হয়। এই দুই যুগকে প্রত্নপ্রস্তর ও নব্যপ্রস্তর যুগ বলা যায়। নব্যপ্রস্তর যুগে মানুষের সভ্যতা বৃদ্ধির আরও প্রমাণ পাওয়া যায়। তাহারা অগ্নি উৎপাদন করিতে জানিত, মাটি পোড়াইয়া বাসন নির্মাণ করিত এবং রন্ধনপ্রণালীতেও অভ্যস্ত ছিল। এই যুগের

বহুদিন পরে মানুষ ধাতুর আবিষ্কার করে। মানুষ প্রথমে সাধারণত তাম্র নিৰ্ম্মিত অস্ত্রের ব্যবহার করিত বলিয়া এই তৃতীয় যুগকে তাম্রযুগ বলা হয়। ইহার পরবর্ত্তী যুগে লৌহ আবিষ্কৃত হওয়ার ফলে মানুষ ক্রমে উন্নততর সভ্যতার অধিকারী হয়।

বাংলা দেশেও আদিম মানব সভ্যতার এই ক্রমবিবর্তনের প্রমাণ পাওয়া গিয়াছে। কারণ এখানেও—প্রধানত পূর্ব ও পশ্চিম সীমান্ত প্রদেশে—প্রত্ন-ও নব্যপ্রস্তর এবং তাম্রযুগের অস্ত্রশস্ত্র পাওয়া গিয়াছে। বাংলা দেশের মধ্যভাগ অপেক্ষাকৃত পরবর্ত্তী যুগে পলিমাটিতে গঠিত হইয়াছিল। প্রস্তর ও তাম্র যুগে সম্ভবত বাংলার পার্শ্বত্যা সীমান্ত প্রদেশেই প্রথমে মানুষের বসবাস ছিল—ক্রমে তাহারা দেশের সর্বত্র ছড়াইয়া পড়িয়াছে।

বৈদিক ধর্ম্মাবলম্বী আৰ্য্যগণ যখন পঞ্চনদে বসতি স্থাপন করেন তখন ও তাহার বহুদিন পরেও বাংলা দেশের সহিত তাঁহাদের কোন ঘনিষ্ঠ সম্বন্ধ ছিল না। বৈদিক সূক্তে বাংলার কোনও উল্লেখ নাই। ঐতরেয় ব্রাহ্মণে অনার্য্য ও দম্য বলিয়া যে সমুদয় জাতির উল্লেখ আছে তাহার মধ্যে পুণ্ড্র ও নাম দেখিতে পাওয়া যায়। এই পুণ্ড্র জাতি উত্তর বঙ্গে বাস করিত তাহা পূর্বেই বলা হইয়াছে। ঐতরেয় আরণ্যকে বঙ্গদেশের লোকের নিন্দাসূচক উল্লেখ আছে। বৈদিক যুগের শেষভাগে রচিত বৌধায়ন ধর্ম্মসূত্রেও পুণ্ড্র ও বঙ্গদেশ বৈদিক কৃষ্টি ও সভ্যতার বহির্ভূত বলিয়া বর্ণিত হইয়াছে এবং এই দুই দেশে স্বল্পকালের জন্য বাস করিলেও প্রায়শ্চিত্ত করিতে হইবে এইরূপ বিধান আছে।

এই সমুদয় উক্তি হইতে স্পষ্টই প্রমাণিত হইবে যে বাংলার আদিম অধিবাসীগণ আৰ্য্যজাতির বংশসম্মত নহেন। বাংলা ভাষার বিশ্লেষণ করিয়া পণ্ডিতগণ এই সিদ্ধান্তে উপনীত হইয়াছেন যে আৰ্য্যগণ এদেশে আসিবার পূর্বে বিভিন্ন জাতি এদেশে বসবাস করিত। নৃতত্ত্ববিদগণও বর্ত্তমান বাঙ্গালীর দৈহিক গঠন পরীক্ষার ফলে এই সিদ্ধান্তই সমর্থন করিয়াছেন।

কিন্তু বাংলার প্রাচীন অধিবাসী এই সমুদয় অনার্য্যজাতির শ্রেণীবিভাগ ও ইতিহাস সম্বন্ধে সুখীণ একমত নহেন। তাঁহাদের বিভিন্ন মতবাদের বিস্তৃত আলোচনা না করিয়া সংক্ষেপে এ সম্বন্ধে কিছু বলিলেই যথেষ্ট হইবে।

বাংলা দেশে কোল, শবর, পুলিন্দ, হাড়ি, ডোম, চণ্ডাল প্রভৃতি যে সমুদয় অন্ত্যজ জাতি দেখা যায় ইহারাই বাংলার আদিম অধিবাসীগণের বংশধর। ভারতবর্ষের অন্যান্য প্রদেশে এবং বাহিরেও এই জাতীয় লোক দেখিতে পাওয়া

যায়। ভাষার ঐক্য হইতে ইহাদের জাতিসম্বন্ধে সিদ্ধান্ত করা হইয়াছে। এই মানব গোষ্ঠীকে ‘অষ্ট্রো-এশিয়াটিক’ অথবা ‘অষ্ট্রিক’ এই সংজ্ঞা দেওয়া হইয়াছে, কিন্তু কেহ কেহ ইহাদিগকে ‘নিষাদ জাতি’ এই আখ্যা দিয়াছেন। ভারতবর্ষের বাহিরে পূর্ব ও দক্ষিণ এশিয়ায় এই জাতির সংখ্যা এখনও খুব বেশী।

নিষাদ জাতির পরে আরও কয়েকটি জাতি এদেশে আগমন করে। ইহাদের একটির ভাষা ড্রবিড় এবং আর একটির ভাষা ব্রাহ্ম-তিব্বতীয়। ইহাদের সম্বন্ধে বিশেষ কিছুই জানা যায় না।

এই সমুদয় জাতিকে পরাভূত করিয়া বাংলা দেশে যাহারা বাস স্থাপন করেন, এবং যাহাদের বংশধরেরাই প্রধানত বর্তমানে বাংলার ব্রাহ্মণ, বৈষ্ণব কায়স্থ প্রভৃতি সমুদয় বর্ণভুক্ত হিন্দুর পূর্বপুরুষ, তাহারা যে বৈদিক আর্য্যগণ হইতে ভিন্ন জাতীয় ছিলেন এ বিষয়ে পণ্ডিতগণের মধ্যে কোন মতভেদ নাই। রিজলী সাহেবের মতে মোঙ্গোলীয় ও ড্রবিড় জাতির সংমিশ্রণে প্রাচীন বাঙ্গালী জাতির উদ্ভব হইয়াছিল। কিন্তু এই মত পরিত্যক্ত হইয়াছে। কোন কোন মোঙ্গোলীয় পার্শ্বজাতি বাংলার উত্তর ও পূর্ব সীমান্তে বাস স্থাপন করিয়াছে কিন্তু এতদ্ব্যতীত প্রাচীন বাঙ্গালী জাতিতে যে মোঙ্গোলীয় রক্ত নাই ইহা একপ্রকার সর্ববাদীসম্মত। আর ড্রবিড় নামে কোন পৃথক জাতির অস্তিত্বই পণ্ডিতগণ এখন স্বীকার করেন না।

মস্তিষ্কের গঠনপ্রণালী হইতেই নৃতত্ত্ববিদগণ মানুষের জাতি নির্ণয় করিয়া থাকেন। মস্তিষ্কের দৈর্ঘ্য ও প্রস্থের অনুপাত অনুসারে যে সমুদয় শ্রেণী-বিভাগ কল্পিত হইয়াছে তাহার মধ্যে প্রধান দুইটির নাম ‘দীর্ঘ-শির’ (Dolichocephalic) ও ‘প্রশস্ত-শির’ (Brachycephalic)। বৈদিক আর্য্যগণ যে যে প্রদেশে প্রাধান্য স্থাপন করিয়াছিলেন সেখানকার সকল শ্রেণীর হিন্দুগণ ‘দীর্ঘ-শির’। কিন্তু বাংলার সকল শ্রেণীর হিন্দুগণই প্রশস্ত-শির। কেহ কেহ অনুমান করেন যে পামির ও টাকলামাকান অঞ্চলের অধিবাসী হোমো-আলপাইনাস নামে অভিহিত এক জাতীয় লোকই বাঙ্গালীর আদি পুরুষ। ইহাদের ভাষা আর্য্যজাতীয় হইলেও ইহারা বৈদিক ধর্ম্মাবলম্বী আর্য্যগণের হইতে সম্পূর্ণ পৃথক। কিন্তু সকলে এই মত গ্রহণ করেন নাই।

মস্তিষ্কের গঠনপ্রণালী হইতে নৃতত্ত্ববিদগণ সিদ্ধান্ত করিয়াছেন যে বাঙ্গালী একটি স্বতন্ত্র ও বিশিষ্ট জাতি। এমন কি বাংলা দেশের ব্রাহ্মণের সহিত অপর কোন প্রদেশের ব্রাহ্মণের অপেক্ষা বাংলার কায়স্থ, সদেগাপ, কৈবর্ত প্রভৃতির সহিত সম্বন্ধ অনেক বেশী ঘনিষ্ঠ।

বাংলার প্রাচীন নিষাদ জাতি প্রধানত কৃষিকার্য্য দ্বারা জীবনযাপন করিত এবং গ্রামে বাস করিত। তাহারা নব্যপ্রস্তর যুগের লোক হইলেও ক্রমে তাম্র ও লৌহের ব্যবহার শিক্ষা করিয়াছিল। সমতল ভূমিতে এবং পাহাড়ের গায়ে স্তরে স্তরে ধান্য উৎপাদন প্রণালী তাহারাই উদ্ভাবন করে। কলা, নারিকেল, পান, সুপারি, লাউ, বেগুন প্রভৃতি সম্বী এবং সম্ভবত আদা ও হলুদের চাষও তাহারা করিত। তাহারা গরু চরাইত না এবং দুধ পান করিত না, কিন্তু মুরগী পালিত এবং হাতীকে পায় মানাইত। কুড়ি হিসাবে গণনা করা এবং চন্দ্রের ত্রাসবুদ্ধি অনুসারে তিথি দ্বারা দিন রাত্রির মাপ তাহারাই এদেশে প্রচারিত করে।

নিষাদ জাতির পবে ত্রিবিভাষাভাষী ও আক্সপাটন শ্রেণীভুক্ত এক জাতি বাংলা দেশে বাস ও বাঙ্গালী জাতির সৃষ্টি করে। পরবর্ত্তীকালে তাহারা নবাগত আর্য্যগণের সহিত এমন ঘনিষ্ঠভাবে মিশিয়া গিয়াছিল যে তাহাদের পৃথক সন্তা ও সভ্যতা সম্বন্ধে কোন স্পষ্ট ধারণা করা কঠিন। কিন্তু আর্য্য উপনিবেশের পূর্বে ভারতবর্ষের সভ্যতা সম্বন্ধে আলোচনার ফলে এই বাঙ্গালী জাতির সভ্যতা সম্বন্ধে কয়েকটি মোটামুটি সিদ্ধান্ত করা যায়। বর্ত্তমান কালে প্রচলিত হিন্দু ধর্ম্মের কয়েকটি বিশিষ্ট অঙ্গ—যেমন কৰ্ম্ম ও জন্মান্তরবাদ, বৈদিক হোম ও যাগযজ্ঞের বিরোধী পূজাপ্রণালী এবং শিব, শক্তি ও বিষ্ণু প্রভৃতি দেবদেবীর আরাধনা, এবং পুবাণবর্ণিত অনেক কথা ও কাহিনী—তাহাদের মধ্যে প্রচলিত ছিল। লৌকিক ব্রত, আচার, অনুষ্ঠান, বিবাহ-ক্রিয়ায় হলুদ, সিন্দূর প্রভৃতির ব্যবহার, নৌকা নিৰ্ম্মাণ ও অন্যান্য অনেক গ্রাম্য শিল্প, ধৃতি শাড়ী প্রভৃতি বিশিষ্ট পরিচ্ছদ প্রভৃতিও এই যুগের সভ্যতার অঙ্গ বলিয়াই মনে হয়। মোটের উপর আর্য্যজাতির সংস্পর্শে আসিবার পূর্বেই যে বর্ত্তমান বাঙ্গালী জাতির উদ্ভব হইয়াছিল এবং তাহারা একটি উচ্চাঙ্গ ও বিশিষ্ট সভ্যতার অধিকারী ছিল এই সিদ্ধান্ত যুক্তিযুক্ত বলিয়া গ্রহণ করা যায়।

## ২। আর্য্য প্রভাব

বৈদিক যুগের শেষভাগে অথবা তাহার অব্যবহিত পরেই বাংলা দেশে আর্য্য উপনিবেশ ও আর্য্য সভ্যতা বিস্তারের পরিচয় পাওয়া যায়। বৈদিক ধর্ম্মসূত্রে বাংলাদেশ আর্য্যাবর্ত্তের বাহিরে বলিয়া গণ্য হইলেও মানবধর্ম্মশাস্ত্রে ইহা আর্য্যাবর্ত্তের অন্তর্ভুক্ত এবং পুণ্ড্র জাতি পতিত ক্ষত্রিয় বলিয়া বর্ণিত হইয়াছে। মহাভারতে কিন্তু পুণ্ড্র ও বঙ্গ এই উভয় জাতিই ‘সুজাত’ ক্ষত্রিয়

বলিয়া অভিহিত হইয়াছে। জৈন উপাঙ্গ পল্লবণা (প্রজ্ঞাপনা) গ্রন্থে আৰ্য্য জাতির তালিকায় বঙ্গ এবং রাঢ়ের উল্লেখ আছে। মহাভারতের তীর্থযাত্রা অধ্যায়ে করতোয়া নদীর তীর ও গঙ্গা-সাগর সঙ্গম পবিত্র তীর্থক্ষেত্র বলিয়া বর্ণিত হইয়াছে। রামায়ণেও সমৃদ্ধ জনপদগুলির তালিকায় বঙ্গের উল্লেখ আছে।

পুবাণ ও মহাভারতে বর্ণিত আছে যে দীর্ঘতমা নামে এক বৃদ্ধ অন্ধ ঋষি যযাতির বংশজাত পূর্বদেশের রাজা মহাধার্ম্মিক পণ্ডিতপ্রবর সংগ্রামে অজেয় বলির আশ্রয় লাভ করেন এবং তাঁহার অনুরোধে তাঁহার রাণী সুদেষ্কার গর্ভে পাঁচটি পুত্র উৎপাদন করেন। ইহাদের নাম অঙ্গ, কলিঙ্গ, পুণ্ড্র, সূক্ষ্ম ও বঙ্গ। তাঁহাদের বংশধরেরা ও তাঁহাদের বাসস্থানও ঐ ঐ নামে পরিচিত। অঙ্গ বর্তমান ভাগলপুর, এবং কলিঙ্গ উড়িষ্যার দক্ষিণবর্তী ভূভাগ। পুণ্ড্র সূক্ষ্ম ও বঙ্গ যথাক্রমে বাংলার উত্তর, পশ্চিম, এবং দক্ষিণ ও পূর্বভাগ। সুতরাং এই পৌরাণিক কাহিনী মতে উল্লিখিত প্রদেশগুলির অধিবাসীরা এক জাতীয় এবং আৰ্য্য ব্রাহ্মণ ও ক্ষত্রিয়ের মিশ্রণে সমৃদ্ধ। এই কাহিনী ঐতিহাসিক বলিয়া গ্রহণ করা যায় না কিন্তু ইহা মহাভারত ও পুরাণের যুগে বাংলা দেশে আৰ্য্য-জাতির বিশিষ্ট প্রভাব সূচিত করে।

অন্যত্র দেশের স্থায় বাংলা দেশেও উন্নত সভ্য অধিবাসীর সঙ্গে সঙ্গে আদিম অসভ্য জাতিও বাস করিত। মহাভারতে বাংলার সমুদ্রতীরবর্তী লোক-দিগকে ম্লেচ্ছ এবং ভাগবতপুরাণে সূক্ষগণকে পাণ্ডাশয় বলা হইয়াছে। আচার্য্য সূত্র নামক প্রাচীন জৈন গ্রন্থেও পশ্চিম-বঙ্গ-বাসীর বর্বরতা ও নির্ভূরতার উল্লেখ আছে। তখন রাঢ় দেশ বঙ্গভূমি ও সূক্ষভূমি এই দুই ভাগে বিভক্ত ছিল। জৈন তীর্থঙ্কর মহাবীর পথহীন এই দুই প্রদেশে ভ্রমণ করিবার সময় এখানকার লোকেরা তাঁহাকে প্রহার করে এবং তাহাদের 'চু চু' শব্দে উত্তেজিত হইয়া কুকুরগুলিও তাঁহাকে কামড়ায়। জৈন সন্ন্যাসীগণ অতিশয় খারাপ খাচ্ছ খাইয়া কোনমতে বঙ্গভূমিতে বাস করেন। কুকুর চেকাইবার জন্য সর্বদাই তাঁহারা একটি দীর্ঘ দণ্ড সঙ্গে রাখিতেন। জৈন গ্রন্থকার দুঃখ করিয়া লিখিয়াছেন যে রাঢ়দেশে ভ্রমণ অতিশয় কষ্টকর।

আর্য্যগণের উপনিবেশের ফলে আর্য্যগণের ভাষা, ধর্ম্ম, সামাজিক প্রথা ও সভ্যতার অন্ত্রাঙ্গ অঙ্গ বাংলা দেশে দৃঢ়ভাবে প্রতিষ্ঠিত হইল। প্রাচীন অনার্য্যভাষা লুপ্ত হইল, বৈদিক ও পৌরাণিক এবং বৌদ্ধ ও জৈন ধর্ম্ম প্রচারিত হইল, বর্ণাশ্রমের নিয়ম অনুসারে সমাজ গঠিত হইল,—এক কথায় সভ্যতার দিক দিয়াও বাংলা দেশ আর্য্যাবর্তের অংশ রূপে পরিণত হইল। পৃথিবীর ইতিহাসে



দেখা যায় যে যখন কোন প্রবল উন্নত সভ্যজাতি দুর্বল অনুন্নত জাতির সংস্পর্শে আসে তখন এই শেষোক্ত জাতি নিজের সভ্য হারাইয়া একেবারে প্রথমোক্ত জাতির মধ্যে মিশাইয়া যায়। তবে পুরাতন ভাষা, ধর্ম ও আচার অনুষ্ঠান একেবারে বিলুপ্ত হয় না—নূতনের মধ্য দিয়া পরিবর্তিত আকারে আত্ম-প্রকাশ করে। বাংলা দেশেও এই নীতির অন্তর্গত হয় নাই। বাংলার প্রাচীন অনার্য্য জাতি সর্বপ্রকারে আর্য্যসমাজে মিশিয়া গিয়াছে। কিন্তু বাঙ্গালীর ‘খোকা খুকা’ ডাক, বাঙ্গালী মেয়ের শাড়ী-সিন্দূর ও পান-হলুদ ব্যবহার, বাঙ্গালীর কালী-মনসা পূজা ও শিবের গাজন, বাংলার বালাম চাউল প্রভৃতি আজও সেই অনার্য্য যুগের স্মৃতি বহন করিতেছে। ঠিক কোন সময়ে আর্য্য প্রভাব বাংলায় প্রতিষ্ঠিত হইয়াছিল তাহা সঠিক নির্ণয় করা যায় না। তবে অনুমান হয় যে খৃষ্টীয় প্রথম শতাব্দী বা তাহার পূর্বেই সমরাভিযান, বাণিজ্য ও ধর্ম-প্রচার প্রভৃতি উপলক্ষে ক্রমশ বহুসংখ্যক আর্য্য এদেশে আগমন ও বসবাস করিতে আরম্ভ করেন। গুপ্ত সম্রাটগণ এদেশে রাজ্য স্থাপন করার ফলে যে আর্য্যপ্রভাব বাংলায় দৃঢ়ভাবে প্রতিষ্ঠিত হয় সে বিষয়ে কোন সন্দেহ নাই। গুপ্তযুগের অর্থাৎ পঞ্চম ও ষষ্ঠ শতাব্দীর যে কয়খানি তাম্রশাসন ও শিলালিপি পাওয়া গিয়াছে তাহা হইতে বেশ বুঝা যায় যে আর্য্যগণের ধর্ম ও সামাজিক রীতিনীতি এই সময় বাংলায় দৃঢ় প্রতিষ্ঠা লাভ করিয়াছিল। ধর্ম ও সমাজ প্রসঙ্গে পরবর্তী কয়েকটি পরিচ্ছেদে এ বিষয়ে আলোচনা করা যাইবে। কিন্তু এই যুগে আর্য্য প্রভাবের আরও যে কয়েকটি পরিচয় পাওয়া যায় নিম্নে তাহার সংক্ষেপে উল্লেখ করা যাইতেছে।

উপরোক্ত তাম্রশাসন ও শিলালিপিতে সহর ও গ্রামবাসী বহুসংখ্যক বাঙ্গালীর নাম পাওয়া যায়। এই নামগুলিতে সাধারণত কেবলমাত্র একটি শব্দ থাকে—যেমন দুর্লভ, গরুড়, বন্ধুমিত্র, ধৃতিপাল, চিরাতদন্ত প্রভৃতি। এই সমুদয় নামের শেষে চট্ট, বর্ষণ, পাল, মিত্র, দত্ত, নন্দী, দাস, ভদ্র, দেব, সেন, ঘোষ, কুণ্ড প্রভৃতি বর্তমানে বাংলায় ব্যবহৃত অনেক পদবী দেখিতে পাওয়া যায়। কিন্তু এগুলি তখন নামের অংশমাত্র ছিল অথবা বংশানুক্রমিক পদবীরূপে ব্যবহৃত হইত তাহা নির্ণয় করা কঠিন। কিন্তু মোটের উপর এই নামগুলি যে আর্য্য-প্রভাবের পরিচায়ক সে বিষয়ে কোন সন্দেহ নাই।

বাংলার গ্রাম ও নগরীর নামেও যথেষ্ট আর্য্য-প্রভাব দেখিতে পাওয়া যায়। পুণ্ড্রবর্ধন, কোটিবর্ষ, পঞ্চনগরী, চণ্ডগ্রাম, কৰ্ম্মাস্তবাসক, স্বচ্ছন্দপাটক, শীলকুণ্ড, নব্যাবকীশিকা, পলাশবৃন্দক প্রভৃতি বিস্তৃত আর্য্য নাম। অনার্য্য

নামকে সংস্কৃতে রূপান্তরিত করা হইয়াছে এরূপ বহু দৃষ্টান্তও পাওয়া যায়—যথা খাড়াপাড়া, গোষাটপুঞ্জক প্রভৃতি। প্রাচীন অনার্য্য নামেরও অভাব নাই যেমন ডোঙ্গা, কণামোটিকা ইত্যাদি। এই সমুদয় জনপদ-নামের আলোচনা করিলেও স্পষ্ট দেখিতে পাওয়া যায় যে পঞ্চম ও ষষ্ঠ শতাব্দীতে আর্য্য প্রভাব বাঙ্গালার সমাজে বিশেষ প্রভাব বিস্তার করিয়াছিল।

## তৃতীয় পরিচ্ছেদ

### প্রাচীন ইতিহাস

গুপ্তযুগের পূর্বে প্রাচীন বাংলার কোন ধারাবাহিক ইতিহাস পাওয়া যায় না। ভারতীয় ও বিদেশীয় সাহিত্যে ইতস্তত বিক্ষিপ্ত উক্তি হইতে আমরা ইহার সম্বন্ধে কিছু কিছু সংবাদ পাই, কিন্তু কেবলমাত্র এইগুলির সাহায্যে সন তারিখ ও ঘটনা সম্বলিত কোন ইতিহাস রচনা সম্ভবপর নহে।

সিংহলদেশীয় মহাবংশ নামক পালিগ্রন্থে নিম্নলিখিত আখ্যানটি পাওয়া যায়।

বঙ্গদেশের রাজা কলিঙ্গের রাজকন্যাকে বিবাহ করেন। তাঁহাদের কন্যা মগধ যাইবার পথে লাঢ় (রাঢ়) দেশে এক সিংহ কর্তৃক অপহৃত হন এবং ঐ সিংহের গুহায় তাঁহার সৌহবাহু (সিংহবাহু) নামে এক পুত্র ও সৌহসৌবলী নামে এক কন্যা জন্মে। পুত্রকন্যাসহ তিনি পলাইয়া আসিয়া বঙ্গদেশের সেনাপতিকে বিবাহ করেন। কালক্রমে বঙ্গরাজের মৃত্যু হইলে অপুত্রক রাজার মন্ত্রীগণ সৌহবাহুকেই রাজা হইতে অজুরোধ করেন—কিন্তু তিনি তাঁহার মাতার স্বামীকে রাজপদে বরণ করিয়া রাঢ়দেশে গমন করেন। এখানে তিনি সৌহপুর নামক নগর প্রতিষ্ঠা করিয়া রাজ্যস্থাপন করেন এবং সৌহসৌবলীকে বিবাহ করেন। তাঁহার বহু পুত্র জন্মে। তাহাদের মধ্যে জ্যেষ্ঠের নাম ছিল বিজয়।

বিজয় কুসঙ্গীদের সঙ্গে মিশিয়া রাজ্যে নানারকম অত্যাচার করিত। রাজা তাহার চরিত্র সংশোধনের চেষ্টা করিলেন কিন্তু কোন ফল হইল না। অবশেষে বিজয় ও তাহার সাত শত সঙ্গীর মাথা অর্ধেক মুড়াইয়া জীপুত্রসহ

এক জাহাজে চড়াইয়া তিনি তাহাদিগকে সমুদ্রে ভাসাইয়া দিলেন। তাহারা লঙ্কাদ্বীপে পৌঁছিল।

ভগবান বুদ্ধের নির্বাণলাভের অব্যবহিত পূর্বে এই ঘটনা ঘটে। ভবিষ্যতে লঙ্কাদ্বীপে বৌদ্ধ ধর্মের প্রতিষ্ঠার জন্য বুদ্ধের আদেশে শত্রু (ইন্দ্র) বিজয়কে রক্ষা করিবার ভার নিলেন। বিজয় লঙ্কাদ্বীপের যক্ষগণকে পরাস্ত করিয়া রাজ্য প্রতিষ্ঠা করিলেন। তাঁহার মৃত্যুর পর বঙ্গদেশ হইতে তাঁহার ভ্রাতুষ্পুত্র পণ্ডুবাসুদেব লঙ্কার রাজা হন। এইরূপে লঙ্কাদ্বীপে বাঙ্গালী রাজবংশ পুরুষানুক্রমে রাজ্য করে।

এই কাহিনী ঐতিহাসিক বলিয়া গ্রহণ করা যায় না। বুদ্ধের জীবনকালে বাঙ্গালীরা সমুদ্র পার হইয়া সুদূর সিংহল তথা লঙ্কাদ্বীপে উপনিবেশ স্থাপন করিয়াছিল ইহার অন্য কোন প্রমাণ নাই। সুতরাং সহস্র বৎসর পরে রচিত মহাবংশের অলৌকিক ঘটনাপূর্ণ কাহিনী বিশ্বাস করা কঠিন। বঙ্গদেশের সহিত লঙ্কাদ্বীপেব কোন রাজনৈতিক সম্বন্ধ থাকা বিচিত্র নহে। কিন্তু তাহা কবে কি আকারে স্থাপিত হইয়াছিল তাহা সঠিক জানিবার কোন উপায় নাই।

মহাভারতে বাংলাদেশের কয়েকটি রাজ্যের কথা আছে। দ্রৌপদীর স্বয়ংবর সভায় উপস্থিত রাজগণের মধ্যে বঙ্গরাজ সমুদ্রসেনের পুত্র 'প্রতাপবান' চন্দ্রসেন, পৌণ্ড্ররাজ বাসুদেব এবং তাম্রলিপ্তের রাজার উল্লেখ আছে। যুধিষ্ঠিরের রাজসূয় যজ্ঞ অনুষ্ঠানকালে শ্রীকৃষ্ণ তাঁহার মিকট ভারতবর্ষের তদানীন্তন রাজনৈতিক অবস্থা বর্ণনা পক্ষে বলেন যে বঙ্গ, পুণ্ড্র ও কিরাতদেশের অধিপতি পৌণ্ড্রক বাসুদেব বলসমর্থিত ও লোকবিশ্রুত এবং সম্রাট জবাসন্ধের অনুগত। জরাসন্ধের মৃত্যুর পর কর্ণ কলিঙ্গ, অঙ্গ, সুক্ষ, পুণ্ড্র ও বঙ্গদেশ এক যুক্তরাষ্ট্রের অধীনে আনয়ন করেন। ভীমসেন দিগ্বিজয় উপলক্ষে কোশিকী নদের তীরবর্তী প্রদেশের রাজা এবং পৌণ্ড্রক বাসুদেব এই দুই মহাবীরকে পরাজিত করিয়া বঙ্গরাজ সমুদ্রসেন ও চন্দ্রসেনকে পরাভূত করেন এবং সুক্ষ, তাম্রলিপ্তি, ককট প্রভৃতি রাজ্য ও সমুদ্রতীরবর্তী ম্লেচ্ছগণকে জয় করেন। পৌণ্ড্রক বাসুদেব শ্রীকৃষ্ণের হস্তে নিহত হন এবং বঙ্গ ও পুণ্ড্র উভয় দেশই পাণ্ডবগণের অধীনতা স্বীকার করে। কুরুক্ষেত্র যুদ্ধে বঙ্গরাজ দুর্যোধনের পক্ষ অবলম্বন করেন এবং যুদ্ধক্ষেত্রে অতুল সাহস ও পরাক্রমের পরিচয় দেন।

এই সমুদয় আখ্যান হইতে অনুমিত হয় যে মহাভারত রচনার যুগ— এমন কি তাহার পূর্ব হইতেই—বাংলাদেশ অনেকগুলি খণ্ডরাজ্যে বিভক্ত

যুগের ইতিহাস সম্বন্ধে আর কিছুই জানা যায় না। বাংলার এই অন্ধকারময় যুগে বিশাল মৌর্য সাম্রাজ্যের উত্থান ও পতন, গ্রীক শক পহ্লব কুষাণ প্রভৃতি বিদেশী জাতির আক্রমণ, দাক্ষিণাত্যে শাতবাহন রাজ্যের অভ্যুদয় এবং আর্যাবর্তে বহু খণ্ড রাজ্যের উদ্ভব হয়। বাংলা দেশ সম্ভবতঃ মৌর্য রাজ্যের অন্তর্ভুক্ত ছিল এবং হয়ত কুষাণ রাজ্য ও ইহার কিয়দংশ অধিকার করিয়াছিলেন। কিন্তু এ সম্বন্ধে নিশ্চিত কোন সংবাদ জানা যায় না। আলেকজান্ডারের অভিযানের চারি পাঁচশত বৎসর পরে লিখিত পেরিপ্লাস গ্রন্থ ও টলেমীর বিবরণ হইতে আমরা জানিতে পারি যে খৃষ্টীয় প্রথম ও দ্বিতীয় শতাব্দীতে বাংলায় স্বাধীন গঙ্গরিডই রাজ্য বেশ প্রবল ছিল এবং গঙ্গাতীরবর্তী গঙ্গে নামক নগরী ইহার রাজধানী ছিল। এই গঙ্গে নগরী একটি প্রসিদ্ধ বন্দর ছিল, এবং বাংলার সূক্ষ্ম মসলিন কাপড় এখান হইতে সুদূর পশ্চিম দেশে রপ্তানি হইত। এই সংবাদটুকু ছাড়া খৃষ্টজন্মের পূর্বে ও পরের তিন শত—মোট ছয় শত বৎসরের বাংলার ইতিহাস নিবিড় অন্ধকারে সমাচ্ছন্ন। বিদেশীর ঐতিহাসিকগণ যে গঙ্গরিডই জাতির সাম্রাজ্য ও ঐশ্বর্য্যে মুগ্ধ হইয়া তাহাদিগকে ভারতের শ্রেষ্ঠ জাতি বলিয়া গণ্য করিয়াছেন, মহাকবি ভার্জিল যে জাতির শৌর্য্য বীর্য্যের উচ্ছ্বসিত প্রশংসা করিয়াছেন এবং পঞ্চ শতাব্দিক বৎসর যাহারা বাংলা দেশে রাজত্ব করিয়াছেন—এ দেশীয় পুরাণ বা অণু কোন গ্রন্থে সে জাতির কোনই উল্লেখ নাই।

## চতুর্থ পরিচ্ছেদ

### গুপ্ত-যুগ

#### ১। গুপ্ত-শাসন

খৃষ্টীয় চতুর্থ ও পঞ্চম শতাব্দীতে গুপ্তবংশীয় রাজগণ ভারতে বিশাল সাম্রাজ্যের প্রতিষ্ঠা করিয়াছিলেন। এই বংশের আদি পুরুষ ত্রীশুপ্ত খৃষ্টীয় তৃতীয় শতাব্দীর শেষে অথবা চতুর্থ শতাব্দীর প্রারম্ভে কোন ক্ষুদ্র রাজ্যের অধিপতি ছিলেন। তাঁহার পৌত্র প্রথম চন্দ্রগুপ্ত ও প্রপৌত্র সমুদ্রগুপ্ত বহু দেশ জয় করিয়া একটি বিরাট সাম্রাজ্য গঠন করেন। এই সাম্রাজ্য ক্রমে বঙ্গদেশ হইতে কাঠিয়াবার পর্য্যন্ত বিস্তৃত হয়।

আদিম গুপ্তরাজ্য কোথায় অবস্থিত ছিল সে সম্বন্ধে নিশ্চিত কিছু জানা যায় না। অনেক ঐতিহাসিক অনুমান করেন যে শ্রীগুপ্ত মগধে রাজত্ব করিতেন। কিন্তু চীনদেশীয় পরিব্রাজক হুইংসিং লিখিয়াছেন যে মহারাজ শ্রীগুপ্ত চীনদেশীয় শ্রমণদের জন্মভূমিস্থাপন স্তূপের নিকটে একটি মন্দির নির্মাণ করিয়াছিলেন। একখানি বৌদ্ধ গ্রন্থ হইতে জানা যায় যে মৃগস্থাপন স্তূপ বরেন্দ্রে অবস্থিত ছিল। সুতরাং মহারাজ শ্রীগুপ্ত যে বরেন্দ্রে অথবা তাহার সমীপবর্তী প্রদেশে রাজত্ব করিতেন তাহাতে সন্দেহ নাই। কেহ কেহ অনুমান করেন যে হুইংসিং বর্ণিত এই শ্রীগুপ্তই গুপ্তরাজবংশের আদিপুরুষ। হুইংসিং বলেন যে শ্রীগুপ্ত পাঁচশত বৎসর পূর্বে রাজত্ব করিতেন। তাহা হইলে শ্রীগুপ্তের রাজ্যকাল দ্বিতীয় শতাব্দির শেষভাগে পড়ে। কিন্তু হুইংসিং-কথিত পাঁচশত বৎসর মোটামুটি ভাবে ধরিলে তল্লিখিত শ্রীগুপ্তকে গুপ্তরাজগণের আদিপুরুষ বলিয়া গণ্য করা যায় এবং অনেক পণ্ডিতই এই মত গ্রহণ করিয়াছেন। এই মত অনুসারে বঙ্গদেশের এক অংশ আদিম গুপ্তরাজ্যের অন্তর্গত ছিল। কেহ কেহ অনুমান করেন যে গুপ্তগণ বাঙ্গালী ছিলেন এবং প্রথমে বাংলাদেশেই রাজত্ব করিতেন। কিন্তু ইহার সমর্থক কোন প্রমাণ অত্যাধি আবিস্কৃত হয় নাই।

প্রথম চন্দ্রগুপ্ত ও সমুদ্রগুপ্ত যখন বিশাল গুপ্তসাম্রাজ্য প্রতিষ্ঠা করেন তখন বাংলা দেশে কতকগুলি স্বাধীন রাজ্য ছিল। বাঁকুড়ার নিকটবর্তী সুনুনিয়া নামক স্থানে পর্বতগাত্রে ক্ষোদিত একখানি লিপিতে পুষ্করণের অধিপতি সিংহবর্মা ও তাঁহার পুত্র চন্দ্রবর্মার উল্লেখ আছে। সুনুনিয়ার ২৫ মাইল উত্তর-পূর্বে দামোদর নদের দক্ষিণ তটে পোখর্যা নামে একটি গ্রাম আছে। এখানে খুব প্রাচীনকালের মূর্তি ও অগ্ন্যস্ত্র জব্য পাওয়া গিয়াছে। খুব সম্ভবত ইহাই সিংহবর্মা ও চন্দ্রবর্মার প্রাচীন রাজধানী পুষ্করণের ধ্বংসাবশেষ। চন্দ্রবর্মার রাজ্য কতদূর বিস্তৃত ছিল বলা যায় না। ফরিদপুর জেলার অন্তর্গত কোটালিপাড়ায় চন্দ্রবর্মাকোট নামক একটি দুর্গ ছিল। ষষ্ঠ শতাব্দির শিলালিপিতে ইহার উল্লেখ আছে। কেহ কেহ অনুমান করেন যে উল্লিখিত চন্দ্রবর্মার নাম অনুসারেই এই দুর্গের ঐরূপ নামকরণ হইয়াছিল। এই মত অনুসারে চন্দ্রবর্মার রাজ্য বাঁকুড়া হইতে ফরিদপুর পর্য্যন্ত বিস্তৃত ছিল। সমুদ্রগুপ্ত যে সমুদয় রাজ্যকে পরাজিত করিয়া আর্য্যাবর্তে সাম্রাজ্য বিস্তার করেন তাঁহাদের মধ্যে একজনের নাম চন্দ্রবর্মা। খুব সম্ভবত ইনিই পুষ্করণাধিপতি চন্দ্রবর্মা এবং ইহাকে পরাজিত করিয়াই সমুদ্রগুপ্ত পশ্চিম ও দক্ষিণ বাংলা অধিকার করেন। বাংলাদেশের পূর্বভাগ—সমতট—সমুদ্রগুপ্তের অধীনে করদ

রাজ্য ছিল। বাংলাদেশের উত্তর ভাগ সম্ভবত গুপ্তসাম্রাজ্যের অন্তর্ভুক্ত ছিল। কারণ সমুদ্রগুপ্তের শিলালিপিতে কামরূপ (বর্তমান আসাম) গুপ্ত সাম্রাজ্যের সীমান্তস্থিত করদরাজ্যরূপে বর্ণিত হইয়াছে।

প্রাচীন দিল্লীতে কুতবমিনারের নিকটে একটি লৌহস্তম্ভ আছে। এই স্তম্ভগাত্রে ক্ষোদিত লিপি হইতে জানা যায় যে চন্দ্রনামক একজন রাজা বঙ্গের সম্মিলিত রাজশক্তিকে পরাজিত করিয়াছিলেন। এই চন্দ্র কে এবং কোথায় রাজত্ব করিতেন তৎসম্বন্ধে পণ্ডিতগণের মধ্যে মতভেদ আছে। কাহারও কাহারও মতে তিনি গুপ্তসম্রাট প্রথম অথবা দ্বিতীয় চন্দ্রগুপ্ত। প্রথমোক্ত অনুমান স্বীকার করিলে বলিতে হয় যে সমুদ্রগুপ্তের পূর্বেই তাঁহার পিতা বঙ্গদেশ জয় করিয়াছিলেন। দ্বিতীয় অনুমান অনুসারে সমুদ্রগুপ্তের বঙ্গ জয়ের পরেও তাঁহার পুত্রকে আবার বঙ্গদেশ জয় করিতে হইয়াছিল। খুব সম্ভবত উপরোক্ত চন্দ্ররাজ গুপ্তবংশীয় সম্রাট নহেন। এ সম্বন্ধে অগ্র যে সমুদয় মতবাদ প্রচলিত তাহার সবিস্তারে উল্লেখ করার প্রয়োজন নাই। কিন্তু রাজা চন্দ্র যেই হউন দিল্লীর স্তম্ভলিপি হইতে প্রমাণিত হয় যে গুপ্তযুগের প্রাক্কালে বঙ্গে একাধিক স্বাধীন রাজ্য ছিল এবং প্রয়োজন হইলে তাহারা সম্মিলিত হইয়া বিদেশী শত্রুর বিরুদ্ধে যুদ্ধ করিত।

সমতট প্রথমে করদ রাজ্য হইলেও ক্রমে ইহা গুপ্তসাম্রাজ্যের অন্তর্ভুক্ত হইয়া গিয়াছিল। সুতরাং সমস্ত বাংলাদেশই পঞ্চম শতাব্দীতে গুপ্তসাম্রাজ্যের অংশ মাত্র ছিল। উত্তর বঙ্গে এই যুগের কয়েকখানি তাম্রশাসন আবিষ্কৃত হইয়াছে। ইহা হইতে জানা যায় যে পুণ্ড্রবর্ধন-ভুক্তি নামক এই বিভাগ গুপ্তসম্রাট কর্তৃক নিয়োজিত এক শাসনকর্তার অধীনে ছিল। এই ভুক্তি বা বিভাগ কতকগুলি বিষয় বা জেলায় বিভক্ত ছিল। ৫৪৪ খৃষ্টাব্দে সম্রাট (সম্ভবত পরবর্তী গুপ্তবংশীয়) স্বীয় পুত্রকে এই ভুক্তির শাসনকর্তার পদে নিয়োজিত করিয়াছিলেন। ৫০৭ অব্দে পূর্ববঙ্গ অথবা সমতট মহারাজ বৈশ্যগুপ্ত শাসন করিতেন। তাঁহার রাজধানী ছিল ক্রীপুর। তিনি নিজ নামে স্বর্ণমুদ্রা প্রচলিত করিয়াছিলেন এবং মহারাজাধিরাজ উপাধি গ্রহণ করিয়াছিলেন। সুতরাং তিনি আদিতে নামত গুপ্তসম্রাটের শাসনকর্তা হইলেও ক্রমে স্বাধীন রাজ্য স্থাপন করিয়াছিলেন বলিয়াই মনে হয়। দক্ষিণ ও পশ্চিম বঙ্গে গুপ্তরাজগণের শাসন প্রণালী কিরূপ ছিল তাহা জানা যায় না।

## ২। স্বাধীন বঙ্গরাজ্য

অন্তর্বিদ্রোহ ও জগজাতির পুনঃ পুনঃ আক্রমণের ফলে খৃষ্টীয় ষষ্ঠ শতাব্দীর প্রথমার্ধে গুপ্ত সম্রাটগণ হীনবল হইয়া পড়েন। এই সময়ে যশোধর্ম্মণ নামে এক দুর্ধ্ববীর সমগ্র আর্ষ্যাবর্তে আপনার প্রভাব বিস্তার করেন। তিনি পূর্বে ব্রহ্মপুত্র নদ হইতে পশ্চিমে আরবসাগর এবং উত্তরে হিমালয় হইতে দক্ষিণে মহেন্দ্রগিরি ( গঞ্জাম জিলায় অবস্থিত ) পর্য্যন্ত বিস্তৃত রাজ্য জয় করিয়াছিলেন। তাঁহার প্রশস্তিকারের এই উক্তি সত্য বলিয়া গ্রহণ করিলে বাংলা দেশও তাঁহার অধীনস্থ ছিল একথা স্বীকার করিতে হয়। যশোধর্ম্মণের রাজ্য দীর্ঘকাল স্থায়ী না হইলেও ইহার ফলে গুপ্তসাম্রাজ্যের ধ্বংস আরম্ভ হয়। এই সময় এবং সম্ভবত এই সুযোগে দক্ষিণ ও পূর্ববঙ্গ গুপ্ত সম্রাটগণের অধীনতা পাশ ছিন্ন করিতে সমর্থ হয়। কোটালিপাড়ার পাঁচখানি এবং বর্ধমান জিলার অন্তর্গত মল্লসারুলে প্রাপ্ত একখানি তাম্রশাসনে এই স্বাধীন বঙ্গরাজ্যের কিছু কিছু বিবরণ পাওয়া যায়। এই ছয়টি তাম্রশাসনে গোপচন্দ্র, ধর্ম্মাদিত্য ও সমাচারদেব এই তিনজন রাজার নাম পাওয়া যায়। ইহারা সকলেই মহারাজাধিরাজ উপাধি গ্রহণ করিয়াছিলেন। সমাচারদেবের নামাঙ্কিত স্বর্ণমুদ্রাও আবিষ্কৃত হইয়াছে। সুতরাং তাঁহারা যে বেশ শক্তিশালী স্বাধীন রাজা ছিলেন এবিষয়ে কোন সন্দেহ নাই। সমগ্র দক্ষিণ ও পশ্চিমবঙ্গের অন্তত কতকাংশ এই স্বাধীন বঙ্গরাজ্যের অন্তর্ভুক্ত ছিল, এবং সম্ভবত পূর্ববঙ্গেও ইহা বিস্তৃত হইয়াছিল।

এই যুগের কতকগুলি স্বর্ণমুদ্রা বাংলাদেশের নানাস্থানে আবিষ্কৃত হইয়াছে। সম্ভবত পূর্বাঞ্চল স্বাধীন বঙ্গদেশের রাজগণই এগুলি প্রচলিত করিয়াছিলেন। এই সমুদয় মুদ্রায় যে সকল রাজার নাম আছে তাহার মধ্যে মাত্র দুইটি অনেকটা নিশ্চিতরূপে পড়া যায়। একটি পৃথুবীর অপরটি ক্রীশ্নধর্ম্মাদিত্য।

এই সমুদয় রাজাই এক বংশীয় কিনা তাহা বলা কঠিন। যে সমুদয় রাজার নাম পাওয়া গিয়াছে তাহার মধ্যে গোপচন্দ্রই সর্বপ্রাচীন ছিলেন বলিয়া মনে হয়। তিনি অন্তত ১৮ বৎসর রাজত্ব করেন। তাঁহার পর ধর্ম্মাদিত্য ও সমাচারদেব যথাক্রমে অন্তত ৩ ও ১৪ বৎসর রাজত্ব করেন। সম্ভবত এই তিনজন রাজা খৃষ্টীয় ৫২৫ হইতে ৫৭৫ অব্দের মধ্যে রাজত্ব করেন। ছাংখের বিষয় এই রাজাদের সম্বন্ধে বিশেষ কোন বিবরণই জানা যায় না। এমন কি তাঁহাদের পরম্পরের মধ্যে কি সম্বন্ধ ছিল তাহাও নির্ণয় করিবার উপায়

নাই। তবে তাঁহাদের তান্ত্রশাসনগুলি পড়িলে মনে হয় যে তাঁহাদের অধীনে স্বাধীন বঙ্গরাজ্য প্রভাব প্রতিপত্তি ও সমৃদ্ধিশালী ছিল।

কোন সময়ে কি ভাবে এই স্বাধীন বঙ্গরাজ্যের অবসান হয় তাহা বলা যায় না। দাক্ষিণাত্যের চালুক্যরাজ কীর্ত্তিবর্ধন ষষ্ঠ শতাব্দীর শেষপাদে অঙ্গ, বঙ্গ, কলিঙ্গ ও মগধ জয় করেন বলিয়া তাঁহার প্রশস্তিকারেরা উল্লেখ করিয়াছেন। চালুক্যরাজ্যের এই বিজয়াভিযান বঙ্গ রাজ্যের পতনের অশ্রুতম কারণ বলিয়া ধরা যাইতে পারে। খুব সম্ভবত স্বাধীন গোড়রাজ্যের অভ্যাদয়ই ইহার প্রধান কারণ।

### ৩। গোড় রাজ্য


গুপ্তসাম্রাজ্যের পতনের পর পরবর্ত্তী গুপ্তবংশ নামে অভিহিত আর এক বংশের গুপ্ত উপাধিধারী রাজগণ এই সাম্রাজ্যের এক অংশ অধিকার করিয়াছিলেন। খৃষ্টীয় ষষ্ঠ শতাব্দীর শেষ ভাগে উত্তরবঙ্গ ও পশ্চিমবঙ্গের কতকাংশ এই রাজবংশের অধীন ছিল। এই সময়ে বাংলাদেশের এই অঞ্চল গোড় নামে প্রসিদ্ধ হয়। নামত গুপ্তরাজগণের অধীন হইলেও ষষ্ঠ শতাব্দীর মধ্যভাগে গোড় একটি বিশিষ্ট জনপদ বলিয়া পরিচিত ছিল। তখন মৌখরিরাজ বংশ বর্ত্তমান যুক্তপ্রদেশে রাজত্ব করিতেন। এই বংশের পরাক্রান্ত রাজা ঈশানবর্ষ্মা সম্বন্ধে তাঁহার একখানি শিলালিপিতে উক্ত হইয়াছে যে তিনি গোড়-গণকে পরাজিত ও বিপর্য্যস্ত করিয়া তাহাদিগকে সমুদ্রতীরে আশ্রয় লইতে বাধ্য করেন। সমুদ্রতীরের উল্লেখ হইতে অনুমান করা যাইতে পারে যে তখন সমগ্র পশ্চিমবঙ্গ গোড়ের অন্তর্গত ছিল।

মৌখরি ও পরবর্ত্তী গুপ্তবংশীয় রাজগণের মধ্যে পুরুষানুক্রমিক বিবাদ চলিতেছিল। ঈশানবর্ষ্মা কর্ত্তক গোড় বিজয় এই বিবাদের ইতিহাসে একটি ক্ষুদ্র অধ্যায় মাত্র। গুপ্তরাজগণের শিলালিপি অনুসারে গুপ্তরাজ কুমারগুপ্ত ঈশানবর্ষ্মাকে পরাজিত করেন এবং কুমারগুপ্তের পুত্র দামোদরগুপ্ত মৌখরিদের সহিত যুদ্ধে জয়লাভ করেন। ঈশানবর্ষ্মার পরবর্ত্তী মৌখরিরাজ শর্কবর্ষ্মা ও অবন্তিবর্ষ্মা সম্ভবত মগধের কয়দংশ অধিকার করেন। কেহ কেহ অনুমান করেন যে ইহার ফলে গুপ্তরাজগণ মগধ পরিত্যাগ করিয়া মালবে রাজত্ব করেন। কিন্তু ইহা সত্য হউক বা না হউক ষষ্ঠ শতাব্দীর শেষভাগে গুপ্তরাজ মহাসেনগুপ্ত পুনরায় মগধ অধিকার করিয়া ব্রহ্মপুত্র নদ পর্য্যন্ত রাজ্য জয় করেন।

অর্দ্ধশতাব্দীব্যাপী এই সংঘর্ষের ফলে এবং উত্তর হইতে তিব্বতীয়দের







# বাংলাদেশ

আটলান্টিক

আফ্রিকা

স্কেল

০ ৩২ ৬৪ ৯৬



এবং দক্ষিণ হইতে চালুক্যরাজের আক্রমণে সম্ভবত গুপ্তরাজগণ হীনবল হইয়া পড়েন এবং এই সুযোগে গৌড়দেশে শশাঙ্ক এক স্বাধীন রাজ্যের প্রতিষ্ঠা করেন।

### ৪। শশাঙ্ক

বঙ্গালী রাজগণের মধ্যে শশাঙ্কই প্রথম সার্বভৌম নরপতি। তাঁহার বংশ বা বাল্যজীবন সম্বন্ধে সঠিক কিছুই জানা যায় না। কেহ কেহ মতপ্রকাশ করিয়াছেন যে শশাঙ্কের অপর নাম নরেন্দ্র গুপ্ত এবং তিনি গুপ্তরাজবংশে জন্মগ্রহণ করেন। কিন্তু এই মতটি সম্পূর্ণ ভিত্তিহীন বলিয়াই মনে হয়। প্রাচীন রোহিতাশ্ব (রোটাঙ্গড়) গিরিগাত্রে ক্ষোদিত একটি শিলালিপিতে “শ্রীমহাসামন্ত শশাঙ্ক” এই পদটি পাওয়া যায়। যদি এই শশাঙ্ক ও গৌড়রাজ শশাঙ্ককে অভিন্ন বলিয়া গ্রহণ করা যায় তাহা হইলে স্বীকার করিতে হয় যে শশাঙ্ক প্রথমে একজন সহাসামন্ত মাত্র ছিলেন। কেহ কেহ অনুমান করেন যে শশাঙ্ক মোখরিরাজ্যের অধীনস্থ সামন্তরাজ ছিলেন। কিন্তু পূর্বেই বলা হইয়াছে যে ষষ্ঠ শতাব্দীর শেষভাগে গুপ্তরাজ মহাসেনগুপ্ত মগধ ও গৌড়ের অধিপতি ছিলেন। সুতরাং শশাঙ্ক এই মহাসেনগুপ্তের অধীনে মহাসামন্ত ছিলেন এই মতই অধিকতর যুক্তিযুক্ত।

৬০৬ অব্দের পূর্বেই শশাঙ্ক গৌড়ে একটি স্বাধীন রাজ্য প্রতিষ্ঠা করিয়াছিলেন। তাঁহার রাজধানী কর্ণসুবর্ণ খুব সম্ভবত মুর্শিদাবাদ জেলায় বহরমপুরের ছয় মাইল দক্ষিণ-পশ্চিমে রাজামাটি নামক স্থানে অবস্থিত ছিল। শশাঙ্ক দক্ষিণে দণ্ডভুক্তি (মেদিনীপুর জেলা), উৎকল, ও গঞ্জাম জেলায় অবস্থিত কোন্ডোদ রাজ্য জয় করেন। উৎকল ও দণ্ডভুক্তি তাঁহার রাজ্যের অন্তর্ভুক্ত ছিল। শৈলোদ্ভব বংশীয় রাজগণ তাঁহার অধীনস্থ সামন্তরূপে কোন্ডোদ শাসন করিতেন। পশ্চিমে মগধ রাজ্যও শশাঙ্ক জয় করেন। যে স্বাধীন বঙ্গরাজ্যের কথা পূর্বে উল্লিখিত হইয়াছে সম্ভবত তাহাও শশাঙ্কের অধীনতা স্বীকার করে। কিন্তু এসম্বন্ধে সঠিক কিছু বলা যায় না।

শশাঙ্কের পূর্বে আর কোনও বঙ্গালী রাজা এইরূপ বিস্তৃত সাম্রাজ্য প্রতিষ্ঠা করিয়াছিলেন বলিয়া জানা নাই। কিন্তু শশাঙ্ক ইহাতেই সন্তুষ্ট হন নাই। তিনি গৌড়ের চিরশত্রু মোখরিদিগকে দমন করিতে কৃতসংকল্প হইলেন।

মোখরিরাজ গ্রহবর্মা পরাক্রান্ত স্বাধীশ্বর (থানেশ্বর)-রাজ প্রভাকর-

বর্দ্ধনের কথা রাজ্যশ্রীকে বিবাহ করিয়াছিলেন। কামরূপরাজ ভাস্করবর্মাও শশাঙ্কের ভয়ে থানেশ্বররাজের সহিত মিত্রতা স্থাপন করেন। শশাঙ্কও এই সম্মিলিত শক্তির বিরুদ্ধে সাহায্যের জন্য মালবরাজ দেবগুপ্তের সহিত সন্ধি-সূত্রে আবদ্ধ হন।

কি সূত্রে এই দুই দলের মধ্যে যুদ্ধ উপস্থিত হয় এবং তাহার প্রথম ভাগের বিবরণ নিশ্চিত জানা যায় না। শশাঙ্ক সম্ভবত প্রথমে বারাণসী অধিকার করিয়া পশ্চিম দিকে অগ্রসর হন এবং দেবগুপ্তও মালব হইতে সসৈন্যে কান্যকুব্জ (কনৌজ) যাত্রা করেন। ইহার পরবর্ত্তী ঘটনা সম্বন্ধে সমসাময়িক ‘হর্ষচরিত’ গ্রন্থে নিম্নলিখিত বিবরণ পাওয়া যায়।

‘থানেশ্বররাজ প্রভাকরবর্দ্ধনের মৃত্যুর পর তাঁহার জ্যেষ্ঠপুত্র রাজ্যবর্দ্ধন সিংহাসনে আরোহণ করিলেন। এমন সময় কান্যকুব্জ হইতে দূত আসিয়া সংবাদ দিল যে মালবের রাজা কান্যকুব্জরাজ গ্রহবর্মাণকে যুদ্ধে পরাস্ত ও নিহত করিয়া রাণী রাজ্যশ্রীকে কারারুদ্ধ করিয়াছেন এবং থানেশ্বর আক্রমণের উদ্যোগ করিতেছেন। এই নিদারুণ সংবাদ শুনিয়া রাজ্যবর্দ্ধন কনিষ্ঠ ভ্রাতা হর্ষবর্দ্ধনের উপর রাজ্যভার স্থান্ত করিয়া অবিলম্বে দশ সহস্র অশ্বরোহী সৈন্য মাত্র লইয়া ভগিনীর উদ্ধারের নিমিত্ত অগ্রসর হইলেন। পথে মালবরাজের সহিত তাঁহার সাক্ষাৎ হয়। তিনি মালবরাজকে পরাজিত করিয়া তাঁহার বহুসৈন্য বন্দী করিয়া থানেশ্বরে প্রেরণ করিলেন। কিন্তু কান্যকুব্জে পৌঁছিবার পূর্বেই শশাঙ্কের হস্তে তাঁহার মৃত্যু হয়।’

হর্ষ-চরিতের বিভিন্নস্থানে এই ঘটনার যেরূপ উল্লেখ আছে তাহাতে মনে হয় যে দেবগুপ্ত কান্যকুব্জ জয় করিয়াই শশাঙ্কের জন্য অপেক্ষা না করিয়া থানেশ্বরের বিরুদ্ধে যুদ্ধযাত্রা করেন। শশাঙ্ক কান্যকুব্জে পৌঁছিয়া এই সংবাদ শুনিয়া দেবগুপ্তের সাহায্যে অগ্রসর হন। কিন্তু দেবগুপ্তের সহিত মিলিত হইবার পূর্বেই রাজ্যবর্দ্ধন তাঁহাকে পরাস্ত ও নিহত করেন। দেবগুপ্তের শ্রায় রাজ্যবর্দ্ধনও জয়োল্লাসে সমূহ-বিপদের আশঙ্কা না করিয়া নিজের ক্ষুদ্র সৈন্যের কতক বন্দী মালবসৈন্যের সঙ্গে থানেশ্বরে প্রেরণ করেন এবং অবশিষ্ট সৈন্য লইয়া কান্যকুব্জের দিকে অগ্রসর হন। সম্ভবত পথে শশাঙ্কের সঙ্গে তাঁহার যুদ্ধ হয় এবং তিনি পরাস্ত ও নিহত হন।

শশাঙ্ক কর্তৃক রাজ্যবর্দ্ধনের হত্যার কথা আমরা তিনটি বিভিন্ন সূত্রে জানিতে পারি। হর্ষবর্দ্ধনের সভাকবি বাণ-ভট্টের ‘হর্ষচরিত’ গ্রন্থ, হর্ষবর্দ্ধনের পরম সুহৃদ চানদেশীয় পরিত্রাজক জয়নসিংহের কাহিনী, এবং হর্ষবর্দ্ধনের

শিলালিপি। বাণভট্ট লিখিয়াছেন যে মিথ্যা উপচারে আশ্বস্ত হইয়া রাজ্যবর্দ্ধন একাকী নিরস্ত্র শশাঙ্কের ভবনে গমন করেন এবং তৎকর্তৃক নিহত হন। রাজ্যবর্দ্ধন কেন এইরূপ অসহায় অবস্থায় শত্রুর হাতে আত্মসমর্পণ করিলেন বাণভট্ট সে সম্বন্ধে একেবারে নীরব। হর্ষচরিতের টীকাকার শঙ্কর লিখিয়াছেন যে শশাঙ্ক তাঁহার কন্যার সহিত বিবাহের প্রলোভন দেখাইয়া রাজ্যবর্দ্ধনকে স্বীয় ভবনে আনয়ন করেন এবং রাজ্যবর্দ্ধন তাঁহার সঙ্গীগণসহ আহারে প্রবৃত্ত হইলে ছদ্মবেশে তাঁহাকে হত্যা করেন। যে ঘটনা বাণভট্ট উল্লেখ করেন নাই সাত আট শত বৎসর পরে শঙ্কর কিরূপে তাহার সন্ধান পাইলেন জানি না। কিন্তু তাঁহার বর্ণনার সহিত বাণভট্ট কথিত ‘নিরস্ত্র একাকী’ রাজ্যবর্দ্ধনের মৃত্যুর কাহিনীর সামঞ্জস্য নাই।

হুয়েনসাং বলেন যে শশাঙ্ক পুনঃপুনঃ তাহার মন্ত্রীগণকে বলিতেন যে সীমাস্তরাজ্যে রাজ্যবর্দ্ধনের ন্যায় ধার্মিক রাজা থাকিলে নিজ রাজ্যের কল্যাণ নাই। এই কথা শুনিয়া শশাঙ্কের মন্ত্রীগণ রাজ্যবর্দ্ধনকে একটি সভায় আমন্ত্রণ করিয়া তাঁহাকে হত্যা করে। হুয়েনসাংয়ের এই উক্তি কোনমতেই বিশ্বাসযোগ্য নহে। কারণ রাজ্যবর্দ্ধন সিংহাসনে আরোহণ করিয়াই যুদ্ধযাত্রা করেন। তিনি ধার্মিক বা অধার্মিক বিচার করিবার এবং এ বিষয়ে পুনঃপুনঃ মন্ত্রীগণকে বলিবার সুযোগ বা সম্ভাবনা শশাঙ্কের ছিল না। অতএব হুয়েনসাং লিখিয়াছেন “রাজ্যবর্দ্ধনের মন্ত্রীগণের দোষেই রাজ্যবর্দ্ধন শত্রুহস্তে নিহত হইয়াছেন—মন্ত্রীরাই ইহার জন্ত দায়ী”। বাণভট্ট-কথিত ‘মিথ্যা উপচারে আশ্বস্ত রাজ্যবর্দ্ধনের একাকী নিরস্ত্র শশাঙ্ক ভবনে গমনেন’ সহিত ইহার সঙ্গতি নাই।

হয়বর্দ্ধনের শিলালিপিতে উক্ত হইয়াছে যে সত্যানুরোধে রাজ্যবর্দ্ধন শত্রুভবনে প্রাণত্যাগ করিয়াছিলেন। এখানে শশাঙ্কের বিশ্বাসঘাতকতার কোন ইঙ্গিতই নাই।

তিনটি সমসাময়িক বিবরণে একই ঘটনা সম্বন্ধে এই প্রকার বিভিন্নতা দেখিলে স্বতই তাহার সত্যতা সম্বন্ধে সন্দেহ জন্মে। তারপর ইহাও উল্লেখযোগ্য যে বাণভট্ট ও হুয়েনসাং উভয়েই শশাঙ্কের পরম বিদ্রোহী এবং তাঁহাদের গ্রন্থের নানা স্থানে শশাঙ্ক সম্বন্ধে অশিষ্ট উক্তি ও অলীক কাহিনীতে এই ~~বিশ্বাসঘাতকতা~~ প্রকটিত হইয়াছে। সুতরাং কেবলমাত্র এই দুইজনের উক্তির উপর নির্ভর করিয়া শশাঙ্ক বিশ্বাসঘাতকতা করিয়া রাজ্যবর্দ্ধনকে হত্যা করিয়াছিলেন এই মত গ্রহণ করা সমীচীন নহে। যুদ্ধে নিহত দুই পক্ষের

পরস্পরের প্রতি অভিযোগ প্রায়শই কত অমূলক বর্তমান যুদ্ধে তাহার বহু প্রমাণ পাওয়া গিয়াছে। এই প্রসঙ্গে শিবাজী কর্তৃক আফজলখানের হত্যার কাহিনী উল্লেখযোগ্য। মহারাষ্ট্র গ্রন্থমতে আফজলখানই বিশ্বাসঘাতক আব্বার মুশলমান ঐতিহাসিকেরা শিবাজী সম্বন্ধে ঐ অপবাদ ঘোষণা করেন। শশাঙ্ক সম্বন্ধে গোড় দেশীয় কোন লেখকের গ্রন্থ থাকিলে তাহাতে সম্ভবত রাজ্যবর্দ্ধানুর হত্যার সম্পূর্ণ বিভিন্নরকম বিবরণই পাওয়া যাইত।

এই প্রসঙ্গে রোম সম্রাট ভ্যালেরিয়ানের উল্লেখ করা যাইতে পারে। কাহারও মতে ভ্যালেরিয়ান যখন পারস্যের রাজার সহিত সন্ধির কথাবার্তা চালাইতেছিলেন তখন পারস্যের রাজা তাঁহাকে আমন্ত্রণ করেন এবং সাক্ষাৎ হইলে বন্দী করেন। অপর মত অনুসারে ভ্যালেরিয়ান অল্প সৈন্য লইয়া যুদ্ধে প্রবৃত্ত হইয়াছিলেন এবং পারস্যরাজের হস্তে পরাজিত ও বন্দী হইয়াছিলেন। কেহ কেহ বলেন যে এক অবরুদ্ধ দুর্গে স্বীয় বিজোহী সৈন্যের হস্ত হইতে আত্মরক্ষার জন্ত তিনি পলাইয়া পারস্যরাজের নিকট আত্মসমর্পণ করেন। অসম্ভব নহে যে অনুরূপ কোন কারণেই রাজ্যবর্দ্ধন শশাঙ্কের বন্দী হইয়াছিলেন। বাণভট্ট নিজেই বলিয়াছেন যে মাত্র দশ সহস্র সৈন্য লইয়া তিনি মালবরাজের বিরুদ্ধে যুদ্ধযাত্রা করিয়াছিলেন। ইহার মধ্যে কতক মালবরাজের সহিত যুদ্ধে হতাহত হইয়াছিল এবং কতক বন্দী মালব সৈন্যসহ কান্ধকুজে প্রেরিত হইয়াছিল। শশাঙ্ক যে দশ সহস্রের অনধিক সৈন্য লইয়া সুদূর কান্ধকুজে যুদ্ধযাত্রা করিয়াছিলেন ইহা সম্ভবপর নহে। সুতরাং রাজ্যবর্দ্ধন যুদ্ধে পরাস্ত হইয়াছিলেন এইরূপ অনুমান করা অসঙ্গত নহে। অপর পক্ষে রাজ্যবর্দ্ধন বৌদ্ধ ছিলেন। পরবর্ত্তীকালে হর্ষবর্দ্ধনের বৌদ্ধধর্মের প্রতি অনুরাগের জন্ত তাঁহার প্রজাগণ তাঁহার প্রাণনাশের জন্ত বড়যন্ত্র করিয়াছিল। সুতরাং রাজ্যবর্দ্ধনের মন্ত্রীগণও যে কৌশলে তাঁহার হত্যাসাধনের সহায়তা করিবেন ইহা একেবারে অবিশ্বাস্য নহে। রাজ্যবর্দ্ধনের মৃত্যুর জন্ত তাঁহার মন্ত্রীগণই দায়ী ছয়েনসাংয়ের এই উক্তি এই অনুমানের পরিপোষক। যুদ্ধে পরাজয় অথবা মন্ত্রীগণের বিশ্বাসঘাতকতার ফলে যদি রাজ্যবর্দ্ধন নিহত হইয়া থাকেন তবে হর্ষবর্দ্ধনের পক্ষীয় লেখক যে এই কলঙ্কের উল্লেখ করিবেন না ইহাই খুব স্বাভাবিক। সুতরাং কেবলমাত্র বাণভট্ট ও ছয়েনসাংয়ের পরস্পর বিরোধী, অস্বাভাবিক অস্পষ্ট উক্তি এবং অসম্পূর্ণ কাহিনীর উপর নির্ভর করিয়া ঋণাত্মক বিশ্বাসঘাতক হত্যাকারীরূপে গ্রহণ করা কোন ক্রমেই যুক্তিসিদ্ধ নহে।

বাণভট্ট বলেন যে রাজ্যবর্দ্ধনের হত্যার সংবাদ শুনিয়া হর্ষবর্দ্ধন শপথ

করিলেন যে যদি নির্দিষ্ট দিনের মধ্যে তিনি পৃথিবী গোড়শূন্য করিতে না পারেন তবে তিনি অগ্নিতে ঝাঁপ দিয়া প্রাণত্যাগ করিবেন। অতঃপর গোড়রাজের বিরুদ্ধে বিপুল সমর-সজ্জা হইল। হর্ষ সসৈন্যে অগ্রসর হইয়া পৃথিবীতে গুলিলেন যে তাঁহার ভগ্নী রাজ্যশ্রী কারাগার হইতে পলাইয়া বিদ্যাপূর্ব্বতে প্রস্থান করিয়াছেন। সুতরাং সেনাপতি ভগ্নীকে সসৈন্যে অগ্রসর হইতে আদেশ দিয়া তিনি নিজে ভগ্নীর সন্ধানে বিদ্যাপূর্ব্বতে গমন করিলেন। সেখানে রাজ্যশ্রীকে উদ্ধার করিয়া তিনি গঙ্গাতীরে স্বীয় সৈন্যের সহিত মিলিত হইলেন।

বাণভট্টের গ্রন্থ এখানেই শেষ হইয়াছে। শশাঙ্কের সহিত হর্ষের যুদ্ধের কথা বাণভট্ট কিছুই বলেন নাই। কিন্তু জয়নামাং লিখিয়াছেন যে হর্ষ ছয় বৎসর যাবৎ অনববত যুদ্ধ করিয়া সমগ্র ভারতবর্ষ জয় করিয়াছিলেন। এই উক্তি সম্পূর্ণ ভিত্তিহীন। হর্ষবর্দ্ধন দাক্ষিণাত্যের রাজা পুলকেশীর হস্তে পরাজিত হইয়াছিলেন। আখ্যায়িকায় অস্তুত ৬১৯ খৃঃ অব্দ পর্য্যন্ত শশাঙ্ক একজন শক্তিশালী রাজা ছিলেন। কারণ ঐ বৎসরে উৎকীর্ণ একখানি তাম্রশাসনে গঙ্গাম জিলাস্থিত কোজ্জোদের শৈলোদ্ভব বংশীয় রাজা “চতুর্কদধি-সলিলবীচীমেখলা দ্বীপগিরিপত্তনবতী” বসুন্ধরার অধিপতি মহারাজাধিরাজ শ্রীশশাঙ্কের মহাসামন্ত বলিয়া উল্লিখিত হইয়াছেন। শশাঙ্ক যে মৃত্যুকাল পর্য্যন্ত মগধের অধিপতি ছিলেন জয়নামাংয়ের উক্তি হইতেই তাহা প্রমাণিত হয়। কারণ জয়নামাংয়ের উক্তি অনুসারে ৬৩৭ খৃষ্টাব্দের অনতিকাল পূর্ব্বে শশাঙ্ক গয়ার বোধিবৃক্ষ ছেদন করেন এবং নিকটবর্ত্তী একটি মন্দির হইতে বুদ্ধমূর্ত্তি সরাইতে আদেশ দেন। ইহার ফলে শশাঙ্কের সর্ব্বাঙ্গে ক্ষত হয়, তাহার মাংস পচিয়া যায় এবং অল্পকাল মধ্যেই তাঁহার মৃত্যু হয়।

সুতরাং হর্ষবর্দ্ধন তাঁহার কঠোর প্রতিজ্ঞা ও বিরট যুদ্ধসজ্জা সত্ত্বেও শশাঙ্কের বিশেষ কিছু অনিষ্ট করিতে পারেন নাই। শশাঙ্কের সহিত তাঁহার কোন যুদ্ধ হইয়াছিল কিনা তাহাও নিশ্চিত জানা যায় না। কেবলমাত্র আখ্যায়িকায় শ্রীমূলকল্প নামক গ্রন্থে ইহার উল্লেখ আছে। এই বৌদ্ধগ্রন্থখানি খুব প্রাচীন নহে। পুরাণের মত এই গ্রন্থে ভবিষ্যৎ রাজাদের সম্বন্ধে অনেক বিবরণ আছে। কিন্তু কোন রাজার নামই পুরাপুরি দেওয়া নাই, হয় প্রথম অক্ষর অথবা সমার্থক কোন শব্দদ্বারা সূচিত করা হইয়াছে। এই গ্রন্থ ঐতিহাসিক বলিয়া গ্রহণ করা যায় না, ইহা মধ্যযুগের কতকগুলি কিংবদন্তীর সমাবেশ মাত্র। এই গ্রন্থোক্ত রাজা ‘সোম’ সম্ভবতঃ শশাঙ্ক এবং তাঁহার শত্রু হকারাখ্য রাজা ও তাঁহার রকারাখ্য জ্যেষ্ঠভ্রাতা যথাক্রমে হর্ষবর্দ্ধন ও



রাজ্যবর্দ্ধন। এই অনুমান স্বীকার করিয়া লইলে এই গ্রন্থে আমরা নিম্নোক্ত বিবরণ পাই।

“এই সময়ে মধ্যদেশে বৈশ্যজাতীয় রাজ্যবর্দ্ধন রাজা হইবেন। তিনি শশাঙ্কের তুল্য শক্তিশালী হইবেন। নগ্নজাতীয় রাজার হস্তে তাঁহার মৃত্যু হইবে। অসাধারণ পরাক্রমশালী তাঁহার কনিষ্ঠভ্রাতা হর্ষবর্দ্ধন বহু সৈন্যসহ শশাঙ্কের রাজধানী পুণ্ড্রনগরীর বিরুদ্ধে অভিযান করেন। তিনি দুর্বৃত্ত শশাঙ্কে পরাজিত করেন এবং ঐ বর্ষেরই দেশে যথোপযুক্ত সম্মান না পাওয়ায় (মতান্তরে ‘পাইয়া’) স্বীয় রাজ্যে প্রত্যাবর্তন করেন।”

এই উক্তি কতদূর সত্য বলা যায় না। কিন্তু ইহা সত্য বলিয়া গ্রহণ করিলেও মাত্র ইহাই প্রমাণিত হয় যে হর্ষবর্দ্ধন শশাঙ্কের রাজ্য আক্রমণ করিয়াছিলেন কিন্তু বিশেষ কোন সাফল্য লাভ করিতে না পারিয়া ফিরিয়া আসিয়াছিলেন।

মঞ্জুগ্রীমূলকল্প মতে শশাঙ্ক মাত্র ১৭ বৎসর রাজত্ব করেন। কিন্তু ইহা সত্য নহে। শশাঙ্ক ৬০৬ অব্দের পূর্বেই রাজসিংহাসনে আরোহণ করেন এবং পূর্বোক্ত হুয়েনসাংয়ের উক্তি হইতে প্রমাণিত হয় যে ৬৩৭ অব্দের অনতিকাল পূর্বে তাঁহার মৃত্যু হয়। শশাঙ্কের যে তিনখানি লিপি পাওয়া গিয়াছে তাহার একখানির তারিখ ৬১৯ অব্দ। খুব সম্ভবত মৃত্যুকাল পর্য্যন্ত শশাঙ্ক গোড়, মগধ, দণ্ডভুক্তি, উৎকল ও কোন্ডোদের অধিপতি ছিলেন।

শশাঙ্ক শিবের উপাসক ছিলেন। হুয়েনসাং তাঁহার বৌদ্ধবিদ্বেষ সম্বন্ধে অনেক গল্প লিখিয়াছেন কিন্তু এগুলি বিশ্বাস করা কঠিন। কারণ হুয়েনসাংয়ের বর্ণনা হইতেই বেশ বোঝা যায় যে শশাঙ্কের রাজধানী কর্ণসুবর্ণে এবং তাঁহার রাজ্যের সর্বত্র বৌদ্ধধর্মের বেশ প্রসার ও প্রতিপত্তি ছিল।

বাংলার ইতিহাসে শশাঙ্কের একটি বিশিষ্ট স্থান আছে। তিনিই প্রথম আর্য্যাবর্তে বাঙ্গালীর সাম্রাজ্য প্রতিষ্ঠার স্বপ্ন দেখেন এবং আংশিকভাবে কার্য্যে পরিণত করেন। প্রতিদ্বন্দ্বী প্রবল মোখরিরাজশক্তি তাঁহার কূটনীতি ও বাহুবলে সমূলে ধ্বংস হয়। সমগ্র উত্তরাপথের অধীশ্বর প্রবল শক্তিশালী হর্ষবর্দ্ধনের সমুদয় চেষ্টা ব্যর্থ করিয়া তিনি বঙ্গ, বিহার, উড়িষ্যার আধিপত্য বজায় রাখিয়াছিলেন। বাণভট্টের মত চরিত-লেখক অথবা হুয়েনসাংয়ের মত সুহৃৎ থাকিলে হর্ষবর্দ্ধনের মতই তাঁহার খ্যাতি চতুর্দিকে বিস্তৃত হইত। কিন্তু অক্ষুণ্ণ নিদারুণ বিড়ম্বনায় তিনি স্বদেশে অখ্যাত এবং অজ্ঞাত; এবং শত্রুর কলঙ্ক কালিমাই তাঁহাকে জগতে পরিচিত করিয়াছে।

## পঞ্চম পরিচ্ছেদ

### অরাজকতা ও মাৎস্য্যায়

#### ১। গৌড়

শশাঙ্কের মৃত্যুর পবে আনুমানিক ৬৩৮ অব্দে জয়নগর বা লো দেশ পরিভ্রমণ কবেন। তিনি কজঙ্গল (বাজমহলেব নিকট), পুণ্ড্রবর্ধন, কর্ণসুবর্ণ, সমতট ও তাম্রলিপ্তি এই পাঁচটি বিভিন্ন বাজার উল্লেখ করিয়াছেন উৎকল এবং কোঙ্গোদও তখন স্বাধীন রাজ্য ছিল। আনুমানিক ৬৪৬ অব্দে হইয়াছে যে শশাঙ্কের মৃত্যুর পবে গৌড়বাস্তব আভ্যন্তরিক বলহ ও বিদ্রোহোচ্ছন্ন ভিন্ন হইয়া গিয়াছিল, একাধিক রাজার অভ্যুদয় হয়—তাহাব মধ্যে কেহ এক সপ্তাহ কেহ বা একমাস রাজত্ব করেন, শশাঙ্কের পুত্র মানব ৮ মাস ৫ দিন রাজত্ব করেন। এই বর্ণনা সম্ভবত অনেক পরিমাণে সত্য। এই প্রকার অস্থায়ী অস্বাভাবিক দ্রোহেই সমগ্র দেশে বিপ্লব বাজার এবং তা নষ্ট হয় এবং বাহ্যিকের আক্রমণের পথ প্রশস্ত করে।

আঃ ৬৭১ অব্দে হর্ষবর্দ্ধন মগধ জয় কবেন এবং পবে বৎসব তিনি উৎকল ও কোঙ্গোদে বিজয়প্রযাত্রা কবেন। এই সময়েই কামরূপবাসী ভাস্করবর্ম্মা গৌড় জয় করিয়া কর্ণসুবর্ণ রাজ্যে গিয়া ৬৭১ অব্দে যখন হর্ষ রাজ্যে অবস্থিতি করিতেছিলেন তখন তিনি বঙ্গ রাজ্যে রণে তা লড়াই হইয়া হর্ষের সহিত সাক্ষাৎ কবেন। তাহাব প্রশ্নে রাজ্যে বর্ণপোতও গঙ্গা নদী দিয়া কজঙ্গলে গমন কবে। এইরূপে শশাঙ্কের দুই প্রবল শত্রু তাহাব রাজ্যের ধ্বংস সাধন করে।

৬৪৬ অথবা ৬৪৭ অব্দে হর্ষবর্দ্ধনের মৃত্যু হয়। ইহার পরই তাহাব সাম্রাজ্য ধ্বংস হয় এবং তিব্বতবাসী কামরূপ ও পুণ্ড্রবর্ধন রাজ্যে আধিপত্য কবেন। সুতরাং গৌড়ে ভাস্করবর্ম্মাব অধিকার খুব বেশীদিন স্থায়ী হয় নাই। ইহার পবেই জয়নাগ নামক একজন রাজা কর্ণসুবর্ণ রাজত্ব করেন। তাহাব অধিপত্য উৎকল উপাধি হইতে অনুমান হয় যে তিনি বেশ শক্তিশালী রাজা ছিলেন। কিন্তু তাহাব রাজ্যের বিস্তৃতি অথবা তাহাব সম্রাজ্যে আর কোনও বিবরণ জানা যায় না।

শশাঙ্কের মৃত্যুর পরবর্তী একশত বৎসর গোড়ের ইতিহাসে এক অন্ধকার-ময় যুগ। এই যুগে অনেক বহিঃশত্রু এই রাজ্য আক্রমণ করে। অনেকে অনুমান করেন যে তিব্বতরাজ ও পরবর্তী গুপ্তবংশীয় সম্রাটগণ এই রাজ্য জয় করিয়াছিলেন—কিন্তু ইহার বিশ্বাসযোগ্য কোন প্রমাণ নাই। অষ্টম শতাব্দীর প্রারম্ভে শৈলবংশীয় একজন রাজা পুণ্ড্রদেশ জয় করেন। ইহার অনতিকাল পরে কনৌজের রাজা যশোবর্ম্মা গোড়রাজকে পরাভূত ও বধ করেন। কনৌজের রাজকবি বাকপতিরাজ এই ঘটনা উপলক্ষ করিয়া গোড়বহো (গোড় বধ) নামক প্রাকৃত ভাষায় এক কাব্য রচনা করেন। কিন্তু ইহার পরেই কাশ্মীরের রাজা ললিতাদিত্যের হাতে যশোবর্ম্মার পরাজয় ঘটে এবং তাঁহার বিশাল রাজ্য ধ্বংস হয়। গোড়রাজ ললিতাদিত্যের অধীনতা স্বীকার করেন। রাজতরঙ্গিণী নামক কাশ্মীরের ইতিহাসে গোড় সম্বন্ধে যে একটি আখ্যান লিপিবদ্ধ হইয়াছে তাহা বিশেষভাবে উল্লেখযোগ্য। ললিতাদিত্য গোড়রাজকে কাশ্মীরে আমন্ত্রণ করেন এবং বিষ্ণুমূর্ত্তি স্পর্শ করিয়া শপথ করেন যে কাশ্মীরে গেলে তাঁহার কোন বিপদ ঘটিবে না। অথচ গোড়রাজ কাশ্মীর যাওয়ার পরেই ললিতাদিত্য তাঁহাকে হত্যা করেন। এই ঘণ্য বিশ্বাসঘাতকতার প্রতিশোধ লইবার জন্ত গোড়রাজের কতিপয় বিশ্বস্ত অনুচর তীর্থযাত্রার ছলে কাশ্মীর গিয়া উক্ত বিষ্ণুমূর্ত্তি ভাঙ্গিবার জন্ত মন্দিরে প্রবেশ করে। ভুলক্রমে তাহারা অশ্রু একটি মূর্ত্তি ভাঙ্গিতে আরম্ভ করে এবং ইতিমধ্যে কাশ্মীরের সৈন্য আসিয়া তাহাদিগকে হত্যা করে। রাজতরঙ্গিণীর রচয়িতা ঐতিহাসিক কহলণ এই বাঙ্গালী বীর অনুচরগণের প্রভুভক্তি ও আত্মোৎসর্গের ভূয়সী প্রশংসা করিয়া লিখিয়াছেন যে উক্ত মন্দিরটি আজও শূন্য কিন্তু পৃথিবী গোড়বীরগণের প্রশংসায় পূর্ণ। কহলণ ললিতাদিত্যকে আদর্শ রাজা বলিয়া বর্ণনা করিয়াছেন কিন্তু তিনি স্বীকার করিয়াছেন যে চন্দ্রের শ্রায় ললিতাদিত্যের চরিত্রে যে দুইটি দুরপনয় কলঙ্ক ছিল গোড়রাজার হত্যা তাহার অন্যতম। রাজকবির এই সমুদয় উক্তি হইতে উল্লিখিত গোড়বীরগণের কাহিনী সত্য বলিয়াই অনুমিত হয়।

কহলণ লিখিয়াছেন যে ললিতাদিত্যের পৌত্র জয়পীড় পিতামহের অনুকরণে দিগ্বিজয়ে বাহির হন। কিন্তু তাঁহার অনুপস্থিতিতে জঙ্ক কাশ্মীর রাজ্য অধিকার করে এবং জয়পীড়ের সৈন্যগণও তাঁহাকে পরিত্যাগ করিয়া অতঃপর সমুদয় অনুচরগণকে বিদায় দিয়া একাকী ছদ্মবেশে ভ্রমণ করিতে করিতে তিনি পুণ্ড্রবর্জন নগরীতে উপস্থিত হন। এই প্রদেশ তখন জয়ন্ত নামক

একজন সামন্ত রাজার অধীনে ছিল। জয়্যাপীড় জয়ন্তের কন্যাকে বিবাহ করেন এবং গোড়ের পাঁচজন রাজাকে পরাস্ত করিয়া জয়ন্তকে তাঁহাদের অধীশ্বর করেন। এই কাহিনী কতদূর সত্য বলা যায় না। তবে গোড় যে তখন পাঁচ অথবা একাধিক খণ্ড রাজ্যে বিভক্ত ছিল ইহা সম্ভব বলিয়াই মনে হয়।

নেপালের লিচ্ছবিরাজ দ্বিতীয় জয়দেবের শিলালিপিতে গোড়ের আর এক বহিঃশত্রুর উল্লেখ পাওয়া যায়। ১৫৩ সংবতে ( ৭৪৮ অথবা ৭৫২ খৃষ্টাব্দ ) উৎকৌণ এই লিপিতে নেপালরাজের শত্রুর ভগদত্তবংশীয় রাজা হর্ষ গোড়, ওড়্র, কলিঙ্গ ও কোশলের অধিপতিরূপে অভিহিত হইয়াছেন। ভগদত্তবংশীয় রাজগণ কামরূপে রাজত্ব করিতেন সুতরাং অনেকেই অনুমান করেন যে কামরূপ-রাজ হর্ষ গোড় জয় করিয়াছিলেন। কিন্তু উড়্র্যাব করবংশীয় রাজগণও ভগদত্তবংশীয় বলিয়া দাবী করিতেন। সুতরাং অসম্ভব নহে যে হর্ষ করবংশীয় রাজা ছিলেন। কিন্তু কেবলমাত্র গোড়াধিপ এই সম্মানসূচক পদবী হইতে কামরূপ বা উৎকলের কোন রাজা গোড়ে রাজত্ব করিতেন এরূপ স্থির সিদ্ধান্ত করা যায় না—তবে সম্ভবত তিনি গোড়ে বিজয়াভিযান করিয়া কিছু সাফল্য লাভ করিয়াছিলেন।

## • ২। বঙ্গ

বঙ্গ রাজ্য শশাঙ্কের সাম্রাজ্যভুক্ত ছিল কিনা নিশ্চিত বলা যায় না। কিন্তু শশাঙ্কের মৃত্যুর পরই যে এখানে সম্রাট নগেন্দ্র আদান রাজা ছিল জুয়েন-সাংয়ের বিবরণ হইতেই তাহা জানা যায়। জুয়েনসাং আরও বলেন যে সম্রাট্টে এক ব্রাহ্মণবংশ রাজত্ব করিতেন, এবং এই বংশীয় শীলভদ্র তাঁহার সময়ে নালন্দার অধ্যক্ষ ছিলেন।

অতঃপর খড়্গাবংশের অভ্যুদয় হয়। খড়্গোত্তম, তৎপুত্র জাতখড়্গ ও তৎপুত্র দেবখড়্গ এই তিনজন রাজা সপ্তম শতাব্দীর শেষার্ধ্বে রাজত্ব করেন। দেবখড়্গের পুত্র রাজরাজ অথবা রাজরাজভট্টও সম্ভবত তাঁহার পরে রাজত্ব করেন। এই রাজগণ সকলেই বৌদ্ধধর্মাবলম্বী ছিলেন। তাঁহাদের রাজ্য দক্ষিণ ও পূর্ববঙ্গে বিস্তৃত ছিল। তাঁহাদের রাজধানীর নাম ছিল কস্মাস্ত। কেহ কেহ অনুমান করেন যে ইহাই বর্তমানে কুমিল্লার নিকটবর্তী বড়কামতা নামে পরিচিত। কিন্তু এই মত নিঃসংশয়ে গ্রহণ করা যায় না।

কনৌজের রাজা যশোবর্মা গোড় রাজাকে বধ করিয়া বঙ্গ জয় করেন।

বাকপতির বর্ণনা হইতে অনুমিত হয় যে বঙ্গরাজ বেশ শক্তিশালী ছিলেন এবং তাঁহার বহু রণহস্তী ছিল। গোড়বহো কাব্যে উক্ত হইয়াছে যে যশোবর্মার নিকট বশুতা স্বীকারের সময় বঙ্গবাসীদের মুখ পাণ্ডুর বর্ণ ধারণ করিয়াছিল কারণ তাহারা একরূপ কার্যে অভ্যস্ত নহে। বিদেশী কবি কর্তৃক বঙ্গের বীরত্ব ও স্বাধীনতা-প্রীতির উল্লেখ সম্ভবত তাঁহার প্রত্যক্ষ অভিজ্ঞতার ফল। যশোবর্মার অধিকার খুব বেশীদিন স্থায়ী হয় নাই। গোড়ের অপর দুই বহিঃশত্রু ললিতাদিত্য ও হর্ষের সহিত বঙ্গের কোন সম্বন্ধ ছিল না।

যশোবর্মা যে সময় বঙ্গ জয় করেন সে সময়েও খড়্গবংশীয়েরা রাজত্ব করিতেছিলেন কিনা বলা কঠিন। এই সময়ের আর কোনও রাজার কথা কোনও বিশ্বস্তসূত্রে অবগত হওয়া যায় না। তিব্বতীয় লামা তারনাথ সপ্তদশ শতাব্দীতে ভারতীয় বৌদ্ধধর্মের যে ইতিহাস রচনা করেন তাহাতে এই যুগের বাংলাদেশের অনেক কাহিনী লিপিবদ্ধ হইয়াছে। এই সমুদয় কাহিনী একেবারে অমূলক না হইলেও অশ্রুবিধ প্রমাণ ব্যতিরেকে সত্য বলিয়া গ্রহণ করা যায় না। তিনি চন্দ্রবংশীয় অনেক রাজার উল্লেখ করিয়াছেন। এই বংশের শেষ দুই রাজা গোবিচন্দ্র ও ললিতচন্দ্র। এই দুই রাজার অস্তিত্ব স্বীকার করিলে বলিতে হয় যে এই চন্দ্রবংশীয় রাজারাই খড়্গবংশীয়দের নিকট হইতে বঙ্গ জয় করেন এবং সম্ভবত ললিতচন্দ্রই যশোবর্মার হস্তে পরাজিত হইয়াছিলেন।

# ষষ্ঠ পরিচ্ছেদ

## পাল সাম্রাজ্য

১। গোপাল (আ ৭৫০-৭৭০)

শশাঙ্কের মৃত্যুর পর শতবর্ষব্যাপী অনৈক্য, আত্মকলহ ও বহিঃশত্রুর পুনঃ পুনঃ আক্রমণের ফলে বাংলার রাজতন্ত্র ধ্বংসপ্রায় হইয়াছিল। প্রায় সহস্র বৎসর পরে তিব্বতীয় বৌদ্ধ লামা তারনাথ এই যুগের বাংলার সম্বন্ধে লিখিয়াছেন যে সমগ্র দেশের কোন রাজ্য ছিল না। প্রাকৃতিক ক্ষত্রিয়, সম্রাট লোক, ব্রাহ্মণ এবং বণিক নিজ নিজ এলাকা স্বাধীনভাবে শাসন করিতেন। ফলে লোকের হৃৎখ হৃদশার আর সীমা ছিল না। সংস্কৃতে এইরূপ অরাজকতার নাম মাংস্রজ্য। পুকুরের যেমন বড় মাছ ছোট মাছ খাইয়া প্রাণ ধারণ করে, দেশে অরাজকতার সময় সেইরূপ প্রবল অবোধে দুর্বলের উপর অত্যাচার করে, এই জন্তই মাংস্রজ্য এই সঙ্গ্রাম উৎপাদি। সমসাময়িক লিপিতে বাংলাদেশে মাংস্রজ্যের উল্লেখ আছে—সুতরাং তারনাথের বর্ণনা মোটামুটি সত্য বলিয়াই গ্রহণ করা যায়। এই চরম হৃৎখ হৃদশা হইতে মুক্তিলাভের জন্ত বাঙ্গালীজাতি যে বিজ্ঞতা ও আত্মত্যাগের পরিচয় দিয়াছিল ইতিহাসে তাহা চিরস্মরণীয় হইয়া থাকিবে। দেশের প্রবীণ নেতৃগণ মিলিত হইয়া পবম্পর বিবাদ বিসংবাদ ভুলিয়া “সংগতি” বাজপদে নির্বাচিত করিবেন এবং সকলেই স্বৈচ্ছায় তাহা স্বীকার করিবেন। দেশের জনসাধারণও সানন্দে এই মত গ্রহণ করিল। ইহার ফলে গোপাল নামক এক ব্যক্তি বাংলা দেশের রাজপদে নির্বাচিত হইলেন। এইরূপে কেবলমাত্র দেশের মঙ্গলের দিকে চাহিয়া ব্যক্তিগত স্বার্থ বিসর্জনপূর্বক সর্বসাধারণে মিলিয়া কোন বৃহৎ কার্য অনুষ্ঠান যেমন বাঙ্গালীর ইতিহাসে আর দেখা যায় না, বর্তমান ক্ষেত্রে এই মহান স্বার্থত্যাগ ও ঐক্যের ফলে বাঙ্গালীর জাতীয় জীবন যে উন্নত ও গৌরবের চরম শিখরে উঠিয়াছিল তাহার দৃষ্টান্তও বাংলার ইতিহাসে আর নাই। ১৮৫৭ অব্দে জাপানে যে গুরুতর রাজনৈতিক পরিবর্তন ঘটিয়াছিল কার্য কারণ ও পরিণাম বিবেচনা করিলে তাহার সহিত সহস্রাধিক বৎসর পূর্বে গোপালের রাজপদে নির্বাচনের তুলনা করা যাইতে পারে।

গোপালের বংশপরিচয় সম্বন্ধে বিশেষ কিছু জানা যায় না। গোপাল ও তাঁহার বংশধরগণ সকলেই বৌদ্ধধর্মাবলম্বী ছিলেন। পালরাজগণের তান্ত্র-শাসনে উক্ত হইয়াছে যে গোপালের পিতামহ দয়িতবিষ্ণু ‘সর্ববিভাবিশুদ্ধ’ ছিলেন এবং তাঁহার পিতা বপাট শক্রর দমন এবং বিপুল কীর্তিকলাপে সসাগরী বশুন্ধরাকে ভূষিত করিয়াছিলেন। সুতরাং গোপাল যে কোন রাজবংশে জন্ম-গ্রহণ করিয়াছিলেন এরূপ মনে হয় না। তাঁহার পিতা যুদ্ধ ব্যবসায়ী ছিলেন এবং গোপালও সম্ভবত পিতার অনুসরণ করিয়া প্রবীণ ও সূনিপুণ যোদ্ধা বলিয়া পরিচিত হইয়াছিলেন। কারণ এই সঙ্কট সময়ে বংশমর্যাদাহীন যুদ্ধানভিজ্ঞ তরুণ-বয়স্ক কোন ব্যক্তির রাজপদে নির্বাচন সম্ভবপর বলিয়া মনে হয় না। পরবর্তীকালে পালগণ ক্ষত্রিয় বলিয়া পরিচিত ছিলেন। গোপালের পুত্র ধর্মপাল সমসাময়িক একখানি গ্রন্থে ‘রাজভটাদিবংশ-পতিত’ বলিয়া উক্ত হইয়াছেন। ইহা হইতে কেহ কেহ অনুমান করেন যে পালরাজগণ খড়্গবংশীয় রাজা রাজরাজভটের বংশধর। কিন্তু এখানে রাজভট শব্দ রাজসৈনিক অর্থে গ্রহণ করাই অধিকতর সমীচীন বলিয়া মনে হয়। ইহা পূর্বোক্ত সিদ্ধান্তের সমর্থক।

গোপালের তারিখ সঠিক জানা যায় না। তবে তিনি অষ্টম শতাব্দীর মধ্যভাগে রাজপদে নির্বাচিত হইয়াছিলেন ইহাই সম্ভবপর মনে হয়। প্রায় চারি শত বর্ষ পরে রচিত রামচরিত গ্রন্থে বরেন্দ্রভূমি পালরাজগণের ‘জনকভূ’ অর্থাৎ পিতৃভূমি বলিয়া বর্ণিত হইয়াছে। ইহা হইতে পণ্ডিতগণ অনুমান করেন যে গোপাল বরেন্দ্রের অধিবাসী ছিলেন। তিনি প্রথমেই সমগ্র বাংলা-দেশের অধিপতি নির্বাচিত হইয়াছিলেন কিনা তাহা সঠিক জানা যায় না। কিন্তু তাঁহার রাজ্যকালে সমগ্র দেশই তাঁহার শাসনাধীন হইয়াছিল এবং বহুদিন পরে বাংলায় দৃঢ়প্রতিষ্ঠিত রাজশক্তির সহিত সুখ ও শান্তি ফিরিয়া আসিয়াছিল। ইহাই গোপালের প্রধান কীর্তি। তাঁহার রাজ্যকালের কোন বিবরণই আমরা জানি না। কিন্তু তিনি যে শতাব্দীব্যাপী বিশৃঙ্খলার পর তাঁহার রাজ্য এমন শক্তিশালী ও সুসমৃদ্ধ করিয়া যাইতে পারিয়াছিলেন, যে তাঁহার পুত্র সমগ্র আর্য্যাবর্ত্তে এক বিশাল সাম্রাজ্য প্রতিষ্ঠা করিতে সমর্থ হইয়াছিলেন ইহাতেই তাঁহার রাজোচিত গুণাবলী ও ভূয়োদর্শনের যথেষ্ট পরিচয় পাওয়া যায়।

## ২। ধর্মপাল (আ ৭৭০-৮১০)

গোপালের মৃত্যুর পর আ ৭৭০ অব্দে তাঁহার পুত্র ধর্মপাল সিংহাসনে আরোহণ করেন। ধর্মপাল বীর, সাহসী ও রাজনীতিকুশল ছিলেন।

গোপালের সূশাসনের ফলে বাংলা দেশের শক্তি ও সমৃদ্ধি অনেক বাড়িয়াছিল। সূতরাং ধর্মপাল প্রথম হইতেই আর্ধ্যাবর্তে এক সাম্রাজ্য স্থাপনের কল্পনায় মাতিয়া উঠিলেন। কিন্তু শীঘ্রই তাঁহার এক প্রতিদ্বন্দ্বী উপস্থিত হইল। ইনি প্রতীহার বংশীয় রাজা বৎসরাজ। প্রতীহারেরা সম্ভবত গুর্জর জাতীয় ছিলেন। এই গুর্জর জাতি হুনদিগের সঙ্গে বা অব্যবহিত পরে ভারতে আসিয়া পঞ্জাব, রাজপুতানা ও মালবে ক্ষুদ্র ক্ষুদ্র রাজ্য স্থাপন করে। অষ্টম শতাব্দীতে মালবের প্রতীহার রাজ্য ক্রমশঃ শক্তিশালী হইয়া ওঠে। যে সময় ধর্মপাল বাংলা দেশ হইতে পশ্চিম দিকে বিজয়াভিযান করেন সেই সময় মালবের প্রতীহার নরপতি বৎসরাজও সাম্রাজ্য স্থাপনের চেষ্টায় পূর্বদিকে অগ্রসর হন। ফলে উভয়ের মধ্যে সংঘর্ষ হয় এবং ধর্মপাল পরাজিত হন। কিন্তু ধর্মপালের সৌভাগ্যক্রমে এই সময় দক্ষিণাপথের রাষ্ট্রকূটরাজ্য দ্রব আর্ধ্যাবর্তে বিজয়াভিযান করিয়া বৎসরাজকে পরাজিত করেন। এই পরাজয়ের ফলে বৎসরাজ পলাইয়া মরুভূমিতে আশ্রয় লইলেন এবং তাঁহার সাম্রাজ্য প্রতিষ্ঠার আশা দূরীভূত হইল।

দ্রব বৎসরাজকে পরাস্ত করিয়াই ক্ষান্ত হইলেন না। তিনি ধর্মপালের বিরুদ্ধেও অগ্রসর হইলেন। ধর্মপাল ইতিমধ্যে মগধ, বারাণসী, ও প্রয়াগ জয় করিয়া গঙ্গা যমুনার মধ্যবর্তী ভূভাগ পর্য্যন্ত অগ্রসর হইয়াছিলেন। এইখানেই দ্রবের সহিত তাঁহার যুদ্ধ হইল। রাষ্ট্রকূটরাজের প্রশস্তিমতে দ্রব ধর্মপালকে পরাজিত করিয়াছিলেন। কিন্তু ইহাতে ধর্মপালের বিশেষ কোন অনিষ্ট হইয়াছিল বলিয়া মনে হয় না। দ্রব শীঘ্রই দক্ষিণাপথে ফিরিয়া গেলেন এবং ধর্মপালের আশ্রয়স্থান প্রতিদ্বন্দ্বী রহিল না। এই সুযোগে ধর্মপাল ক্রমে ক্রমে প্রায় সমগ্র আর্ধ্যাবর্ত জয় করিয়া নিজের আধিপত্য স্থাপন করিলেন। ইহার ফলে তিনি সার্বভৌম সম্রাটের পদ প্রাপ্ত হইলেন এবং গৌরবশূচক ‘পরমেশ্বর পরমভট্টারক মহারাজাধিরাজ’ প্রভৃতি উপাধি গ্রহণ করিলেন।

ধর্মপালের পুত্র দেবপালের তাম্রশাসনে উক্ত হইয়াছে যে ধর্মপাল দিগ্বিজয়ে প্রবৃত্ত হইয়া কদার ও গোকর্ণ এই দুই তীর্থ এবং গঙ্গাসাগর সঙ্গম দর্শন করিয়াছিলেন। কদার হিমালয়ে অবস্থিত সুপরিচিত তীর্থ। গোকর্ণের অবস্থিতি লইয়া পণ্ডিতগণের মধ্যে মতভেদ আছে। কাহারও মতে ইহা বোম্বে প্রেসিডেন্সির অন্তর্গত উত্তর কাণাড়ায় অবস্থিত সুপরিচিত গোকর্ণ নামক তীর্থ। কিন্তু ধর্মপাল যে দাক্ষিণাত্যের রাষ্ট্রকূটরাজ্য পার হইয়া এই দূর দেশে



বিজয়াভিযান করিয়াছিলেন বিশিষ্ট প্রমাণ অভাবে তাহা বিশ্বাস করা কঠিন। নেপালে বাগমতী নদীর তীরে পশুপতি মন্দিরের দুই মাইল উত্তর-পূর্বে গোবর্ধ নামে তীর্থ আছে—সম্ভবত ধর্মপাল এই স্থানে গমন করিয়াছিলেন। এই অনুমানের সপক্ষে বলা যাইতে পারে যে স্বয়ম্ভুপুরাণে উক্ত হইয়াছে যে গোড়রাজ ধর্মপাল নেপালের সিংহাসন অধিকার করিয়াছিলেন। গোবর্ধ যেখানেই অবস্থিত হউক ধর্মপালের সেনাবাহিনী দিগ্বিজয়ে বাহির হইয়া যে পঞ্জাবের প্রান্ত হইতে বাংলার সীমান্ত পর্যন্ত বিজয়াভিযান করিয়াছিল সে বিষয়ে সন্দেহ নাই।

আর্য্যাবর্তে আধিপত্য লাভ করিবার জন্য ধর্মপালকে বহু যুদ্ধ করিতে হইয়াছিল। কিন্তু উক্ত দিগ্বিজয়ের উল্লেখ ব্যতীত পালরাজগণের প্রশস্তিতে এই সমুদয় যুদ্ধের বিশদ কোন বিবরণ নাই। এই দিগ্বিজয়ের প্রারম্ভেই তিনি ইন্দ্ররাজ প্রভৃতিকে জয় করিয়া মহোদয় অর্থাৎ কান্যকুব্জ অধিকার করিয়াছিলেন। প্রাচীন পাটলিপুত্র ও বর্তমান দিল্লীর স্থায় তৎকালে কান্যকুব্জই আর্য্যাবর্তের রাজধানী বলিয়া বিবেচিত হইত এবং সাম্রাজ্য স্থাপনের অভিলাষী রাজগণ কান্যকুব্জের দিকে লোলুপ দৃষ্টি নিক্ষেপ করিতেন। ধর্মপাল কান্যকুব্জ অধিকার করিয়া ক্রমে সিন্ধুনদ ও পঞ্জাবের উত্তরে হিমালয়ের পাদভূমি পর্যন্ত জয় করিলেন। দক্ষিণে বিদ্যাপর্ব্বত অতিক্রম করিয়াও তিনি সম্ভবত কিছুদূর অগ্রসর হইয়াছিলেন। এইরূপে আর্য্যাবর্তের সার্বভৌমত্ব লাভ করিয়া ইহা প্রকাশ্যে ঘোষণা করিবার জন্য তিনি কাশ্যকুব্জে এক বৃহৎ রাজাভিষেকের আয়োজন করিলেন। ইহাতে আর্য্যাবর্তের বহু সামন্ত নরপতিগণ উপস্থিত হইয়া ধর্মপালের অধিরাজ্য স্বীকার করিলেন। মালদহের নিকটবর্তী খালিমপুরে প্রাপ্ত ধর্মপালের তাম্রশাসনের একটি মাত্র শ্লোকে এই ঘটনাটি নিম্নলিখিতরূপে বর্ণিত হইয়াছে। “তিনি মনোহর ক্রান্তজি-বিকাশে [ ইঙ্গিত মাত্র ] ভোজ, মংস্ত্র, মজ্র, কুরু, যজ্র, যবন, অবস্তি, গন্ধার এবং কীর প্রভৃতি বিভিন্ন জনপদের [ সামন্ত ? ] নরপালগণকে প্রণতিপরায়ণ চঞ্চলাবনত মস্তকে সাধু সাধু বলিয়া কীর্তন করাইতে করাইতে হৃষ্টচিত্ত পাঞ্চালবৃদ্ধকর্তৃক মস্তকোপরি আত্মাভিষেকের স্বর্ণকলস উদ্ধৃত করাইয়া কাশ্যকুব্জকে রাজত্ব প্রদান করিয়াছিলেন।”

এই শ্লোকে যে সকল রাজ্যের উল্লেখ আছে অস্তুত সে সমুদয়ই যে ধর্মপালের সাম্রাজ্যের অন্তর্গত ছিল তাহা স্বীকার করিতেই হইবে। ইহার মধ্যে গন্ধার, মজ্র, কুরু ও কীর দেশ যথাক্রমে পঞ্চনদের পশ্চিম, মধ্য, পূর্ব ও

উত্তরে অবস্থিত। যবন দেশ সম্ভবত সিঙ্কনদের তীরবর্তী কোনও মুসলমান অধিকৃত রাজ্য স্মৃতিত করিতেছে। অবস্থি মালবের এবং মৎস্যদেশ আলওয়ার ও জয়পুর রাজ্যের প্রাচীন নাম। ভোজ ও যছু একাধিক রাজ্যের নাম ছিল। সুতরাং উক্ত শ্লোকে ঠিক কোন্ কোন্ দেশ স্মৃতিত হইয়াছে তাহা বলা কঠিন। সম্ভবত ভোজরাজ্য বর্তমান বেরারে এবং যছুরাজ্য পঞ্জাবে অথবা সুরাষ্ট্রে অবস্থিত ছিল।

এই সমুদয় রাজ্যের অবস্থিতি আলোচনা করিলে সহজেই অনুমিত হইবে যে ধর্মপাল প্রায় সমগ্র আর্য্যাবর্তের অধীশ্বর ছিলেন। পালরাজগণের প্রশস্তি ব্যতীত অশ্বত্থও ধর্মপালের এই সার্বভৌমত্বের উল্লেখ আছে। একাদশ শতাব্দীতে রচিত সোড়ঢল প্রণীত উদয়সুন্দরীকথা নামক চম্পু-কাব্যে ধর্মপাল উত্তরাপথস্বামী বলিয়া অভিহিত হইয়াছেন।

এই বিশাল সাম্রাজ্যের মধ্যে মাত্র বাংলাদেশ ও বিহার ধর্মপালের নিজ শাসনাধীনে ছিল। অন্যান্য পরাজিত রাজগণ ধর্মপালের প্রভু স্বীকার করিয়া স্বীয় স্বীয় রাজ্যশাসন করিতেন। কেবলমাত্র কান্যকুজে পরাজিত ইন্দ্ররাজের পরিবর্তে ধর্মপাল চক্রায়ুধ নামক একজন নূতন ব্যক্তিকে রাজপদে অভিষিক্ত করিয়াছিলেন।

ধর্মপাল নিরুদ্ধে এই সাম্রাজ্য ভোগ করিতে পারেন নাই। তাঁহার পূর্বতন প্রতিদ্বন্দ্বী প্রতীহাররাজ বৎসরাজের পুত্র নাগভট শীঘ্রই কতক রাজ্য জয় এবং কতক রাজ্যের সহিত মিত্রতা স্থাপন পূর্বক স্বীয় শক্তি বৃদ্ধি করিয়া ধর্মপালের বিরুদ্ধে অগ্রসর হইলেন। তিনি প্রথম চক্রায়ুধকে পরাজিত করেন। এই চক্রায়ুধ ধর্মপালের শরণাপন্ন হন। পরিশেষে ধর্মপালের সাহিত নাগভটের বিষম যুদ্ধ হয়। প্রতীহাররাজের প্রশস্তি অনুসারে নাগভট এই যুদ্ধে জয়ী হন। কিন্তু অচিরকাল মধ্যেই রাষ্ট্রকূটরাজ ক্রবের পুত্র তৃতীয় গোবিন্দ নাগভটের রাজ্য আক্রমণ করিয়া তাঁহাকে সম্পূর্ণরূপে পরাভূত করেন এবং বৎসরাজের স্থায় নাগভটের সাম্রাজ্য স্থাপনের আশাও দূরীভূত হয়।

রাষ্ট্রকূটরাজগণের প্রশস্তি অনুসারে ধর্মপাল ও চক্রায়ুধ উভয়ে স্বেচ্ছায় তৃতীয় গোবিন্দের আনুগত্য স্বীকার করেন। ইহা হইতে একরূপ অনুমান করা অসম্ভব হইবে না যে ধর্মপাল ও চক্রায়ুধ নাগভটকে দমন করিবার নিমিত্তই রাষ্ট্রকূটরাজের শরণাপন্ন হইয়াছিলেন এবং তাঁহাদের আমন্ত্রণেই তৃতীয় গোবিন্দ নাগভটের রাজ্য ধ্বংস করিয়াছিলেন। সে যাহাই হউক পিতার ন্যায় তৃতীয়

গোবিন্দও শীঘ্রই দক্ষিণাপথে ফিরিয়া গেলেন। আর্য্যাবর্তে ধর্ম্মপালের আর কোনও প্রবল প্রতিদ্বন্দ্বী রহিল না। নাগভটের পরাজয় এরূপ গুরুতর হইয়াছিল যে তিনি এবং তাঁহার পুত্র আর পালরাজগণের বিরুদ্ধে কিছুই করিতে পারিলেন না। সুতরাং ধর্ম্মপালের বিশাল সাম্রাজ্য অটুট রহিল এবং সম্ভবত শেষ বয়সে তিনি শান্তিতে জীবন অতিবাহিত করিয়াছিলেন।

ধর্ম্মপালের বাহুবলে বাংলাদেশের রাজনৈতিক পরিবর্তন যেরূপ গুরুতর হইয়াছিল সচরাচর তাহার দৃষ্টান্ত মিলে না। অর্দ্ধশতাব্দী পূর্বে যে দেশ পরপদানত এবং অরাজকতা ও অত্যাচারের লীলাভূমি ছিল সেই দেশ সহসা প্রচণ্ড শক্তিশালী হইয়া সমগ্র আর্য্যাবর্তে নিজের প্রভুত্ব বিস্তার করিবে ইহা অলৌকিক কাহিনীর মতই অদ্ভুত মনে হয়। এই সাম্রাজ্য বিস্তারের সঙ্গে সঙ্গেই বাঙ্গালীর নূতন জাতীয় জীবনের সূত্রপাত হয়। ধর্ম্ম শিল্প ও সাহিত্যের মধ্য দিয়াই এই জাতীয় জীবন প্রধানত আত্মবিকাশ করিয়াছিল। পাল-রাজগণের চারিশত বর্ষব্যাপী রাজ্যকাল বাঙ্গালী জাতির আত্মপ্রতিষ্ঠার যুগ। ধর্ম্মপালের রাজ্য বাঙ্গালীর জীবন প্রভাত।

এই নূতন যুগের বাঙ্গালীর আশা আকাঙ্ক্ষা কল্পনা ও আদর্শ সমসাময়িক রচনার মধ্য দিয়া কিয়ৎ পরিমাণে প্রতিধ্বনিত হইয়াছে। খালিমপুর তাম্র-শাসনে ধর্ম্মপালের ‘পাটলিপুত্রনগর-সমাবাসিত-শ্রীমজ্জয়স্কন্ধাবারের’ যে বর্ণনা আছে তাহাতে নবসাম্রাজ্য প্রতিষ্ঠার গর্বে দৃষ্ট বাঙ্গালীর মানস-চিত্র ফুটিয়া উঠিয়াছে। অশোকের পুণ্যস্মৃতি বিজড়িত মৌর্য্য রাজগণের প্রাচীন রাজধানী পাটলিপুত্রে (বর্তমান পাটনা) ধর্ম্মপাল সাময়িক অথবা স্থায়ীভাবে রাজধানী স্থাপন করিয়াছিলেন। কবি তাহার বর্ণনা প্রসঙ্গে লিখিয়াছেন যে এখানে গঙ্গাবক্ষে অসংখ্য বিশাল রণতরীর সমাবেশ সেতুবন্ধ রামেশ্বরের শৈলশিখরশ্রেণী বলিয়া মনে হইত; এখানকার অসংখ্য রণহস্তী দিনশোভাকে স্নান করিয়া নিবিড় মেঘের শোভা সৃষ্টি করিত; উত্তরাপথের বহু সামন্তরাজগণ যে অগণিত অশ্ব উপঢৌকন স্বরূপ পাঠাইয়াছিলেন তাহাদের ক্ষুরোখিত ধূলিজালে এইস্থান চতুর্দিকে ধূসরিত হইয়া থাকিত; এবং রাজরাজেশ্বর ধর্ম্মপালের সেবার জন্ত সমস্ত জম্বুদ্বীপ (ভারতবর্ষ) হইতে যে সমস্ত রাজগণ এখানে উপস্থিত হইয়াছিলেন তাঁহাদের অনন্ত পদাতিসেনার পদভরে বম্বুক্ষরা অবনত হইয়া থাকিত। শক্তি, সম্পদ ও ঐশ্বর্য্যের এই বর্ণনার মধ্যে যে আতিশয্য আছে তাহা তৎকালীন জাতীয় মনোভাবের পরিচায়ক।

এই নূতন জাতীয় জীবনের সৃষ্টিকর্তা ধর্ম্মপালকে বাঙ্গালী কি চক্ষে

দেখিত তাহা অনায়াসেই আমরা কল্পনা করিতে পারি। কবি একটি মাত্র শ্লোকে তাহার একটু আভাস দিয়াছেন। তিনি লিখিয়াছেন যে সীমাস্থদেশে গোপগণ, বনে বনচরগণ, গ্রামসমীপে জনসাধারণ, প্রত্যেক গৃহপ্রাঞ্জে ক্রীড়ারত শিশুগণ, প্রতি দোকানে ক্রয়বিক্রয়কারীগণ, এমন কি বিলাসগৃহের পিঞ্জরস্থিত শুকগণও সর্বদা ধর্মপালের গুণগান করিত; সুতরাং ধর্মপাল সর্বত্র এই আশ্বস্তি শ্রবণ করিতেন এবং লজ্জায় সর্বদাই তাঁহার বদনমণ্ডল নভ হইয়া থাকিত।

একদিন বাংলার মাঠে ঘাটে ঘরে বাহিরে ষাঁহার নাম লোকের মুখে মুখে ফিরিত তাঁহার কোন স্মৃতিই আজ বাংলাদেশে নাই। অদৃষ্টের নিদারুণ পরিহাসে বাঙ্গালী তাঁহার নাম পর্য্যন্ত ভুলিয়া গিয়াছিল। কয়েকখানি তাম্র-শাসন ও শিলালিপি এবং তিব্বতীয় গ্রন্থের সাহায্যে, আমরা তাঁহার কীষ্টি-কলাপের ক্ষীণ প্রতিধ্বনি মাত্র পাইয়াছি, কিন্তু তাঁহার জীবনীর বিশেষ কোন বিবরণ জানিতে পারি নাই। বাঙ্গালীর হুর্ভাগ্য বাংলাদেশের হুর্ভাগ্য যে কয়েকটি স্থল ঘটনা ব্যতীত এই মহাবীর ও মহাপুরুষের ব্যক্তিগত জীবন ও চরিত্র সম্বন্ধে আর কিছুই জানিবার উপায় নাই।

ধর্মপাল রাষ্ট্রকূটরাজ পরবলের কন্যা রম্মাদেবীকে বিবাহ করিয়াছিলেন। এই পরবল কে এবং কোথায় রাজত্ব করিতেন সে সম্বন্ধে নিশ্চিত কিছুই বলা যায় না। ৮৬১ অব্দে উৎকীর্ণ রাষ্ট্রকূট-বংশীয় পরবল নামক রাজার একখানি শিলালিপি মধ্যভারতে পাওয়া গিয়াছে। কেহ কেহ মনে করেন যে ইনিই রম্মাদেবীর পিতা। কিন্তু ঐ তারিখের অন্ধশতাব্দী পূর্বেই দীর্ঘকাল রাজত্বের পর ধর্মপালের মৃত্যু হয়। সুতরাং একেবারে অসম্ভব না হইলেও ধর্মপালের সহিত উক্ত পরবলের কন্যার বিবাহ খুব অস্বাভাবিক ঘটনা বলিয়াই গ্রহণ করিতে হইবে। রম্মাদেবী দাক্ষিণাত্যের প্রসিদ্ধ রাষ্ট্রকূট-বংশের কোন রাজকন্যা ছিলেন এই মতটিই অধিকতর বিশ্বাসযোগ্য বলিয়া মনে হয়।

ধর্মপালের কনিষ্ঠ ভ্রাতা বাক্পাল অনেক যুদ্ধে তাঁহার সেনাপতি ছিলেন এবং গর্গ নামে এক ব্রাহ্মণ তাঁহার প্রধান মন্ত্রী ছিলেন। বাক্পাল ও গর্গের বংশধরগণের লিপিতে এই দুই জনের কৃতিত্ব বিশদভাবে বর্ণিত হইয়াছে এবং প্রধানত তাঁহাদের সাহায্যেই যে ধর্মপাল সাম্রাজ্য প্রতিষ্ঠায় সফলকাম হইয়াছিলেন এরূপ স্পষ্ট ইঙ্গিতও আছে। এই উক্তির মধ্যে কিছু সত্য থাকিলেও ইহা যে অতিরঞ্জন সে বিষয়ে কোন সন্দেহ নাই।

পিতার মৃত্যু ধর্মপালও বৌদ্ধ ছিলেন। তিব্বত দেশীয় গ্রন্থে ধর্মপালের

অনেক কৌতুকলাপের উল্লেখ আছে। মগধে তিনি একটি বিহার বা বৌদ্ধমঠ নির্মাণ করেন। তাঁহার বিক্রমশীল এই দ্বিতীয় নাম বা উপাধি অনুসারে ইহা 'বিক্রমশীল-বিহার' নামে অভিহিত হয়। নালন্দার স্থায়ী বিক্রমশীল-বিহারও ভারতের সর্বত্র ও ভারতের বাহিরে প্রসিদ্ধি লাভ করিয়াছিল। গঙ্গাতটে এক শৈল শিখরে অবস্থিত এই বিহারে একটি প্রধান মন্দির এবং তাহার চারিদিকে ১০৭টি ছোট মন্দির ছিল। এটি একটি উচ্চ শিক্ষাকেন্দ্র ছিল এবং ১১৪ জন শিক্ষক এখানে নানা বিষয় অধ্যাপনা করিতেন। তিব্বতের বহু বৌদ্ধ ভিক্ষু এখানে অধ্যয়ন করিতে আসিতেন এবং এখানকার অনেক প্রসিদ্ধ বৌদ্ধ আচার্য্য তিব্বতে বিশুদ্ধ বৌদ্ধধর্ম প্রচার করিয়াছেন। বরেন্দ্র-ভূমিতে সোমপুর নামক স্থানে ধর্মপাল আর একটি বিহার প্রতিষ্ঠা করেন। সম্প্রতি রাজসাহী জিলার অন্তর্গত পাহাড়পুর নামক স্থানে ইহার বিরাট ধ্বংসাবশেষ আবিষ্কৃত হইয়াছে। এত বড় বৌদ্ধ-বিহার ভারতবর্ষের আর কোথাও ছিল বলিয়া জানা যায় নাই। যে সুবিস্তৃত অঙ্গনের চতুর্দিক ঘিরিয়া এই বিহারটি ছিল তাহার মধ্যস্থলে এক বিশাল মন্দিরের ভগ্নাবশেষ পাওয়া গিয়াছে। এই প্রকার গঠনরীতি ভারতবর্ষের আর কোন মন্দিরে দেখা যায় না। শিল্প-শীর্ষক অধ্যায়ে এই মন্দির ও বিহারের বর্ণনা করা যাইবে। পাহাড়পুরের নিকটবর্তী ওমপুর গ্রাম এখনও প্রাচীন সোমপুরের স্মৃতি রক্ষা করিয়া আসিতেছে। ওদন্তপুরেও (বিহার) ধর্মপাল সম্ভবত একটি বিহার নির্মাণ করিয়াছিলেন। তিব্বতীয় লেখক তারনাথের মতে ধর্মপাল ধর্মশিক্ষার জন্ত ৫০টি শিক্ষাকেন্দ্র প্রতিষ্ঠা করিয়াছিলেন।

ধর্মপাল নিজে বৌদ্ধ হইলেও হিন্দুধর্মের প্রতি তাঁহার কোন বিদ্বেষ ছিল না। নারায়ণের এক মন্দিরের জন্ত তিনি নিষ্কর ভূমি দান করিয়াছিলেন। তিনি শাস্ত্রানুশাসন মানিয়া চলিতেন এবং প্রতি বর্ষের লোক যাহাতে স্বধর্ম প্রতিপালন করে তাহার ব্যবস্থা করিতেন। তাঁহার প্রধান মন্ত্রী ছিলেন একজন ব্রাহ্মণ এবং ইহার বংশধরেরা বহুপুরুষ পর্য্যন্ত বৌদ্ধ পালরাজগণের প্রধানমন্ত্রীর পদে অধিষ্ঠিত ছিলেন। একালে রাজার ব্যক্তিগত ধর্মবিশ্বাসের সহিত রাজ্য-শাসন ব্যাপারের যে কোন সম্বন্ধ ছিল না ইহা সহজেই অনুমান করা যাইতে পারে।

খালিমপুর তাম্রশাসন ধর্মপালের বিজয়রাজ্যের ৩২ সম্বৎসরে লিখিত। ইহার পর ধর্মপাল আর কত বৎসর রাজত্ব করিয়াছিলেন তাহা নিশ্চিত জানা যায় না। তারনাথের মতে ধর্মপালের রাজ্যকাল ৬৪ বৎসর—কিন্তু ইহার সমর্থক কোন প্রমাণ নাই।

ধর্মপালের মৃত্যুর পর রম্মাদেবীর গর্ভজাত তাঁহার পুত্র দেবপাল সিংহাসনে আরোহণ করেন। ধর্মপালের খালিমপুর তান্ত্রশাসনে কিন্তু যুবরাজ ত্রিভুবনপালের উল্লেখ পাওয়া যায়। এই যুবরাজ ত্রিভুবনপালই দেবপাল নামে রাজা হন অথবা জ্যেষ্ঠভ্রাতা ত্রিভুবনপালের মৃত্যুতে কনিষ্ঠ দেবপাল পিতৃ-সিংহাসনে আরোহণ করেন তাহা নিশ্চিত বলা যায় না। এই শেষোক্ত অনুমানই সত্য বলিয়া মনে হয়। কারণ খালিমপুর তান্ত্রশাসনে রাজপুত্র দেবটেরও উল্লেখ আছে এবং অসম্ভব নহে যে ইহা দেবপাল নামের অপভ্রংশ। অবশ্য ত্রিভুবনপাল জীবিত থাকিলেও কনিষ্ঠ দেবপাল সিংহাসন অধিকার করিয়া থাকিতে পারেন। কিন্তু এ সকলই অনুমান মাত্র।

### ৩। দেবপাল (আ ৮১০ ৮৫০)

পরমেশ্বর পরমভট্টারক মহারাজাধিরাজ দেবপাল পিতার উপযুক্ত পুত্র ছিলেন এবং পিতৃসাম্রাজ্য অক্ষুণ্ণ রাখিতে সমর্থ হইয়াছিলেন। তিনি অনেক যুদ্ধে লিপ্ত হইয়াছিলেন এবং নূতন নূতন রাজ্য জয় করিয়াছিলেন। তাঁহার তান্ত্রশাসনে উক্ত হইয়াছে যে তাঁহার বিজয়বাহিনী দক্ষিণে বিদ্যাপর্বত ও পশ্চিমে কাশ্মীর দেশ অর্থাৎ কাশ্মীরের সীমান্ত পর্য্যন্ত অগ্রসর হইয়াছিল। তাঁহার সেনাপতি ও মন্ত্রীগণের বংশধরদের লিপিতে বিজিত রাজ্যের তালিকা পাওয়া যায়। পিতৃব্য বাক্পালের পুত্র জয়পাল তাঁহার সেনাপতি ছিলেন। জয়পালের বংশধর নারায়ণপালের তান্ত্রশাসনে উক্ত হইয়াছে যে জয়পাল দিগ্বিজয়ে অগ্রসর হইলে উৎকলের রাজা দূর হইতে তাঁহার নামমাত্র শ্রবণ করিয়াই অবসন্ন হইয়া নিজের রাজধানী পরিত্যাগ করিয়াছিলেন। প্রাগ-জ্যোতিষের (অগ্রাণ) রাজা জয়পালের আজ্ঞায় যুদ্ধোত্তম ত্যাগ করিয়া পালরাজের বশ্যতা স্বীকার করিয়াছিলেন। ধর্মপালের মন্ত্রী গর্গের পুত্র দর্ভপাণি এবং প্রপৌত্র কেদারমিশ্র উভয়েই দেবপালের রাজ্যকালে প্রধান মন্ত্রীর পদ অলঙ্কৃত করিয়াছিলেন। কেদারমিশ্রের পুত্র গুরবমিশ্রের লিপিতে উক্ত হইয়াছে যে দর্ভপাণির নীতিকৌশলে দেবপাল হিমালয় হইতে বিদ্যাপর্বত এবং পূর্ব ও পশ্চিম সমুদ্রের মধ্যবর্তী সমগ্র ভূভাগ করপ্রদ করিতে সমর্থ হইয়াছিলেন। এই লিপিতে আরও উক্ত হইয়াছে যে মন্ত্রী কেদারমিশ্রের বুদ্ধিবলের উপাসনা করিয়া গোড়েশ্বর দেবপালদেব উৎকলকুল ধ্বংস, ছনগর্ব্ব ধ্বংস এবং ত্রিভু ও গুর্জরনাথের দর্প চূর্ণ করিয়া দীর্ঘকাল পর্য্যন্ত আসমুদ্র পৃথিবী উপভোগ করিয়াছিলেন।

উল্লিখিত লিপি দুইখানির মতে দেবপালের রাজ্যের যত কিছু গৌরব ও কৃতিত্ব তাহা কেবল মন্ত্রীদ্বয় ও সেনাপতিরই প্রাপ্য। গুরবমিশ্রের লিপিতে ইহাও বলা হইয়াছে যে অগণিত রাজন্যবর্গের প্রভু সম্রাট দেবপাল ( উপদেশ গ্রহণের জন্য স্বয়ং ) দর্ভপাণির অবসরের অপেক্ষায় তাঁহার দ্বারদেশে দণ্ডায়মান থাকিতেন এবং রাজসভায় অগ্রে এই মন্ত্রীদ্বয়কে মহার্ঘ্য আসন প্রদান করিয়া স্বয়ং সচকিতভাবেই সিংহাসনে উপবেশন করিতেন।

যখন এই সমুদয় উক্তি লিপিবদ্ধ হইয়াছিল তখন পালবংশের গৌরব-রবি অন্তমিত। সুতরাং তখনকার দুর্বলচিত্ত পালরাজের পক্ষে এই প্রকার আচরণ সম্ভবপর হইলেও ধর্মপালের পুত্র আর্ঘ্যাবর্তের অধীশ্বর দেবপালদেবের সম্বন্ধে ইহা বিশ্বাস করা কঠিন। এই সমুদয় অত্যাক্তির মধ্যে কি পরিমাণ সত্য নিহিত আছে তাহার অনুসন্ধান নিষ্প্রয়োজন। কারণ দেবপালের রাজ্যকালে বাংলার সাম্রাজ্য বিস্তারই ইতিহাসের মুখ্য ঘটনা, তাহা কি পরিমাণে সেনাপতির বাজ্বলে অথবা মন্ত্রীর বুদ্ধিকৌশলে হইয়াছিল এই বিচার অপেক্ষাকৃত গৌণ বিষয়।

উপরে বিজিত রাজগণের যে বিবরণ দেওয়া হইয়াছে তাহা হইতে সহজেই বুঝা যায় যে দেবপাল উড়িষ্যা ও আসাম বাংলার এই দুই সীমান্ত প্রদেশ জয় করেন। আসামের রাজা বিনায়ুদ্ধে বশ্যতা স্বীকার করিয়া সামন্ত রাজার স্থায় রাজত্ব করিতেন। কিন্তু উড়িষ্যার রাজাকে দূরীভূত করিয়া উড়িষ্যা সম্ভবত পালরাজ্যের অন্তর্ভুক্ত করা হইয়াছিল। উৎকলাধীশের রাজধানী পরিত্যাগ এবং 'উৎকীলিতোৎকলকুল' এই প্রকার পদপ্রয়োগ এই সিদ্ধান্তের সমর্থন করে। উড়িষ্যার ভঞ্জ রাজবংশের লিপি হইতে জানা যায় যে রণভঞ্জের পর এই বংশীয় রাজগণ প্রাচীন খিজলী রাজ্য ও রাজধানী ত্যাগ করিয়া উড়িষ্যার দক্ষিণ সীমান্তে গঙ্গাম জিলায় আশ্রয় লইতে বাধ্য হইয়াছিলেন। রণভঞ্জ সম্ভবত নবম শতাব্দির প্রথম ভাগ পর্য্যন্ত রাজত্ব করেন। উড়িষ্যার করবংশীয় সম্রাট শুভকরের পুত্র সম্রাট শিবকর নবম শতাব্দির প্রারম্ভে রাজত্ব করেন। ইহার পর দুইশত বৎসর পর্য্যন্ত এই রাজবংশের সম্বন্ধে আর কিছুই জানা যায় না। সুতরাং খুব সম্ভব যে এই দুই বংশীয় রাজাকে দূর করিয়াই দেবপাল উড়িষ্যা, অন্তত তাহার অধিকাংশ ভাগ, অধিকার করেন।

দেবপাল যে ছগজাতির গর্ব খর্ব করেন তাহাদের রাজ্য কোথায় ছিল তাহা নিশ্চিত বলা যায় না। ষষ্ঠ শতাব্দির প্রারম্ভে ছগজাতি আর্ঘ্যাবর্তের পশ্চিম ভাগে বিস্তৃত রাজ্য স্থাপন করিয়াছিল। কিন্তু তাহারা ক্রমশ হীনবল

ইইয়া পড়ে এবং বিভিন্ন স্থানে ক্ষুদ্র ক্ষুদ্র রাজ্য স্থাপন করে। চর্ষচরিত পাঠে জানা যায় যে উত্তরাপথে হিমালয়ের নিকটে ছগদের একটি রাজ্য ছিল। সম্ভবত দেবপাল এই রাজ্য জয় করিয়া কাশ্মোজ পর্য্যন্ত অগ্রসর হইয়াছিলেন। কাশ্মোজ পঞ্চনদের উত্তর পশ্চিমে ও গান্ধারের ঠিক উত্তরে এবং ছগরাজ্যের স্থায় পাল সাম্রাজ্যের সীমান্তে অবস্থিত ছিল। সুতরাং এই দুই রাজ্যের সহিত দেবপালের বিরোধ খুবই স্বাভাবিক। এখানে বলা আবশ্যক যে মালব প্রদেশেও একটি ছগ-রাজ্য ছিল।

দেবপাল যে গুর্জর রাজার দর্প চূর্ণ করিয়াছিলেন তিনি সম্ভবত নাগভটের পৌত্র প্রথম ভোজ। রাষ্ট্রকূটরাজ তৃতীয় গোবিন্দের হস্তে নিদারুণ পরাজয়ের পর প্রতীহাররাজ নাগভট ও তাঁহার পুত্র রামভদ্রের শক্তি অতিশয় ক্ষীণ হইয়াছিল। রামভদ্রের রাজ্যকালে প্রতীহার রাজা শত্রু কর্তৃক বিধ্বস্ত হইয়াছিল এরূপ ইঙ্গিতও এই বংশের লিপিতে পাওয়া যায়। তৎপুত্র ভোজ প্রথমে কিছু সফলতা লাভ করিয়াছিলেন, কারণ তিনি ৮৩৬ অব্দে কনৌজ ও কালঞ্জরের আধিপত্য লাভ করিয়াছিলেন; কিন্তু ৮৬৯ অব্দের পূর্বে তিনি স্বীয় রাজ্য গুর্জরত্না (বর্তমান রাজপুতানা) হইতে বিতাড়িত এবং ৮৬৭ অব্দের পূর্বে রাষ্ট্রকূটরাজ কর্তৃক পরাজিত হন। সম্ভবত ৮৪০ হইতে ৮৬০ অব্দের মধ্যে দেবপাল তাঁহাকে পরাজিত করেন।

এইরূপে দেখিতে পাই যে, ধর্মপাল যে সাম্রাজ্য প্রতিষ্ঠা করিয়াছিলেন দেবপাল তাহার সীমান্তস্থিত কামরূপ, উৎকল, ছগদেশ ও কাশ্মোজ জয় করেন এবং চিরশত্রু প্রতীহাররাজকে পরাজিত করেন। সুতরাং প্রশংসিকা যে তাঁহার রাজ্য হিমালয় হইতে বিষ্ণুপর্বত এবং পূর্বে হইতে পশ্চিম সমুদ্র পর্য্যন্ত বিস্তৃত বলিয়া বর্ণনা করিয়াছেন তাহা মোটামুটিভাবে সত্য বলিয়া গ্রহণ করা যায়।

মুস্কেরে প্রাপ্ত দেবপালের তাম্রশাসনে তাঁহার সাম্রাজ্য হিমালয় হইতে রামেশ্বর সেতুবন্ধ পর্য্যন্ত বিস্তৃত ছিল বলিয়া বর্ণিত হইয়াছে। ইহা অতিরঞ্জিত এবং নিছক কবিকল্পনা বলিয়াই সকলে গ্রহণ করিয়াছেন। কিন্তু ইহার মূলে কিছু সত্য থাকিতেও পারে। দেবপাল যে দ্রবিড়নাথের দর্প চূর্ণ করিয়াছিলেন ঐতিহাসিকেরা তাঁহাকে দাক্ষিণাত্যের রাষ্ট্রকূটরাজ বলিয়াই গ্রহণ করিয়াছেন। প্রতীহার রাজার স্থায় রাষ্ট্রকূট রাজার সহিতও পালরাজগণের বংশানুক্রমিক শত্রুতা ছিল, সুতরাং দেবপাল কোনও রাষ্ট্রকূটরাজকে পরাভূত করিয়া থাকিবেন ইহা খুবই স্বাভাবিক। কিন্তু দ্রবিড় বলিতে সাধারণত দাক্ষিণাত্য বুঝায় না, ইহা দক্ষিণ ভারত অর্থাৎ কৃষ্ণা নদীর দক্ষিণস্থিত ভূভাগের নাম। এই মূদুর



দেশে যে দেবপাল যুদ্ধে লিপ্ত হইয়াছিলেন ইহার সপক্ষে কোন প্রমাণ না থাকায়ই পণ্ডিতগণ তাঁহার প্রতিদ্বন্দ্বী দ্রবিড়নাথ ও রাষ্ট্রকূটরাজকে অভিন্ন বলিয়া গ্রহণ করিয়াছেন। কিন্তু দক্ষিণ ভারতের কয়েকখানি লিপি হইতে জানা যায় যে মগধ, কলিঙ্গ, চোল, পল্লব ও গঙ্গ প্রভৃতি রাজ্য মিলিত হইয়া পাণ্ড্য-রাজের সহিত যুদ্ধ করে। কুস্থকোনম্ নামক স্থানে পাণ্ড্যরাজ শ্রীমার শ্রীবল্লভ ইহাদের পরাস্ত করেন। শ্রীমার শ্রীবল্লভের রাজ্যকাল ৮৫১ হইতে ৮৬২ অব্দ। এই সময় দেবপাল যে মগধের রাজা ছিলেন সে সম্বন্ধে কোন সন্দেহ নাই; এবং উৎকল জয় করার পর যে তিনি কলিঙ্গ প্রভৃতি দেশের সঙ্গে রাজনৈতিক সম্বন্ধে আবদ্ধ হইয়া থাকিবেন ইহাও খুব স্বাভাবিক। সুতরাং অসম্ভব নহে যে উল্লিখিত মিলিত শক্তির সহিত দেবপাল পাণ্ড্যরাজ্যে কোন যুদ্ধে জয়লাভ করিয়াছিলেন। রামেশ্বর সেতুবন্ধ পাণ্ড্যরাজ্যে অবস্থিত। সুতরাং দেবপালের সভাকবি হয়ত' এই সমরবিজয় উপলক্ষ করিয়া দেবপালের রাজ্য রামেশ্বর সেতুবন্ধ পর্য্যন্ত বিস্তৃত বলিয়া বর্ণনা করিয়াছেন।

দেবপাল অন্তত ৩৫ বৎসর রাজত্ব করিয়াছিলেন। তাঁহার রাজ্যকাল ৮১০ হইতে ৮৫০ অব্দ অনুমান করা যাইতে পারে। তাহার সময়ে পাল সাম্রাজ্য গৌরবের চরম শিখরে আরোহণ করিয়াছিল। তাঁহার রাজত্বকালে বাঙ্গালী সৈন্য ব্রহ্মপুত্র হইতে সিন্ধুস্রোতর তীর এবং সম্ভবত দক্ষিণ ভারতের প্রায় শেষ প্রান্ত পর্য্যন্ত বিজয়াভিযান করিয়াছিল। প্রায় সমগ্র আধাবর্ষ তাঁহাকে অধীশ্বর বলিয়া স্বীকার করিত। ভারতবর্ষের বাহিরেও তাঁহার খ্যাতি ও প্রতিপত্তি বিস্তৃত হইয়াছিল। যবদ্বীপ, সুমাত্রা ও মলয় উপদ্বীপের অধিপতি শৈলেন্দ্রবংশীয় মহারাজা বালপুত্রদেব তাঁহার নিকট দূত প্রেরণ করেন। শৈলেন্দ্ররাজ প্রসিদ্ধ নালন্দাবিহারে একটি মঠ প্রতিষ্ঠা করিয়াছিলেন এবং ইহার ব্যয় নির্বাহের জন্য পাঁচটি গ্রাম প্রার্থনা করেন। তদনুসারে দেবপাল পাঁচটি গ্রাম দান করেন। নালন্দা তখন সমগ্র এশিয়ায় বৌদ্ধধর্মের প্রধান কেন্দ্র হইয়া উঠিয়াছিল এবং পালরাজগণও বৌদ্ধধর্মের গৃষ্ঠপোষকরূপে ভারতের বাহিরে সর্বত্র বৌদ্ধগণের নিকট সুপরিচিত ও সম্মানিত ছিলেন। দেবপাল যে নালন্দাবিহারের সহিত ঘনিষ্ঠভাবে সংযুক্ত ছিলেন অথচ একখানি শিলালিপিতে তাহার কিছু আভাস আছে। 'ইহা হইতে আমরা জানিতে পারি যে নগরহার (বর্তমান জালালাবাদ) নিবাসী ব্রাহ্মণবংশীয় ইন্দ্রগুপ্তের পুত্র বীরদেব "দেবপাল নামক ভুবনাধিপতির নিকট পূজাপ্রাপ্ত" এবং "নালন্দার পরিপালনভার প্রাপ্ত হইয়াছিলেন।"

১. ৮৫১ অব্দে আরবীভাষায় লিখিত একখানি গ্রন্থ হইতে জানা যায় যে তৎকালে ভারতে তিনটি প্রধান রাজ্য ছিল। ইহাদের মধ্যে দুইটি যে রাষ্ট্রকূট ও গুর্জর প্রতীহার তাহা বেশ বোঝা যায়। তৃতীয়টি রুদ্রি অথবা রুদ্র। এই নামের অর্থ বা উৎপত্তি যাহাই হউক ইহা যে পালরাজ্যকে স্মৃতিত করে সে বিষয়ে কোন সন্দেহ নাই। উল্লিখিত গ্রন্থ অনুসারে রুদ্র দেশের রাজা প্রতিবেশী গুর্জর ও রাষ্ট্রকূট রাজার সহিত সর্বদাই যুদ্ধে লিপ্ত থাকিতেন। কিন্তু তাঁহার সৈন্য শত্রুসৈন্য অপেক্ষা সংখ্যায় অধিক ছিল। যুদ্ধ যাত্রাকালে ৫০,০০০ রণহস্তী এবং সৈন্যগণের বস্ত্রাদি ধৌত করিবার জন্যই দশ পনেরো হাজার অনুচর তাঁহার সঙ্গে থাকিত। এই বর্ণনা সম্ভবত দেবপাল সম্বন্ধে প্রযোজ্য।

সোড়ল প্রণীত উদয়সুন্দরীকথা নামক কাব্য হইতে জানা যায় যে অভিনন্দ পালরাজ যুবরাজের সভাকবি ছিলেন। অভিনন্দ প্রণীত রামচরিত কাব্যে যুবরাজের আরও কিছু পরিচয় পাওয়া যায়। তিনি ধর্মপালের বংশে জন্মগ্রহণ করিয়াছিলেন এবং “পালকুলচন্দ্র” এবং “পালকুল প্রদীপ” প্রভৃতি আখ্যায় বিভূষিত হইয়াছেন। তাঁহার উপাধি ছিল হারবর্ষ এবং পিতার নাম বিক্রমশীল। তিনি অনেক রাজা জয় করিয়াছিলেন।

যুবরাজ হারবর্ষ যে পালবংশীয় রাজা ছিলেন সে বিষয়ে কোন সন্দেহ নাই। বিক্রমশীল যে ধর্মপালেরই নামাস্তর তাহাতেও সন্দেহ করিবার বিশেষ কারণ নাই—কারণ তাঁহার প্রতিষ্ঠিত বিহার শ্রীমদ্-বিক্রমশীল-দেব-মহাবিহার নামে অভিহিত হইয়াছে। সুতরাং যুবরাজ হারবর্ষ ধর্মপালের পুত্র ছিলেন এইরূপ অনুমান করা যাইতে পারে। কিন্তু হারবর্ষ যুবরাজ দেবপালেরই নামাস্তর অথবা তাঁহার ভ্রাতা এ সম্বন্ধে নিশ্চিত কিছু বলা যায় না।

ধর্মপাল ও দেবপালের রাজ্যকালে বাংলার শক্তি ও সমৃদ্ধি কিরূপ বাড়িয়াছিল তাহা সহজেই অনুমান করা যাইতে পারে। কিন্তু আশ্চর্যের বিষয় এই যে তিব্বতদেশীয় গ্রন্থে বর্ণিত হইয়াছে যে ধর্মপাল তিব্বতের রাজা খ্রী-স্রং-ল্দে-ব্গ সনের (৭২৫-৭২৭ অব্দ) বশ্যতা স্বীকার করেন এবং তিব্বতীয় রাজা রল্-প-চন্ (৮১৭-৮৩৬) গঙ্গাসাগর পর্য্যন্ত জয় করেন। এই প্রকার দাবীর মূলে কতদূর সত্য নিহিত আছে তাহা জানিবার উপায় নাই কারণ ভারতীয় কোন গ্রন্থ বা লিপিতে উক্ত তিব্বতীয় অভিযানের কোন উল্লেখই নাই। তবে এরূপ অভিযান অসম্ভব নহে এবং সম্ভবত

মাঝে মাঝে ইহার ফলে পালরাজগণ বিপন্ন হইতেন। নাগভট কর্তৃক ধর্মপালের পরাজয় এবং প্রথম ভোজের ৮৩৬ অব্দে কনৌজ অধিকার প্রভৃতি ঘটনার সহিত এরূপ কোন তিব্বতীয় অভিযানের প্রত্যক্ষ অথবা পরোক্ষ সম্বন্ধ থাকা বিচিত্র নহে।

অষ্ট শতাব্দীর অধিক কাল পর্য্যন্ত ধর্মপাল ও দেবপাল আর্য্যাবর্ষে বিস্তৃত সাম্রাজ্যের অধীশ্বর ছিলেন। অনেকে মনে করেন যে হর্ষবর্দ্ধনের সাম্রাজ্যই আর্য্যাবর্ষের শেষ হিন্দুসাম্রাজ্য। কিন্তু পালসাম্রাজ্য যে ইহার অপেক্ষা বিস্তৃত ও অধিককাল স্থায়ী হইয়াছিল সে বিষয়ে কোন সন্দেহ নাই।

প্রাচীন মৌর্য্য ও গুপ্তসাম্রাজ্যের সহিত পালসাম্রাজ্যের প্রকৃতিগত প্রভেদ ছিল। মৌর্য্য ও গুপ্তসাম্রাজ্যের বিস্তৃত ভূভাগ স্বয়ং সম্রাট অথবা তন্নিযুক্ত শাসনকর্তার অধীনে থাকিত। কিন্তু বাংলা ও বিহার ব্যতীত আর্য্যাবর্ষের অপর কোন প্রদেশ যে পালরাজগণের বা তাঁহাদের কর্মচারীর শাসনাধীন ছিল এরূপ প্রমাণ পাওয়া যায় নাই। পরাজিত রাজগণ পালরাজগণের অধীনতা ও কোনও কোনও স্থলে করদান করিতে স্বীকার করিলেই সম্ভবত তাঁহারা বিনা বাধায় স্থায়ী রাজ্য শাসন করিতে পারিতেন। তাঁহারা পালরাজগণকে উপঢৌকন পাঠাইতেন, মাঝে মাঝে তাঁহাদের সভায় উপস্থিত থাকিতেন এবং সম্ভবত প্রয়োজন হইলে সৈন্য দিয়া সাহায্য করিতেন। কিন্তু ইহার অতিরিক্ত আর কোন প্রকার দায়িত্ব সম্ভবত তাঁহাদের ছিল না। এ সম্বন্ধে এ পর্য্যন্ত যে প্রমাণ পাওয়া গিয়াছে তাহা এতই স্বল্প যে নিশ্চিত কোন প্রকার সিদ্ধান্ত করা কঠিন; তবে হর্ষবর্দ্ধনের সাম্রাজ্য যে এ বিষয়ে পালসাম্রাজ্যের অপেক্ষা শ্রেষ্ঠ ছিল এবং সাম্রাজ্যের বিভিন্ন অংশে ধর্মপাল বা দেবপাল অপেক্ষা সাক্ষাৎ সম্বন্ধে তাঁহার অধিকতর শক্তি বা ক্ষমতা ছিল এরূপ মনে করিবার কোনই কারণ নাই।

বাল্মীকীর বাহুবলে আর্য্যাবর্ষে বিশাল সাম্রাজ্য প্রতিষ্ঠাই ধর্মপাল ও দেবপালের রাজ্যের প্রধান ঐতিহাসিক ঘটনা। বাল্মীকীর জাতীয় ইতিহাসে ইহার অনুরূপ শক্তি বা সমৃদ্ধির পরিচয় ইহার পূর্বে বা পরে আর কখনও পাওয়া যায় নাই।

## সপ্তম পারিচ্ছেদ

### পাল সাম্রাজ্যের পতন

দেবপালের মৃত্যুর পর তিনশত বৎসর পর্যন্ত পালরাজবংশের ইতিহাস কবি-বর্ণিত “পতন-অভ্যুদয়-বন্ধুর পন্থায়” অগ্রসর হইয়াছিল। উত্থান পতনের মধ্য দিয়া চারিশত বৎসরকাল অতিবাহিত করিয়া অবশেষে এই প্রসিদ্ধ রাজ্য ও রাজবংশ ধ্বংসপ্রাপ্ত হয়। ইহাই স্বাভাবিক কালের গতি। বরং এত সুদীর্ঘকাল রাজত্বের দৃষ্টান্ত আর্য্যাবর্তের ইতিহাসে অতি বিরল, নাই বলিলেও চলে।

দেবপালের মৃত্যুর পর বিগ্রহপাল সিংহাসনে আরোহণ করেন। দেবপাল ও বিগ্রহপালের সম্বন্ধ লইয়া পণ্ডিতগণের মধ্যে মতভেদ আছে। কাহারও মতে বিগ্রহপাল দেবপালের পুত্র। কিন্তু অধিকাংশ পণ্ডিতগণই মনে করেন যে বিগ্রহপাল ধর্ম্মপালের ভ্রাতা বাক্পালের পৌত্র ও জয়পালের পুত্র। এই মতই সমীচীন বলিয়া বোধ হয় এবং বিগ্রহপালের পুত্র নারায়ণপালের তাম্র-শাসনে পালরাজগণের যে বংশাবলী বিবৃত হইয়াছে তাহাও এই মতের সমর্থন করে। ইহাতে তৃতীয় শ্লোকে ধর্ম্মপালের বর্ণনার পরে চতুর্থ শ্লোকে তাঁহার কনিষ্ঠ ভ্রাতা বাক্পালের, ও পঞ্চম শ্লোকে তাঁহার পুত্র জয়পালের উল্লেখ আছে। এই শ্লোকে কথিত হইয়াছে যে জয়পাল ধর্ম্মদেয়গণকে যুদ্ধে বশীভূত করিয়া পূর্বজ দেবপালকে ভুবনরাজ্যস্থলের অধিকারী করিয়া দিয়াছিলেন। পরবর্ত্তী ষষ্ঠ শ্লোকে জয়পাল কৃষ্ণ উৎকল ও কামরূপ জয় বর্ণিত হইয়াছে। সপ্তম শ্লোকে বলা হইয়াছে “তাঁহার অজ্ঞাতশত্রুর হায়ে বিগ্রহপাল নামক পুত্র জন্মগ্রহণ করিয়াছিলেন”। সংস্কৃত রচনারীতি অনুসারে ‘তাঁহার’ এই সর্ব্বনাম শব্দ নিকটবর্ত্তী বিশেষ্য পদকেই সূচিত করে। সুতরাং পঞ্চম ও সপ্তম শ্লোকের ‘তাঁহার’ এই সর্ব্বনাম শব্দ যথাক্রমে বাক্পাল ও জয়পাল সম্বন্ধে প্রযুক্ত হইয়াছে ইহাই সঙ্গত বলিয়া মনে হয়। অতএব বাক্পালের পুত্রই যে জয়পাল, এবং জয়পালের পুত্র বিগ্রহপাল, উক্ত দুই শ্লোক হইতে এইরূপই সিদ্ধান্ত হয়। অপর পক্ষ বলেন যে দেবপাল জয়পালের পূর্বজ বলিয়া বর্ণিত হইয়াছেন, সুতরাং জয়পাল দেবপালের কনিষ্ঠ সহোদর অর্থাৎ ধর্ম্মপালের পুত্র। অতএব পঞ্চম ও সপ্তম শ্লোকের ‘তাঁহার’ এই সর্ব্বনাম শব্দ যথাক্রমে ধর্ম্মপাল ও

দেবপালের সহকর্মেই প্রযোজ্য। এই যুক্তি সঙ্গত বলিয়া মনে হয় না, কারণ পূর্বজ শব্দে কেবল জ্যেষ্ঠ বুঝায়, জ্যেষ্ঠ সহোদর অর্থ গ্রহণ করিতে হইবে এমন কোন কথা নাই। অপর পক্ষে ইহাও বিবেচ্য যে ধর্মপাল বা দেবপালের তাম্রশাসনে বাকুপালের বা জয়পালের কোন উল্লেখ নাই, সহসা নারায়ণপালের তাম্রশাসনে তাঁহাদের এই গুণ-ব্যাখ্যানের হেতু কি? ইহার একমাত্র সঙ্গত কারণ এই মনে হয় যে বিগ্রহপাল ও তাঁহার বংশধরগণ দেবপালের স্মারকসঙ্গত উত্তরাধিকারী ছিলেন না, সুতরাং তাঁহাদের পূর্বপুরুষগণের কৃতিত্ব দ্বারা ইহাদের সিংহাসন অধিকারের সমর্থন করার প্রয়োজন ছিল। অত্যাধিক তিন পুরুষ পরে এই প্রাচীন কৌত্তিগাথা উদ্ধারের আর কোন যুক্তি পাওয়া যায় না।

দেবপালের কোন পুত্র না থাকায় বিগ্রহপাল পিতৃব্যের সিংহাসন অধিকার করিয়াছিলেন ইহা খুব সম্ভব বলিয়া মনে হয় না, কারণ দেবপালের রাজ্যের ৩৩ বর্ষে অর্থাৎ তাঁহার মৃত্যুর অনধিককাল পূর্বে উৎকীর্ণ একখানি তাম্রশাসনে তাঁহার পুত্র রাজ্যপালের যৌবরাজ্যে অভিষেকের উল্লেখ আছে। অবশ্য পিতার জীবিতকালেই রাজ্যপালের মৃত্যু হইয়া থাকিতে পারে। কিন্তু ইহাও অসম্ভব নহে যে সেনাপতি জয়পাল বৃদ্ধ রাজা দেবপালের মৃত্যুর পর অল্পগত সৈন্যবলের সাহায্যে নিজের পুত্রকেই সিংহাসনে বসাইয়াছিলেন। দেবপালের মৃত্যুর পরই যে পালরাজ্য ধ্বংসোন্মুখ হইয়াছিল হয়ত এই গৃহবিবাদই তাহার পথ প্রশস্ত করিয়া দিয়াছিল। কিন্তু এ সম্বন্ধে উপযুক্ত প্রমাণ না থাকায় নিশ্চিত কিছু বলা যায় না।

বিগ্রহপাল শূরপাল নামেও পরিচিত ছিলেন। তিনি শাস্তিপ্রিয় ও সংসারবিরাগী ছিলেন। অল্পকাল (আ ৮৫০-৮৫৪) রাজ্য করিয়াই তিনি পুত্র নারায়ণপালের হস্তে রাজ্যভার অর্পণ করিয়া বানপ্রস্থ অবলম্বন করেন। নারায়ণপাল সুদীর্ঘকাল রাজত্ব করেন (আ ৮৫৪-৯০৮)। তাঁহার ৫৭ রাজ্যসংবৎসরের একখানি লিপি আবিষ্কৃত হইয়াছে। তিনিও পিতার ন্যায় উত্তমহীন শাস্তিপ্রিয় ছিলেন। কেদারমিশ্রের পুত্র গুরবমিশ্র তাঁহার মন্ত্রী ছিলেন। এই গুরবমিশ্রের লিপিতে ধর্মপাল ও দেবপালের অনেক রাজ্যজয়ের উল্লেখ আছে। কিন্তু বিগ্রহপাল ও নারায়ণপাল সম্বন্ধে সেরূপ কোন উক্তি নাই। রাজা শূরপাল সম্বন্ধে উক্ত হইয়াছে যে তিনি কেদারমিশ্রের যজ্ঞস্থলে উপস্থিত হইয়া অনেকবার অশ্রাবনতশিরে পবিত্র শাস্তিবারি গ্রহণ করিয়াছিলেন।

ধর্মপাল ও দেবপাল বাহুবলে যে বিশাল সাম্রাজ্য প্রতিষ্ঠা করিয়াছিলেন যজ্ঞের শাস্তিবারি বা তপস্বীদ্বারা তাহা রক্ষা করা সম্ভবপর ছিল না। সুতরাং বিগ্রহপাল ও নারায়ণপালের অর্ধ শতাব্দীর অধিককালব্যাপী রাজ্যকালে বিশাল পালসাম্রাজ্য খণ্ড বিখণ্ড হইয়া গেল, এমন কি বিহার ও বাংলা দেশের কোন কোন অংশও বহিঃশত্রু কর্তৃক অধিকৃত হইল।

রাষ্ট্রকূটরাজ অমোঘবর্ষের লিপিতে উক্ত হইয়াছে যে অঙ্গ বঙ্গ ও মগধের অধিপতি তাঁহার বশ্যতা স্বীকার করিয়াছিলেন। আ ৮৬০ অব্দে অমোঘবর্ষ কুষা ও গোদাবরী নদীর মধ্যবর্তী বেঙ্গি দেশ জয় করেন—সম্ভবত ইহার অনতিকাল পরেই তিনি পালরাজ্য আক্রমণ করেন। অঙ্গ বঙ্গ ও মগধের পৃথক উল্লেখ দেখিয়া মনে হয় যে এগুলি তখন পৃথক স্বাধীন রাজ্যে পরিণত হইয়াছিল—কিন্তু এ অনুমান সত্য নাও হইতে পারে। সম্ভবত পালরাজ পরাজিত হইয়াছিলেন—কিন্তু রাষ্ট্রকূটরাজ যে স্থায়ীভাবে এ দেশের কোন অংশ অধিকার করিয়াছিলেন তাহা মনে হয় না। তবে এই পরাজয়ে পালরাজগণের খ্যাতি ও প্রতিপত্তির অনেক লাঘব হইয়াছিল এবং সম্ভবত এই সুযোগে উড়িষ্যার শুল্কিবংশীয় মহারাজাধিরাজ রণসুস্ত রাঢ়ের কিয়দংশ অধিকার করেন।

পালরাজ যখন এইরূপ দক্ষিণ দিক হইতে আপন শত্রুর আক্রমণে ব্যতিব্যস্ত তখন প্রতীহাররাজ ভোজ পুনরায় আর্য্যাবর্তে স্বীয় প্রাধাত্য স্থাপনের উদ্যোগ করিতে লাগিলেন। যতদিন দেবপাল জীবিত ছিলেন ততদিন তাঁহার চেষ্টা ফলবতী হয় নাই। কিন্তু নারায়ণপালের মৃত্যু দুর্বল রাজার পক্ষে ভোজের গতিরোধ করা সম্ভবপর হইল না। ভোজ কলচুরি ও গুহিলোট রাজগণের সহায়তায় নারায়ণপালকে গুরুত্বরূপে পরাজিত করিলেন। ইহা পর ভোজ আর্য্যাবর্তে সর্বত্র আপন প্রভুত্ব বিস্তার করিলেন। পাল সাম্রাজ্যের ধ্বংসের উপর প্রতীহার রাজ্যের ভিত্তি স্থাপিত হইল। ভোজের পুত্র মহেন্দ্রপাল পুনরায় পালরাজ্য আক্রমণ করিয়া বিহার প্রদেশ অধিকার করিলেন। তারপর অগ্রসর হইয়া ক্রমে তিনি উত্তর বাংলায় স্বীয় প্রাধাত্য স্থাপন করিলেন। বাংলা ও বিহারে মহেন্দ্রপালের যে সমুদয় লিপি পাওয়া গিয়াছে তাহাদের তারিখ ৮৮৭ হইতে ৯০৪ অব্দের মধ্যে। কলচুরিরাজ কোকিলও সম্ভবত এই সময়ে বঙ্গ আক্রমণ করিয়া ইহার ধনরত্ন লুণ্ঠন করেন।

এইরূপে নবম শতাব্দের শেষভাগে কেবলমাত্র আর্য্যাবর্তের বিস্তৃত সাম্রাজ্য নহে, পালরাজগণের নিজ রাজ্যও শত্রুর করতলগত হইল। নারায়ণ-

পালের অক্ষমতা ব্যতীত হয়ত এইরূপ শোচনীয় পতনের অশ্রু কারণও বিদ্যমান ছিল। দেবপালের মৃত্যুর পর পালরাজবংশের গৃহবিবাদের কথা পূর্বেই আলোচিত হইয়াছে। রাষ্ট্রকূটরাজ দ্বিতীয় কৃষ্ণ ( আ ৮৮০-৯১৪ ) পালরাজ্য আক্রমণ করিয়াছিলেন। বিজিত কামরূপ ও উৎকলের রাজগণ এই সময়ে প্রবল হইয়া ওঠেন এবং সম্ভবত তাঁহাদের সহিতও নারায়ণ-পালের সংগ্রাম হইয়াছিল। এইরূপে আভ্যন্তরিক কলহ ও চতুর্দিকে বহিঃশত্রুর আক্রমণে পালরাজ্যের দুর্দশা চরমে পৌঁছিয়াছিল।

পালরাজগণ আর্য্যাবর্ত ও দাক্ষিণাত্যের প্রবল রাজবংশের সহিত বৈবাহিক সূত্রে আবদ্ধ হইয়া নিজেদের শক্তি বৃদ্ধির চেষ্টা করিয়াছিলেন। বিগ্রহপাল কলচুরি অথবা হৈহয় রাজবংশের কন্যা লজ্জাদেবীকে বিবাহ করিয়াছিলেন। কিন্তু ইহা সত্ত্বেও কলচুরিগণ নারায়ণপালের শত্রুপক্ষে যোগদান করিয়াছিল। নারায়ণপালের পুত্র রাজ্যপাল রাষ্ট্রকূটরাজ তুঙ্গের কন্যা ভাগ্যদেবীকে বিবাহ করেন। এই তুঙ্গ সম্ভবত দ্বিতীয় কৃষ্ণের পুত্র জগত্তুঙ্গ। এই বিবাহের ফলে পালরাজগণের কিছু সুবিধা হইয়াছিল কিনা জানা যায় না। কিন্তু নারায়ণ-পালের সুদীর্ঘ রাজ্যের শেষে তিনি প্রতীহারগণকে দূর করিয়া পুনরায় বিহার ও বাংলায় স্থায়ী প্রাধান্য স্থাপন করিতে সমর্থ হইয়াছিলেন।

নারায়ণপালের মৃত্যুর পর যথাক্রমে তাঁহার পুত্র রাজ্যপাল ( আ ৯০৮-৯৪০ ) ও তৎপুত্র দ্বিতীয় গোপাল ( আ ৯৪০-৯৬০ ) রাজত্ব করেন। পালরাজগণের সভাকবি লিখিয়াছেন যে রাজ্যপাল সমুদ্রের ন্যায় গভীর জলাশয় খনন ও পর্বতের তুল্য উচ্চ মন্দির নির্মাণ করিয়া খ্যাতিলাভ করিয়াছিলেন। কিন্তু তিনি রাজ্যপাল ও গোপালের কোনরূপ বিজয়কাহিনীর উল্লেখ করেন নাই। রাজ্যপাল সম্ভবত নিরুদ্বেগে রাজত্ব করিতে পারিয়াছিলেন। কারণ তাঁহার রাজ্যের প্রারম্ভেই চিরশত্রু প্রতীহাররাজ রাষ্ট্রকূটরাজ ইন্দ্র কর্তৃক পরাজিত হইয়াছিলেন। ইন্দ্র প্রতীহার রাজধানী কানাকুজ অধিকার করিয়া লুণ্ঠন করিয়াছিলেন এবং প্রতীহাররাজ মহীপাল পলাইয়া কোনমতে প্রাণ রক্ষা করিয়াছিলেন। এই নিদারুণ বিপর্য্যয়ের ফলে প্রতীহার রাজ্য ধ্বংসের পথে অগ্রসর হইল এবং পালরাজগণও অনেকটা নিরাপদ হইলেন।

কিন্তু শীঘ্রই অশ্রু শত্রুর আবির্ভাব হইল। পাল ও প্রতীহার সাম্রাজ্যের পতনের পরে আর্য্যাবর্তে নূতন নূতন রাজশক্তির উদয় হইল এবং ইহারা অনেকেই সাম্রাজ্য প্রতিষ্ঠার চেষ্টায় পাল, প্রতীহার ও অগাধ্য রাজ্যের সহিত যুদ্ধ করিতে লাগিল। এইরূপে সর্বপ্রথমে মধ্যভারতের বৃন্দেলখণ্ড অঞ্চলে চন্দ্রাভ্যেয় বা

চন্দেল্ল রাজ্য প্রবল হইয়া ওঠে। চন্দেল্লরাজ যশোবর্ষণ প্রসিদ্ধ কালঞ্জর গিরি-  
তুর্গ অধিকার করিয়া আর্য্যাবর্তে প্রাধান্য লাভ করেন এবং তাঁহার বিজয়বাহিনী  
কাশ্মীর হইতে বাংলা দেশ পর্য্যন্ত যুদ্ধাভিযান করে। চন্দেল্লরাজের সভাকবি  
লিখিয়াছেন যে যশোবর্ষণ উজ্জানলতার আয় অবলৌল্যক্রমে গোড়দিগকে  
অসিদ্ধারা ছেদন করিয়াছিলেন এবং তাঁহার পুত্র ধঙ্গ ( আ ৯৫৪-১০০০ ) রাঢ়া  
ও অঙ্গদেশের রাণীকে কারারুদ্ধ করিয়াছিলেন। এই সমুদয় শ্লেষোক্তি নিছক  
সত্য না হইলেও পালরাজগণ চন্দেল্লরাজকর্তৃক পরাজিত হইয়াছিলেন ইহাই  
সম্ভবপর বলিয়া মনে হয়। চন্দেল্লগণের আয় কলচুরি রাজগণও দশম শতাব্দের  
মধ্যভাগে আর্য্যাবর্তের নানা দেশ আক্রমণ করেন। কলচুরিরাজ প্রথম  
যুবরাজ ও তাঁহার পুত্র লক্ষ্মণরাজ যথাক্রমে গোড় ও বঙ্গাল দেশ জয় করেন  
বলিয়া তাঁহাদের সভাকবি বর্ণনা করিয়াছেন।

এই সমুদয় আক্রমণের ফলে পালরাজগণ ক্রমেই শক্তিহীন হইয়া  
পড়িলেন এবং বাংলাদেশের বিভিন্ন অংশে স্বাধীন খণ্ডরাজ্যের উদ্ভব হইল।  
চন্দেল্ল ও কলচুরি রাজবংশের সভাকবিরা যে অঙ্গ, রাঢ়া, গোড় ও বঙ্গাল  
প্রভৃতির উল্লেখ করিয়াছেন তাহা সম্ভবত এইরূপ পৃথক পৃথক স্বাধীন রাজ্যের  
সূচনা করে। কিন্তু ইহার অনাবিধ প্রমাণও আছে।

দ্বিতীয় গোপালের পুত্র দ্বিতীয় বিগ্রহপাল আ ৯৬০ হইতে ৯৮৮ অব্দ  
পর্য্যন্ত রাজত্ব করেন। তাঁহার পুত্র মহীপালের তাম্রশাসনে উক্ত হইয়াছে  
যে তিনি (মহীপাল) অনধিকারী কর্তৃক বিলুপ্ত পিতৃরাজ্যের উদ্ধার সাধন করেন।  
সুতরাং দ্বিতীয় বিগ্রহপালের রাজ্যকালেই পালরাজ্যের পৌরুষ রাজ্যের বিলোপ  
হইয়াছিল। উত্তরবঙ্গের নানানি শিলালিপি ও পশ্চিমবঙ্গের একস্থানি  
তাম্রশাসন ইত্যাদি নানা যায় যে এই সময়ে এই দুই প্রদেশে কাশ্যোজবংশীয়  
রাজগণ রাজত্ব করিতেন। সুতরাং এই কাশ্যোজ রাজগণই যে মহীপালের  
তাম্রশাসনোক্ত ‘অনধিকারী’ তাহা নিঃসন্দেহে স্বীকার করা যায়।

বাংলার এই কাশ্যোজ রাজবংশের উৎপত্তি গভীর রহস্যে আবৃত। ইহার  
প্রতিষ্ঠাতা মহারাজাধিরাজ রাজ্যপাল কাশ্যোজ-বংশ-তিলক বলিয়া বর্ণিত  
হইয়াছেন। তাঁহার রাণীর নাম ভাগ্যদেবী। তাঁহার পর তাঁহার দুই পুত্র  
নারায়ণপাল ও নয়পাল যথাক্রমে পিতৃসিংহাসনে আরোহণ করেন। প্রিয়দু  
নামক নগরে নয়পালের রাজধানী ছিল।

বাংলার পালসম্রাট নারায়ণপালের পুত্র রাজ্যপালের কথা পূর্বেই  
উল্লিখিত হইয়াছে। তাঁহার রাণীর নামও ভাগ্যদেবী। এইরূপ নামসাদৃশ্য



হইতে এই দুই রাজ্যপালকে অভিন্ন মনে করা খুবই স্বাভাবিক। কিন্তু তাহা হইলে 'কাশ্বোজবংশ-তিলক' এই উপাধির সার্থকতা কি? কেহ কেহ অনুমান করেন যে পালসম্রাট রাজ্যপালের মাতা সম্ভবত কাশ্বোজবংশীয়া রাজকন্যা ছিলেন এবং সেই জন্যই রাজ্যপাল কাশ্বোজবংশ-তিলক বলিয়া বর্ণিত হইয়াছেন। এরূপ মাতৃবংশদ্বারা পরিচয়ের দৃষ্টান্ত অন্যান্য রাজবংশের ইতিহাসেও পাওয়া যায়। এই দুই রাজ্যপালের অভিন্নতা মানিয়া লইলে এই সিদ্ধান্ত করিতে হয় যে তাঁহার মৃত্যুর পর রাজ্যের এক অংশে ( অঙ্গ ও মগধে ) তাঁহার পুত্র দ্বিতীয় গোপাল ও তৎপুত্র দ্বিতীয় বিগ্রহপাল ও অন্য অংশে ( উত্তর ও পশ্চিম বঙ্গে ) তাহার দুই পুত্র নারায়ণপাল ও নয়পাল যথাক্রমে রাজত্ব করেন। অন্যথা স্বীকার করিতে হয় যে রাজ্যপাল নামক কাশ্বোজবংশীয় এক ব্যক্তি কোন উপায়ে পালরাজগণের হস্ত হইতে উত্তর ও পশ্চিমবঙ্গ অধিকার করিয়া একটি স্বাধীন রাজ্য স্থাপন করেন।

ভারতের উত্তর-পশ্চিম সীমান্ত প্রদেশে কাশ্বোজ জাতির আদি বাসস্থল। এই সুদূর দেশ হইতে আসিয়া কাশ্বোজ জাতি বাংলা দেশ জয় করিয়াছিল ইহা সম্ভবপর বলিয়া মনে হয় না। তিব্বতীয়েরা কোন কোন গ্রন্থে কাশ্বোজ নামে অভিহিত হইয়াছে এবং কোন কোন তিব্বতীয় গ্রন্থে লুসাই পর্বতের নিকটবর্তী বঙ্গ ও ব্রহ্মদেশের সীমান্ত প্রদেশে অবস্থিত কাশ্বোজ জাতির উল্লেখ পাওয়া যায়। কেহ কেহ অনুমান করেন যে, যে কাশ্বোজ জাতি বাংলা দেশ জয় করিয়াছিল তাহা এ দুয়ের অগ্রতম। কিন্তু কাশ্বোজ জাতি যে বাংলাদেশ আক্রমণ করিয়া জয় করিয়াছিল এরূপ স্থির সিদ্ধান্ত করিবার কোন কারণ নাই। পালরাজগণ ভারতের বিভিন্ন প্রদেশ হইতে সৈন্য সংগ্রহ করিতেন। দেবপালের লিপি হইতে জানা যায় যে কাশ্বোজ দেশ হইতে পালরাজগণের যুদ্ধ-অশ্ব সংগৃহীত হইত। সুতরাং অসম্ভব নহে যে কাশ্বোজ দেশীয় রাজ্যপাল পালরাজগণের অধীনে সৈন্য অথবা অগ্নি কোন বিভাগে উচ্চ রাজকার্যে নিযুক্ত ছিলেন এবং পালরাজগণের দুর্বলতার সুযোগে এক স্বাধীন রাজ্যের প্রতিষ্ঠা করিয়াছিলেন। যে উপায়েই কাশ্বোজ রাজবংশের প্রতিষ্ঠা হউক, দশম শতাব্দির মধ্যভাগে যে তাঁহাদের অধীনে উত্তর ও পশ্চিম বঙ্গ একটি স্বতন্ত্র স্বাধীন রাজ্যে পরিণত হইয়াছিল সে বিষয়ে সন্দেহ নাই।

বাংলার অগ্ন্যাগ্নি অঞ্চলেও কয়েকটি স্বাধীন রাজ্যের প্রতিষ্ঠা হইয়াছিল। মহারাজাধিরাজ কান্তিদেব হরিকেল রাজত্ব করিতেন এবং তাঁহার রাজধানীর অথবা এক প্রধান নগরীর নাম ছিল বর্দ্ধমানপুর। হরিকেল বলিতে সাধারণত

পূর্ববঙ্গ বুঝায় কিন্তু ইহা বঙ্গের নামান্তররূপেও ব্যবহৃত হইয়াছে। সূত্রাং কান্তিদেবের রাজ্য কোথায় এবং কতদূর বিস্তৃত ছিল বলা যায় না। যদি বর্দ্ধমানপুর সুপরিচিত বর্দ্ধমান নগরী হয় তাহা হইলে বলিতে হইবে যে কান্তিদেবের রাজ্য পশ্চিমবঙ্গেও বিস্তৃত ছিল। কান্তিদেব বিন্দুরতি নাম্নী এক শক্তিশালী রাজার কন্যা বিবাহ করিয়াছিলেন এবং সম্ভবত ইহাই তাঁহার সৌভাগ্যের মূল। কারণ তাঁহার পিতা বা পিতামহ রাজা ছিলেন বলিয়া মনে হয় না। কান্তিদেব কোন সময়ে রাজত্ব করিয়াছিলেন তাহা সঠিক নির্ণয় করা যায় না। খুব সম্ভবত দেবপালের পরবর্ত্তী দুর্ব্বল পালরাজগণের সময়েই তিনি পূর্ববঙ্গে স্বাধীনতা অবলম্বন করিয়াছিলেন। পরে দক্ষিণ বাংলা ও সম্ভবত পশ্চিম বাংলার কিয়দংশও অধিকার করেন। দশম শতাব্দী হইতে যে বঙ্গাল রাজ্যের উল্লেখ দেখিতে পাওয়া যায় সম্ভবত কান্তিদেবই তাহার পত্তন করেন। কান্তিদেব বৌদ্ধ ছিলেন। তাঁহার বংশধরগণের সম্বন্ধে এ পর্য্যন্ত কিছুই জানা যায় নাই।

কান্তিদেবের অনতিকাল পরেই লয়চন্দ্রদেব কুমিল্লা অঞ্চলে রাজত্ব করেন। তাঁহার সম্বন্ধে বিশেষ কিছুই জানা যায় না। কিন্তু চন্দ্র উপাধিধারী এক বৌদ্ধ রাজবংশ দশম শতাব্দীর শেষভাগে হরিকৈলে রাজত্ব করিতেন। চন্দ্রদ্বীপ তাঁহাদের রাজ্যভুক্ত ছিল এবং সম্ভবত রাজবংশের উপাধি হইতেই এই নামকরণ হইয়াছিল। লামা তারনাথ চন্দ্রবংশীয় রাজাদের বিস্তৃত বিবরণ দিয়াছেন কিন্তু তাঁহার মতে এই সকল রাজাই পালরাজগণের পূর্ববর্ত্তী ছিলেন। দশম শতাব্দীতে বাংলায় যে চন্দ্রবংশ রাজত্ব করিতেন তাঁহাদের সহিত তারনাথ বর্ণিত চন্দ্রবংশের অথবা আরাকানে চন্দ্র উপাধিধারী যে সময়ের রাজগণ রাজত্ব করিয়াছেন তাঁহাদের কোন সম্বন্ধ ছিল কি না তাহা অত্যাধিক নির্ণীত হয় নাই। আলোচ্য চন্দ্রবংশের মাত্র দুইজন রাজার নাম এ পর্য্যন্ত জানা গিয়াছে—মহারাজাধিরাজ ত্রৈলোক্যচন্দ্র ও তাঁহার পুত্র মহারাজাধিরাজ শ্রীচন্দ্র। ত্রৈলোক্যচন্দ্রের পিতা সুবর্ণচন্দ্র ও পিতামহ পূর্ণচন্দ্রের সম্বন্ধে আমরা কেবলমাত্র এইটুকু জানি যে তাঁহারা অথবা তাঁহাদের পূর্বপুরুষগণ রোহিতাগিরিতে রাজত্ব করিতেন। ত্রৈলোক্যচন্দ্রই প্রথমে হরিকৈলে ও চন্দ্রদ্বীপে একটি স্বাধীন রাজ্যের প্রতিষ্ঠা করেন। রোহিতাগিরি কোথায় ছিল ঠিক বলা যায় না। কেহ কেহ মনে করেন যে ইহাই বর্ত্তমানে রোটাঙ্গড় নামে পরিচিত। আবার কাহারও মতে কুমিল্লার নিকটবর্ত্তী লালমাই অথবা লালমাটি সংস্কৃত রোহিতাগিরিতে পরিণত হইয়াছে। চন্দ্রবংশের আদিম নিবাস পূর্ববঙ্গে

ছিল ইহাই সম্ভবপর বলিয়া মনে হয়। এ পর্য্যন্ত এ বংশের যে চারিখানি তাম্রশাসন পাওয়া গিয়াছে তাহা বিক্রমপুর জয়স্বদ্ধাবার হইতে প্রদত্ত। সুতরাং বিক্রমপুর তাঁহাদের রাজধানী ছিল এরূপ অনুমান করা যাইতে পারে। বাংলার ইতিহাসপ্রসিদ্ধ রাজধানী বিক্রমপুর সম্ভবত চন্দ্রবংশীয় রাজারাই প্রতিষ্ঠা করেন। প্রাচীনকালে বঙ্গ ও বঙ্গাল বলিলে যে দেশ বুঝাইত ত্রৈলোক্য-চন্দ্র ও শ্রীচন্দ্র তাহার রাজা ছিলেন। শ্রীচন্দ্র অস্তুত ৩৫ বৎসর রাজত্ব করেন। সম্ভবত তাঁহার রাজ্যকালেই কলচুরিরাজ লক্ষ্মণরাজ বঙ্গাল দেশ আক্রমণ করেন।

একাদশ শতাব্দের প্রারম্ভে গোবিন্দচন্দ্র দক্ষিণ ও পূর্ব বঙ্গে রাজত্ব করিতেন। চোলরাজ রাজেন্দ্র চোলের লিপিতে তিনি বঙ্গাল দেশের রাজা বলিয়া উল্লিখিত হইয়াছেন, কিন্তু বিক্রমপুরেও তাঁহার লিপি আবিষ্কৃত হইয়াছে। গোবিন্দচন্দ্র সম্ভবত চন্দ্রবংশীয় রাজা, কিন্তু শ্রীচন্দ্রের সহিত তাঁহার কি সম্বন্ধ ছিল তাহা জানা যায় নাই।

উল্লিখিত আলোচনা হইতে সহজেই প্রতীয়মান হয় যে দ্বিতীয় গোপাল ও দ্বিতীয় বিগ্রহপালের রাজ্যকালে পালরাজ্য তিনটি প্রধান ভাগে বিভক্ত হইয়াছিল। পূর্ব ও দক্ষিণবঙ্গ অর্থাৎ বঙ্গ ও বঙ্গাল দেশে চন্দ্রবংশীয় রাজ্য, পশ্চিম ও উত্তর বঙ্গ অর্থাৎ রাঢ়া ও বরেন্দ্রে অথবা গোড়ি কাশ্মোজবংশীয় রাজ্য, এবং বিহার অর্থাৎ অঙ্গ ও মগধে পালবংশীয় রাজ্য। এতদ্ব্যতীত পশ্চিম বঙ্গে আরও দু'একটি ক্ষুদ্র স্বাধীন রাজ্য ছিল, তাহা পরে আলোচিত হইবে। এই সময় পালরাজগণের পিতৃভূমি বিশাল বাংলা দেশে তাঁহাদের কোন প্রকার অধিকার ছিল বলিয়া মনে হয় না।

চন্দেল ও কলচুরি রাজগণের প্রশস্তিতে যে বঙ্গ, বঙ্গাল, গোড়ি, রাঢ়া, অঙ্গ প্রভৃতি রাজ্য জয়ের উল্লেখ আছে তাহা খুব সম্ভবত এই সমুদয় স্বাধীন খণ্ড রাজ্যের প্রতি প্রযোজ্য।

## অষ্টম পরিচ্ছেদ

### দ্বিতীয় পাল সাম্রাজ্য

#### ১। মহীপাল

দশম শতাব্দির শেষভাগে যখন পালরাজবংশ দুর্দশা ও অবনতির চরম সীমায় পৌঁছিয়াছিল তখন দ্বিতীয় বিগ্রহপালের পুত্র মহীপাল পিতৃসিংহাসনে আরোহণ করেন ( আ ৯৮৮ )। তাঁহার অর্দ্ধশতাব্দীব্যাপী রাজ্যকালে পাল-রাজবংশের সৌভাগ্যরবি আবার উদ্ভিত হইয়াছিল। তিনি বাংলায় বিলুপ্ত পিতৃরাজ্য উদ্ধার ও পুনরায় পাল সাম্রাজ্য প্রতিষ্ঠা করিয়া যে অতুল কীৰ্ত্তি অর্জন করিয়াছেন তাহা ইতিহাসে তাঁহাকে চিরস্মরণীয় করিয়া রাখিয়াছে। বাংলা দেশ ধর্ম্মপাল ও দেবপালের নাম ভুলিয়া গিয়াছে কিন্তু 'ধান ভানতে মহীপালের গীত' প্রভৃতি লৌকিক প্রবাদ, দিনাজপুরের মহীপালদীঘি এবং মহীপাল, মহীপুর, মহীসম্ভোগ প্রভৃতি স্থান আজিও মহীপালের স্মৃতি রক্ষা করিয়া আসিতেছে।

কুমিল্লার নিকটবর্ত্তী বাঘাউরা ও নারায়ণপুর গ্রামে একটি বিষ্ণু ও একটি গণেশ মূর্ত্তির পাদপীঠে যথাক্রমে তৃতীয় ও চতুর্থ সংবৎসরে উৎকীর্ণ মহীপালের দুইখানি লিপি হইতে প্রমাণিত হয় যে সিংহাসন আরোহণের ২৩ বৎসরের মধ্যেই তিনি পূর্ববঙ্গ পুনরুদ্ধার করিয়াছিলেন। উত্তর অথবা পশ্চিমবঙ্গ জয় না করিয়া তিনি পূর্ববঙ্গে যাইতে পারেন নাই। তাঁহার রাজত্বের নবম বৎসরে উৎকীর্ণ বাণগড় লিপি হইতে প্রমাণিত হয় যে উত্তরবঙ্গ তাহার অধীন ছিল। সুতরাং রাজ্যারম্ভেই তিনি উত্তর ও পূর্ববঙ্গ জয় করেন এই সিদ্ধান্ত অনায়াসেই করা যাইতে পারে। বাণগড় লিপিতে উক্ত হইয়াছে যে মহীপাল 'রণক্ষেত্রে বাহুদর্পপ্রকাশে সকল বিপক্ষ পক্ষ নিহত করিয়া অনধিকারী কর্ত্তক বিলুপ্ত পিতৃরাজ্যের উদ্ধার সাধন করিয়া, রাজগণের মস্তকে চরণপদ্ম সংস্থাপিত করিয়া, অবনিপাল হইয়াছিলেন।' সভাকবির এই উক্তি যে ঐতিহাসিক সত্য সে বিষয়ে সন্দেহ করিবার কারণ নাই।

কিন্তু সমগ্র বাংলাদেশ জয় করিবার পূর্বেই দক্ষিণ ভারতের পরাক্রান্ত চোলরাজ রাজেন্দ্র মহীপালের রাজ্য আক্রমণ করিলেন। চোলরাজগণের

শ্রায় শক্তিশালী রাজবংশ তখন ভারতবর্ষে আর ছিল না। উড়িষ্যা হইতে আরম্ভ করিয়া রামেশ্বর সেতুবন্ধ পর্য্যন্ত ভারতের পূর্ব উপকূল সমস্তই তাঁহাদের অধীন ছিল, এবং তাঁহাদের প্রচণ্ড ও প্রকাণ্ড নৌবাহিনী বঙ্গোপসাগরের পরপারে সুমাত্রা ও মলয় উপদ্বীপের বহু রাজ্য জয় করিয়া দক্ষিণ-পূর্ব এশিয়ার বিপুল বাণিজ্যভাণ্ডারের স্বর্ণদ্বার তাঁহাদের সম্মুখে উন্মুক্ত করিয়া দিয়াছিল। এই বিশাল সাম্রাজ্য ও অতুল ঐশ্বর্য্যের অধিকারী রাজা রাজেন্দ্র চোল শিবের উপাসক ছিলেন। সুতরাং তাঁহার রাজ্য পবিত্র করিবার উদ্দেশ্যে গঙ্গাজল আনয়ন করিবার জন্ত তিনি এক বিরাট সৈন্যদল প্রেরণ করেন। তাঁহার সেনাপতি বঙ্গের সীমান্তে উপস্থিত হইয়া প্রথমে দণ্ডভুক্তিরাজ ধর্ম্মপাল ও পরে লোকপ্রসিদ্ধ দক্ষিণ রাঢ়ের অধিপতি রণশূরকে পরাজিত করিয়া এই দুই রাজ্য অধিকার করেন। তারপর তিনি 'অবিরাম-বধা-বারি-সিদ্ধ' বঙ্গাল দেশ আক্রমণ করিলে রাজা গোবিন্দচন্দ্র হস্তীপৃষ্ঠ হইতে অবতরণ করিয়া রণক্ষেত্র হইতে পলায়ন করিলেন। তারপর শক্তিশালী মহীপালের সহিত যুদ্ধ হইল। মহীপাল ভীত হইয়া রণস্থল ত্যাগ করিলেন এবং তাঁহার দুর্ম্মদ রণহস্তী, নারীগণ ও ধনরত্ন লুণ্ঠনপূর্ব্বক চোলসেনাপতি উত্তর রাঢ় অধিকার করিয়া গঙ্গাতীরে উপনীত হইলেন।

চোলরাজের সভাকবি এই অভিযানের যে বর্ণনা দিয়াছেন তাহাতে অনুমিত হয় যে গঙ্গাজল সংগ্রহ করা ছাড়া ইহার আর কোন উদ্দেশ্য ছিল না। তামিল ঐতিহাসিকগণও স্বীকার করেন যে এই অভিযানে আর কোনও স্থায়ী ফল লাভ হয় নাই। চোল প্রশস্তিতে বাংলায় চোলরাজ্যের প্রভু বা প্রতিষ্ঠার কোন উল্লেখ নাই, কেবল বলা হইয়াছে যে চোল সেনাপতি বাংলার পরাজিত রাজ্যবর্গকে মস্তকে গঙ্গাজল বহন করিয়া আনিতে বাধ্য করিয়াছিলেন। ইহা সত্য হইলে বলিতে হইবে যে পৃথিবীতে অন্ধ ধর্ম্মবিশ্বাসের জন্ত যত উৎপীড়ন ও অত্যাচার হইয়াছে চোলরাজের বঙ্গদেশ আক্রমণ তাহার এক চরম দৃষ্টান্ত। বিনাযুদ্ধে বাংলার রাজগণ যে চোল রাজাকে গঙ্গাজল দিতে অস্বীকার করিয়াছিলেন ইহা চোল প্রশস্তিকার বলেন নাই এবং ইহা স্বভাবতই বিশ্বাস করা কঠিন। সুতরাং ইহার জন্ত অনর্থক সহস্র সহস্র লোকের হত্যা করা ধর্ম্মের নামে গুরুতর অধর্ম্ম বলিয়াই মনে হয়। অপর পক্ষে দিখিজয়ী রাজেন্দ্র চোল যে কেবল গঙ্গাজলের জন্তই সৈন্য প্রেরণ করিয়াছিলেন, বঙ্গদেশ জয় করা তাঁহার মোটেই উদ্দেশ্য ছিল না, ইহাও বিশ্বাস করা কঠিন। হয়ত এই চেষ্টা সফল হয় নাই বলিয়াই চোলরাজের সভাকবি পরাজয় ও ব্যর্থতার কলঙ্ক

গঞ্জাজল দিয়া ধুইয়া ফেলিতে প্রয়াস পাইয়াছেন। আখ্য ক্রমশঃ প্রণীত চণ্ডকৌশিক নাটকে মহীপাল কর্তৃক কর্ণাটগণের পরাভবের উল্লেখ আছে। কেহ কেহ ইহা হইতে সিদ্ধান্ত কবিয়াছেন যে পালবাজ মহীপাল চোলসৈন্য পবাস্ত করিয়াছিলেন। কিন্তু এই মত গ্রহণ করা কঠিন। কাবণ চোল ও কর্ণাট দুই ভিন্ন দেশ। সম্ভবত প্রতীহাববাজ মহীপাল কর্তৃক বাষ্ট্রকূট সৈন্যের পরাভবের কথাই চণ্ডকৌশিকে ইঙ্গিত করা হইয়াছে, কাবণ বাষ্ট্রকূটগণ কর্ণাট দেশে বাজায় করিতেন।

বাজেন্দ্রচোলের অভিযানের প্রকৃত উদ্দেশ্য ও ফলাফল যাহাই হউক মোটের উপর এতখানি সন্দেহই স্বীকার করেন যে ভাগীবথীর পবিত্র বারি সংগ্রহ কবিয়া চোলসৈন্যের স্বদেশে প্রত্যাবর্তনের পর বাংলাদেশে তাঁহাদের বিজয় অভিযানের ফলস্বরূপ চোল সৈন্যের দখল হইয়াছিল। এই উল্লিখিত বর্ণনা হইতে মনে হয় যে দণ্ডভুক্তি, দক্ষিণ বাট ও বঙ্গলাদেশে তখন ধর্মপাল, বংশুব ও গোবিন্দচন্দ্র স্বাধীনভাবে বাজায় কবিত্তেছিলেন— কিন্তু উত্তরবাট মহীপালের অধীন ছিল। চোল আক্রমণের ফলে এই বাজেনৈতিক অবস্থার কোন পরিবর্তন হইয়াছিল কিনা এবং মহীপাল দক্ষিণবাট ও দক্ষিণবঙ্গ দখল করিয়া সমগ্র বঙ্গ প্রদেশে প্রাধান্য কবিত্তে পারিয়াছিলেন কিনা তাহা ঠিক জানা যায় না।

মহীপালের পিতা ও পিতামহ মগধ বাজায় কবিতেন। কিন্তু মিথিলাও (উত্তর বিহার) মহীপালের রাজ্যভুক্ত ছিল। সম্ভবত মহীপাল নিজেই মিথিলা জয় কবিয়াছিলেন।

বাবাণসী নিকট ১১৮১ খ্রীষ্টাব্দে বৌদ্ধতীর্থ সাবনায় ১১৮১ (১০২৬ শঃ) তারিখ একখানি লিপি পাওয়া গিয়াছে। ইহাতে বোঝা যায় মহীপালের আদেশে তাঁহার অন্তঃস্থ শ্রীমান্ স্থিবপাল ও শ্রীমান্ বসন্তপাল কর্তৃক নূতন নূতন মন্দির নির্মাণ ও পুরাতন মন্দিরাদির জীর্ণসংস্কারের উল্লেখ আছে। ইহা হইতে অনুমিত হয় যে ১০২৬ অব্দে মহীপালের অধিকার বাবাণসী পর্যন্ত বিস্তৃত হইয়াছিল।

কিন্তু ইহার অল্পকাল পরেই কলচুরিবাজ গাজেন্দ্রের মহীপালকে পরাজিত করিয়া বাবাণসী অধিকার করেন। কাবণ ১০৩৪ খ্রীষ্টাব্দে যখন আহম্মদ নিয়ালতিগীন বাবাণসী আক্রমণ করেন তখন ইহা কলচুরিবাজের অধীন ছিল।

মহীপালের রাজ্যকালে আখ্যাবাসের পশ্চিমভাগে বড়ই দুর্দিন উপস্থিত

হইয়াছিল। গজনির সুলতানগণের পুনঃপুনঃ ভারত আক্রমণের ফলে পরাক্রান্ত সাহি ও প্রতীহারবংশের ধ্বংস হয়, অগ্ন্যাত্ত রাজবংশ বিপর্যস্ত ও হতবল হইয়া পড়েন এবং ভারতের প্রসিদ্ধ মন্দির ও নগরগুলি ধ্বংস ও তাহার অগণিত ধনরত্ন লুপ্তিত হয়। আর্ঘ্যাবর্তের রাজ্যবর্গ একযোগে তাহাদিগের বিরুদ্ধে যুদ্ধ করিয়াও কোন ফল লাভ করিতে পারেন নাই। এই বিধ্বংসী বিদেশী শত্রুর আক্রমণ প্রতিরোধ করিবার জন্য মহীপাল কোন সাহায্য প্রেরণ করেন নাই, এজন্য কোন কোন ঐতিহাসিক তাঁহার প্রতি দোষারোপ করিয়াছেন। কিন্তু মহীপালের ইতিহাস সম্যক্ আলোচনা করিলে এই প্রকার নিন্দা বা অভিযোগের সমর্থন করা যায় না। পিতৃরাজ্যচ্যুত মহীপালকে নিজের বাহুবলে বাংলায় পুনরধিকার প্রতিষ্ঠা করিতে হয়। এই কার্য সম্পূর্ণ হইবার পূর্বেই রাজেন্দ্রচোল তাঁহার রাজ্য আক্রমণ করেন। কলচুরিরাজও তাঁহার আর এক শত্রু ছিলেন। তৎকালে রাজেন্দ্রচোল ও গাঙ্গেয়দেবের ত্রায় দিগ্বিজয়ী বীর ভারতবর্ষে আর কেহ ছিল না। ইহাদের ত্রায় শত্রুর হস্ত হইতে আত্মরক্ষা করিতেই তাঁহাকে সর্বদা বিব্রত থাকিতে হইত। এমতাবস্থায় সুদূর পঞ্চনদে সৈন্য প্রেরণ করা তাঁহার পক্ষে হয়ত সম্ভব ছিল না। সুতরাং তৎকালীন বাংলার আভ্যন্তরীণ অবস্থা সর্বিশেষ না জানিয়া মহীপালকে ভীক, কাপুরুষ অথবা দেশের প্রতি কর্তব্যপালনে উদাসীন ইত্যাদি আখ্যায় ভূষিত করা যুক্তিসঙ্গত বলিয়া মনে হয় না।

মহীপাল যাহা করিয়াছিলেন তাহাই তাঁহার শৌর্য্যবীর্ষ্যের যথেষ্ট পরিচয় দিতেছে। পালরাজ্যকে আসন্ন ধ্বংসের হস্ত হইতে রক্ষা করিয়া তিনি বঙ্গদেশের পূর্ব সীমান্ত হইতে বারাগসী পর্য্যন্ত বিস্তৃত ভূভাগ ও মিথিলায় পালরাজ্যের অধিকার প্রতিষ্ঠিত করিয়াছিলেন। তারপর ভারতের দুই প্রবল রাজশক্তির সহিত প্রতিদ্বন্দ্বিতা করিয়া তিনি এই রাজ্যের অধিকাংশ রক্ষা করিতে সমর্থ হইয়াছিলেন। ইহাই মহীপালের কৃতিত্বের শ্রেষ্ঠ পরিচয়।

পালরাজশক্তির পুনরুত্থানের চিহ্ন স্বরূপ মহীপাল প্রাচীন কীর্ত্তির রক্ষণে যত্নশীল ছিলেন। সারনাথ লিপিতে শত শত কীর্ত্তিরত্ন নির্মাণ এবং অশোকস্তম্ভ, সার্বধর্ম্যচক্র ও “অষ্টমহাস্থান” শৈলবিনির্মিত গন্ধকূটি প্রভৃতি প্রসিদ্ধ প্রাচীন বৌদ্ধকীর্ত্তির সংস্কার সাধনের উল্লেখ আছে। এতদ্ব্যতীত মহীপাল অগ্নিদাহে বিনষ্ট নাগন্দা মহাবিহারের জীর্ণোদ্ধার এবং বৌদ্ধগয়ায়

দুইটি মন্দির নির্মাণ করেন। কাশীধামে নবদুর্গার প্রাচীন মন্দির ও অগ্ন্যগ্নি হিন্দু দেবদেবীর মন্দিরও সম্ভবত তিনি নির্মাণ করেন। অনেক লিপি ও নগরী এখনও তাঁহার নামের সহিত বিজড়িত হইয়া আছে এবং সম্ভবত তিনিই সেগুলির প্রতিষ্ঠা করেন। মোটের উপর মহীপালের রাজ্যে বাংলায় সকল দিকেই এক নূতন জাতীয় জাগরণের আভাস পাওয়া যায়।

মহীপালের ইমাদপুরে প্রাপ্ত লিপি তাঁহার রাজ্যের ৪৮ বৎসরে লিখিত। সুতরাং অনুমিত হয় যে তিনি প্রায় অর্দ্ধ শতাব্দীকাল রাজত্ব করেন (আ ৯৮৮-১০৩৮)।

## ২। বৈদেশিক আক্রমণ ও অন্তর্বিদ্বেহ

মহীপালের পর তাঁহার পুত্র নয়পাল সিংহাসনে আরোহণ করেন ও অন্তত ১৫ বৎসর রাজত্ব করেন (আ ১০৩৮-১০৫৫)। কলচুরিরা জগদ্বৈয়দেবের পুত্র কর্ণ অথবা লক্ষ্মীকর্ণের সহিত সুদীর্ঘকালব্যাপী যুদ্ধেই তাঁহার রাজ্যকালের প্রধান ঘটনা। তিব্বতীয় গ্রন্থে এই যুদ্ধের বিস্তৃত বিবরণ পাওয়া যায়। কর্ণ মগধ আক্রমণ করিয়া নয়পালকে পরাজিত করেন। তিনি পাল-বাজধানী অধিকার করিতে পারেন নাই, কিন্তু অনেক বৌদ্ধ প্রতিষ্ঠান ধ্বংস করিয়া মন্দিরের দ্রব্যাদি লুণ্ঠন করেন। প্রসিদ্ধ বৌদ্ধ আচার্য্য অতীশ অথবা দীপঙ্কর শ্রীজ্ঞান তখন মগধে বাস করিতেছিলেন। তিনি প্রথমে কোন প্রকারে এই যুদ্ধব্যাপারে হস্তক্ষেপ করেন নাই। কিন্তু পরে যখন নয়পাল কর্ণকে পরাজিত করিয়া কলচুরিসৈন্য বিধ্বংস করিতে-ছিলেন তখন দীপঙ্কর কর্ণ ও তাঁহার সৈন্যকে আশ্রয় দেন। তাঁহার চেষ্টায় উভয় পক্ষের মধ্যে সন্ধি স্থাপিত হয়।

কিন্তু এই সন্ধি দীর্ঘকাল স্থায়ী হয় নাই। নয়পালের পুত্র তৃতীয় বিগ্রহপালের রাজ্যকালে (আ ১০৫৫-১০৭০) কর্ণ পুনরায় বাংলাদেশে যুদ্ধাভিযান করেন। এই যুদ্ধেও কর্ণ প্রথমে জয়লাভ করেন। বীরভূম জিলার অন্তর্গত পাইকোর নামক স্থানে একটি শিলাস্তম্ভ গাত্রে কর্ণের একটি লিপি উৎকীর্ণ আছে। ইহা হইতে বুঝা যায় যে তিনি পশ্চিমবঙ্গের কতক অংশ অধিকার করিয়াছিলেন। কিন্তু পরে তিনি তৃতীয় বিগ্রহপাল কর্তৃক পরাজিত হন। তৃতীয় বিগ্রহপালের সহিত কর্ণের কন্যা যৌবনশ্রীর বিবাহ হয়। সম্ভবত এই বৈবাহিক সম্বন্ধ দ্বারা উভয় পক্ষের মধ্যে সন্ধি স্থাপিত হয়।



এই সুদীর্ঘ যুদ্ধের ফলে পালরাজশক্তি ক্রমশই দুর্বল হইয়া পড়ে ফলে বাংলার নানা প্রদেশে স্বাধীন খণ্ডরাজ্যের উদ্ভব হয়। 'মহামাণ্ডলিক ঈশ্বরঘোষ ঢেকরীতে রাজধানী স্থাপিত করিয়া একটি স্বাধীন রাজ্যের প্রতিষ্ঠা করেন। ঢেকরী সম্ভবত বর্ধমান জিলায় অবস্থিত। পূর্ববঙ্গে দুইটি স্বাধীন রাজ্যের প্রতিষ্ঠা হয়। বর্ষ্মবংশীয় রাজগণ বিক্রমপুরে রাজধানী স্থাপিত করিয়া পূর্ববঙ্গের কতকাংশ শাসন করেন। কুমিল্লা অঞ্চলে পট্টিকের নামে আর একটি রাজ্য স্থাপিত হয়। কুমিল্লার নিকটবর্তী পট্টিকের পরগণা এখনও এই প্রাচীন রাজ্যের স্মৃতি রক্ষা করিয়াছে। এই দুই রাজ্য সম্বন্ধে অল্পত্র বিস্তারিত আলোচনা করা হইবে।

পালরাজগণের এই আভ্যন্তরিক ছরবস্ত্রার সময় কর্ণাটের চালুক্যরাজগণ বাংলাদেশ আক্রমণ করেন। চালুক্যরাজ সোমেশ্বরের পুত্র কুমার বিক্রমাদিত্য দিগ্বিজয়ে বহির্গত হইয়া গোড় ও কামরূপ জয় করেন। এতদ্ব্যতীত চালুক্যগণ একাধিকবার বঙ্গ আক্রমণ করেন।

সুযোগ পাইয়া উড়িষ্যার রাজগণও বাংলা আক্রমণ করেন। সোমবংশীয় রাজা মহাশিবগুপ্ত যযাতি গোড় ও রাঢ়ায় জয়লাভ করিয়াছিলেন এবং রাজা উদ্যোতকেশরী গোড়ীয় সৈন্যকে পরাস্ত করিয়াছিলেন। ইহাদের কাহারও তারিখ সঠিক জানা যায় না। কিন্তু খুব সম্ভবত উভয়েই একাদশ শতাব্দীতে রাজত্ব করিতেন।

কেবল বাংলায় নহে মগধেও পালরাজশক্তি ক্রমশ হীনবল হইয়া পড়িল। নয়পালের রাজ্যকালেই গয়ার চতুষ্পার্শ্ববর্তী ভূভাগে শূদ্রক নামক একজন সেনানায়ক একটি রাজ্যের প্রতিষ্ঠা করেন। শূদ্রক ও তাঁহার পুত্র বিশ্বাদিত্য নামত পালরাজগণের অধীনতা স্বীকার করিতেন। কিন্তু বিশ্বাদিত্যের (নামাস্তুর বিশ্বরূপ) পুত্র যক্ষপাল স্বাধীন রাজার স্থায় রাজত্ব করেন।

এইরূপে দেখা যায় যে তৃতীয় বিগ্রহপালের মৃত্যুকালে পালরাজ্য বৈদেশিক শত্রুর আক্রমণে ও অন্তর্বিপ্লবে ছিন্নভিন্ন হইয়া গিয়াছিল। তৃতীয় বিগ্রহপালের তিন পুত্র ছিল—দ্বিতীয় মহীপাল, দ্বিতীয় শূরপাল ও রামপাল। দ্বিতীয় মহীপাল পিতার মৃত্যুর পর সিংহাসনে আরোহণ করিলেন। কিন্তু চারিদিকেই তখন বিশৃঙ্খলা ও ষড়যন্ত্র চলিতেছিল। দুই লোকের কথায় রাজার বিশ্বাস হইল যে তাঁহার দুই ভ্রাতা এই সমুদয় ষড়যন্ত্রে লিপ্ত আছেন। সুতরাং তিনি তাঁহাদিগকে কারারুদ্ধ করিয়া রাখিলেন। কিন্তু শীঘ্রই বরেন্দ্রের

-সামন্তবর্গ প্রকাশভাবে বিদ্রোহী হইয়া রাজার বিরুদ্ধে যুদ্ধ ঘোষণা করিল। মহীপালের সৈন্য বা যুদ্ধসজ্জা যথেষ্ট পরিমাণে ছিল না—কিন্তু মন্ত্রীগণের পরামর্শ অগ্রাহ্য করিয়া তিনি বিদ্রোহীগণের সহিত যুদ্ধ করিতে অগ্রসর হইলেন। মহীপাল পরাস্ত ও নিহত হইলেন। কৈবর্তজাতীয় নায়ক দিবা বরেন্দ্রের রাজা হইলেন।

সন্ধ্যাকরনন্দী বিরচিত রামচরিত কাব্যে এই বিদ্রোহ ও তাহার পরবর্ত্তী ঘটনা সবিস্তারে বর্ণিত হইয়াছে। বাংলার ইতিহাসে এই গ্রন্থখানি অমূল্য— কারণ বাংলার আর কোন রাজনৈতিক ঘটনার এরূপ বিস্তৃত বিবরণ আমরা কোথাও পাই না। সন্ধ্যাকরনন্দীর পিতা এই সমুদয় ঘটনার কালে উচ্চ রাজকার্য্যে নিযুক্ত ছিলেন এবং তিনি নিজেও ইহার অধিকাংশ প্রত্যক্ষ করিয়াছিলেন। সুতরাং সমুদয় ঘটনা যথাযথভাবে জানিবার তাহার বিশেষ সুযোগ ছিল। কিন্তু দুঃখের বিষয় এই কাব্যখানির সম্যক অর্থ গ্রহণ করা অতিশয় কঠিন। ইহার প্রধান কারণ এই যে কাব্যখানি দ্ব্যর্থবোধক। ইহার প্রতি শ্লোকের দুই প্রকার অর্থ আছে। এক অর্থ ধরিলে কাব্যখানিতে রামায়ণে বর্ণিত রামচন্দ্রের আখ্যান এবং অন্য অর্থে পালরাজগণের, প্রধানত রামপালের, ইতিহাস পাওয়া যায়। দ্বিবিধ অর্থব্যাঞ্জনার জন্য শ্লোকগুলির শব্দযোজনাই এমনভাবে করিতে হইয়াছে যে সহজে তাহা বিশ্লেষণ করা যায় না। এইজন্যই কবির জীবিতকালেই, অথবা তাহার অল্পদিন পরেই, এই কাব্যের একটি টীকা রচিত হয়। তাহাতে দুইপক্ষের অর্থ ও ব্যাখ্যা দেওয়া হইয়াছে। তুর্ভাগ্যের বিষয় ১মহামহোপাধ্যায় হরপ্রসাদ শাস্ত্রী নেপালে এই কাব্যের যে একমাত্র পুঁথি অবিকার করেন তাহাতে সম্পূর্ণ মূলগ্রন্থ ও টীকার এক অংশ মাত্র পাওয়া যায়। যে অংশের টীকা নাই সেই অংশের শ্লোকের প্রকৃত ব্যাখ্যা, বিশেষত তাহার মধ্যে ঐতিহাসিক ঘটনার যে সমুদয় ইঙ্গিত বা আভাস আছে তাহার মর্ম্মগ্রহণ করা সর্বত্র সম্ভবপর হয় নাই। টীকার সাহায্যে মূলগ্রন্থ হইতে বরেন্দ্রের বিদ্রোহ ও রামপাল কর্তৃক বরেন্দ্রের পুনরধিকার সম্বন্ধে যাহা জানা যায় পরবর্ত্তী অধ্যায়ে তাহা বিবৃত হইবে।

## নবম পরিচ্ছেদ

### তৃতীয় পাল-সাম্রাজ্য

#### ১। বরেন্দ্র-বিদ্রোহ

যে বিদ্রোহের ফলে দ্বিতীয় মহীপাল রাজ্য ও প্রাণ হারাইলেন কৈবর্তনায়ক দিব্যের সহিত তাহার কোন সম্বন্ধ ছিল কিনা তাহা নির্ণয় করা কঠিন। রামচরিতের একটি শ্লোকে এরূপ ইঙ্গিত আছে যে দিব্য মহীপালের অধীনে উচ্চ রাজকার্যে নিযুক্ত ছিলেন। রামচরিতে ইহাও স্পষ্ট উল্লিখিত হইয়াছে যে দিব্য মহীপালকে হত্যা করিয়া বরেন্দ্রভূমি অধিকার করিয়াছিলেন। সুতরাং প্রত্যক্ষ অথবা পরোক্ষভাবে যে দিব্য এই বিদ্রোহের সহিত সংশ্লিষ্ট ছিলেন ইহা অনুমান করা স্বাভাবিক। কিন্তু দিব্যের সহিত বিদ্রোহীদের কোন প্রকার যোগাযোগ ছিল এরূপ কোন কথা রামচরিতে নাই। সুতরাং অসম্ভব নহে যে দিব্য প্রথমে মহীপালের বিরুদ্ধে বিদ্রোহে যোগদান করেন নাই কিন্তু বিদ্রোহীদের হস্তে পরাজয়ের পর মহীপালকে হত্যা করিয়া তিনি বরেন্দ্রী অধিকার করিয়াছিলেন। রামচরিতে দিব্যকে দম্ভ্য ও ‘উপধিত্রতী’ বলা হইয়াছে। টীকাকার উপধিত্রতীর অর্থ করিয়াছেন ‘ছদ্মনিত্রতী’। কেহ কেহ ইহা হইতে সিদ্ধান্ত করিয়াছেন যে দিব্য কর্তব্যবশে বিদ্রোহী সাজিয়া মহীপালকে হত্যা করিয়াছিলেন। কিন্তু এরূপ অর্থ সঙ্গত মনে হয় না। দম্ভ্য ও উপধিত্রতী হইতে বরং ইহাই মনে হয় যে রামচরিতকারের মতে দিব্য প্রকৃতই দম্ভ্য ছিলেন, কিন্তু দেশহিতের ভাণ করিয়া রাজাকে হত্যা করিয়াছিলেন। বস্তুত রামচরিত কাব্যের অগ্ৰত্ৰণে দিব্যের আচরণ কুৎসিৎ ও নিন্দনীয় বলিয়া ব্যাখ্যাত হইয়াছে। কিছুদিন পর্য্যন্ত বাংলার একদল লোক বিশ্বাস করিতেন যে দিব্য অত্যাচারী মহীপালকে বধ করিয়া দেশরক্ষা করিয়াছিলেন এবং তাঁহার এই মহৎ কার্যের জন্ত জনসাধারণ কর্তৃক রাজা নির্বাচিত হইয়াছিলেন। তাঁহার দিব্যকে মহাপুরুষ সাজাইয়া উত্তরবঙ্গের নানা স্থানে প্রতি বৎসর “দিব্য-স্মৃতি উৎসবের” ব্যবস্থা করিতেন। কিন্তু রামচরিতে ইহার কোন সমর্থনই পাওয়া যায় না। অবশ্য পালরাজগণের কর্মচারী সন্ধ্যাকরনন্দী দিব্য সম্বন্ধে বিরুদ্ধভাব পোষণ করিবেন ইহা খুবই স্বাভাবিক। কিন্তু রামচরিত ব্যতীত দিব্য সম্বন্ধে জানিবার

আর কোন উপায় নাই। সুতরাং রামচরিতকার তাঁহার চরিত্রে যে কলঙ্ক লেপন করিয়াছেন তাহা পুরাপুরি সত্য বলিয়া গ্রহণ না করিলেও দিব্যকে দেশের ত্রাণকর্ত্তা মহাপুরুষ মনে করিবার কোনই কারণ নাই।

দিব্য নিষ্কণ্টকে বরেন্দ্রের রাজ্য ভোগ করিতে পারেন নাই। পূর্ববঙ্গের বর্ম্মবংশীয় রাজা জাতবর্ম্মা তাঁহাকে পরাজিত করিয়াছিলেন ; কিন্তু এই বিরোধের হেতু বা বিশেষ কোন বিবরণ জানা যায় না। রামপাল বরেন্দ্র উদ্ধার করিবার চেষ্টা করিয়াছিলেন কিন্তু পারেন নাই—বরং দিব্য রামপালের রাজ্য আক্রমণ করিয়া তাঁহাকে ব্যতিব্যস্ত করিয়াছিলেন। যদিও রামচরিতে দিব্যরাজ্যকালের কোন ঘটনার উল্লেখ নাই, তথাপি যিনি জাতবর্ম্মা ও রামপালের বিরুদ্ধে যুদ্ধ করিয়া বরেন্দ্রী রক্ষা করিতে পারিয়াছিলেন তিনি যে বেশ শক্তিশালী রাজা ছিলেন এবং বরেন্দ্রে তাঁহার প্রভুত্ব বেশ দৃঢ়তার প্রতিষ্ঠিত হইয়াছিল তাহা স্বীকার করিতেই হইবে। দিব্যরাজ্য মৃত্যুর পর তাঁহার ভ্রাতা রুদোক এবং তৎপরে রুদোকের পুত্র ভীম বরেন্দ্রের সিংহাসনে আরোহণ করেন। রামচরিতে ভীমের প্রশংসাসূচক কয়েকটি শ্লোক আছে এবং তাঁহার রাজ্যের শক্তি ও সমৃদ্ধির বর্ণনা আছে। সুতরাং দিব্য স্বীয় প্রভু ও রাজাকে বধ করিয়া যে মহাপাতক করিয়াছিলেন বরেন্দ্রে একটি শক্তিশালী রাজ্য প্রতিষ্ঠাপূর্বক তথায় সুখ-শান্তি ফিরাইয়া আনিয়া তাহার কতক প্রায়শ্চিত্ত করিয়াছিলেন।

## ২। রামপাল

দ্বিতীয় মহাপাল যখন সিংহাসন দমন করিতে অগ্রসর হন তখন বর্ম্মবর্ম্মা দুই কনিষ্ঠ ভ্রাতা রামপাল ও রামপাল কারাগারে আবদ্ধ ছিলেন তাহা পূর্বেই বলা হইয়াছে। মহাপালের পরাজয় ও মৃত্যুর পর তাঁহার কল্পে মুক্তি লাভ করিয়া বরেন্দ্র হইতে পলায়ন করেন রামচরিতে তাঁহার কোন উল্লেখ নাই। পলায়ন করিবার পর পালরাজ্যের কোন এক অংশে, সম্ভবত মগধে, শূরপাল রাজসিংহাসনে আরোহণ করেন। তাঁহার রাজ্যকালের কোন বিবরণই জানা যায় নাই। সম্ভবত তিনি খুব অল্পকালই রাজত্ব করিয়াছিলেন এবং তারপর রামপাল রাজা হন।

রামপাল রাজা হইয়া বরেন্দ্র উদ্ধার করিবার প্রয়াস করিয়াছিলেন কিন্তু বিফলমনোরথ হইয়া বহুদিন নিশ্চেষ্ট ছিলেন। তারপর আবার এক গুরুতর বিপদ উপস্থিত হইলে পুত্র ও অমাত্যগণের সহিত পরামর্শ করিয়া বিপুল উদ্যমে

কার্যক্ষেত্রে অবতীর্ণ হইলেন। এই গুরুতর বিপদ কি, রামচরিতকার তাহার উল্লেখ করেন নাই। সম্ভবত দিব্য কর্তৃক আক্রমণই এই বিপদ, এবং রাজ্যের অবশিষ্ট অংশ হারাইবার ভয়েই বিচলিত হইয়া রামপাল পুনরায় দিব্যের প্রতিরোধ করিতে কৃতসংকল্প হইলেন।

দিব্যের বিরুদ্ধে সৈন্য সংগ্রহের জন্য রামপাল সামন্তরাজগণের দ্বারে দ্বারে ঘুরিতে লাগিলেন। অর্থ ও সম্পত্তির প্রলোভনে অনেকেই তাঁহাকে সাহায্য করিতে স্বীকৃত হইল। এইরূপে বহুদিনের চেষ্টায় রামপাল অবশেষে বিপুল এক সৈন্যদল সংগ্রহ করিতে সমর্থ হইলেন।

রামপালের প্রধান সহায় ছিলেন তাঁহার মাতুল রাষ্ট্রকূটকুলতিলক মথন। ইনি মথন নামেও প্রসিদ্ধ ছিলেন। তিনি দুই পুত্র মহামাণ্ডলিক কাহুরদেব ও সুবর্ণদেব এবং ভ্রাতৃপুত্র মহাপ্রতীহার শিবরাজ প্রভৃতিকে সঙ্গে লইয়া আসিলেন। অপর যে সমুদয় সামন্তরাজ রামপালকে সৈন্যদ্বারা সাহায্য করিয়াছিলেন তাঁহাদের মধ্যে নিম্নলিখিত কয়েকজনের নাম রামচরিতে পাওয়া যায়। রামচরিতের টীকায় ইহাদের রাজ্যের নামও দেওয়া আছে কিন্তু তাহার অনেকগুলির অবস্থান নির্ণয় করা যায় না।

১। ভীমযশ—ইনি মগধ ও পীঠীর অধিপতি ছিলেন এবং কাণ্ডকুজ-রাজ্যের সৈন্য পরাস্ত করিয়াছিলেন।

২। কোটাটবীর রাজা বীরগুণ।

৩। দণ্ডভুক্তির রাজা জয়সিংহ। দণ্ডভুক্তি মেদিনীপুর জিলায় অবস্থিত ছিল।

৪। দেবগ্রামের রাজা বিক্রমরাজ।

৫। অরণ্য প্রদেশস্থ সামন্তবর্গের চূড়ামণি অপরমন্দারের (হুগলী জিলাভূগত) অধিপতি লক্ষ্মীশূর।

৬। কুজবটীর (সাঁওতাল পরগণা) রাজা শূরপাল।

৭। তৈলকম্পের (মানভূম) রাজা রুদ্রশিখর।

৮। উচ্ছালের রাজা ভাস্কর অথবা ময়গলসিংহ।

৯। ঢেকরীরাজ প্রতাপসিংহ।

১০। (বর্তমান রাজমহলের নিকটবর্তী) কয়লমণ্ডলের অধিপতি নরসিংহার্জুন।

১১। সঙ্কটগ্রামের রাজা চণ্ডার্জুন।

১২। নিদ্রাবলীর রাজা বিজয়রাজ।

১৩। কৌশাহীর রাজা ঘোরপবর্জন। কৌশাহী সম্ভবত রাজসাহী অথবা বগুড়া জিলায় অবস্থিত ছিল।

১৪। পছুবহার রাজা সোম।

এই সমুদয় ব্যতীত আরও অনেক সামন্তরাজ রামপালের সহিত যোগ দিয়াছিলেন—রামচরিতে তাঁহাদের সাধারণভাবে উল্লেখ আছে, নাম দেওয়া নাই। ইহার মধ্যে যে সমুদয় সামন্তরাজ্যের অবস্থিতি মোটামুটি জানা যায় তাহার বিশ্লেষণ করিলে দেখা যাইবে যে প্রধানত মগধ ও রাঢ়দেশের সামন্তগণই রামপালের পক্ষ অবলম্বন করিয়াছিলেন।

রামপাল সম্ভবত দক্ষিণ বঙ্গ হইতে ববেন্দ্র আক্রমণ করেন। সমস্ত সামন্তরাজগণের সৈন্য একত্রিত করিয়া তিনি প্রথমে মহাপ্রতীহার শিবরাজকে একদল সৈন্যসহ প্রেরণ করেন। এই সৈন্যদল গঙ্গা নদী পার হইয়া ববেন্দ্রভূমি বিধ্বস্ত করে। এইরূপে গঙ্গার অপর তীর সুরক্ষিত করিয়া রামপাল তাহার বিপুল সৈন্য লইয়া নদীপার হইয়া বরেন্দ্রভূমি আক্রমণ করেন। এইবার কৈবর্তরাজ ভীম সসৈন্যে রামপালকে বাধা দিলেন এবং দুই দলে ভীষণ যুদ্ধ হইল। রামচরিতে নয়টি প্লোকে এই যুদ্ধের বর্ণনা আছে। রামপাল ও ভীম উভয়ই বিশেষ বিক্রম প্রদর্শন করেন এবং পরস্পরের সম্মুখীন হইয়া যুদ্ধ করেন। কিন্তু হস্তীপৃষ্ঠে যুদ্ধ করিতে করিতে দৈববিড়ম্বনায় ভীম বন্দী হইলেন। ইহাতে তাহার সৈন্যদল ছত্রভঙ্গ হইয়া পড়িল। যদিও হরি নামক তাহার এক সুহ্ম পুত্ররায় তাহার সৈন্যগণকে একত্র করিয়া যুদ্ধ করেন এবং প্রথমে কিছু সফলতাও লাভ করেন, তথাপি পরিশেষে রামপালেরই জয় হইল। রামপাল ভীমের কঠোর দণ্ড বিধান করিলেন। ভীমকে বধ্যভূমিতে নিয়া প্রথমে তাহার সম্মুখেই তাহার পরিজনবর্গকে হত্যা করা হইল। তারপর বহু শরাঘাতে ভীমকেও বধ করা হইল। এইরূপে কৈবর্তনায়কের বিদ্রোহ ও ভীমের জীবন অবসান হইল।

বহুদিন পরে রামপাল আবার পিতৃভূমি বরেন্দ্রী ফিরিয়া পাইলেন। তিনি প্রথমে ইহার শাস্তি ও শৃঙ্খলা ফিরাইয়া আনিতে যত্নবান হইলেন। তিনি প্রজার করভার লাঘব এবং কৃষির উন্নতি বিধান করিলেন। তারপর রামাবতী নামক নূতন এক রাজধানী প্রতিষ্ঠা করিলেন। এই রামাবতী নগরী সম্ভবত মালদহের নিকটবর্তী ছিল।

এইরূপে পিতৃভূমি বরেন্দ্রীতে স্থায়ী শক্তি সুপ্রতিষ্ঠিত করিয়া রামপাল নিকটবর্তী রাজ্যসমূহ জয় করিয়া পালসাম্রাজ্যের লুপ্ত গৌরব উদ্ধার করিতে যত্নবান হইলেন।

বিক্রমপুরের বর্ষরাজ সম্ভবত বিনা যুদ্ধেই রামপালের বশ্যতা স্বীকার করিলেন। রামচরিতে উক্ত হইয়াছে যে পূর্বদেশীয় বর্ষরাজ নিজের পরিভ্রাণের জন্ত উৎকৃষ্ট হস্তী ও স্বীয় রথ উপঢৌকন দিয়া রামপালের আরাধনা করিলেন।

কামরূপও যুদ্ধে বিজিত হইয়া অধীনতা স্বীকার করিল। সম্ভবত রামপালের কোন সামন্ত রাজা এই যুদ্ধের সেনাপতি ছিলেন। তিনি কামরূপ জয় করিয়া ফিরিয়া আসিলে রামপাল তাঁহাকে বহু সম্মানদানে আপ্যায়িত করিলেন।

এইরূপে পূর্বদিকের সীমান্তপ্রদেশ জয় করিয়া রামপাল দক্ষিণ দিকে অগ্রসর হইলেন। রাঢ়দেশের সামন্তগণ সকলেই রামপালের অধীনতা স্বীকার করিয়াছিলেন। তাঁহাদের সাহায্যে রামপাল উড়িষ্যার অভিমুখে অগ্রসর হইলেন। উড়িষ্যার রাজনৈতিক অবস্থা বিশেষ শোচনীয় হইয়া উঠিয়াছিল। দক্ষিণ হইতে গঙ্গরাজগণ পুনঃ পুনঃ আক্রমণ করিয়া ইহাকে বিপর্যাস্ত করিতেছিলেন। রামপালের সামন্তরাজ দণ্ডভুক্তির অধিপতি জয়সিংহ রামপালের বরেন্দ্র অভিযানে যোগ দিবার পূর্বেই উৎকলরাজ কর্ণকেশরীকে পরাজিত করিয়া- ছিলেন। গঙ্গরাজগণ উৎকল অধিকার করিলে বাংলা দেশের সমূহ বিপদ এই আশঙ্কায়ই সম্ভবত রামপাল নিজের মনোনীত একজনকে উৎকলের সিংহাসনে প্রতিষ্ঠিত করিলেন। ঠিক অনুরূপ কারণেই অনন্তবর্ষা চোড়গঙ্গ রাজ্যচ্যুত উৎকলরাজকে আশ্রয় দিলেন। এইরূপে দুই প্রতিদ্বন্দ্বী রাজার রক্ষকরূপে উৎকলের অধিকার লইয়া রামপাল ও অনন্তবর্ষার মধ্যে বহুদিনব্যাপী যুদ্ধ চলিয়াছিল। রামচরিত অনুসারে রামপাল উৎকল জয় করিয়া কলিঙ্গদেশ পর্যাস্ত স্বীয় প্রভুত্ব প্রতিষ্ঠান করেন। অনন্তবর্ষার লিপি হইতে জানা যায় যে ১১৩৫ অব্দের অনতিকাল পূর্বে তিনি উড়িষ্যা জয় করিয়া স্বীয় রাজ্যভুক্ত করেন। সুতরাং রামপালের মৃত্যু পর্যাস্ত উড়িষ্যা তাঁহার আধিপত্য ছিল ইহা অনুমান করা যাইতে পারে।

রামচরিতের একটি শ্লোকে একপক্ষে সীতার সৌন্দর্য্য ও অপরপক্ষে বরেন্দ্রীর সহিত অন্যান্য দেশের রাজনৈতিক সম্বন্ধ বর্ণিত হইয়াছে। টীকা না থাকায় এই শ্লোকের সমুদয় ইঙ্গিত স্পষ্ট বোঝা যায় না, কিন্তু কয়েকটি সিদ্ধান্ত বেশ যুক্তিসঙ্গত বলিয়া মনে হয়। প্রথমত রামপাল অঙ্গদেশ জয় করিয়াছিলেন (অবনমদঙ্গ)। দ্বিতীয়ত তিনি কর্ণাটরাজগণের লোলুপ দৃষ্টি হইতে বঙ্গদেশকে রক্ষা করিতে সমর্থ হইয়াছিলেন (অধরিতকর্ণাটেক্ষণলীলা)। তৃতীয়ত তিনি মধ্যদেশের রাজ্যবিস্তারে বাধা দিয়াছিলেন (ধৃতমধ্যদেশতনিমা)।

অঙ্গ ও মগধ যে রামপালের রাজ্যভুক্ত ছিল শিলালিপি হইতে তাহার প্রমাণ পাওয়া যায়। কর্ণাটদেশীয় চালুক্যরাজগণের বাংলা আক্রমণের কথা পূর্ব্বেই বলা হইয়াছে। রামপালের রাজ্যকালে আখ্যাবর্তে কর্ণাটগণের প্রভুত্ব আরও বিস্তার লাভ করে। কর্ণাটের দুইজন সেনানায়ক পালসাম্রাজ্যের সীমার মধ্যেই দুইটি রাজ্যের প্রতিষ্ঠা করে। প্রথমটি রাঢ়দেশের সেনরাজ্য। রামপালের জীবিতকালে ইহা খুব শক্তিশালী ছিল না এবং এ সম্বন্ধে পরে আলোচিত হইবে। কিন্তু কর্ণাটবীর নাগদেব একাদশ শতাব্দের শেষ ভাগে (আ ১০৯৭) মিথিলায় আর একটি প্রবল স্বাধীন রাজ্যের প্রতিষ্ঠা করেন। মিথিলা প্রথম মহীপালের সময় পালরাজ্যভুক্ত ছিল। নাগদেবের সহিত গোড়াধিপের সংঘর্ষ হয়। এই গোড়াধিপ সম্ভবত রামপাল, কারণ রামপালকে পরাজিত না করিয়া কোন কর্ণাটবীর মিথিলায় রাজ্য প্রতিষ্ঠা করিতে পারেন ইহা সম্ভবপর বলিয়া মনে হয় না। সুতরাং কর্ণাটের লোলুপ দৃষ্টি এ সময় বাংলার বিশেষ আশঙ্কা ও উদ্বেগের কারণ হইয়াছিল। রামপালের জীবিতকালে নাগ বাংলা জয় করিতে পারেন নাই এবং সেনরাজগণও মাথা তুলিতে পারেন নাই—সম্ভবত রামচরিতকার ইহাই ইঙ্গিত করিয়াছেন। রামপালের মৃত্যুর অনতিকাল পরেই কর্ণাটদেশীয় সেনরাজগণ সমস্ত বাংলা দেশ জয় করেন। সুতরাং রামপাল যে কর্ণাটের লোলুপ দৃষ্টি হইতে বাংলা দেশ রক্ষা করিতে পারিয়াছিলেন ইহা কম কৃতিত্বের কথা নহে।

রামপালের রাজ্যকালে গাহড়বাল বংশীয় চন্দ্রদেব বর্তমান যুক্তপ্রদেশে একটি শক্তিশালী রাজ্য প্রতিষ্ঠা করেন। কাশী ও কান্যকুব্জ এই রাজ্যের দুইটি প্রধান কেন্দ্র ছিল। পালরাজ্যের সীমান্তে অবস্থিত থাকায় পালরাজগণের সহিত ইহাদের সংঘর্ষ উপস্থিত হইল। গাহড়বালরাজগণের লিপি হইতে জানা যায় যে ১১০৯ অব্দের পূর্ব্বে গাহড়বালরাজ মদনপালের পুত্র গোবিন্দচন্দ্রের সহিত গোড়রাজের যুদ্ধ হইয়াছিল। এই যুদ্ধে যে গোবিন্দচন্দ্র জয়লাভ করিয়া গোড়রাজ্যের কোন অংশ অধিকার করিয়াছিলেন তাঁহার প্রশস্তিকারও এমন কথা বলেন নাই। সুতরাং রামপাল মধ্যদেশের রাজ্যবিস্তার প্রতিরোধ করিতে পারিয়াছিলেন রামচরিতের এই উক্তি বিশ্বাসযোগ্য বলিয়াই মনে হয়। এই প্রসঙ্গে ইহাও উল্লেখযোগ্য যে গোবিন্দচন্দ্রের রাণী কুমারদেবী রামপালের মাতুল মহনের দৌহিত্রী ছিলেন। অসম্ভব নহে যে মহন এই বৈবাহিক সম্বন্ধ দ্বারা রামপালের সহিত গাহড়বালরাজের মিত্রতাস্থাপন করিতে চেষ্টা করিয়াছিলেন এবং কতক পরিমাণে কৃতকার্যও হইয়াছিলেন। মহন যে কেবল রাম-



পালের মাতুল ছিলেন এবং তাঁহার ঘোর বিপদের দিনে পুত্র ও ভ্রাতৃপুত্রসহ তাঁহার সাহায্য করিয়াছিলেন তাহা নহে, উভয়ে অভিন্নহৃদয় সূত্রং ছিলেন। বৃদ্ধবয়সে রামপাল মহাশয়ের মৃত্যুসংবাদ শুনিয়া এত শোকাকুল হইলেন যে নিজের প্রাণ বিসর্জন করিতে কৃতসংকল্প হইলেন। মুদগগিরি (মুঙ্গের) নগরীতে গঙ্গাগর্ভে প্রবেশপূর্বক তিনি এই নশ্বর দেহ ত্যাগ করিয়া স্বর্গে মাতুলের সহিত মিলিত হইলেন। বঙ্গুর শোকে এইরূপ আত্মবিসর্জনের দৃষ্টান্ত জগতে বিরল।

রামপাল ৪২ বৎসরেরও অধিককাল রাজা করেন। জ্যেষ্ঠভ্রাতা মহীপালের রাজ্যকালেই তিনি যৌবনে পদার্পণ করেন, অত্যাধা তিনি সিংহাসনের জন্ত ষড়যন্ত্র করিতেছেন এরূপ অপবাদ বিশ্বাসযোগ্য হইত না। সুতরাং মৃত্যুকালে তাঁহার অস্তুত ৭০ বৎসর বয়স হইয়াছিল এরূপ অনুমান করা যাইতে পারে। তিনি সম্ভবত ১০৭৭ হইতে ১১২০ অব্দ পর্য্যন্ত রাজত্ব করেন।

রামপালের জীবন ও মৃত্যু উভয়ই বিচিত্র। তাঁহার কাহিনী ইতিহাস অপেক্ষা উপন্যাসের অধিক উপযোগী। জীবনের প্রারম্ভে জ্যেষ্ঠভ্রাতার অমূলক সন্দেহের ফলে যখন কারাগারে শৃঙ্খলিত অবস্থায় তিনি নিদারুণ শারীরিক ও মানসিক যন্ত্রণা ভোগ করিতেছিলেন, তখন অস্তুর্বিপ্লবের ফলে বরেন্দ্রে পাল-রাজ্যের অবসান হইল। সেই ঘোর দুর্ঘ্যোগের দিনে অসহায় বন্দী রামপাল কিরূপে জীবন রক্ষা করিয়াছিলেন ইতিহাস তাহার কোন সন্ধান রাখে না। তারপর পিতৃরাজ্য হইতে বিতাড়িত হইয়া কোন্ নিভৃত প্রদেশে তিনি দীর্ঘকাল দুঃসহ মনোব্যথায যাপন করিয়াছিলেন তাহাও জানা যায় না। যখন বিপদ আরও ঘনীভূত হইয়া উঠিল এবং সম্ভবত তাঁহার শেষ আশ্রয়টুকুও হস্তচ্যুত হইবার উপক্রম হইল, তখন ধর্মপাল ও দেবপালের উত্তরাধিকারী এবং প্রথম মহীপালের বংশধর ভারতপ্রসিদ্ধ রাজবংশের এই শেষ মুকুটমণি লজ্জা ঘৃণা ভয় ত্যাগ করিয়া অধীনস্থ সামন্তরাজগণের দ্বারে দ্বারে সাহায্য ভিক্ষা করিয়া ফিরিতে লাগিলেন। তাঁহার উত্তম ও অধ্যবসায়ে রাজলক্ষ্মী তাঁহার প্রতি প্রসন্ন হইলেন। বরেন্দ্র পুনরধিকৃত হইল, বাংলা দেশের সর্বত্র তিনি প্রভুত্ব প্রতিষ্ঠিত করিলেন এবং কামরূপ ও উৎকল জয় করিলেন। দক্ষিণে দিগ্বিজয়ী অনন্তবর্ষা চোড়গঙ্গ এবং পশ্চিমে চালুক্য ও গাহড়বাল এই তিনটি প্রবল রাজ-শক্তির বিরুদ্ধে তাঁহাকে সংগ্রাম করিতে হইয়াছিল। তাঁহার বাহুবলে ঋগুবিধুও বাংলা দেশে আবার একতা ও সুদৃঢ় রাজশক্তি ফিরিয়া আসিল, বাঙ্গালী

আবার সাম্রাজ্য প্রতিষ্ঠার স্বপ্ন দেখিল। নিবিবার ঠিক আগে প্রদীপ যেমন উজ্জ্বল হইয়া উঠে রামপালের রাজ্যকালে পালরাজ্যের কীর্ত্তিশিখাও তেমনি শেষবারের মত জ্বলিয়া উঠিল। রামপালের মৃত্যুর সঙ্গে সঙ্গেই পাল-বংশের গৌরবরবি চিরদিনের তরে অন্তমিত হইল।

## দশম পরিচ্ছেদ

### পাল রাজ্যের ঋংস

রামপালের মৃত্যুর পর তাঁহার পুত্র কুমারপাল রাজা হইলেন। রামচরিতে উক্ত হইয়াছে যে রামপালের দুই পুত্র বিজ্ঞপাল ও রাজ্যপাল বরেন্দ্রের বিদ্রোহদমনে যথেষ্ট সাহায্য করিয়াছিলেন। রামপালের আর এক পুত্র মদনপাল পরে পালরাজ্যের রাজা হইয়াছিলেন। রামপালের এই চারি পুত্রের মধ্যে কে সর্বজ্যেষ্ঠ ছিলেন, এবং কোন্ অধিকারে কুমারপাল পিতার মৃত্যুর পর সিংহাসনে আরোহণ করিয়াছিলেন তাহা সঠিক জানিবার উপায় নাই।

কুমারপালের রাজত্বকালে ( আ ১১২০-১১২৫ ) দক্ষিণবঙ্গে বিদ্রোহ হইয়াছিল এবং তাঁহার “প্রাণাপেক্ষা প্রিয়তর বন্ধু প্রধান অমাত্য” বৈষ্ঠদেব নৌযুদ্ধে বিদ্রোহীদেরকে পরাজিত করিয়াছিলেন। ইহার কিছুদিন পরেই পূর্বভাগে, সম্ভবত কামরূপে, তিম্গ্যদেব বিদ্রোহী হইয়াছিলেন এবং বৈষ্ঠদেব তাঁহাকে পরাজিত করিয়া সেই রাজ্যের রাজা হইয়াছিলেন। পরবর্ত্তীকালে, সম্ভবত কুমারপালের মৃত্যুর পর, বৈষ্ঠদেব কামরূপে স্বাধীনভাবে রাজ্য করেন। কুমারপালের পর তাঁহার পুত্র তৃতীয় গোপাল রাজা হন। তাঁহার রাজত্বকালের ( আ ১১২৫-১১৪০ ) কোন ঘটনাই জানা যায় না। কিন্তু পালরাজ্যের অন্তর্বিদ্রোহ সম্ভবত এই সময় আরও বিস্তৃত হয়। পূর্ববঙ্গে বর্ম্মণ রাজারা স্বাধীনতা ঘোষণা করেন। সুযোগ পাইয়া দক্ষিণ হইতে গঙ্গরাজগণ পালরাজ্য আক্রমণ করেন। ১১৩৫ অব্দের পূর্বে অনন্তবর্ম্মা চোড়গঙ্গ মেদিনীপুর ও হুগলী জিলার মধ্য দিয়া অগ্রসর হইয়া গঙ্গাতীরবর্ত্তী মন্ডার প্রদেশ পর্য্যন্ত জয় করেন। তিনি যে মিথুনপুর ও আরম্য হুর্গ অধিকার করেন তাহা সম্ভবত

আধুনিক মেদিনীপুর ও আরামবাগ (হুগলী জিলা)। দাক্ষিণাত্যের চালুক্য-রাজগণও পশ্চিমবঙ্গ আক্রমণ করেন এবং ইহার ফলে রাঢ়দেশের সেনরাজবংশ প্রবল হইয়া ওঠে। গাহড়বাল রাজগণও মগধ আক্রমণ করিয়া পাটনা পর্য্যন্ত অধিকার করেন।

তৃতীয় গোপালের মৃত্যুর পর মদনপাল যখন সিংহাসনে আরোহণ করেন তখন এইরূপে আভ্যন্তরিক বিদ্রোহ ও বহিঃশত্রুর আক্রমণে পালরাজ্য দ্রুতবেগে ধ্বংসের পথে অগ্রসর হইতেছিল। মদনপাল চতুর্দিকে শত্রু কর্তৃক আক্রান্ত হইয়া পালরাজ্য রক্ষার জন্য যথাসাধ্য চেষ্টা করিলেন, কিন্তু সমর্থ হইলেন না। রামচরিতের একটি শ্লোক হইতে অনুমিত হয় যে তিনি অনন্তবর্ষা চোড়গঙ্গের সহিত যুদ্ধে কিছু সফলতা লাভ করিয়াছিলেন। কিন্তু এই সময়ে গাহড়বালগণ আরও অগ্রসর হইয়া মুঙ্গের নগরী পর্য্যন্ত অধিকার করে। অনেক চেষ্টার পর মদনপাল এই অঞ্চল শত্রুহস্ত হইতে পুনরুদ্ধার করেন। কিন্তু শীঘ্রই তাঁহাকে অগ্ন্যায় শত্রুর বিরুদ্ধে অগ্রসর হইতে হয়। গোবর্দ্ধন নামক এক রাজাকে তিনি পরাজিত করেন। সম্ভবত ইনি বাংলার কোন অঞ্চলে এক স্বাধীন রাজ্য স্থাপন করিয়াছিলেন। আর এক প্রবল শত্রু মদনপালের বহু সৈন্য নষ্ট করিয়াছিল। মদনপাল বহুকষ্টে তাহাকে কালিন্দী নদীর তীর পর্য্যন্ত হঠাইয়া দেন। এই নদী সম্ভবত মালদহের নিকটবর্তী কালিন্দী নদী। এইরূপে যে শত্রুরাজ্য গোড় দেশের একাংশ জয় করিয়া প্রায় পালরাজধানী পর্য্যন্ত অগ্রসর হইয়াছিলেন তিনি সম্ভবত সেনরাজ বিজয় সেন। বিজয় সেনের শিলালিপি হইতে জানা যায় যে তিনি গোড়-রাজকে বিতাড়িত করিয়াছিলেন এবং গোড়রাজ্যের অস্তুত কিয়দংশ অধিকার করিয়াছিলেন। এই পরাজিত গোড়রাজ যে মদনপাল সে বিষয়ে কোন সন্দেহ নাই। মদনপাল আনুমানিক ১১৪০ হইতে ১১৫৫ অব্দ পর্য্যন্ত রাজত্ব করেন।

মদনপালের রাজত্বের সমুদয় ঘটনার বিশদ বিবরণ অথবা পারস্পর্য্য সঠিক না জানিতে পারিলেও ইহা অনায়াসেই সিদ্ধান্ত করা যাইতে পারে যে তাঁহার মৃত্যুকালে দক্ষিণ, পূর্ব, ও পশ্চিম বঙ্গে তাঁহার কোন অধিকারই ছিল না। উত্তর বঙ্গেরও সমগ্র অথবা অধিকাংশ তাঁহার হস্তচ্যুত হইয়াছিল। সুতরাং পালরাজ্য এই সময়ে মগধের মধ্য ও পূর্বভাগে সীমাবদ্ধ ছিল।

মদনপালের পর গোবিন্দপাল নামে এক রাজা গয়ায় রাজত্ব করেন। ইহারও পরমেশ্বর পরমভট্টারক মহারাজাধিরাজ প্রভৃতি পদবী এবং গোড়েশ্বর

উপাধি ছিল। ইনি সম্ভবত মদনপালের মৃত্যুর পরই রাজসিংহাসনে আরোহণ করেন এবং ১১৬২ খৃষ্টাব্দে তাঁহার রাজ্য বিনষ্ট হয়। তিনি বৌদ্ধ ছিলেন এবং একখানি বৌদ্ধ পুঁথিতে “শ্রীমদগোবিন্দপালদেবানাং বিনষ্টরাজ্যে অষ্টত্রিংশৎ সম্বৎসরে” এইরূপ কালজ্ঞাপক পদ পাওয়া যায়। অপর কয়েকখানি পুঁথিতে ‘বিনষ্টরাজ্যের’ পরিবর্তে ‘গতরাজ্য’, ‘অতীত-সম্বৎসর’ প্রভৃতি শব্দ ব্যবহৃত হইয়াছে। এই সমুদয় কালজ্ঞাপক বাক্য হইতে অনুমিত হয় যে গোবিন্দপালই মগধের শেষ বৌদ্ধ রাজা, এবং এইজন্যই বৌদ্ধ ভিক্ষুগণ তাঁহার মৃত্যুর পর বিধর্মী রাজার ‘প্রবর্দ্ধমান বিজয়রাজ্যের’ উল্লেখ না করিয়া গোবিন্দপালের রাজ্য-ধ্বংস হইতে কালগণনা করিতেন।

গোবিন্দপাল পালরাজবংশীয় ছিলেন কিনা তাহা নিশ্চিত করিয়া বলা যায় না। তাঁহার পদবী ও উপাধি, বৌদ্ধধর্ম, ও মদনপালের মৃত্যুর অব্যবহিত পরেই মগধে রাজত্বের কথা বিবেচনা করিলে তিনি যে পালরাজবংশীয় ছিলেন এরূপ অনুমান সঙ্গত বলিয়া মনে হয়। কিন্তু তাহা হইলেও মদনপালের সহিত তাঁহার কি সম্বন্ধ ছিল, এবং গয়ার বাহিরে তাঁহার রাজ্য কতদূর বিস্তৃত ছিল—অর্থাৎ তাঁহার গোঁড়েশ্বর উপাধি কেবলমাত্র পূর্ববঙ্গের সূচক অথবা গোঁড়রাজ্যে তাঁহার কোনকালে কোনপ্রকার অধিকার ছিল—ইত্যাদি বিষয়ে কিছুই বলা যায় না। তবে ইহা একপ্রকার স্থির সিদ্ধান্ত করা যাইতে পারে যে ১১৬২ খৃষ্টাব্দে তাঁহার রাজ্য বিনষ্ট হওয়ার সঙ্গে সঙ্গেই ধর্মপাল, দেবপাল, মহীপাল ও রামপালের স্মৃতি বিজড়িত পালরাজ্যের শেষ চিহ্ন বিলুপ্ত হইয়া যায়।

কেহ কেহ পলপাল, ইন্দ্রহ্যমপাল প্রভৃতি দুই একজন পরবর্তী পাল উপাধিধারী রাজার উল্লেখ করিয়াছেন, কিন্তু তাঁহাদের অস্তিত্ব সম্বন্ধে সন্দেহ করিবার যথেষ্ট কারণ আছে।

## একাদশ পরিচ্ছেদ

### বর্ষরাজবংশ

একাদশ শতাব্দীর শেষভাগে যখন পালরাজশক্তি ক্রমশ দুর্বল হইয়া পড়িতেছিল তখন পূর্ববঙ্গে বর্ষ-উপাধিধারী এক রাজবংশের প্রতিষ্ঠা হয় একথা পূর্বেই বলা হইয়াছে (৬০ পৃঃ)। ঢাকা জিলার অন্তর্গত বেলাব গ্রামে প্রাপ্ত একখানি তাম্রশাসনই এই রাজবংশের ইতিহাসের প্রধান অবলম্বন। এই শাসনে বর্ষরাজগণের বংশপরিচয়ে প্রথমে পৌরাণিক কাহিনী অনুযায়ী ব্রহ্মা হইতে পুত্রপৌত্রাদিক্রমে অত্রি, চন্দ্র, বৃষ, পুরুষ, আয়ু নহুষ, যযাতি ও যজ্ঞর, এবং এই যজ্ঞবংশে হরির অবতার কৃষ্ণের জন্মের উল্লেখ আছে। এই হরির বান্ধব অর্থাৎ জ্ঞাতি বর্ষবংশ বৈদিক ধর্মের প্রধান পৃষ্ঠপোষক ছিলেন এবং সিংহপুরে রাজত্ব করিতেন। এই বংশীয় বজ্রবর্ষা একাধারে বীর, কবি ও পণ্ডিত ছিলেন। তাঁহার পুত্র জাতবর্ষা বহু যুদ্ধে জয়লাভ করিয়া সার্বভৌমত্ব লাভ করিয়াছিলেন। তিনি অঙ্গদেশে স্বীয় ক্ষমতা প্রতিষ্ঠিত করিয়াছিলেন, কামরূপ জয় করিয়াছিলেন, দিব্যের ভূজবল হতশ্রী করিয়াছিলেন, এবং গোবর্দ্ধন নামক রাজাকে পরাজিত করিয়াছিলেন। প্রশস্তিকারের দ্ব্যর্থবোধক শ্লোকের এই উক্তি কতদূর সত্য তাহা বলা যায় না। ঐ শ্লোকে ইহাও বলা হইয়াছে যে তিনি কর্ণের কন্যা বীরশ্রীকে বিবাহ করিয়াছিলেন। ডাঙলের কলচুরিরাজ কর্ণ যে পালরাজ্য আক্রমণ করিয়া বঙ্গদেশ পর্য্যন্ত অগ্রসর হইয়াছিলেন এবং অবশেষে পালরাজ তৃতীয় বিগ্রহপালের সহিত স্বীয় কন্যা যৌবনশ্রীর বিবাহ দিয়াছিলেন তাহা পূর্বেই উল্লিখিত হইয়াছে। সুতরাং অসম্ভব নহে যে জাতবর্ষা কলচুরিরাজ গান্ধেয়দেব ও কর্ণের অধীনস্থ সামন্তরাজরূপে তাঁহাদের সঙ্গে পালরাজ্য আক্রমণ করেন, এবং অঙ্গদেশে পালরাজ ও বরেন্দ্রে কৈবর্তরাজ দিব্যের সহিত যুদ্ধে প্রবৃত্ত হন। তারপর কোন সুযোগে পূর্ববঙ্গে অধিকার প্রতিষ্ঠিত করিয়া কামরূপ আক্রমণ করেন ও গোবর্দ্ধন নামক বঙ্গদেশীয় কোন রাজার বিরুদ্ধে অভিযান করেন। অবশ্য এ সকলই বর্তমানে অনুমান মাত্র—কারণ ইহার সপক্ষে বিশিষ্ট কোন প্রমাণ নাই। কিন্তু এইরূপ কোন অনুমানের আশ্রয় না লইলে সিংহপুর নামক ক্ষুদ্র রাজ্যের অধিপতি জাতবর্ষা কেবলমাত্র

নিজের বাহুবলে অঙ্গ, কামরূপ ও বরেন্দ্রে বিজয়াভিযান করিয়া বঙ্গে এক স্বাধীন রাজ্য প্রতিষ্ঠা করিয়াছিলেন এরূপ বিশ্বাস করা কঠিন।

বর্ষরাজগণের আদিম রাজ্য সিংহপুর কোথায় ছিল এ বিষয়ে পণ্ডিত-গণের মধ্যে মতভেদ আছে। পঞ্জাবের একখানি শিলালিপিতে সিংহপুরের যাদব-বংশসম্বৃত্তা জালন্ধরের এক রাণীর কথা আছে এবং ছয়েনসাংও পঞ্জাবে এক সিংহপুর রাজ্যের উল্লেখ করিয়াছেন। কেহ কেহ অনুমান করেন যে ইহাই পূর্ববঙ্গের যাদব-বংশীয় বর্ষরাজগণের আদি বাসভূমি। কলিঙ্গও এক সিংহপুর রাজ্য ছিল—এইস্থান বর্তমানে সিজুপুরম্ নামে পরিচিত এবং চিকাকোল ও নরাসল্পপেতার মধ্যস্থলে অবস্থিত। সিংহলদেশীয় গ্রন্থে যে বিজয়সিংহের আখ্যান আছে তাহাতে রাঢ়দেশে এক সিংহপুরের উল্লেখ আছে; ইহা সম্ভবত হুগলী জিলার অন্তর্গত সিজুর নামক গ্রামে অবস্থিত ছিল। বর্ষগণের আদি বাসভূমি কলিঙ্গ অথবা রাঢ়ের অন্তর্গত সিংহপুরে ছিল ইহাও কেহ কেহ অনুমান করেন। কলিঙ্গের সিংহপুর রাজ্য পঞ্চম হইতে দ্বাদশ শতাব্দী পর্য্যন্ত বিদ্যমান ছিল ইহার বিশেষ প্রমাণ আছে। খুব সম্ভবত জাতবর্ষা এই রাজ্যেরই অধিপতি ছিলেন। কলচুরিরাজগণের প্রশস্তি অনুসারে গাঙ্গেয়দেব অঙ্গ ও উৎকলের রাজাকে পরাজিত করেন ও তৎপুত্র কর্ণ গোড়, বঙ্গ ও কলিঙ্গে আধিপত্য করেন। সুতরাং কলিঙ্গদেশীয় জাতবর্ষা কলচুরি রাজগণের অধীনে অঙ্গ, গোড় ও বঙ্গে যুদ্ধাভিযান করিয়াছিলেন এবং এই সুযোগে বঙ্গে এক স্বাধীন রাজ্য স্থাপন করিয়াছিলেন এরূপ অনুমানই খুব স্বাভাবিক বলিয়া মনে হয়।

বেলাব তাম্রশাসনে জাতবর্ষার পর তাঁহার পুত্র সামলবর্ষার উল্লেখ আছে। কিন্তু ঢাকার নিকটবর্তী বজ্রযোগিনী গ্রামে এই সামলবর্ষার একখানি তাম্রশাসনের যে একটি খণ্ডমাত্র পাওয়া গিয়াছে তাহা হইতে অনুমিত হয় যে জাতবর্ষার পরে হরিবর্ষা রাজত্ব করেন। এই তাম্রশাসনখানির সম্পূর্ণ পাঠ উদ্ধার না হইলে এ সম্বন্ধে কোন স্থির সিদ্ধান্ত করা যায় না। কিন্তু হরিবর্ষা নামে যে একজন রাজা ছিলেন তাহার বহু প্রমাণ আছে। দুইখানি বৌদ্ধ-গ্রন্থের পুঁথি মহারাজাধিরাজ পরমেশ্বর পরমভট্টারক হরিবর্ষার রাজত্বের ১২ ও ৩৯ সংবৎসরে লিখিত হইয়াছিল। হরিবর্ষার মন্ত্রী প্রসিদ্ধ পণ্ডিত ভবদেব ভট্টের একখানি শিলালিপি পাওয়া গিয়াছে ইহাতেও হরিবর্ষার উল্লেখ আছে। হরিবর্ষার একখানি তাম্রশাসন সামন্তসার গ্রামে পাওয়া গিয়াছে। দুঃখের বিষয় অগ্নিদগ্ধ হওয়ায় এই তাম্রশাসনখানির পাঠ অনেক স্থলেই অস্পষ্ট ও

দুর্বোধ। ইহাতে হরিবর্ষ্মার পিতার নাম আছে। ৮নগেন্দ্রনাথ বসু ইহা জ্যোতিবর্ষ্মা পড়িয়াছিলেন কিন্তু শ্রীযুক্ত নলিনীকান্ত ভট্টশালী বলেন যে ইহা সম্ভবত জাতবর্ষ্মা। এই পাঠ সত্য হইলে বলিতে হইবে যে জাতবর্ষ্মার মৃত্যুর পর তাঁহার জ্যেষ্ঠপুত্র হরিবর্ষ্মা রাজত্ব করেন।

হরিবর্ষ্মার রাজধানী সম্ভবত বিক্রমপুরেই ছিল এবং তিনি প্রায় অর্ধ শতাব্দীকাল যাবৎ রাজত্ব করেন। রামচরিতে উক্ত হইয়াছে যে হরি নামক সেনাপতি ভীমের পরাজয়ের পর রামপালের সহিত সখ্যসূত্রে আবদ্ধ ছিলেন, এবং প্রাক্দেশীয় এক বর্ষ্ম নরপতি স্বীয় পরিত্রাণের নিমিত্ত বিজয়ী রামপালের নিকট উপঢৌকন পাঠাইয়াছিলেন। খুব সম্ভবত উক্ত হরি ও বর্ষ্ম নরপতি এবং হরিবর্ষ্মা একই ব্যক্তি। তবে এ সম্বন্ধে নিশ্চিত কিছু বলা যায় না।

হরিবর্ষ্মার পর তাঁহার পুত্র রাজা হইয়াছিলেন। কিন্তু ইহাদের কাহারও রাজ্যকালের বিশেষ কোন বিবরণ পাওয়া যায় না। তবে ইহাদের মন্ত্রী ভবদেবভট্ট একজন প্রসিদ্ধ ব্যক্তি ছিলেন এবং একখানি শিলালিপি হইতে তাঁহার ও তাঁহার বংশের বিস্তৃত বিবরণ পাওয়া যায়। বাংলাদেশের এই প্রকার প্রাচীন ব্রাহ্মণ বংশের কোন সঠিক বিবরণ বিশেষ দুর্বল, সুতরাং ইহার সংক্ষিপ্ত উল্লেখ প্রয়োজন।

রাঢ়দেশের অলঙ্কারস্বরূপ সিদ্ধল গ্রামের অধিবাসী ভবদেব গোড় রাজার নিকট হইতে হস্তিনীভিট্ট গ্রাম উপহার পাইয়াছিলেন। তাঁহার পৌত্রের পৌত্র আদিদেব বঙ্গরাজের বিশেষ বিশ্বাসভাজন মহামন্ত্রী, মহাপাত্র ও সাক্ষিবিগ্রহিক ছিলেন। তাঁহার পুত্র গোবর্দ্ধন শস্ত্র ও শাস্ত্রে তুল্য পারদর্শী ছিলেন এবং পণ্ডিতগণের সভায় ও যুদ্ধক্ষেত্রে খ্যাতি অর্জন করিয়াছিলেন। তাঁহার পত্নী বন্দ্যযটীয় এক ব্রাহ্মণকন্যার গর্ভে ভবদেব ভট্ট জন্মগ্রহণ করেন। তিনি সিদ্ধান্ত, তন্ত্র, গণিত ও ফলসংহিতায় (জ্যোতিষ) পারদর্শী ছিলেন এবং হোরাশাস্ত্রে অভিনব সিদ্ধান্ত প্রচার করিয়াছিলেন। তিনি ধর্মশাস্ত্রের ও শ্রুতির নূতন ব্যাখ্যা ও মীমাংসা সম্বন্ধে বহু গ্রন্থ রচনা করিয়াছিলেন, এবং কবিকলা, সর্ব্ব আগম (বেদ), অর্থশাস্ত্র, আয়ুর্বেদ, অস্ত্রবেদ প্রভৃতি শাস্ত্রে অদ্বিতীয় পণ্ডিত ছিলেন। তিনি রাজা হরিবর্ষ্মদেবের মন্ত্রী ছিলেন এবং তাঁহার মন্ত্রশক্তির প্রভাবে ধর্মবিজয়ী রাজা হরিবর্ষ্মা দীর্ঘকাল রাজ্য ভোগ করিয়াছিলেন। প্রশস্তিকারের বর্ণনা অনুসারে ভবদেবভট্ট একজন অসাধারণ পুরুষ ছিলেন। অতিরঞ্জিত হইলেও ভবদেবের পাণ্ডিত্যের খ্যাতি যে অনেকাংশে সত্য তাহাতে সন্দেহ নাই, কারণ তাঁহার মীমাংসা ও শ্রুতি বিষয়ক গ্রন্থ এখনও প্রচলিত ও

প্রসিদ্ধ। সংস্কৃত সাহিত্য প্রসঙ্গে পরে ইহার আলোচনা করা যাইবে। ভবদেবের বালবলভীভুজ এই উপাধি ছিল। ইহার প্রকৃত অর্থ নির্ণয় করা হ্রাহ। বালবলভী সম্ভবত কোন স্থানের নাম।

হরিবর্ষা ও তাঁহার পুত্রের পর জাতবর্ষার অপর পুত্র সামলবর্ষা রাজা হন। মহারাজাধিরাজ সামলবর্ষার রাজ্যকালের কোন বিবরণ জানা যায় না, কিন্তু বাংলার বৈদিক ব্রাহ্মণগণের কুলজী গ্রন্থ অনুসারে রাজা সামলবর্ষার আমন্ত্রণে তাঁহাদের পূর্বপুরুষ ১০০১ শাকে বাংলা দেশে আগমন করেন। কোন কোন বৈদিক কুলজী মতে রাজা হরিবর্ষাই বৈদিক ব্রাহ্মণ আনয়ন করেন। মোটের উপর বাংলায় বৈদিক ব্রাহ্মণের প্রতিষ্ঠার ইতিহাস বর্ষরাজবংশের সহিত জড়িত। কুলজীতে যে তারিখ (১০৭২ অব্দ) আছে তাহা একেবারে ঠিক না হইলেও খুব বেশী ভুল বলা যায় না। কারণ জাতবর্ষা তৃতীয় বিগ্রহ-পালের সমসাময়িক, সুতরাং একাদশ শতাব্দীর মধ্যভাগে রাজত্ব করিতেন; এবং তাঁহার পুত্রদ্বয় হরিবর্ষা ও সামলবর্ষা একাদশ শতাব্দীর শেষার্ধ্বে ও দ্বাদশ শতাব্দীর প্রথমে রাজত্ব করিয়াছিলেন ইহা সহজেই অনুমান করা যাইতে পারে।

সামলবর্ষার পর তাঁহার পুত্র ভোজবর্ষা রাজত্ব করেন। তাঁহার রাজধানী বিক্রমপুর হইতে তাঁহার রাজত্বের পঞ্চম বৎসরে বেলাব-তাম্রশাসন প্রদত্ত হয়। এই তাম্রশাসনে ভোজবর্ষা পরমবৈষ্ণব পরমেশ্বর পরমভট্টারক মহারাজাধিরাজ প্রভৃতি উপাধিতে ভূষিত হইয়াছেন। সুতরাং তিনি যে একজন স্বাধীন ও পরাক্রান্ত রাজা ছিলেন একপা অনুমান করা অসঙ্গত নহে। কিন্তু ভোজবর্ষার পরে এই বংশের কোন বিবরণ পাওয়া যায় না। সম্ভবত দ্বাদশ শতাব্দীর প্রথম অর্ধে সেনরাজবংশীয় বিজয়সেন এই বর্ষরাজবংশের উচ্ছেদ করেন।



# দ্বাদশ পরিচ্ছেদ

## সেনরাজবংশ

### ১। উৎপত্তি

সেনরাজগণের পূর্বপুরুষগণ কর্ণাটবাসী ছিলেন। তাঁহাদের শিলালিপি অনুসারে তাঁহারা চন্দ্রবংশীয় এবং ব্রহ্মক্ষত্রিয় ছিলেন। বাংলাদেশের প্রাচীন কুলজীগ্রন্থে তাঁহাদিগকে বৈষ্ণব জাতীয় বলা হইয়াছে। আধুনিক কালে তাঁহাদিগকে কায়স্থ এবং বাংলাদেশের অন্যান্য সুপরিচিত জাতিভুক্ত বলিয়া প্রতিপন্ন করিবার চেষ্টা হইয়াছে। কিন্তু এ বিষয়ে সমসাময়িক লিপিতে তাঁহাদের নিজেদের উক্তিই সত্য বলিয়া গ্রহণ করিতে হইবে। সুতরাং সেন রাজগণ যে কর্ণাটদেশের ক্ষত্রিয় জাতির এক শাখাভুক্ত ছিলেন সে সম্বন্ধে সন্দেহ করিবার কোন কারণ নাই। বাংলা দেশে আসিবার পর তাঁহারা হয়ত বৈবাহিক সম্বন্ধ দ্বারা বৈষ্ণব অথবা অন্য কোন জাতির অন্তর্ভুক্ত হইয়াছিলেন, কিন্তু এসম্বন্ধে নিশ্চিত কিছু বলা যায় না।

ব্রহ্মক্ষত্রিয় একটি সুপরিচিত জাতি। অনেকে মনে করেন যে প্রথমে ব্রাহ্মণ ও পরে ক্ষত্রিয় হওয়াতেই এই জাতির এরূপ নামকরণ হইয়াছে। সেন রাজগণের এক পূর্বপুরুষ ব্রহ্মবাদী বলিয়া উল্লিখিত হইয়াছেন। এই সময় কর্ণাটদেশে ( বর্তমান ধারবাড় জিলায় ) সেন উপাধিধারী অনেক জৈন আচার্য্যের নাম পাওয়া যায়। ইহারা সেনবংশীয় বলিয়া অভিহিত হইয়াছেন। কেহ কেহ অনুমান করেন যে বাংলার সেনরাজগণ এই জৈন আচার্য্যবংশে জন্মগ্রহণ করেন। প্রথমে তাঁহারা জৈনধর্ম ত্যাগ করিয়া শৈবধর্ম ও পরবর্তীকালে ধর্মচর্য্যার পরিবর্তে শঙ্করচর্য্য গ্রহণ করেন। এই অনুমান কতদূর সত্য তাহা বলা কঠিন।

সেনরাজগণ কোন্ সময়ে বাংলা দেশে প্রথম বসতিস্থাপন করেন সে সম্বন্ধে সেনরাজগণের লিপিতে যে দুইটি উক্তি আছে তাহা প্রথমে পরস্পর বিরোধী বলিয়াই মনে হয়। বিজয়সেনের দেওপাড়া লিপিতে কথিত হইয়াছে যে সামন্তসেন রামেশ্বর সেতুবন্ধ পর্য্যন্ত বহু যুদ্ধাভিযান করিয়া এবং দুর্ব্বৃত্ত কর্ণাটলক্ষ্মী-লুণ্ঠনকারী শত্রুকুলকে ধ্বংস করিয়া শেষ বয়সে গঙ্গাতটে পুণ্যাশ্রমে জীবন যাপন করিয়াছিলেন। ইহা হইতে স্বতই অনুমিত হয় যে সামন্তসেনই প্রথমে কর্ণাট হইতে বঙ্গদেশে আসিয়া গঙ্গাতীরে বাস করেন। কিন্তু বল্লাল

সেনের নৈহাটি তান্ত্রশাসনে উক্ত হইয়াছে যে চন্দ্রের বংশে জাত অনেক রাজপুত্র রাঢ়দেশের অলঙ্কারস্বরূপ ছিলেন এবং তাঁহাদের বংশে সামন্তসেন জন্মগ্রহণ করেন। এখানে স্পষ্ট বলা হইয়াছে যে সামন্তসেনের পূর্বপুরুষগণ রাঢ়দেশে প্রতিষ্ঠা লাভ করিয়াছিলেন। এই দুইটি উক্তির সামঞ্জস্য সাধন করিতে হইলে বলিতে হয় যে কর্ণাটের এক সেনবংশ বহুদিন যাবৎ রাঢ়দেশে বাস করিতে-ছিলেন, কিন্তু তাঁহারা কর্ণাট দেশের সহিতও সম্বন্ধ রক্ষা করিয়া আসিতেছিলেন। এই বংশের সামন্তসেন যৌবনে কর্ণাট দেশে বহু যুদ্ধে নিজের শৌর্য্যবীৰ্য্যের পরিচয় দিয়া এই বংশের উন্নতির সূত্রপাত করেন এবং সম্ভবত ইহার ফলেই তাঁহার পুত্র হেমন্ত সেন রাঢ়দেশে একটি স্বাধীন রাজ্যের প্রতিষ্ঠা করিতে সমর্থ হইয়াছিলেন।

কি উপায়ে বিদেশীয় সেনগণ বাংলায় রাজ্য প্রতিষ্ঠা করিয়াছিলেন তাহা অত্যাধিক সঠিক নির্ণীত হয় নাই। কেহ কেহ অনুমান করেন যে তাঁহারা প্রথমে পালরাজগণের অধীনে সৈন্যধ্যক্ষ অথবা অগ্র কোন উচ্চ রাজকাৰ্য্যে নিযুক্ত ছিলেন। পরে পালরাজগণের দুর্বলতার সুযোগে রাজ্য প্রতিষ্ঠা করিতে সমর্থ হইয়াছিলেন। এই অনুমানের সপক্ষে বলা যাইতে পারে যে পালরাজগণের তান্ত্রশাসনে যে কর্মচারীর তালিকা আছে তাহার মধ্যে নিয়মিতভাবে 'গোড়-মালব-খশ-ছগ-কুলিক-কর্ণাট-লাট-চাট-ভাট' এই পদের উল্লেখ দেখিতে পাওয়া যায়। সুতরাং সম্ভবত পাল রাজগণ খশ ছগ প্রভৃতির ন্যায় কর্ণাটগণকেও সৈন্যদলে নিযুক্ত করিতেন এবং সেনবংশীয় তাহাদের নায়ক কোন সুযোগে পশ্চিমবঙ্গে ক্ষুদ্র এক রাজ্যের অধিপতি হইয়াছিলেন।

কেহ কেহ বলেন যে কর্ণাটদেশীয় সেনরাজগণের পূর্বপুরুষ কোন আক্রমণকারী রাজার সহিত দাক্ষিণাত্য হইতে বঙ্গদেশে আসেন এবং পরবর্ত্তী যুগের সন্ধিয়া হোলকার প্রভৃতি মহারাষ্ট্র নায়কগণের ন্যায় পশ্চিম বঙ্গে এক স্বাধীন রাজ্যের প্রতিষ্ঠা করেন। কর্ণাটের চালুক্যরাজগণ যে একাধিকবার বঙ্গদেশ আক্রমণ করেন তাহা পূর্বেই বলা হইয়াছে। যুবরাজ বিক্রমাদিত্য আ ১০৬৮ অব্দে গোড় ও কামরূপ আক্রমণ করিয়া জয়লাভ করিয়াছিলেন। ইহার পূর্বে ও পরে এইরূপ বিজয়াভিযানের কথা চালুক্যগণের শিলালিপিতে উল্লিখিত হইয়াছে। একাদশ শতাব্দীর শেষ অথবা দ্বাদশ শতাব্দীর প্রথম ভাগে চালুক্যরাজ বিক্রমাদিত্যের সামন্ত আচ বঙ্গ ও কলিঙ্গ রাজ্যে স্থায়ী প্রভুর আধিপত্য স্থাপন করিয়াছেন বলিয়া গর্ব্ব করিয়াছেন। ১১২১ ও ১১২৪ অব্দে উৎকীর্ণ লিপিতে বিক্রমাদিত্যকর্তৃক অঙ্গ, বঙ্গ, কলিঙ্গ, গোড়, মগধ

ও নেপাল জয়ের উল্লেখ আছে। সুতরাং ইহা অসম্ভব নহে যে এই সমস্ত অভিযানের ফলেই কর্ণাট বংশীয় সেনগণ বঙ্গদেশে এবং নান্যদেব মিথিলায় প্রভুত্ব স্থাপনের সুযোগ পাইয়াছিলেন।

কেহ কেহ অনুমান করেন যে সেনরাজগণের পূর্বপুরুষ চোলরাজ রাজেন্দ্র চোলের সঙ্গে বঙ্গদেশে আসিয়াছিলেন। কিন্তু রাজেন্দ্র চোল কর্ণাট-বাসী ছিলেন না, সুতরাং পূর্বোক্ত অনুমানই অধিকতর বিশ্বাসযোগ্য বলিয়া মনে হয়।

সেনরাজগণ যে সময় এবং যে ভাবেই বঙ্গদেশে আসিয়া থাকুন, সামন্ত-সেনের পূর্বে তাঁহাদের কোন বিশ্বাসযোগ্য বিবরণ পাওয়া যায় নাই। সামন্তসেন কর্ণাটদেশে অনেক যুদ্ধে যশোলাভ করিয়া বৃদ্ধ বয়সে রাঢ়দেশে গঙ্গাতীরে বাসস্থাপন করিয়াছিলেন। কিন্তু তিনি কোন স্বাধীন রাজ্য প্রতিষ্ঠা করিতে পারিয়াছিলেন বলিয়া মনে হয় না। কারণ তাঁহার পৌত্র বিজয়সেনের শিলালিপিতে তাঁহার নামের সঙ্গে কোন রাজত্ব-সূচক পদবী ব্যবহৃত হয় নাই। অপর পক্ষে বিজয়সেনের লিপিতে তাঁহার পিতা হেমন্তসেন মহারাজাধিরাজ ও মাতা যশোদেবী মহারাজ্ঞী উপাধিতে ভূষিত হইয়াছেন। সুতরাং হেমন্তসেনই এই বংশের প্রথম স্বাধীন রাজা ছিলেন এই অনুমানই সঙ্গত বলিয়া মনে হয়। কিন্তু হেমন্তসেন সম্বন্ধে আর কোন বিবরণ এপর্যন্ত জানা যায় নাই।

## ২। বিজয়সেন

হেমন্তসেনের মৃত্যুর পর তাঁহার পুত্র বিজয়সেন সিংহাসনে আরোহণ করেন। বিজয়সেনের একখানি তাম্রশাসন ও একখানি শিলালিপি আবিষ্কৃত হইয়াছে। তাম্রশাসনখানিতে তাঁহার যে রাজ্যাক্ষ লিখিত আছে তাহার প্রকৃতি পাঠ সম্বন্ধে মতভেদ আছে। কেহ কেহ ইহাকে ৩২ এবং কেহ কেহ ৬২ পাঠ করিয়াছেন। এই শেষোক্ত মতই এখন সাধারণত গৃহীত হইয়া থাকে এবং ইহা সত্য হইলে বিজয়সেন আ ১০৯৫ অব্দে রাজ্য লাভ করিয়াছিলেন। অপর পক্ষে তাম্রশাসনোক্ত রাজ্যাক্ষ ৩২ পাঠ করিলে তিনি আ ১১২৫ অব্দে সিংহাসনে আরোহণ করিয়াছিলেন এরূপ অনুমানই যুক্তিসঙ্গত বলিয়া মনে হয়।

পূর্বেরই বলা হইয়াছে যে পালরাজ রামপাল আ ১০৭৭ হইতে ১১২০ অব্দ পর্য্যন্ত রাজত্ব করেন। সুতরাং, যদি বিজয়সেন ১০৯৫ অব্দে সিংহাসনে আরোহণ করিয়া থাকেন তাহা হইলে তাঁহার রাজত্বের প্রথম ২৫ বৎসর তিনি

সুজ্জ্বল অধিপতি এবং অন্তত কিছুকাল রামপালের সামন্ত ছিলেন এই সিদ্ধান্তই সমীচীন বলিয়া মনে হয়। যে সমুদয় সামন্তরাজ রামপালকে বরেন্দ্র উদ্ধারে সাহায্য করিয়াছিলেন তাঁহাদের মধ্যে নিজাবলীর বিজয়রাজ একজন। কেহ কেহ অনুমান করেন যে এই বিজয়রাজই সেনরাজ বিজয়সেন। আবার বিজয়সেনের শিলালিপির ঊনবিংশ শ্লোকে গুঢ় শ্লেষ অর্থ করনা করিয়া কেহ কেহ সিদ্ধান্ত করিয়াছেন যে বিজয়সেন কৈবর্তরাজ দিবাকে পরাজিত করিয়াছিলেন। কিন্তু এই অনুমান ভিত্তিহীন বলিয়াই মনে হয়।

রামপালের মৃত্যুর পর যখন পালরাজ্যে গোলযোগ উপস্থিত হইল তখনই বিজয়সেন স্বীয় শক্তি বৃদ্ধি করিবার সুযোগ পাইলেন। শ্রবংশীয় রাজকন্যা বিলাসদেবী তাঁহার প্রধানা মহিষী ছিলেন। রামপালের সামন্ত রাজগণের মধ্যে অরণ্য প্রদেশস্থ সামন্তবর্গের চুড়ামণি অপর-মন্দারের অধিপতি লক্ষ্মীশূরের উল্লেখ আছে। রাজেন্দ্রচোলের লিপিতে দক্ষিণ রাঢ়ের অধিপতি রণশূরের নাম পাওয়া যায়। সুতরাং একাদশ শতাব্দীতে দক্ষিণ রাঢ় অথবা ইহার অধিকাংশ শ্রবংশীয় রাজগণের অধীনে ছিল। সম্ভবত বিলাসদেবী এই বংশীয় ছিলেন এবং তাঁহাকে বিবাহ করিয়া বিজয়সেন রাঢ়দেশে স্বীয় অধিকার প্রতিষ্ঠা করিবার সুবিধা পাইয়াছিলেন। কিন্তু কর্ণাটরাজের সামন্ত আচ কর্তৃক বঙ্গদেশে প্রভুত্ব স্থাপনই সম্ভবত কর্ণাটদেশীয় বিজয়সেনের শক্তিবৃদ্ধির প্রধান কারণ।

যে উপায়েই হউক বিজয়সেন যে রামপালের মৃত্যুর অনতিকালপরেই সমগ্র বঙ্গদেশে প্রভুত্ব স্থাপনের প্রয়াসী হইয়াছিলেন সে বিষয়ে সন্দেহ নাই। তিনি বর্ষ্মরাজকে পরাজিত করিয়া পূর্ব ও দক্ষিণ বঙ্গ অধিকার করেন। তাঁহার দেওপাড়া শিলালিপিতে উক্ত হইয়াছে যে নাগ, বীর, রাঘব ও বর্দ্ধন নামক রাজগণ তাঁহার সহিত যুদ্ধে পরাভূত হন এবং তিনি কামরূপরাজকে দূরীভূত, ফলিজরাজকে পরাজিত এবং গোড়রাজকে দ্রুত পলায়ন করিতে বাধ্য করেন।

বিজয়সেনের স্থায় কর্ণাটদেশীয় নাগদেব মিথিলায় রাজত্ব স্থাপন করিয়াছিলেন। সম্ভবত তিনিও বঙ্গদেশ অধিকার করিতে অগ্রসর হইয়াছিলেন এবং এই সূত্রেই বিজয়সেনের সহিত তাঁহার যুদ্ধ হয়। যুদ্ধে পরাজিত হইয়া নাগদেব বঙ্গজয়ের আশা ত্যাগ করিতে বাধ্য হইয়াছিলেন। বীর, বর্দ্ধন ও রাঘব এই তিনজন রাজা কোথায় রাজত্ব করিতেন তাহা নিশ্চিত বলা যায় না।

বিজয়সেন কর্তৃক পরাজিত গোড়রাজ যে মদনপাল সে বিষয়ে কোন সন্দেহ নাই। রাজসাহী জিলার অন্তর্গত দেওপাড়া নামক স্থানে বিজয়সেনের

যে শিলালিপি পাওয়া গিয়াছে তাহা হইতে জানা যায় যে তিনি ঐ স্থানে প্রত্যাশ্বরের এক প্রকাণ্ড মন্দির নির্মাণ করিয়াছিলেন। সুতরাং বরেন্দ্রের অন্তত এক অংশ যে বিজয়সেনের রাজ্যভুক্ত হইয়াছিল সে বিষয়ে সন্দেহ নাই। কামরূপ ও কলিঙ্গের অভিযানের ফলে বিজয়সেন কি পরিমাণে ঐ দুই রাজ্যে স্বীয় অধিকার প্রতিষ্ঠা করিতে পারিয়াছিলেন তাহা নিশ্চিত বলা যায় না, কিন্তু ইহা হইতে সিদ্ধান্ত করা যায় যে সমগ্র পূর্ব ও পশ্চিম বঙ্গে বিজয়সেনের আধিপত্য দৃঢ়ভাবে প্রতিষ্ঠিত হইয়াছিল। কারণ তাহা না হইলে তাঁহার পক্ষে কামরূপ ও কলিঙ্গে কোন অভিযান প্রেরণ করা সম্ভবপর ছিল বলিয়া মনে হয় না।

এইরূপে বহুযুদ্ধে জয়লাভ করিয়া বিজয়সেন প্রায় সমগ্র বঙ্গদেশে এক অখণ্ড রাজ্য প্রতিষ্ঠা করিতে সমর্থ হইয়াছিলেন। পালরাজগণ মগধে আশ্রয় লইয়াছিলেন। বরেন্দ্রের এক অংশে তাঁহাদের কোন আধিপত্য ছিল কিনা বলা যায় না, কিন্তু বঙ্গদেশের অথবা কোনও স্থানে তাঁহাদের যে কোন প্রকার প্রভুত্বই ছিল না সে সম্বন্ধে কোন সন্দেহ নাই।

দেওপাড়া লিপিতে উল্লিখিত হইয়াছে যে পাশ্চাত্য চক্র জয় করিবার জন্ত বিজয়সেনের নৌ-বিতান গঙ্গানদীর মধ্য দিয়া অগ্রসর হইয়াছিল। এই রণসজ্জার উদ্দেশ্য ও ফলাফল কিছুই নিশ্চিতরূপে জানা যায় না। সম্ভবতঃ মগধের পাল ও গাহড়বাল এই দুই রাজশক্তির বিরুদ্ধেই ইহা প্রেরিত হইয়াছিল। যদি ইহা রাজর্মহল অতিক্রম করিয়া থাকে তাহা হইলে বলিতে হইবে যে বরেন্দ্র ও মিথিলা এই উভয় প্রদেশেই বিজয়সেনের শক্তি দৃঢ়ভাবে প্রতিষ্ঠিত হইয়াছিল। কিন্তু পাশ্চাত্য শক্তির বিরুদ্ধে যুদ্ধযাত্রা যে বিশেষ সফল হইয়াছিল দেওপাড়া লিপির বর্ণনা হইতে এরূপ মনে হয় না।

বিজয়সেনের রাজত্ব বাংলার ইতিহাসে বিশেষ একটি স্মরণীয় ঘটনা। বহুদিন পরে আবার একটি দৃঢ় রাজশক্তি প্রতিষ্ঠিত হইয়া দেশে শ্রুত ও শান্তি আনয়ন করিয়াছিল। পালরাজত্বের শেষ যুগে বাংলার রাজনৈতিক একতা বিনষ্ট হইয়াছিল এবং ক্ষুদ্র ক্ষুদ্র সামন্তরাজগণ স্বীয় স্বার্থের প্রেরণায় বৃহত্তর জাতীয় ঐক্যের আদর্শ ভুলিয়া পরস্পর কলহে মত্ত ছিলেন। অর্থ ও রাজ্যের লোভ দেখাইয়া রামপাল ইহাদিগকে কিছুদিনের জন্ত স্বপক্ষে আনিয়াছিলেন, কিন্তু ইহাদিগকে দমন করিয়া দৃঢ় অখণ্ড রাজশক্তির প্রভাব পুনরায় প্রতিষ্ঠিত করিতে পারেন নাই। বিজয়সেন ইহা করিতে সমর্থ হইয়াছিলেন এবং তাঁহার প্রবল প্রত্যাপে বাংলায় এক নূতন গৌরবময় যুগের সূচনা করিয়াছিলেন।

বিজয়সেন এইরূপ কঠোর শাসনের প্রবর্তন না করিলে বাংলাদেশে পুনরায় অরাজকতা ও মাৎস্যহাযের প্রাদুর্ভাব হইত। সাধারণ একজন সামন্তরাজ্যের পদ হইতে নিজের বুদ্ধি সাহস ও রণ-কৌশলে বিজয়সেন বাংলার সার্বভৌম রাজার স্থান অধিকার করিয়াছিলেন ইহাই তাঁহার প্রধান কৃতিত্ব ও অসামান্য ব্যক্তিত্বের পরিচায়ক। তিনি পরমেশ্বর পরমভট্টারক ও মহারাজাধিরাজ উপাধি গ্রহণ করিয়াছিলেন এবং 'অরিরাজ-বৃষভশঙ্কর' এই গৌরবসূচক নামে পরিচিত ছিলেন। তাঁহার রাজত্বে যে বাংলায় নবযুগের সূত্রপাত হইয়াছিল কবি উমাপতিধর রচিত দেওপাড়া প্রশস্তি তাহার সাক্ষ্য দিতেছে। অত্যাশ্রিত দোষে দূষিত হইলেও এই প্রশস্তির মধ্যে এক নবজাগ্রত রাজ-শক্তির আশা আকাঙ্ক্ষা ও আদর্শ প্রতিধ্বনিত হইয়াছে এবং বিজয়সেনের এক দিরাট মহিমাময় চিত্র প্রতিফলিত হইয়াছে। প্রসিদ্ধ কবি ভ্রাহ্ম-রচিত বিজয়-প্রশস্তি ও গোড়োবর্ষীশ-কুল-প্রশস্তি বিজয়সেনের উদ্দেশ্যেই লিখিত হইয়াছিল এরূপ মনে করিবার সঙ্গত কারণ আছে।

## ৩। বল্লালসেন

আ ১১৫৮ অব্দে বিজয়সেনের মৃত্যু হয় এবং তৎপুত্র বল্লালসেন সিংহাসনে আরোহণ করেন। বল্লালসেনের একখানি তাম্রশাসন এবং তাঁহার রচিত দানসাগর এবং অদ্ভুতসাগর নামক দুইখানি গ্রন্থ হইতে তাঁহার সম্বন্ধে কিছু কিছু বিবরণ জানা যায়। এতদ্ব্যতীত 'বল্লাল রচিত' নামক দুইখানি গ্রন্থ আবিষ্কৃত হইয়াছে, ইহাতে বল্লালসেনের অনেক কাহিনী বিবৃত হইয়াছে। বল্লালচরিতের একখানি গ্রন্থের পুষ্পিকা হইতে জানা যায় যে ইহাব প্রথম দুইখণ্ড বল্লালসেনের অনুরোধে তাঁহার শিক্ষক গোপালভট্ট কর্তৃক ১৩০০ শকাব্দে, এবং তৃতীয় খণ্ড নবদ্বীপাধিপতির আদেশে গোপালভট্টের বংশধর আনন্দভট্ট কর্তৃক ১৫০০ শকাব্দে রচিত হইয়াছিল। বল্লালচরিতের দ্বিতীয় গ্রন্থ নবদ্বীপের রাজা বুদ্ধিমন্তখানের আদেশে আনন্দভট্ট কর্তৃক ১৪৩২ শকাব্দে রচিত বলিয়া উল্লিখিত হইয়াছে। মহামহোপাধ্যায় হরপ্রসাদ শাস্ত্রীর মতে প্রথম গ্রন্থখানি জাল এবং দ্বিতীয় গ্রন্থখানিই প্রকৃত বল্লালচরিত। কিন্তু এই সিদ্ধান্ত গ্রহণ করা কঠিন। উভয় গ্রন্থই কতকগুলি বংশাবলী এবং জন-প্রবাদের সমষ্টিমাত্র এবং ইহার কোনখানিই প্রামাণিক বা অকৃত্রিম বলিয়া গ্রহণ করা যায় না। সম্ভবত বোধশ কি সপ্তদশ শতাব্দীতে কেবলমাত্র প্রচলিত

কিংবদন্তী অবলম্বন করিয়াই এই গ্রন্থ দুইখানি লিখিত হইয়াছিল এবং উনবিংশ শতাব্দীতেও ইহার কোন কোন অংশ পরিবর্তিত অথবা পরিবর্দ্ধিত হইয়াছে। সুতরাং বল্লালচরিতের কোন উক্তি অগ্র প্রমাণাভাবে বিশ্বাসযোগ্য বলিয়া গ্রহণ করা সঙ্গত নহে।

দানসাগর ও অদ্ভুতসাগরের উপসংহারে বল্লালসেনের পরিচায়ক কয়েকটি শ্লোক আছে। ইহা হইতে জানা যায় যে গুরু অনিরুদ্ধের নিকট বল্লালসেন বেদস্মৃতিপুরাণ প্রভৃতি বহুশাস্ত্র অধ্যয়ন করিয়াছিলেন। বল্লালসেন যে যাগযজ্ঞাদি ধর্ম্মানুষ্ঠানে রত প্রবীণ শাস্ত্রবিৎ পণ্ডিত ছিলেন তাঁহার রচিত উক্ত দুইখানি গ্রন্থই তাহার শ্রেষ্ঠ নিদর্শন। এদেশে বল্লালসেনের সম্বন্ধে যে সমুদয় প্রবাদ প্রচলিত আছে তাহাও এই সিদ্ধান্তের সমর্থন করে। বঙ্গীয় কুলজী গ্রন্থে কৌলীন্দ্ৰ প্রথার উৎপত্তির সহিত বল্লালসেনের নাম অচ্ছেদ্যভাবে জড়িত। বাংলা দেশ বিজয়সেনকে ভুলিয়া গিয়াছে কিন্তু বল্লালসেনের নাম ও স্মৃতি এদেশে হইতে বিলুপ্ত হয় নাই।

যাগযজ্ঞ, শাস্ত্রচর্চা ও সমাজসংস্কার প্রভৃতি কার্যে প্রধানত নিযুক্ত থাকিলেও বল্লালসেন যুদ্ধবিগ্রহ হইতে একেবারে মুক্ত থাকিতে পারেন নাই। অদ্ভুতসাগরে তাঁহাকে “গৌড়েন্দ্র-কুঞ্জরালান-সম্ভবাহর্মহীপতিঃ” বলিয়া বর্ণনা করা হইয়াছে। ইহা হইতে অনুমিত হয় যে গৌড়বাজের সহিত তিনি যুদ্ধ করিয়াছিলেন। এই গৌড়রাজ সম্ভবত গোবিন্দপাল, কারণ তিনি গৌড়েশ্বর উপাধি ধারণ করিতেন। পূর্বেই বলা হইয়াছে যে গোবিন্দপাল মগধে রাজত্ব করিতেন এবং ১১৬২ অব্দে তাঁহার রাজ্য বিনষ্ট হয়। সুতরাং খুব সম্ভব বল্লালসেনের হস্তেই তিনি পরাজিত ও রাজ্যচ্যুত হন। বল্লালচরিতে বল্লালসেনের মগধ-জয়ের উল্লেখ আছে। এই গ্রন্থে আরও উক্ত হইয়াছে যে পিতার জীবদ্দেশায় তিনি মিথিলা জয় করেন। মিথিলা যে সেনরাজ্যের অন্তর্ভুক্ত ছিল এরূপ অনুমান করিবার সঙ্গত কারণ আছে। প্রথমত, নাগদেবের মৃত্যুর অব্যবহিত পরবর্তী যুগে মিথিলার কোন বিশ্বাসযোগ্য বিবরণ ঐ দেশীয় ইতিহাসে লিপিবদ্ধ হয় নাই। দ্বিতীয়ত প্রচলিত ও সুপ্রসিদ্ধ জনপ্রবাদ অনুসারে বল্লালসেন স্বীয় রাজ্য রাঢ়, বরেন্দ্র, বাগড়ী, বঙ্গ ও মিথিলা এই পাঁচভাগে বিভক্ত করেন। তৃতীয়ত বল্লালসেনের পুত্র লক্ষ্মণসেনের নামযুক্ত সংবৎ মিথিলায় অভাবধি প্রচলিত আছে। মিথিলার বাহিরে অগ্র কোন স্থানে এই অক জনসাধারণের মধ্যে প্রচলিত ছিল এরূপ প্রমাণ পাওয়া যায় নাই। মিথিলা সেনরাজ্যভুক্ত না হইলে তথায় এই অক প্রচলনের কোন স্থায়সঙ্গত কারণ

পাওয়া যায় না। সুতরাং বল্লালসেন মিথিলা জয় করিয়াছিলেন এই প্রবাদ সত্য বলিয়া গ্রহণ করা যাইতে পারে।

বল্লালসেন যে পিতৃরাজ্য অক্ষুণ্ণ রাখিয়াছিলেন তাহা নিঃসন্দেহে গ্রহণ করা যাইতে পারে। সম্ভবত মিথিলা ও মগধের কতকাংশ তাঁহার রাজ্যভুক্ত ছিল। তিনি চালুক্যরাজের ( সম্ভবত দ্বিতীয় জগদেকমল্ল ) ছুহিতা রামদেবীকে বিবাহ করেন। ইহা হইতে প্রমাণিত হয় যে সেনরাজগণের সম্মান ও প্রতিপত্তি বাংলার বাহিরে বিস্তৃত হইয়াছিল এবং পিতৃভূমি কর্ণাটের সহিতও তাঁহাদের সম্বন্ধ বিচ্ছিন্ন হয় নাই। পিতার অনুকরণে বল্লালসেন সম্রাট-সূচক অশ্বাশ্ব পদবীর সহিত ‘অরিরাজ-নিঃশঙ্কশঙ্কর’ এই নাম গ্রহণ করিয়াছিলেন। বল্লালসেন যে কেবল রাজগণের নহে বিদ্বানমণ্ডলীরও চক্রবর্তী ছিলেন প্রশস্তিকারের এই উক্তি অনেকাংশে সত্য।

শস্ত্রচালনা ও শাস্ত্রচর্চায় জীবন অতিবাহিত করিয়া রাজষিভূলা বল্লালসেন বৃদ্ধ বয়সে পুত্র লক্ষণসেনের হস্তে রাজ্যভার অর্পণ এবং তাঁহাকে সাম্রাজ্যরক্ষারূপ মহাদীক্ষায় দীক্ষিত করিয়া সস্ত্রীক ত্রিবেণীর নিকট গঙ্গাতীরে বাণপ্রস্থ অবলম্বন পূর্বক শেষজীবন অতিবাহিত করেন। অদ্বুতসাগরের একটি শ্লোক হইতে আমরা এই বিবরণ পাই। এই শ্লোকের এক্রূপ অর্থও করা যাইতে পারে যে বৃদ্ধ রাজা ও রাণী স্বেচ্ছায় গঙ্গাগর্ভে দেহত্যাগ করিয়াছিলেন।

### ৪। লক্ষণসেন

১১৭৯ অব্দে লক্ষণসেন পিতৃসিংহাসনে আরোহণ করেন। তাঁহার রাজ্যকালের আটখানি তাম্রশাসন, তাঁহার সভাকবিগণরচিত কয়েকটি স্তুতিবাচক শ্লোক, তাঁহার পুত্রদ্বয়ের তাম্রশাসন ও মুসলমান ঐতিহাসিক মীনহাজুদ্দিন বিরচিত তবকাং-ই-নাসিরী নামক গ্রন্থ হইতে তাঁহার রাজ্যের অনেক বিবরণ পাওয়া যায়। বাল্যকালেই তিনি পিতা ও পিতামহের সঙ্গে যুদ্ধক্ষেত্রে উপস্থিত হইয়া রণকুশলতার পরিচয় দিয়াছিলেন। তাঁহার দুইখানি তাম্রশাসনে উক্ত হইয়াছে যে তিনি কৌমারে উদ্ধত গোড়েখরের শ্রীহরণ ও যৌবনে কলিঙ্গ দেশে অভিযান করিয়াছিলেন; তিনি যুদ্ধে কাশিরাজকে পরাজিত করিয়াছিলেন এবং ভীক্স প্রাগজ্যোতিষের ( কামরূপ-আসাম ) রাজা তাঁহার বশ্যতা স্বীকার করিয়াছিলেন। আমরা পূর্বে দেখিয়াছি যে বিজয়সেন ও বল্লালসেন উভয়েই গোড়েখরের বিরুদ্ধে যুদ্ধ করিয়াছিলেন। সুতরাং খুব সম্ভবত কুমার



লক্ষ্মণসেন পিতা অথবা পিতামহের রাজত্বকালে গোঁড়ে যে অভিযান করিয়াছিলেন প্রশস্তিকার এস্থলে তাহারই উল্লেখ করিয়াছেন। কিন্তু প্রশস্তিকার অগ্ৰত্ৰ লিখিয়াছেন যে লক্ষ্মণসেন নিজভূজবলে সমর-সমুদ্র মস্থন করিয়া গোঁড়লক্ষ্মী লাভ করিয়াছিলেন। বিজয়সেন গোঁড়রাজকে দূরীভূত করিলেও তাঁহার রাজ্যকালে গোঁড়বিজয় সম্ভবত সম্পূর্ণ হয় নাই। কারণ গোবিন্দপাল গোঁড়েশ্বর উপাধি ধারণ করিতেন এবং বল্লালসেনকে গোঁড়ে অভিযান করিতে হইয়াছিল। লক্ষ্মণসেনই সম্ভবত সম্পূর্ণরূপে গোঁড়দেশ জয় করেন। কারণ রাজধানী গোড়ের লক্ষ্মণাবতী এই নাম সম্ভবত লক্ষ্মণসেনের নাম অনুসারেই হইয়াছিল এবং সর্বপ্রথম তাঁহার তাম্রশাসনেই সেনরাজগণের নামের পূর্বে গোঁড়েশ্বর এই উপাধি ব্যবহৃত হইয়াছে।

লক্ষ্মণসেনের কলিঙ্গ ও কামরূপ জয়ও সম্ভবত তাঁহার পিতামহের রাজ্যকালেই সংঘটিত হইয়াছিল। কারণ বিজয়সেনের রাজ্যকালেই এই দুই দেশ বিজিত হইয়াছিল। তবে ইহাও অসম্ভব নহে যে গোড়ের ন্যায় এই দুই রাজ্য বিজয় লক্ষ্মণসেনই সম্পূর্ণ করেন এবং এইজন্ত তাঁহাকে পুনরায় যুদ্ধ করিতে হইয়াছিল। কারণ তাঁহার পুত্রদ্বয়ের তাম্রশাসনে উক্ত হইয়াছে যে তিনি সমুদ্রতীরে পুরুষোত্তম ক্ষেত্রে, কাশীতে ও প্রয়াগে যজ্ঞযূপের সহ 'সমরজয়ন্তস্ত' স্থাপিত করিয়াছিলেন। এই সময়ে গঙ্গবংশীয় রাজগণ কলিঙ্গ ও উৎকল উভয় দেশেই রাজত্ব করিতেন। সম্ভবত লক্ষ্মণসেন কোন গঙ্গরাজাকে পরাজিত করিয়াই পুরীতে জয়ন্তস্ত স্থাপন করিয়াছিলেন।

কাশী ও প্রয়াগে জয়ন্তস্ত স্থাপন পশ্চিমদিকে গাহড়বাল রাজ্যের বিরুদ্ধে তাঁহার বিজয়াভিযান সূচিত করিতেছে। পালবংশের পতনের পূর্বেই যে গাহড়বাল রাজগণ মগধে আধিপত্য বিস্তার করিয়াছিলেন তাহা পূর্বে উল্লিখিত হইয়াছে। বিজয়সেন নৌবাহিনী পাঠাইয়াও তাঁহাদের বিরুদ্ধে বিশেষ কোন জয়লাভ করিতে পারেন নাই। বল্লালসেন কিছু সফলতা লাভ করিয়াছিলেন, কিন্তু তিনি গোবিন্দপালের রাজ্য নষ্ট করায় গাহড়বালগণ মগধে আরও অধিকার বিস্তারের সুযোগ পাইলেন। গাহড়বালরাজ বিজয়চন্দ্র ও জয়চন্দ্রের লিপি হইতে প্রমাণিত হয় যে ১১৬৯ হইতে ১১৯০ অব্দের মধ্যে মগধের পশ্চিম ও মধ্যভাগ গাহড়বাল রাজ্যের অন্তর্গত ছিল। গাহড়বাল রাজ্যের পূর্বদিকে এইরূপ দ্রুত বিস্তার সেনরাজ্যের পক্ষে বিশেষ আশঙ্কাজনক হওয়ায় লক্ষ্মণসেনের সহিত গাহড়বাল রাজ্যের যুদ্ধ অবশ্যম্ভাবী হইয়া উঠিয়াছিল। বিস্তৃত বিবরণ জানা না থাকিলেও লক্ষ্মণসেন যে এই যুদ্ধে বিশেষ সফলতা লাভ

করিয়াছিলেন সে বিষয়ে কোন সন্দেহ নাই। মগধের মধ্যভাগে গয়া জিলায় যে লক্ষ্মণসেন রাজ্য বিস্তার করিয়াছিলেন বৌদ্ধগয়ায় প্রাপ্ত ছুইখানি লিপিতে তাহার স্পষ্ট প্রমাণ পাওয়া যায়। গাহড়বালরাজ জয়চন্দ্রের লিপি হইতে প্রমাণিত হয় যে ১১৮২ হইতে ১১৯২ অব্দের মধ্যে তিনি গয়ায় রাজত্ব করিতেন। তাঁহাকে পরাজিত না করিয়া লক্ষ্মণসেন কখনও গয়া অধিকার করিতে পারেন নাই। লক্ষ্মণসেন কর্তৃক জয়চন্দ্রের পরাজয়ের একুপ স্পষ্ট প্রমাণ বিদ্যমান থাকায় লক্ষ্মণসেন যে কাশী ও প্রয়াগে জয়ন্তস্তু স্থাপন করিয়াছিলেন তাম্র-শাসনের এই বিশিষ্ট উক্তি নিছক কল্পনা মনে করিয়া অগ্রাহ্য করিবার কোন যুক্তিসঙ্গত কারণ নাই।

এইরূপে দেখা যায় যে উত্তরে গোড়, পূর্বে কামরূপ ও দক্ষিণে কলিঙ্গ-রাজকে পরাভূত করিয়া লক্ষ্মণসেন পৈত্রিক রাজ্য অক্ষুণ্ণ এবং সুদৃঢ় করিতে সমর্থ হইয়াছিলেন। পশ্চিমে তিনি স্বায়-পিতা ও পিতামহ অপেক্ষা অধিকতর সফলতা অর্জন করিয়াছিলেন এবং অন্তত মগধে রাজ্য বিস্তার করিয়াছিলেন। তাঁহার মৃত্যু ও সেনরাজ্যধ্বংসের বহুকাল পরেও মগধে তাঁহার রাজ্যশেষ হইতে সংবৎসর গণনা করা হইত। মগধে লক্ষ্মণসেনের ক্ষমতা যে দৃঢ়ভাবে প্রতিষ্ঠিত হইয়াছিল ইহাই তাহার প্রকৃষ্ট প্রমাণ।

লক্ষ্মণসেনের ছুই সভাকবি উমাপতিধর ও শরণ রচিত কয়েকটি শ্লোকে এক রাজার বিজয়কাহিনীর উল্লেখ আছে। শ্লোকগুলিতে রাজার নাম নাই কিন্তু তিনি যে প্রাগ্জ্যোতিষ ( কামরূপ ), গোড়, কলিঙ্গ, কাশী, মগধ প্রভৃতি জয় করিয়াছিলেন এবং চেদি ও ম্লেচ্ছরাজকে পরাজিত করিয়াছিলেন তাহার উল্লেখ আছে। এই সমুদয় শ্লোক যে লক্ষ্মণসেনকে উদ্দেশ্য করিয়াই তাহার সভাকবিরা রচনা করিয়াছিলেন একুপ সিদ্ধান্ত অনায়াসেই করা যাইতে পারে। কারণ চেদি ও ম্লেচ্ছরাজের পরাজয় বাতীত অগ্রাহ্য বিজয়কাহিনী যে লক্ষ্মণসেনের সম্বন্ধে প্রযোজ্য তাহার বিশিষ্ট প্রমাণ পাওয়া যায়। সুতরাং লক্ষ্মণসেন যে চেদি ( কলচুরি ) ও কোন ম্লেচ্ছ রাজাকে পরাজিত করিয়াছিলেন একুপ অস্বাভাবিক অসঙ্গত নহে। রতনপুরের কলচুরিরাজগণের সামন্ত বল্লভরাজ গোড়রাজকে পরাভূত করিয়াছিলেন, মধ্য প্রদেশের একখানি শিলালিপিতে একুপ উল্লেখ আছে। সুতরাং লক্ষ্মণসেনের সহিত চেদিরাজের সংঘর্ষ সম্ভবত ঐতিহাসিক ঘটনা। এই যুদ্ধে ছুইপক্ষই জয়ের দাবী করিয়াছেন—সুতরাং ইহার ফলাফল অনিশ্চিত বলিয়াই গ্রহণ করিতে হইবে।

উল্লিখিত আলোচনা হইতে দেখা যায় যে লক্ষ্মণসেন বাল্যকাল হইতে

আরম্ভ করিয়া প্রায় সারাজীবনই যুদ্ধবিগ্রহে লিপ্ত ছিলেন। ধর্মপাল ও দেবপালের পরে বাংলার আর কোন রাজা তাঁহার ছায় বাংলার সীমান্তের বাহিরে যুদ্ধে এরূপ সফলতা লাভ করিতে পারেন নাই। কিন্তু যুদ্ধ ব্যবসায়ী হইলেও রাজা লক্ষ্মণসেন শাস্ত্র ও ধর্মচর্চায় পিতার উপযুক্ত পুত্র ছিলেন। বল্লালসেন তাঁহার অন্ততঃসাগর গ্রন্থ সমাপ্ত করিয়া যাইতে পারেন নাই। পিতার নির্দেশক্রমে লক্ষ্মণসেন এই গ্রন্থ সমাপ্ত করেন। লক্ষ্মণসেন নিজে সুকবি ছিলেন এবং তাঁহার রচিত কয়েকটি শ্লোক পাওয়া গিয়াছে। ধোয়ী, শরণ; জয়দেব, গোবর্দ্ধন এবং উমাপতিধর প্রভৃতি প্রসিদ্ধ কবিগণ তাঁহার রাজসভা অলঙ্কৃত করিতেন। তাঁহার প্রধান মন্ত্রী ও ধর্ম্যাধ্যক্ষ হলানুধ ভারত প্রসিদ্ধ পণ্ডিত ছিলেন। জয়দেব এখনও একজন শ্রেষ্ঠ সংস্কৃত কবি বলিয়া জগদ্বিখ্যাত। তাঁহার মধুর বৈষ্ণব পদাবলী এখনও ভারতের ঘরে ঘরে গীত হইয়া থাকে।

লক্ষ্মণসেন নিজেও বৈষ্ণবধর্মের অনুরাগী ছিলেন। বিজয়সেন ও বল্লালসেন পরম-মহেশ্বর উপাধি ধারণ করিতেন। তাহাদের তান্ত্রশাসনে প্রথমেই শিবের প্রণাম ও স্তুতিবাচক শ্লোক এবং মুদ্রায় কুলদেবতা সদাশিবের মূর্তি অঙ্কিত থাকিত। লক্ষ্মণসেন সদাশিব মুদ্রার পরিবর্তন করেন নাই কিন্তু তিনি পরম-মাহেশ্বরের পরিবর্তে পরমবৈষ্ণব উপাধি গ্রহণ করেন এবং তাঁহার তান্ত্রশাসনগুলি নারায়ণের প্রণাম ও স্তুতিবাচক শ্লোক দিয়া আরম্ভ করা হইয়াছে। সুতরাং লক্ষ্মণসেন কৌলিক শৈব ধর্ম ত্যাগ করিয়া বৈষ্ণব ধর্মে দীক্ষিত হইয়াছিলেন ইহাই সম্ভবপর বলিয়া মনে হয়।

লক্ষ্মণসেন যখন পিতৃসিংহাসনে আরোহণ করেন তখন তাঁহার বয়স প্রায় ষাট বৎসর। প্রায় ২০ বৎসর রাজ্য করিয়া এই অশীতিপরবৃদ্ধ রাজা পিতার ছায় গঙ্গাতীরে অবস্থান করিবার উদ্দেশ্যে নবদ্বীপে গমন করেন। তাঁহার এই শেষ বয়সে রাজ্যে আভ্যন্তরিক বিপ্লবের সূচনা দেখা যায়। ১১১৬ অব্দের একখানি তান্ত্রশাসন হইতে জানা যায় যে ডোমনপাল নামক একব্যক্তি সুন্দরবনের খাড়ী পরগণায় বিদ্রোহী হইয়া এক স্বাধীন রাজ্যের প্রতিষ্ঠা করিয়াছিল। এই সময় আর্ঘ্যাবর্ষেও বিষম বিপদ উপস্থিত হয়। তুরস্কজাতীয় ঘোর দেশের অধিপতি মহম্মদ ঘোরী চৌহান পৃথ্বীরাজ ও গাহড়বাল জয়চন্দ্রকে পরাজিত করিয়া ক্রমে ক্রমে প্রায় সমগ্র হিন্দুস্থানে নিজের রাজ্য বিস্তার করেন। আর্ঘ্যাবর্ষের প্রসিদ্ধ রাজপুত রাজ্যগুলি একে একে বিজেতা তুর্কীগণের পদানত হইল। ক্রমে তুর্কীগণ যুক্তপ্রদেশ অধিকার করিয়া মগধের সীমান্তে উপনীত হইল।

এই ঘোর দুর্দিনে লক্ষ্মণসেন স্বীয় রাজ্য রক্ষার কি উদ্ধোগ করিয়াছিলেন তাহা জানিবার কোন উপায় নাই। বাঙ্গালী অথবা ভারতীয় কোন লেখক রচিত দেশের এই দুর্যোগময় অন্ধকার যুগের কোন বিবরণই পাওয়া যায় নাই। ইহার অন্ধশতাব্দী পরে তুর্কী বিজেতার সভাসদ ঐতিহাসিক লোকমুখে সেনরাজ্য জয়ের যে কাহিনী শুনিয়াছিলেন তাহা অবলম্বন করিয়াই এই যুগের ইতিহাস রচিত হইয়াছে। আর সেই ইতিহাসেরও প্রকৃত মর্ম গ্রহণ না করিয়া তাহার বিকৃত ব্যাখ্যান দ্বারা মাত্র ১৭ জন তুরস্ক অধ্যারোহী বঙ্গদেশ জয় করিয়াছিল এই অদ্ভুত উপাখ্যানে বিশ্বাস করিয়া অনেকেই লক্ষ্মণসেনকে কাপুরুষ বলিয়া হতব্রদ্ধা করিয়া আসিতেছে। এইজন্যই এই বিষয়টির একটু বিস্তৃত আলোচনা প্রয়োজন।

### ৩। তুরস্ক সেনা কর্তৃক গোড় জয়

তবকাৎ-ই-নাসিরী নামক ঐতিহাসিক গ্রন্থে তুরস্কগণ কর্তৃক মগধ ও গোড় জয়ের সর্বপ্রাচীন বিবরণ পাওয়া যায়। গ্রন্থকার মীনহাজুদ্দিন দিল্লীর সুলতানের অধীনে উচ্চ রাজকার্যে নিযুক্ত ছিলেন এবং নানাস্থানে ঘুরিয়া সংবাদ সংগ্রহ করিয়া আ ১১৬০ অব্দের কিছু পরে এই ইতিহাস রচনা করেন। গোড় ও মগধ জয়ের সম্বন্ধে কোন সরকারী বিবরণ বা দলিল তাঁহার হস্তগত হয় নাই। মগধ জয়ের ২০ বৎসর পরে লক্ষ্মী নগরীতে দুইজন বৃদ্ধ সৈনিকের সহিত তাঁহার সাক্ষাৎ হয়। ইহারা এই যুদ্ধে যোগদান কাব্যেয়াজিল এবং ইহাদের নিকট শুনিয়াই মীনহাজু মগধ জয়ের বিবরণ লিখিয়াছেন। গোড়ের অভিযানে লিপ্ত ছিল এরূপ কোন ব্যক্তির সহিত সম্ভবত তাঁহার দেখা হয় নাই। কারণ তিনি কেবলমাত্র বলিয়াছেন যে বিশ্বাসী লোকদের নিকট হইতে তিনি এই কাহিনী শুনিয়াছেন।

এইরূপে কেবলমাত্র লোকমুখে শুনিয়া মীনহাজু মগধ ও গোড় জয়ের যে ঐতিহাসিক বিবরণ লিখিয়াছেন তাহার সারমর্ম নিম্নে দেওয়া হইল :—

“মহম্মদ বখতিয়ার নামক খিলজীবংশীয় একজন তুরস্ক সেনানায়ক উপযুক্ত কর্ম্মানুসন্ধানে মহম্মদ ঘোরী ও কুতবুদ্দিনের নিকট গিয়া বিফল মনোরথ হইয়া অবশেষে অযোধ্যায় মালিক হুসামুদ্দিনের অনুগ্রহে চুণারগড়ের নিকট দুইটি পরগণা জায়গীর প্রাপ্ত হন। এখান হইতে বখতিয়ার দুই বৎসর যাবৎ মগধের নানাস্থান লুণ্ঠন করেন এবং লুণ্ঠিত অর্থের দ্বারা সৈন্য ও অস্ত্রশস্ত্র সংগ্রহ করিয়া

অবশেষে দুইশত অশ্বারোহী সৈন্যসহ হঠাৎ আক্রমণ করিয়া ‘কিল্লা বিহার’ অধিকার করেন। ইহার মুণ্ডিত মস্তক অধিবাসীদিগকে নিহত ও বিস্তর জব্দ লুণ্ঠন করার পরে আক্রমণকারীগণ জানিতে পারিলেন যে ইহা বস্তুত ‘কিল্লা’ বা দুর্গ নহে, একটি বিছালয় মাত্র, এবং হিন্দুর ভাষায় ইহাকে ‘বিহার’ বলে।

কিল্লা বিহারের লুণ্ঠিত ধনরত্ন সহ বখতিয়ার স্বয়ং দিল্লীতে গিয়া কুতবুদ্দিনের সহিত সাক্ষাৎ করেন এবং বহু সম্মান প্রাপ্ত হন। দিল্লী হইতে ফিরিয়া আসিয়া তিনি বিহার প্রদেশ জয় করিয়াছিলেন।

এই সময়ে রায় লখমনিয়া রাজধানী ‘হুদীয়া’তে অবস্থান করিতেছিলেন। তাঁহার পিতার মৃত্যু সময়ে তিনি মাতৃগর্ভে ছিলেন। তাঁহার জন্মকালে দৈবজ্ঞগণ গণনা করিয়া বলিল যে যদি এই শিশুর এখনই জন্ম হয় তবে সে কখনই রাজা হইবে না, কিন্তু আর দুই ঘণ্টা পরে জন্মিলে সে ৮০ বৎসর রাজত্ব করিবে। এই কথা শুনিয়া রাজমাতার আদেশে তাঁহার দুই পা বাঁধিয়া মাথা নীচের দিকে করিয়া তাঁহাকে বুলাইয়া রাখা হইল। শুভ মুহূর্ত্ত উপস্থিত হইলে তাঁহাকে নামান হয়, কিন্তু পুত্র প্রসবের পরেই তাঁহার মৃত্যু হইল। রায় লখমনিয়া ৮০ বৎসর রাজত্ব করিয়াছিলেন এবং হিন্দুস্থানের একজন প্রসিদ্ধ রাজা ছিলেন।

বখতিয়ার কর্তৃক বিহার জয়ের পরে তাঁহার খ্যাতি হুদীয়ায় পৌঁছিল। দৈবজ্ঞ, পণ্ডিত ও ব্রাহ্মণগণ রাজাকে বলিলেন, “শাস্ত্রে লেখা আছে তুরস্কেরা এ দেশ জয় করিবে, এবং তাহার কাল উপস্থিত, সুতরাং অবিলম্বে পলায়ন করাই সঙ্গত।” রাজার প্রশ্নোত্তরে তাঁহারা জানাইলেন যে তুরস্ক বিজয়ীর চেহারা কিরূপ তাহাও শাস্ত্রে লেখা আছে। গুপ্তচর পাঠাইয়া বখতিয়ারের আকৃতির বিবরণ আনান হইলে দেখা গেল যে শাস্ত্রের বর্ণনার সহিত ইহার সম্পূর্ণ ঐক্য আছে। তখন বহু ব্রাহ্মণ ও বণিকগণ হুদীয়া হইতে পলায়ন করিল, কিন্তু রাজা লখমনিয়া রাজধানী ত্যাগ করিতে স্বীকৃত হইলেন না।

ইহার এক বৎসর পরে বখতিয়ার একদল সৈন্য অস্ত্রশস্ত্রে সজ্জিত করিয়া বিহার হইতে যাত্রা করিলেন। তিনি একরূপ দ্রুতগতিতে অগ্রসর হইয়াছিলেন যে যখন অতর্কিতভাবে তিনি সহসা হুদীয়া পৌঁছিলেন, তখন মাত্র ১৮ জন অশ্বারোহী তাঁহার সঙ্গে আসিতে পারিয়াছিল, বাকী সৈন্য পশ্চাতে আসিতে-ছিল। নগরদ্বারে উপস্থিত হইয়া বখতিয়ার কাহাকেও কিছু না বলিয়া এমন ধীরে সুস্থে সজ্জীগণসহ সহরে প্রবেশ করিলেন যে লোকেরা মনে করিল যে সম্ভবত ইহারা একদল সওদাগর, অশ্ব বিক্রয় করিতে আসিয়াছে। বখতিয়ার

যখন রাজপ্রাসাদের দ্বারে উপনীত হইলেন তখন বৃদ্ধ রাজা লখমনিয়া মধ্যাহ্ন-ভোজন করিতেছিলেন। সহসা প্রাসাদদ্বারে এবং নগরীর অভ্যন্তর হইতে তুমুল কলরব শোনা গেল। লখমনিয়া এই কলরবের প্রকৃত কারণ জানিবার পূর্বেই বখতিয়ার সদলে রাজপুরীতে প্রবেশ করিয়া রাজঅমুচরগণকে হত্যা করিতে আরম্ভ করিলেন। রাজা নগ্নপদে প্রাসাদের পশ্চাৎ দ্বার দিয়া বাহির হইয়া নৌকাযোগে পলায়ন করিলেন। বখতিয়ারের সমুদয় সেনা নদীয়ায় উপস্থিত হইয়া ঐ নগরী ও তাহার চতুষ্পার্শ্ববর্তী স্থান সমূহ অধিকার করিল এবং বখতিয়ারও সেখানেই বসতি স্থাপন করিলেন। ওদিকে রায় লখমনিয়া সঙ্কনাৎ ও বঙ্গের অভিমুখে প্রস্থান করিলেন। তথায় অল্পদিন পরেই তাঁহার রাজ্য শেষ হইল, কিন্তু তাঁহার বংশধরগণ এখনও বঙ্গ দেশে রাজত্ব করিতেছেন।

রায় লখমনিয়াব রাজ্য অধিকার করার পরে বখতিয়ার ধ্বংসপ্রায় নদীয়া ত্যাগ করিয়া বর্তমানে যে স্থান লক্ষ্মণাবতী নামে পরিচিত সেইস্থানে রাজধানী স্থাপন করিলেন।”

বখতিয়ার খিলজী কর্তৃক বাংলাদেশ জয় সম্বন্ধে যত কাহিনী ও মতবাদ প্রচলিত আছে তাহা উল্লিখিত বিবরণের উপর প্রতিষ্ঠিত। কারণ এ সম্বন্ধে অণু কোন সমসাময়িক ঐতিহাসিক বিবরণ পাওয়া যায় নাই। মৌনহাজুদ্দিনের বিবরণ সম্পূর্ণ ঐতিহাসিক বলিয়া গ্রহণ করিলেও প্রচলিত বিশ্বাস অনেক পরিমাণে ভ্রান্ত বলিয়াই প্রতিপন্ন হইবে। প্রথমত “সপ্তদশ অশ্বারোহী যবনের ডরে” কাপুরুষ লক্ষ্মণসেন ‘সোণার বাংলা রাজ্য’ বিসর্জন দিয়াছিলেন, কবিবর নবীনচন্দ্রের এই উক্তি সম্পূর্ণ ভিত্তিহীন। বখতিয়ার যখন নগরদ্বারে উপনীত হইয়াছিলেন তখন তাঁহার সহিত মাত্র ১৮ জন অশ্বারোহী সৈন্য ছিল, কিন্তু বাকী সৈন্য নিকটেই পশ্চাতে ছিল। কারণ যে সময় বখতিয়ার রাজবাড়ী পৌঁছিয়াছিলেন সেই সময়ই এই সৈন্য বা অন্তত তাহার এক বড় অংশ সহরে ঢুকিয়া পড়িয়াছিল। তাহার ফলে নগরমধ্যে যে আতর্জনাদ উঠিয়াছিল বখতিয়ার রাজপ্রাসাদে প্রবেশের পূর্বেই রাজার কর্ণে তাহা প্রবেশ করিয়াছিল। সুতরাং লক্ষ্মণসেন যখন পলায়ন করিয়াছিলেন তখন বখতিয়ারের বহু সৈন্য নগরমধ্যে ছিল। তারপর যখন সকল সৈন্য পৌঁছিল তখনই নদীয়া অধিকৃত হইল। বখতিয়ারের এইদিনকার অভিযানে কেবল এই নগরীটিই অধিকৃত হইয়াছিল—সমস্ত বঙ্গদেশ তো দূরের কথা গোড়ের অপর কোন অংশই বিজিত হয় নাই।

যখন তুরস্ক আক্রমণের আশঙ্কায় নদীয়ার অধিবাসীরা বৎসরাবধি অশ্রুত পলাইতে ব্যস্ত ছিল তখন এই অশীতিপর বৃদ্ধ রাজা মন্ত্রী, দৈবজ্ঞ ও সভাসদ পণ্ডিতগণের পরামর্শ অগ্রাহ্য করিয়া রাজধানীতেই অবস্থান করিতে-ছিলেন। সুতরাং প্রজাবর্গ অপেক্ষা রাজার শৌর্য্য ও সাহস অনেক বেশী পরিমাণেই ছিল। যখন নগর রক্ষীগণের মূর্থতায় বা অশ্রু কোন কারণে বিনা বাধায় তুরস্ক সৈন্যগণ রাজপ্রাসাদে প্রবেশ করিল, তখন অতর্কিতে সহসা আক্রান্ত হইয়া বৃদ্ধ রাজার পলায়ন করিয়া আত্মরক্ষা করা ভিন্ন আর কোন উপায় ছিল না। সুতরাং ইহাকে কোনমতেই কাপুরুষতার দৃষ্টান্ত বলা যায় না।

মীনহাজুদ্দিনের বিবরণের উপর নির্ভর করিয়া যাহারা লক্ষ্মণসেনের চরিত্রে দোষারোপ করেন তাঁহারা ভুলিয়া যান যে মীনহাজুদ্দিন স্বয়ং তাঁহার বহু সুখ্যাতি করিয়াছেন। তিনি লক্ষ্মণসেনকে হিন্দুস্থানের “রায়গণের পুরুষানু-ক্রমিক খলিফাস্থানীয়” বলিয়া বর্ণনা করিয়াছেন। সুতরাং মীনহাজুদ্দিনের মতে লক্ষ্মণসেন আর্য্যাবর্তের রাজগণের মধ্যে সর্বপ্রধান ছিলেন। তিনি পৃথ্বীরাজ ও জয়চাঁদের সম্বন্ধে বিশেষ কিছুই বলেন নাই, কিন্তু লক্ষ্মণসেনের জন্ম কাহিনী সবিস্তারে বর্ণনা করিয়া তাঁহার দানশীলতার সুখ্যাতি ও শাসনরীতির প্রশংসা করিয়াছেন। এমন কি সাধারণত মুসলমান লেখকেরা অ-মুসলমান সম্বন্ধে যে প্রকার উক্তি করেন না, তিনি লক্ষ্মণসেন সম্বন্ধে তাহাও করিয়াছেন। তিনি তাঁহাকে “মুলতান করিম কুতবদ্দীন হাতেমুজ্জমান” বা সেই যুগের হাতেম কুতবদ্দীনের সঙ্গে তুলনা করিয়াছেন এবং আল্লাহ্‌র নিকট প্রার্থনা জানাইয়াছেন যেন তিনি “পরলোকে লক্ষ্মণসেনের শাস্তির (যাহা অমুসলমান মাত্রেরই প্রাপ্য) লাঘব করেন।”

সুতরাং মীনহাজুদ্দিনের উক্তি সম্পূর্ণ সত্য বলিয়া গ্রহণ করিলেও লক্ষ্মণসেনের চরিত্র ও খ্যাতি সম্বন্ধে উচ্চ ধারণাই পোষণ করিতে হয়। বখতিয়ার কর্তৃক নদীয়া অধিকারের জন্য যে বৃদ্ধ রাজা অপেক্ষা তাঁহার মন্ত্রী, সৈন্তাধ্যক্ষগণ ও প্রজাবর্গই অধিকতর দায়ী সে সম্বন্ধে কোন সন্দেহ থাকিতে পারে না। যিনি আকোমার যুদ্ধক্ষেত্রে শৌর্য্যবীর্ষ্যের পরিচয় দিয়াছেন, গোড়, কামরূপ, কলিঙ্গ, বারাণসী ও প্রয়াগে যাহার বীরত্ব খ্যাতি বিস্তৃত হইয়াছিল, মীনহাজুদ্দিনের লেখনী তাঁহার পুত্র চরিত্রে কলঙ্ক কালিমা লেপন করে নাই।

কিন্তু মীনহাজুদ্দিনের নদীয়া অভিযান কাহিনী সম্পূর্ণরূপে সত্য বলিয়া গ্রহণ করা কঠিন। যে বিশ্বাসী লোকেরা তাঁহাকে সংবাদ যোগাইয়াছিল, তাহাদের জ্ঞান ও বুদ্ধি কতদূর ছিল, তাহা লক্ষ্মণসেনের অদ্ভুত জন্ম বিবরণ ও

তাঁহার ৮০ বৎসর রাজত্বের কথা হইতেই বুঝা যায়। বিশেষত এই কাহিনীর মধ্যে অনেক সুপরিচিত প্রবাদ, কথা ও অবিস্মৃত ঘটনার সমাবেশ আছে। ‘তুরস্ক আক্রমণ সম্বন্ধে হিন্দুর শাস্ত্রবাণী’ চন্দ্রনামা নামক গ্রন্থে সিন্ধুদেশ সম্বন্ধেও উল্লিখিত হইয়াছে। এই শাস্ত্রবাণীর মূল্য যাহাই হউক, ইহাতে প্রমাণিত হয় যে নদীয়া আক্রমণের অন্তত এক বৎসর পূর্বে ইহার সম্ভাবনা রাজকর্মচারীরা জ্ঞাত ছিলেন। অথচ বখতিয়ার বিহার হইতে নদীয়া পৌঁছিলেন, ইহার মধ্যে তাঁহার অভিযানের কোন সংবাদ সেন রাজদরবারে পৌঁছিল না। যে সময় তুরস্কসেনা কর্তৃক দেশ আক্রান্ত হইবার পূর্ণ সম্ভাবনা বিद्यমান, সেই সময়ে রাজধানীর দ্বাররক্ষাকারীরা ১৮ জন অশ্বারোহী তুর্কীকে বিনা বাধায় নগরে প্রবেশ করিতে দিল এবং অস্ত্র শস্ত্রে সুসজ্জিত বর্ষ্যানত সৈন্যকে অশ্বব্যবসায়ী বলিয়া ভুল করিল; নগর রক্ষীরাও কোন সন্দেহ করিল না এবং বখতিয়ার বিনা বাধায় রাজপ্রাসাদের তোরণ পর্য্যন্ত পৌঁছিলেন; যখন বখতিয়ারের অবশিষ্ট সৈন্যদল নগরে প্রবেশ করিল তখনও এই অগ্রগামী ১৮ জন অশ্বারোহীকে সন্দেহ করিয়া কেহ তাহাদের গতি প্রতিরোধ করিতে অগ্রসর হইল না! রাজার দেহরক্ষী বা সৈন্যদল অবশ্যই ছিল; এবং যখন রাজা স্বয়ং নদীয়াতে ছিলেন তখন অন্তত একদল রাজসৈন্য তাঁহার রক্ষাকার্য্যে নিযুক্ত ছিল; অথচ বখতিয়ারের সৈন্যদলের কাহারও গায়ে একটি আঁচড় লাগিল না, তাহার স্বচ্ছন্দে বিনা বাধায় হত্যাকাণ্ড ও লুণ্ঠন কার্য্য চালাইতে লাগিল। এ সমুদয় এতই অস্বাভাবিক যে খুব দৃঢ় বিশ্বাসযোগ্য প্রমাণ ব্যতীত সত্য বলিয়া স্বীকার করা অসম্ভব।

অথচ যে প্রাণের উপর নির্ভর করিয়া মীনহাজুদ্দিন এই অদ্ভুত কাহিনী লিপিবদ্ধ করিয়াছেন তাহা খুবই অকিঞ্চিৎকর। একজন অতিবৃদ্ধ সৈনিক তাঁহাকে বিহার অভিযানের কাহিনী শুনাইয়াছিল। নদীয়া অভিযানের সম্বন্ধে কোন লিখিত দলিল বা বিবরণ তিনি পান নাই। যে এই কাহিনী বলিয়াছিল তাহার এই অভিযানের সম্বন্ধে কোন প্রত্যক্ষ অভিজ্ঞতা থাকিলে মীনহাজুদ্দিন তাহা উল্লেখ করিতেন। সুতরাং লঙ্কীর বাজারে প্রচলিত নানাবিধ জন-প্রবাদের উপরই এই কাহিনী প্রতিষ্ঠিত এই অনুমান অসঙ্গত নহে। যে সময়ে মীনহাজুদ্দিন এই কাহিনী শুনিয়াছিলেন তখন অর্দ্ধশতাব্দী যাবৎ তুর্কীদের রাজ্য আর্য্যাবর্ত্তে দৃঢ়ভাবে প্রতিষ্ঠিত হইয়াছে এবং একে একে প্রাচীন হিন্দুরাজ্য তাহাদের পদানত হইয়াছে। বিজয়গর্বে দৃপ্ত, প্রভুত্বের উন্মাদনায় মত্ত, বিজিত পরাধীন জাতির প্রতি হতশ্রদ্ধ সাধারণ তুরস্ক সৈনিক অথবা রাজপুরুষ যে



নিজেদের অতীত বিজয়কাহিনী অতিশয়োক্তি ও অলৌকিক কাহিনীদ্বারা রঞ্জিত করিবে ইহা খুবই স্বাভাবিক। নদীয়া অভিযান সম্বন্ধেও একাধিক অদ্ভুত কাহিনী প্রচলিত ছিল। মীনহাজুদ্দিনের গ্রন্থরচনার অনধিক এক শতাব্দী পরে ( ১৩৫০ অব্দে ) ঐতিহাসিক ইসমি তাঁহার ফুতু-উস-সলাটিন গ্রন্থে নিম্নলিখিত বিবরণ দিয়াছেন : “মুহম্মদ বখতিয়ার বণিকের স্থায় সর্বত্র ঘুরিয়া বেড়াইতেন। রাজা লখ্মনিয়া শুনিলেন যে একজন সওদাগর বহু মূল্যবান দ্রব্যজাত ও তাতার দেশীয় অশ্ব বিক্রয় করিতে তাঁহার রাজধানীতে আসিয়াছে। লক্ষ্মণসেন রাজ-প্রাসাদ হইতে বাহির হইয়া দ্রব্যগুলি ক্রয় করিবার জন্ত সওদাগরের নিকট গেলেন। বখতিয়ার রাজাকে দ্রব্য দেখাইতেছেন এমন সময় পূর্বব্যবস্থামত তাঁহার ইজিতে তাঁহার অমুচরগণ সহসা চতুর্দিক হইতে হিন্দুদিগকে আক্রমণ করিল। অতর্কিত আক্রমণে হিন্দুরা ছত্রভঙ্গ হইয়া পড়িল কিন্তু রাজার দেহরক্ষীগণ বহুক্ষণ পর্য্যন্ত যুদ্ধ করিল। খিলজী বীরগণ অল্পসংখ্যক রক্ষীগণকে হত্যা করিয়া রাজাকে বন্দী করিয়া বখতিয়ারের নিকট লইয়া গেলেন। বখতিয়ার ঐ রাজ্যের বাদশাহ হইলেন।”

এই কাহিনীর সমালোচনা নিম্প্রয়োজন। মীনহাজুদ্দিনের কাহিনী যে সে যুগেও সকলে ঐতিহাসিক সত্য বলিয়া গ্রহণ করে নাই ইহা তাহার একটি প্রমাণ। কারণ তাহা হইলে অব্যবহিত পরবর্ত্তী অপর একজন ঐতিহাসিক তাহার উল্লেখমাত্র না করিয়া এইরূপ অদ্ভুত আখ্যানের অবতারণা করিতেন না। ইহা হইতে আরও প্রমাণিত হয় যে বক্ত্রিয়ার কর্তৃক লক্ষ্মণসেনের পরাজয় সম্বন্ধে কোন বিশ্বস্ত বিবরণ ঐতিহাসিকগণের জানা ছিল না, এবং এ সম্বন্ধে বিবিধ আজগুবি কাহিনীর সৃষ্টি হইয়াছিল। মীনহাজুদ্দিন ও ইসমি দুইটি লিপিবদ্ধ করিয়াছেন, এবং সম্ভবত এরূপ আরও অনেক গল্প প্রচলিত ছিল।

কেহ কেহ মীনহাজুদ্দিনের বিবরণ একেবারে অমূলক বলিয়া প্রত্যাখ্যান করিয়াছেন। কিন্তু তাহা সঙ্গত বোধ হয় না। তবে ইহা হইতে এই সিদ্ধান্ত করা যাইতে পারে যে বুদ্ধ রাজা লক্ষ্মণসেন যখন নদীয়ায় বাস করিতেছিলেন তখন বখতিয়ার খিলজী তাঁহাকে বন্দী করিবার জন্ত এক ক্ষুদ্র অশ্বারোহী সৈন্যদল লইয়া বিহার হইতে দ্রুতগতিতে অপ্রত্যাশিত পথে আসিয়া অতর্কিতে ঐ নগরী আক্রমণ করেন, এবং রাজাকে না পাইয়া ঐ নগরী লুণ্ঠন করিয়া প্রস্থান করিয়াছিলেন। নদীয়া তখন সেনদের প্রধান রাজধানী অথবা বিশেষ সুরক্ষিত ছিল কিনা তাহা নিশ্চিত জানিবার উপায় নাই।

বখতিয়ার যে নদীয়ায় বসতি করেন নাই, বরং ইহা ধ্বংস করিয়াছিলেন, মীনহাজুদ্দিন তাহা স্বীকার করিয়াছেন। তাঁহার নদীয়া আক্রমণ গোড়াজয়ের প্রথম অভিযান কিনা তাহাও সন্দেহমূলক। মীনহাজুদ্দিন লিখিয়াছেন যে বিহারজয়ের পূর্বে তিনি ঐ প্রদেশের নানাস্থানে লুণ্ঠরাজ করিয়া ফিরিতেন। “কিল্লা বিহারের” গ্রাম কেবলমাত্র লুণ্ঠনের উদ্দেশ্যেই তিনি অতিক্রান্ত নদীয়া আক্রমণ করিয়া থাকিবেন ইহাও অসম্ভব নহে।

১২৫৫ অব্দে মুঘিসুদ্দিন উজবেক নদীয়া জয়ের চিহ্নস্বরূপ যে মুদ্রা প্রচলিত করেন তাহা হইতে অনুমিত হয় যে ঐ তারিখের পূর্বে নদীয়ায় তুর্কীশাসন স্থায়ীভাবে প্রতিষ্ঠিত হয় নাই। সুতরাং নদীয়া কিছুদিন বখতিয়ারের অধিকারে থাকিলেও ইহা যে আবার সেন রাজ্যের অন্তর্ভুক্ত হইয়াছিল এরূপ অনুমান করাই সম্ভব।

নদীয়া জয়ের কতদিন পরে এবং কিভাবে বখতিয়ার লক্ষ্মণাবতী জয় করিয়া সেখানে রাজধানী স্থাপন করিয়াছিলেন মীনহাজুদ্দিনের গ্রন্থে তাহার কোন উল্লেখ নাই। লক্ষ্মণসেন ও তাঁহার বংশধরেরা নদীয়াজয়ের পর বহুবৎসর বঙ্গে রাজত্ব করিয়াছেন। তিনি এবং তাঁহার দুই পুত্র য়েচ্ছ ও যবনদের সঙ্গে যুদ্ধে জয়ী হইয়াছিলেন সমসাময়িক তাম্রশাসন ও কবিতায় ইহার উল্লেখ আছে। যখন প্রায় সমগ্র আর্য্যাবর্ত তুর্কীগণের পদানত, তখনও যাহারা বীর-বিক্রমে বঙ্গের স্বাধীনতা রক্ষা করিতে সমর্থ হইয়াছিলেন, তাঁহাদের সৈন্তবল এত দুর্বল বা শাসনতন্ত্র এমন বিশৃঙ্খল ছিল না যে অতিক্রান্ত আক্রমণে নদীয়া অধিকার করিতে পারিলেও বখতিয়ার বিনা বাধায় গোড় জয় করিতে সমর্থ হইয়াছিলেন। কিন্তু ঐ গোড়জয়ের কোন ঐতিহাসিক বিবরণই পাওয়া যায় নাই।

### ৬। সেন রাজ্যের পতন

আ ১২০২ অব্দে বখতিয়ার নদীয়া আক্রমণ করেন। ইহার পরও লক্ষ্মণসেন অন্তত তিন চারি বৎসর রাজ্য করিয়াছিলেন। তাঁহার এই সময়কার দুইখানি তাম্রশাসন আবিষ্কৃত হইয়াছে। ইহাতে রাজকবি যেভাবে তাঁহার শৌর্য্য বীর্য্যের ও প্রাচীন রীতি অনুযায়ী রাজপদবী প্রভৃতির উল্লেখ করিয়াছেন তাহাতে বাংলা দেশের গুরুতর রাষ্ট্রীয় পরিবর্তনের কোন আভাসই পাওয়া যায় না। অপরদিকে উত্তরবঙ্গ অথবা তাহার এক অংশ ব্যতীত বখতিয়ার বাংলার আর কোন প্রদেশে স্থায়ী আধিপত্য প্রতিষ্ঠিত

করিতে পারিয়াছিলেন ইহার কোন প্রমাণ নাই। বঙ্গজয় সম্পূর্ণ না করিয়াই বখতিয়ার স্বদূর তিব্বতের উদ্দেশ্যে যাত্রা করেন এবং এই অভিযানে সর্বস্বাস্থ্য হইয়া ভগ্নহৃদয়ে প্রাণত্যাগ করেন। বখতিয়ারের এই বিফলতার সহিত সেনরাজগণের যুদ্ধোত্তমের কোন সম্বন্ধ আছে কিনা তুর্কী ঐতিহাসিকগণ সে সম্বন্ধে একেবারে নীরব।

লক্ষ্মণসেন ও বখতিয়ার উভয়েই সম্ভবত ১২০৫ অব্দে বা তাঁহার দুই এক বৎসরের মধ্যেই মৃত্যুমুখে পতিত হন। লক্ষ্মণসেনের পর তাঁহার দুই পুত্র বিশ্বরূপসেন ও কেশবসেন পিতৃসিংহাসনে আরোহণ করেন। সম্ভবত বিশ্বরূপসেনই জ্যেষ্ঠ ছিলেন এবং প্রথমে রাজত্ব করেন, কিন্তু এ বিষয়ে নিশ্চিত কিছু বলা যায় না। এই দুই রাজারই তাম্রশাসন পাওয়া গিয়াছে। ইহাতে বিশ্বরূপসেন “অরিরাজ বৃষভাক্ষশঙ্কর গৌড়েশ্বর” ও কেশবসেন “অরিরাজ অসহা-শঙ্কর গৌড়েশ্বর” উপাধিতে ভূষিত হইয়াছেন। উভয়েই ‘সৌর’ অর্থাৎ সূর্য্যের উপাসক ছিলেন। এইরূপে দেখা যায় যে সেন রাজগণ যথাক্রমে শৈব, বৈষ্ণব ও সৌর সম্প্রদায়ভুক্ত হইয়াছিলেন।

এই দুই রাজার রাজ্যকালের কোন বিস্তৃত বিবরণ পাওয়া যায় নাই। কিন্তু দক্ষিণ ও পূর্ব বাংলা যে তাঁহাদের রাজ্যভুক্ত ছিল সে বিষয়ে কোন সন্দেহ নাই। কারণ ইহাদের তাম্রশাসনে বিক্রমপুর ও দক্ষিণবঙ্গের সমুদ্রতীরে ভূমিদানের উল্লেখ আছে। বিশ্বরূপসেন ও কেশবসেন উভয়েই “যবনাধ্বয় প্রলয়-কাল-ক্লদ” বলিয়া তাম্রশাসনে অভিহিত হইয়াছেন। ইহা হইতে অনুমিত হয় যে উভয়েই উত্তরবঙ্গের মুসলমান তুর্কীরাজ্যের সহিত যুদ্ধে সফলতা লাভ করিয়াছিলেন। ইহা কেবলমাত্র প্রশস্তিকারের স্তুতিবাক্য নহে। কারণ মীনহাজুদ্দিনের ইতিহাস হইতেও প্রমাণিত হয় যে তুর্কীগণ উত্তরবঙ্গের সমগ্র অথবা অধিকাংশ অধিকার করিলেও বহুদিন পর্য্যন্ত পূর্ব ও দক্ষিণবঙ্গ অধিকার করিতে পারেন নাই। তিনি লিখিয়াছেন যে গঙ্গার দুই তীরে, রাঢ় ও বরেন্দ্রেই, তুর্কীরাজ্য সীমাবদ্ধ ছিল, এবং তখনও লক্ষ্মণসেনের বংশধরগণ বঙ্গে রাজত্ব করিতেন। তুর্কীরাজগণ যে মধ্যে মধ্যে বঙ্গে অভিযান করিতেন তাহাও এই গ্রন্থে উল্লিখিত হইয়াছে। সুতরাং বিশ্বরূপসেন ও কেশবসেন যে যবন-রাজকে যুদ্ধে পরাজিত করিয়া পূর্ব ও দক্ষিণবঙ্গ স্থায়ী অধিকারে রাখিতে সমর্থ হইয়াছিলেন এবিষয়ে কোন সন্দেহ নাই।

বিশ্বরূপসেনের একখানি তাম্রশাসন তাঁহার রাজত্বের চতুর্দশ সম্বৎসরে এবং আর একখানি ইহার পরে প্রদত্ত হইয়াছিল। কেশবসেনের তাম্রশাসন-

খানির তারিখ তাঁহার রাজ্যের তৃতীয় বৎসর। সুতরাং এই দুই ভ্রাতার মোট রাজ্যকাল প্রায় ২৫ বৎসর ছিল এরূপ অনুমান করা যাইতে পারে। কেশব-সেনের মৃত্যুর পরে ( আ ১২৩০ ) কে রাজসিংহাসনে আরোহণ করিয়াছিলেন তাহা জানা যায় না। বিশ্বরূপসেনের তাম্রশাসনে কুমার সূর্য্যসেন ও কুমার পুরুষোত্তমসেনের নামোল্লেখ আছে। ‘কুমার’ এই উপাধি হইতে অনুমিত হয় যে উভয়েই রাজপুত্র, অস্তুত রাজবংশীয়, ছিলেন। কিন্তু ইহাদের কেহ-যে রাজা হইয়াছিলেন তাহার প্রমাণ নাই। পরবর্ত্তীকালে রচিত রাজাবলী, বিপ্রকল্পলতিকা প্রভৃতি গ্রন্থ, আবুলফজল প্রণীত আইন-ই-আকবরী এবং এদেশে প্রচলিত লৌকিক কাহিনীতে অনেক সেনরাজার নামোল্লেখ আছে, কিন্তু এই সমুদয় বিবরণ ঐতিহাসিক বলিয়া গ্রহণ করা যায় না। মীনতাজুদ্দিনের পূর্ব্বোল্লিখিত উক্তি হইতে প্রমাণিত হয় যে তিনি যে সময়ে তাঁহার গ্রন্থ সমাপ্ত করেন ( আ ১২৬০ অব্দ ),—অস্তুত যে সময়ে লক্ষ্মণাবতীতে আসিয়া বাংলা দেশের ঐতিহাসিক বিবরণ সংগ্রহ করেন ( আ ১২৪৪ অব্দ )—তখনও লক্ষ্মণসেনের বংশধরগণ বঙ্গে রাজত্ব করিতেন। সুতরাং কেশবসেনের পরেও যে এক বা একাধিক সেন রাজা বঙ্গে রাজত্ব করিয়াছিলেন সে সম্বন্ধে কোন সন্দেহ নাই।

‘পঞ্চরক্ষা’ নামক একখানি বৌদ্ধগ্রন্থের পুঁথি হইতে জানা যায় যে ইহা ১২১১ শকে ( ১২৮৯ অব্দে ) পরমসৌগত পরমরাজাধিরাজ গোড়েশ্বর মধুসেনের রাজ্যে লিখিত হইয়াছিল। এই বৌদ্ধ নরপতি মধুসেন লক্ষ্মণসেনের বংশধর কিনা তাহা সঠিক জানা যায় না, কিন্তু তাঁহার ‘সেন’ উপাধি হইতে এরূপ অনুমান করা অসঙ্গত নহে। মধুসেন ত্রয়োদশ শতাব্দীর শেষভাগে রাজত্ব করেন। কিন্তু তাঁহার রাজ্যের অবস্থিতি ও বিস্তৃতি সম্বন্ধে কিছুই জানা যায় না। তিনি গোড়েশ্বর উপাধি গ্রহণ করিয়াছিলেন, কিন্তু গোড়ের কোন অংশ তাঁহার রাজ্যভুক্ত ছিল কিনা অথ সমর্থক প্রমাণ না পাইলে সে সম্বন্ধে নিশ্চিত কিছু বলা যায় না। মধুসেনের পর বাংলায় সেন উপাধিধারী কোন রাজার অস্তিত্বের প্রমাণ অতীবধি আবিষ্কৃত হয় নাই। বর্দ্ধমান জিলার কাটোয়া মহকুমার অন্তর্গত মঙ্গলকোট নামক গ্রামের এক মসজিদে একখানি ভগ্ন প্রস্তরখণ্ডে একটি সংস্কৃত লিপির কিয়দংশ উৎকীর্ণ আছে। কেহ কেহ বলেন ইহাতে চন্দ্রসেন নামক রাজার উল্লেখ আছে। কিন্তু এই রাজার সম্বন্ধে আর কোনও বিবরণ জানা যায় নাই।

ত্রয়োদশ শতাব্দীতে বুদ্ধসেন ও তাঁহার পুত্র জয়সেন পীঠী রাজ্যের

অধিপতি ছিলেন। বর্তমান গয়া জিলায় গীঠী রাজ্য অবস্থিত ছিল। গীঠীপতি আচার্য্য জয়সেন “লক্ষ্মণসেনস্ব অতীতরাজ্য সম্বৎসর—৮৩” এই অর্কে বৌদ্ধগয়ার মহাবোধি বিহারকে একখানি গ্রাম দান করেন। এই তারিখের প্রকৃত অর্থ লইয়া পণ্ডিতগণের মধ্যে মতভেদ আছে। “লক্ষ্মণসেনের রাজ্য ধ্বংস হওয়ার ৮৩ বৎসর পরে,”—উক্ত পদের এই প্রকার অর্থই সঙ্গত বলিয়া মনে হয়। গয়া অঞ্চলে আ ১২০০ অব্দে সেনরাজ্য ধ্বংস হয়। সুতরাং বুদ্ধসেন ও জয়সেন ত্রয়োদশ শতাব্দের শেষার্ধ্বে রাজ্য করিতেন। ইহা হইতে প্রমাণিত হয় যে তুরস্ক বিজয়ের পরও মগধে ক্ষুদ্র ক্ষুদ্র দেশীয় রাজ্য বিद्यমান ছিল এবং সেন উপাধিধারী রাজগণ তথায় রাজত্ব করিতেন।

তিব্বতীয় লামা তারনাথ লিখিয়াছেন যে সেন-বংশীয় লবসেন, কাশসেন, মণিতসেন এবং রাথিকসেন এই চারিজন রাজা মোট ৮০ বৎসর রাজত্ব করেন। তৎপর লবসেন, বুদ্ধসেন, হরিতসেন এবং প্রতীতসেন এই চারিজন তুরস্ক রাজার অধীনে রাজত্ব করেন। তারনাথের এই উক্তির সমর্থক কোন প্রমাণ পাওয়া যায় নাই। কিন্তু অসম্ভব নহে যে তারনাথ কথিত বুদ্ধসেনই পূর্বোক্ত গীঠীপতি বুদ্ধসেন।

গীঠীর সেনরাজগণের সহিত বাংলার সেনরাজবংশের কোন সম্বন্ধ ছিল কিনা তাহা নিশ্চিত বলা যায় না। জয়সেনের লিপিতে লক্ষ্মণসেনের নাম সংযুক্ত সম্বৎসর ব্যবহৃত হওয়ায় ইহাই প্রমাণিত হয় যে এককালে এই অঞ্চল লক্ষ্মণসেনের রাজ্যভুক্ত ছিল—কিন্তু ইহা হইতে জয়সেনের সহিত লক্ষ্মণসেনের কোন বংশগত সম্বন্ধ ছিল এরূপ সিদ্ধান্ত করা যায় না। তবে এরূপ সম্বন্ধ থাকা অস্বাভাবিক বা অসম্ভব নহে।

তুর্কী আক্রমণই সেন রাজবংশের পতনের একমাত্র কারণ নহে। সম্ভবত আভ্যন্তরিক বিদ্রোহও ইহার ধ্বংসের পথ প্রশস্ত করিয়াছিল। ডোম্মনপাল দ্বাদশ শতাব্দীর শেষভাগে সুন্দরবন অঞ্চলে যে এক স্বাধীন রাজ্যের পত্তন করিয়াছিলেন তাহা পূর্ব্বেই উল্লিখিত হইয়াছে। তুর্কী আক্রমণের ফলে সেন রাজগণের বিপদ ও দুর্বলতার সুযোগে এইরূপ আরও কয়েকটি স্বাধীন রাজ্যের উদ্ভব হয়। পরবর্ত্তী অধ্যায়ে এ সম্বন্ধে বিস্তৃতভাবে আলোচনা করা হইয়াছে।

সেন রাজগণের রাজধানী কোথায় ছিল সে সম্বন্ধে এ যাবৎ বহু বাদানুবাদ হইয়াছে। ইহার বিস্তৃত আলোচনা নিম্নয়োজন। রাঢ় দেশের কোন্ অংশে হেমন্তসেন রাজত্ব করিতেন এবং তাঁহার রাজধানী কোথায় ছিল তাহা বলা

যায় না। কিন্তু বিজয়সেন বঙ্গদেশ জয় করার পর যে ঢাকার নিকটবর্তী বিক্রমপুরে সেনরাজগণের রাজধানী প্রতিষ্ঠিত হইয়াছিল সে বিষয়ে কোন সন্দেহ নাই। বিজয়সেন, বল্লালসেন ও লক্ষ্মণসেনের রাজত্বের প্রথমভাগের যে সমুদয় তান্ত্রশাসন অদ্যাবধি আবিষ্কৃত হইয়াছে তাহার সকলই “শ্রীবিক্রমপুর-সমাবাসিত শ্রীমজ্জয়স্কন্ধাবার” হইতে প্রদত্ত। “স্কন্ধাবার” শব্দে শিবির ও রাজধানী উভয়ই বুঝায়, কিন্তু যখন তিনজন রাজার তান্ত্রশাসনেই এই এক স্কন্ধাবারের উল্লেখ পাওয়া যায়, তখন ইহাকে রাজধানী অর্থেই গ্রহণ করা সম্ভব। ইহার অদ্যবধি প্রমাণও আছে। বিজয়সেনের তান্ত্রশাসন হইতে জানা যায় যে তাঁহার মহাদেবী অর্থাৎ প্রধানা মহিষী বিলাসদেবী বিক্রমপুর উপকারিকা মধ্যে তুলাপুরুষ মহাদান নামক বিরাট অন্তর্গত সম্পন্ন করেন। সুতরাং বিক্রমপুর যে অস্থায়ী শিবির মাত্র নহে, কিন্তু স্থায়ী রাজধানী ছিল, সে বিষয় সন্দেহ নাই। এখনও স্থানীয় প্রবাদ অনুসারে বিক্রমপুরে বল্লাল বাড়ী প্রভৃতি সেন রাজগণের অতীত কীর্তির ধ্বংস নিদর্শন আছে।

লক্ষ্মণসেনের রাজত্বের শেষভাগে উৎকীর্ণ দুইখানি তান্ত্রশাসন ধার্ম্যগ্রাম, ও তাঁহার দুই পুত্রের তান্ত্রশাসন ফক্কগ্রাম স্কন্ধাবার হইতে প্রদত্ত। ধার্ম্যগ্রাম ও ফক্কগ্রামের অবস্থিতি সম্বন্ধে কিছুই জানা যায় না। লক্ষ্মণসেন ও তাঁহার পুত্রগণ বিক্রমপুর পরিত্যাগ করিয়া এই দুই স্থানে রাজধানী প্রতিষ্ঠিত করিয়াছিলেন কিনা তাহাও নিশ্চিত বলা যায় না।

অনুমিত হয় যে পালরাজগণের স্থায় সেনরাজগণেরও একাধিক রাজধানী ছিল। লক্ষ্মণসেনের সময় অথবা তাহার পূর্বে সম্ভবত গোড় ও নদীয়ার সেন রাজগণের রাজধানী স্থাপিত হইয়াছিল। কারণ মুসলমান ইতিহাসে গোড় লক্ষ্মণাবতী নামে পরিচিত এবং সম্ভবত লক্ষ্মণসেনের নাম অনুসারেই গোড়ের এই নাম পরিবর্তন হইয়াছিল। মীনহাজুদ্দিনের বর্ণনা অনুসারে মহম্মদ বক্তিয়ারের আক্রমণের সময় লক্ষ্মণসেন রাজধানী নদীয়ার অবস্থিতি করিতে-ছিলেন। বাংলার কুলজী গ্রন্থ অনুসারে বল্লালসেন বৃদ্ধবয়সে রাজধানী নবদ্বীপে বাস করিতেন। বল্লালচরিতে উক্ত হইয়াছে যে বল্লালসেনের তিনটি রাজধানী ছিল বিক্রমপুর, গোড় ও স্বর্ণগ্রাম। কবি ধোয়ী রচিত পবনদূত কাব্যে গঙ্গাতীরবর্তী বিজয়পুর নগরী লক্ষ্মণসেনের রাজধানীরূপে বর্ণিত হইয়াছে। এই বিজয়পুরের অবস্থিতি সম্বন্ধে পণ্ডিতগণের মধ্যে মতভেদ আছে। কেহ কেহ বিজয়পুরকে নদীয়ার সহিত অভিন্ন বলিয়া গ্রহণ করিয়াছেন, আবার কাহারও মতে রাজসাহীর অন্তর্গত রামপুর বোয়ালিয়ার দশ মাইল পশ্চিমে অবস্থিত

বিজয়নগর গ্রামই প্রাচীন বিজয়পুর; কিন্তু পবনদূতে ত্রিবেণী সঙ্গমের পরই বিজয়পুরের উল্লেখ করা হইয়াছে এবং গঙ্গানদী পার হইবার কোন প্রসঙ্গ নাই, সুতরাং বর্তমান নদীয়াই প্রাচীন বিজয়পুর এই মতটিই সমীচীন বলিয়া মনে হয়। সম্ভবত বিজয়সেনের নাম অনুসারেই এই নামকরণ হইয়াছিল।

## ত্রয়োদশ পরিচ্ছেদ

### পাল ও সেন রাজগণের কাল নির্ণয়

পাল ও সেনরাজগণের কাল নির্ণয় লইয়া পণ্ডিতগণের মধ্যে মতভেদ আছে। এই বিষয়ের বিস্তৃত আলোচনা এস্থলে সম্ভবপর নহে। তবে যে প্রণালীতে এই গ্রন্থে এই সমুদয় রাজার কাল-নির্ণয় করা হইয়াছে তাহার সম্বন্ধে সংক্ষিপ্ত আলোচনা প্রয়োজন।

পালরাজগণের মধ্যে কেবলমাত্র প্রথম মহীপালের সারনাথ লিপিতে একটি নির্দিষ্ট তারিখের উল্লেখ আছে—১০৮৩ সম্বৎ অর্থাৎ ১০২৬ অব্দ। মহীপাল এই তারিখে রাজত্ব করিতেন ইহা ধরিয়া লইয়া, তাহার পূর্ব ও পরবর্তী রাজগণের মোট রাজত্বকাল যতদূর জানা আছে তাহার সাহায্যে মোটামুটিভাবে পালরাজগণের কাল নির্ণয় করা যায়। তারপর পালরাজগণের সম-সাময়িক অষ্টাষ্ট্র যে সমুদয় ভারতীয় রাজার নাম জানা যায় তাহাদের জানা তারিখের সাহায্যে এই কাল নির্ণয় আরও একটু সংকীর্ণভাবে করা সম্ভবপর। ধর্মপাল রাষ্ট্রকূটরাজ তৃতীয় গোবিন্দের, মহীপাল রাজেন্দ্র চোলের এবং নয়পাল কলচুরি কর্ণের সমসাময়িক ছিলেন ইহা পূর্ববর্তী বলা হইয়াছে, এবং সৌভাগ্যের বিষয় এই সমুদয় বিদেশী রাজগণের তারিখও সঠিকভাবে জানিবার উপায় আছে। এই সমুদয় আলোচনা করিয়া পালরাজগণের নিম্নলিখিতরূপ কাল নির্ণয় করা হইয়াছে।

রাজার নাম	মোট জানা রাজত্বকাল	রাজ্যালাভের আনুমানিক অব্দ
১। গোপাল (১ম)	X	৭৫০
২। ধর্মপাল	৩২	৭৭০

৩। দেবপাল	৩৯ (অথবা ৩৫)	৮১০
৪। বিগ্রহপাল অথবা শূরপাল	{ (১ম) ৩	৮৫০
৫। নারায়ণপাল		
৬। রাজ্যপাল	৩২	৯০৮
৭। গোপাল (২য়)	১৭	৯৪০
৮। বিগ্রহপাল (২য়)	২৬ (?)	৯৬০
৯। মহীপাল (১ম)	৪৮	৯৮৮
১০। নয়পাল	১৫	১০৩৮
১১। বিগ্রহপাল (৩য়)	×	১০৫৫
১২। মহীপাল (২য়)	×	১০৭০
১৩। শূরপাল (২য়)	×	১০৭৫
১৪। রামপাল	৪২	১০৭৭
১৫। কুমারপাল	×	১১২০
১৬। গোপাল (৩য়)	১৪	১১২৫
১৭। মদনপাল	১৭	১১৪০
১৮। গোবিন্দপাল	৪	১১৫৫

সেনরাজগণের কাল নির্ণয় বিষয়ে দুইটি মলাবান উপাদান আছে, কিন্তু দুঃখের বিষয় ইহারা পরস্পর বিরোধী। প্রথমত লক্ষ্মণ সংবৎ (ল সং) নামে একটি অন্ধ প্রাচীনশাল হইতে অতীবধি মিথিলায় প্রচলিত আছে। ১১০৭ হইতে ১১১২ অব্দের মধ্যে ইহার প্রথম বৎসর গণনা করা হয়। সাধারণত কোন রাজার রাজ্যপ্রাপ্তির সময় হইতেই তাঁহার নামে অন্ধ প্রচলিত হয়। সুতরাং লক্ষ্মণ সংবৎের আরম্ভকালে অর্থাৎ ১১০৭ হইতে ১১১২ অব্দের মধ্যে লক্ষ্মণসেন রাজ্য লাভ করেন অনেকে এই মত গ্রহণ করিয়াছেন।

অপরপক্ষে বল্লালসেন রচিত দানসাগর ও অদ্ভুতসাগরের বহুসংখ্যক পুঁথির উপসংহারে স্পষ্ট লিখিত আছে যে ১০৮১ (অথবা ১০৮২) শাকে (১১৫৯-৬০ অন্ধ) বল্লালসেনের রাজ্যারম্ভ, ১০৯১ শাকে (১১৬৯ অন্ধ) দানসাগরের রচনাকাল এবং ১০৮৯ (অথবা ১০৯০) শাকে (১১৬৭-৬৮ অন্ধ) অদ্ভুতসাগর গ্রন্থের রচনা আরম্ভ হয়। কোন কোন পুঁথিতে এই সময়-জ্ঞাপক শ্লোকগুলি না থাকায় কেহ কেহ এইগুলির উপর আস্থা স্থাপন করেন না।



কিন্তু এযাবৎ যত পুঁথি আবিষ্কৃত হইয়াছে তাহার প্রায় সকলগুলিতেই এই সমুদয় শ্লোক পাওয়া যায়, যে দুই একখানি পুঁথিতে এই সমুদয় শ্লোক নাই সে পুঁথিতেও গ্রন্থমধ্যে নানা স্থানে উহার কোন কোন তারিখের উল্লেখ আছে। রাজা টোডরমল্ল অভূতমাগরের পুঁথিতে এই তারিখের উল্লেখ করিয়া লিখিয়াছেন যে বল্লালসেন ১১৬০-৬১ অব্দে রাজত্ব করিতেন।

এই সমুদয় তারিখের সমর্থক আর একটি প্রমাণ পাওয়া গিয়াছে। লক্ষ্মণসেনের সভাকবি শ্রীধরদাসের সছক্তিকর্ণামৃত গ্রন্থের পুঁথিতে যে পুষ্পিকা আছে তাহা হইতে জানা যায় যে ১১২৭ শাকে (= ১২০৫ অব্দে) লক্ষ্মণসেনের ‘রসৈক-বিংশ’ রাজ্য সম্বৎসরে এই গ্রন্থ রচিত হয়। রসৈক-বিংশ পদের অর্থ ২৭ (রস = ৬ + ২১)। এইরূপ পদের প্রয়োগ একটু অভূত বলিয়া কেহ কেহ এই পদটিকে ‘রাজ্যৈকবিংশ’ এইরূপ পাঠ করিয়া ১২০৫ অব্দ লক্ষ্মণসেনের একবিংশতি বৎসর রাজ্যকাল এইরূপ অর্থ গ্রহণ করিয়াছেন। সে যাহাই হউক ১২০৫ অব্দে যে লক্ষ্মণসেন রাজত্ব করিতেন সছক্তিকর্ণামৃত হইতে তাহা প্রমাণিত হয় এবং এই সিদ্ধান্ত বল্লালসেনের কালজ্ঞাপক পূর্বোক্ত শ্লোকগুলির সম্পূর্ণ সমর্থন করে। এই সমুদয়ের উপর নির্ভর করিয়া এই গ্রন্থে সেন রাজ-গণের নিম্নলিখিতরূপ কাল নির্ণয় করা হইয়াছে এবং পণ্ডিতগণ প্রায় সকলেই এই মত গ্রহণ করিয়াছেন।

রাজার নাম	মোট জানা রাজত্বকাল	রাজ্যলাভের আনুমানিক অব্দ
বিজয়সেন	৬২ ( ৩২ ? )	১০৯৫ ( ১১২৫ ? )
বল্লালসেন	১১	১১৫৮
লক্ষ্মণসেন	২৭	১১৭৯
বিশ্বরূপ সেন	১৪	১২০৬
কেশবসেন	৩	১২২৫

বিজয়সেনের বারাকপুর লিপির তারিখ কেহ ৩২ এবং কেহ ৬২ পাঠ করিয়াছেন। এই দুই ভিন্ন পাঠ গ্রহণ করিলে তাঁহার রাজ্যারম্ভকাল কিরূপ বিভিন্ন হইবে তাহা উপরে বন্ধনীয়ুক্ত সংখ্যা দ্বারা দেখান হইয়াছে।

প্রশ্ন উঠিতে পারে যে লক্ষ্মণসেন যদি ১১৭৯ অব্দে রাজ্যলাভ করিয়া থাকেন তবে ১১০৭ হইতে ১১১৯ অব্দের মধ্যে তাঁহার নামযুক্ত লক্ষ্মণ সংবৎ আরম্ভ হইল কিরূপে? এই প্রশ্নের কোন সন্তোষজনক উত্তর দেওয়া সম্ভবপর নহে। তবে এবিষয়ে কয়েকটি কথা স্মরণ রাখা আবশ্যিক। প্রথমত লক্ষ্মণ-

সেনের রাজ্যারম্ভকাল হইতে কোন অঙ্কের প্রতিষ্ঠা হইলে বঙ্গদেশে তাহার প্রচলন হইত এবং তাঁহার পুত্রদ্বয় বিশ্বকম্পসেন এবং কেশবসেনের তাম্রশাসনে তাঁহাদের রাজ্যাক্ষের পরিবর্তে এই অঙ্কেরই ব্যবহার হইত, এইরূপ অনুমান সম্পূর্ণ সঙ্গত। দ্বিতীয়ত লক্ষ্মণ সংবতের ব্যবহারের পূর্বে মগধের তিনটি প্রাচীন লিপিতে নিম্নলিখিতরূপে তারিখ দেওয়া হইয়াছে।

১। শ্রীমল্লকর্ণসেনস্ত্রীতরাজ্যে সং ৫১

২। শ্রীমল্লকর্ণসেনদেবপাদানামস্ত্রীতরাজ্যে সং ৭৭

৩। লক্ষ্মণসেনস্ত্রীতরাজ্যে সং ৮৩

পালবংশীয় ( অথবা পাল-উপাধিধারী ) শেষ রাজা গোবিন্দপালের নাম সংযুক্ত এইরূপ তারিখ একখানি শিলালিপি ও কয়েকখানি পুঁথিতে পাওয়া যায় যথা :—

১। শ্রীগোবিন্দপালদেবগতরাজ্যে চতুর্দশসম্বৎসরে

২। শ্রীমদগোবিন্দপালদেবানাং বিনষ্টরাজ্যে অষ্টত্রিংশৎসম্বৎসরে।

এই সমুদয় পদের প্রকৃত বাখ্যা সম্বন্ধে পণ্ডিতগণের মধ্যে মতভেদ আছে। কিন্তু এই সমুদয় তারিখ যে গোবিন্দপাল ও লক্ষ্মণসেনের রাজ্য শেষ হইতে গণনা আরম্ভ হইয়াছে তাহাই সঙ্গত বলিয়া মনে হয়। সাধারণত কোন রাজার রাজ্যকালে কোন লিপি বা পুঁথি লিখিত হইলে তাঁহার প্রবর্ত্তমান-বিজয়রাজ্য-সংবৎসর দিয়া তারিখ দেওয়া হইত। কিন্তু বৌদ্ধ পাল বংশ ধ্বংস হইলে বৌদ্ধ বিহারের ভিক্ষুগণ নবাগত হিন্দু রাজ্যের প্রবর্ত্তমান বিজয়রাজ্যের পরিবর্তে প্রাচীন বৌদ্ধ রাজবংশের ধ্বংস হইতেই তারিখ গণনা করিতেন, এবং মগধ মুসলমান বিজৈতার পদানত হইলে মগধবাসীগণ মুসলমান রাজ্যের প্রবর্ত্তমান-বিজয়রাজ্যের পরিবর্তে শেষ হিন্দুরাজ্য লক্ষ্মণসেনের রাজ্যশেষ হইতে তারিখ গণনা করিতেন, ইহাই উক্ত তারিখযুক্ত পদগুলি হইতে অনুমান হয়। সুতরাং প্রথমে লক্ষ্মণসেনের রাজ্যধ্বংস হইতেই একটি অঙ্কের গণনা আরম্ভ হয়। বাংলায় প্রচলিত বল্লাল সন ও পরগণাতি সনও ঐ অঙ্ক বলিয়াই অনুমিত হয়। কারণ এ উভয়ই ১২০০ অঙ্কের দুই এক বৎসর আগে বা পরে আরম্ভ হইয়াছে।

এই অঙ্ক কিছুকাল প্রচলিত থাকিবার পর সম্ভবত মিথিলায় লক্ষ্মণসেনের রাজ্যধ্বংসের পরিবর্তে তাঁহার জন্ম হইতে এক অঙ্ক গণনার রীতি প্রবর্ত্তিত হয় এবং এই জন্ম তারিখ হইতে গণনা করিয়া লক্ষ্মণ সংবৎ প্রচলিত হয়। মীনহাজুদ্দিন লিখিয়াছেন যে বখতিয়ারের আক্রমণকালে লক্ষ্মণসেনের

বয়স প্রায় ৮০ বৎসর হইয়াছিল। এই উক্তি অনুসারে আ ১১১৯ অব্দে লক্ষ্মণসেনের জন্ম হইয়াছিল। লক্ষ্মণ সংবতের সহিত শকাব্দ ও সংবতের তারিখ দেওয়া আছে এরূপ বহু দৃষ্টান্ত আলোচনা করিয়া দেখা গিয়াছে যে ‘লসং’ এর আরম্ভকাল ১১০০ হইতে ১১১৯ অব্দের মধ্যে বিভিন্ন বৎসরে পড়ে। বর্তমানকালে মিথিলায় যে পঞ্জিকা প্রচলিত আছে ওদনুসারে লসং ১১০৮ অব্দে আরম্ভ হইয়াছিল। এই প্রকার বৈষম্যের কারণ কি তাহা জানা যায় নাই। সম্ভবত যখন লক্ষ্মণসেনের মৃত্যুর শতাধিক বর্ষ পরে তাঁহার জন্মতারিখ হইতে লসং গণনা আরম্ভ হয় তখন মিথিলায় এই তারিখটি সঠিক জানা ছিল না এবং এসম্বন্ধে ভিন্ন ভিন্ন মত প্রচলিত ছিল। সেই জন্মই ‘লসং’ এর বিভিন্ন আরম্ভ কালের মধ্যে অনধিক বার বৎসরের প্রভেদ হইয়াছে। অবশ্য এসকলই অনুমান মাত্র। লসং এর প্রকৃত আরম্ভকাল এবং ইহা কোন ঘটনার স্মৃতি বহন করিতেছে তাহা সঠিক জানিবার উপায় নাই। তবে ইহা এক প্রকার স্থির যে দ্বাদশ শতাব্দীর প্রথম বা দ্বিতীয় দশকে—যখন হইতে ‘লসং’ এর প্রথম বৎসর গণনা করা হয়—লক্ষ্মণসেন রাজ্য লাভ করেন নাই, সুতরাং লক্ষ্মণসেনের রাজসিংহাসনে আরোহণ উপলক্ষে বা সেই ঘটনা চিরস্মরণীয় করিবার জন্ম লক্ষ্মণ সংবতের প্রচলন হইয়াছিল এই সিদ্ধান্ত গ্রহণযোগ্য নহে।

## চতুর্দশ পরিচ্ছেদ

### বাংলার শেষ স্বাধীন রাজ্য

#### ১। দেববংশ

লক্ষ্মণসেনের রাজত্বের শেষভাগে মেঘনার পূর্বতীরে মধুমথনদেব একটি স্বাধীন রাজ্যের প্রতিষ্ঠা করেন। মধুমথনদেবের পিতা পুরুষোত্তম ‘দেবায়-গ্রামণী’ অর্থাৎ দেববংশের প্রধান বলিয়া আখ্যাত হইয়াছেন, কিন্তু এই বংশের কোন তাম্রশাসনেই তাঁহার সম্বন্ধে রাজপদবী জ্ঞাপক কোন উপাধি ব্যবহৃত হয় নাই। মধুমথনদেব ও তাঁহার পুত্র বাসুদেব সম্বন্ধে কিছুই জানা যায় না। কিন্তু বাসুদেবের পুত্র দামোদরদেবের দুইখানি তাম্রশাসন আবিষ্কৃত হইয়াছে। ইহা হইতে জানা যায় যে তিনি ১২৩১ অব্দে সিংহাসনে আরোহণ করেন এবং

অন্তত ১২৪৩ অব্দ পর্য্যন্ত রাজত্ব করেন। এই তাম্রশাসনদ্বয় হইতে অনুমিত হয় যে দামোদরদেবের রাজ্য বর্তমান ত্রিপুরা, নোয়াখালি ও চট্টগ্রাম জেলায় সীমাবদ্ধ ছিল। ‘সকল-ভূপাল-চক্রবর্তী’ ও ‘অরিরাজ-চাগুর-মাধব’ এই উপাধিদ্বয় হইতে অনুমিত হয় যে দামোদর পরাক্রান্ত রাজা ছিলেন। সম্ভবত বিশ্বরূপসেনের মৃত্যুর পর তিনি পৈত্রিক রাজ্যের সীমা বিস্তার করিতে সমর্থ হইয়াছিলেন।

দামোদরদেবের মৃত্যুর পর তাঁহার রাজ্যের কোন বিবরণ পাওয়া যায় না। কিন্তু ঢাকা জিলার আদাবাড়ী নামক স্থানে প্রাপ্ত একখানি তাম্রশাসনে দেব উপাধিদারী আর এক রাজার নাম পাওয়া যায়। এই তাম্রশাসনখানি অতিশয় জীর্ণ এবং ইহার সম্পূর্ণ পাঠোদ্ধার সম্ভব হয় নাই। যেটুকু পড়া গিয়াছে তাহা হইতে জানা যায় যে পরমেশ্বর পরমভট্টারক মহারাজাধিরাজ অরিরাজ-দম্বুজমাধব দশরথদেব বিক্রমপুর রাজধানী হইতে এই তাম্রশাসন দান করিয়াছিলেন। কেশবসেন ও বিশ্বরূপসেনের অনুকরণে তিনি অশ্বপতি, গজপতি, নরপতি, রাজত্রয়াধিপতি প্রভৃতি উপাধি ধারণ করিয়াছিলেন, এবং সেনরাজগণের “সেনকুল-কমল-বিকাস-ভাস্কর” পদবীর পরিবর্তে তাঁহার শাসনে “দেবায়য়-কমল-বিকাস-ভাস্কর” ব্যবহৃত হইয়াছে। সুতরাং তিনি যে দেববংশীয় ছিলেন তাহাতে কোন সন্দেহ নাই। তবে পূর্বোক্ত দেববংশ ও এই দেববংশ যে অভিন্ন তাহা নিঃসন্দেহে বলা যায় না।

দশরথদেবের উপাধিদৃষ্টে সহজেই অনুমিত হয় যে বিশ্বরূপসেনের মৃত্যুর অনতিকাল পরেই তিনি রাজত্ব করেন। পূর্বেই উক্ত হইয়াছে যে লক্ষ্মণসেনের বংশধরগণ অল্প ১১৭৫ অথবা ১২৬০ অব্দ পর্য্যন্ত রাজত্ব করেন। সম্ভবত ইহার পর কোন সময়ে দশরথদেব সেনরাজগণের রাজ্য অধিকার করিয়া থাকিবেন। তাঁহার তাম্রশাসনে উক্ত হইয়াছে যে তিনি নারায়ণের কৃপায় গোড় রাজ্য লাভ করিয়াছিলেন। মুসলমান ঐতিহাসিকগণের মতে গোড় এই সময়ে তুরস্ক রাজগণের অধীনে ছিল। তবে তুরস্ক নায়কগণের গৃহবিবাদে স্বযোগে দশরথদেব গোড়ের কিয়দংশ অধিকার করিয়া কিছুদিন রাজত্ব করিয়াছিলেন ইহা একেবারে অবিশ্বাস্য বলা যায় না। বাংলাদেশে তুরস্ক প্রভুত্ব দৃঢ়ভাবে প্রতিষ্ঠিত হইতে বহুদিন লাগিয়াছিল, এবং এই সময়ের মধ্যে যে হিন্দুরাজগণ লুপ্ত রাজ্য উদ্ধার করিতে পুনঃ পুনঃ চেষ্টা করিয়াছিলেন এবং আংশিক ভাবে কৃতকার্য হইয়াছিলেন তাহাতে সন্দেহ করিবার কারণ নাই। জিয়াউদ্দিন বাণীর ইতিহাসে কথিত হইয়াছে যে দিল্লীর সুলতান ঘিয়াসুদ্দিন বলবন যখন তুঘরি

খানের বিদ্রোহ দমন করিবার জন্য বঙ্গদেশে অভিযান করেন তখন সোণারগাঁয়ের রাজা দমুজরায়ের সহিত তাঁহার এইরূপ এক চুক্তিপত্র হয় যে তুঘরিলা যাহাতে জলপথে পলায়ন করিতে না পারে দমুজরায় তাহার ব্যবস্থা করিবেন। অনেকে অনুমান করেন যে এই দমুজরায় ও অরিরাজ-দমুজমাধব দশরথ অভিন্ন। সোণারগাঁ ও বিক্রমপুর বর্তমানে ধলেশ্বরী নদীর দুই তীরে অবস্থিত। সুতরাং বিক্রমপুরের 'দমুজমাধব' উপাধিধারী রাজা বিদেশী ঐতিহাসিক কর্তৃক সোণারগাঁয়ের রাজা দমুজরায় রূপে অভিহিত হইবেন ইহা খুব অস্বাভাবিক নহে। বাংলার কুলজীগ্রন্থেও দেখিতে পাওয়া যায় যে কেশবসেনের অনতিকাল পরে দমুজমাধব নামে এক রাজা রাজত্ব করিতেন। দশরথদেব ও দমুজমাধবকে অভিন্ন বলিয়া গ্রহণ করিলে স্বীকার করিতে হয় যে দশরথদেব বলবনের অভিযান সময়ে অর্থাৎ ১২৮৩ খৃষ্টাব্দে সিংহাসনে আসীন ছিলেন।

শ্রীহট্টের নিকটবর্তী ভাটেরা গ্রামে প্রাপ্ত দুইখানি তাম্রশাসন হইতে দেববংশীয় কয়েকজন রাজার বিবরণ পাওয়া যায়। তাঁহাদের বংশতালিকা এইরূপ।

খরবাণ  
|  
গোকুলদেব  
|  
নারায়ণদেব  
|  
কেশবসেনদেব  
|  
ঈশানদেব

কেশবদেব একজন বিখ্যাত যোদ্ধা ছিলেন এবং তুলাপুরুষ যজ্ঞ করিয়াছিলেন। ঈশানদেব অন্তত ১৭ বৎসর রাজত্ব করিয়াছিলেন। এতদ্ব্যতীত এই রাজগণের আর কোন ঐতিহাসিক বিবরণ পাওয়া যায় না। তাম্রশাসন দুইটির অক্ষর দৃষ্টে অনুমান হয় যে উক্ত রাজগণ ত্রয়োদশ অথবা চতুর্দশ শতাব্দীতে রাজত্ব করেন। দেব উপাধি হইতে অনুমিত হয় যে এই রাজগণও দেব বংশীয় ছিলেন। কিন্তু ইহাদের সহিত পূর্বোক্ত দেববংশীয় রাজগণের কোন সম্বন্ধ ছিল কিনা তাহা বলা যায় না।

যে স্থানে তাম্রশাসন দুইটি পাওয়া গিয়াছে সেখানে একটি জনপ্রবাদ প্রচলিত আছে যে তথাকার রাজা গৌরগোবিন্দ শাহ জালাল কর্তৃক পরাজিত হন। এই ঘটনার তারিখ ১২৫৭ অব্দ। কেশবদেবের এক উপাধি ছিল

রিপুরাজ গোপী-গোবিন্দ । কেহ কেহ মনে করেন যে এই রাজাই জনপ্রবাদের গৌরগোবিন্দ ।

## ২। পট্টিকেরা রাজ্য

বর্তমান কুমিল্লা জিলায় পট্টিকেরা রাজ্য অবস্থিত ছিল। পট্টিকেরা নামে একটি পরগণা এখনও এই প্রাচীন রাজ্যের স্মৃতি বহন করিতেছে। গত বৎসর (১৯৪৩ অব্দ) সামরিক প্রয়োজনে মাটি খনন উপলক্ষ্যে কুমিল্লার অনতিদূরবর্তী লালমাই বা ময়নামতী পাছাড়ে বহু প্রাচীন স্তূপ, মন্দির, প্রভৃতির ধ্বংসাবশেষ আবিষ্কৃত হইয়াছে। প্রায় দশ মাইল ব্যাপিয়া এই সমুদয় প্রাচীন কীর্তির চিহ্ন এখনও বিদ্যমান। এই স্থানকে যে প্রাচীন পট্টিকেরা রাজ্যের রাজধানী অথবা অন্যতম প্রধান কেন্দ্র ছিল তাহা একপ্রকার নিঃসংশয়ে বলা যাইতে পারে।

১০১৫ অব্দে লিখিত একখানি পুঁথিতে ষোড়শভুজা এক দেবীর চিত্রের নিম্নে লিখিত আছে “পট্টিকের চন্দাবরভবনে চন্দা”। ইহা হইতে প্রমাণিত হয় যে রাজধানী পট্টিকেরে প্রতিষ্ঠিত বৌদ্ধ চন্দা দেবীর মূর্তি একাদশ শতাব্দীর পূর্বেই প্রসিদ্ধি লাভ করিয়াছিল। পূর্বোক্ত ধ্বংসাবশেষ হইতেও অনুমিত হয় যে ইহারও ৩৪ শত বৎসর পূর্বে পট্টিকের একটি সমৃদ্ধ জনপদ ছিল।

ব্রহ্মদেশের ঐতিহাসিক আখ্যানে পট্টিকের রাজ্যের বহু উল্লেখ দেখিতে পাওয়া যায়। ব্রহ্মের প্রসিদ্ধ রাজা অনিরুদ্ধ (১০৪৪-১০৭৭ অব্দ) পট্টিকের পর্য্যন্ত স্বীয় বাহ্যার প্রসার করেন এবং এই সময় হইতেই ছই রাজ্যের মধ্যে ঘনিষ্ঠ সম্বন্ধ স্থাপিত হয়। ব্রহ্মরাজ কন্জিথের (১০৮৪-১১১২) কন্যার সহিত পট্টিকের রাজপুত্রের বার্থ প্রেমের কাহিনী ব্রহ্মদেশের আখ্যানে সবিস্তারে লিপিবদ্ধ হইয়াছে এবং এই ঘটনা অবলম্বন করিয়া তথায় অনেক কবিতা ও নাটক রচিত হইয়াছে। এই সমুদয় নাটক এখনও ব্রহ্মদেশে অভিনীত হয়। ব্রহ্মরাজের ইচ্ছা থাকিলেও রাজনৈতিক কারণে তাঁহার কন্যার সহিত পট্টিকের রাজকুমারের বিবাহ অসম্ভব হইলে উক্ত রাজকুমার আত্মহত্যা করেন। কিন্তু এই রাজকন্যার গর্ভজাত পুত্র অলংসিথু মাতামহের মৃত্যুর পর ব্রহ্মদেশের রাজা হন এবং পট্টিকের রাজ্যকে বিবাহ করেন। অলংসিথুর মৃত্যুর পর তাঁহার পুত্র নরথু সিংহাসনে আরোহণ করিয়া স্বহস্তে তাঁহার বিমাতা পট্টিকের রাজকন্যাকে বধ করেন। কন্যার মৃত্যু-সংবাদ শ্রবণ করিয়া পট্টিকের-

রাজ প্রতিশোধ লইতে সংকল্প করিলেন। আটজন বিশ্বস্ত সৈনিককে তিনি ব্রাহ্মণের ছদ্মবেশে ব্রহ্মদেশের রাজধানী পাগানে পাঠাইলেন। ব্রাহ্মণেরা আশীর্বাদ করিবার ছলে রাজসমীপে উপস্থিত হইয়া রাজাকে বধ করে এবং সকলেই স্বেচ্ছায় প্রাণ বিসর্জন দেয়। এই সমুদয় কাহিনী কতদূর সত্য বলা যায় না, কিন্তু ইহা হইতে প্রমাণিত হয় যে একাদশ ও দ্বাদশ শতাব্দীতে পট্টকের একটি প্রসিদ্ধ রাজ্য ছিল এবং নিকটবর্তী ব্রহ্মদেশের সহিত তাহার রাজনৈতিক সম্বন্ধ ছিল।

ময়নামতী পাহাড়ে প্রাপ্ত একখানি তাম্রশাসনে রণবঙ্কমল্ল শ্রীহরিকালদেব নামক পট্টকের এক রাজার নাম পাওয়া যায়। ইনি ১২০৫ অব্দে সিংহাসনে আরোহণ করেন এবং অন্তত ১৭ বৎসর রাজত্ব করেন। এই তাম্রশাসন দ্বারা রাজমন্ত্রী শ্রী ধড়ি-এব পট্টকের নগরের এক বৌদ্ধ-বিহারে কিঞ্চিৎ ভূমি দান করেন। রাজমন্ত্রীর পিতার নাম হেদি-এব এবং তাম্র শাসনের লেখকের নাম মেদিনী-এব। এই সমুদয় নাম ব্রহ্মদেশীয় নামের অনুরূপ এবং পট্টকের রাজ্যের সহিত ব্রহ্মদেশের ঘনিষ্ঠ সম্বন্ধের পরিচায়ক।

শ্রীহরিকালদেব প্রাচীন পট্টকের রাজবংশীয় অথবা নিজেই একটি স্বাধীন রাজ্যের প্রতিষ্ঠা করিয়াছিলেন তাহা বলা যায় না। এই সময়ে যে দেববংশীয় রাজগণ এই অঞ্চলে রাজত্ব করিতেন তাহা পূর্বেই বলা হইয়াছে। অসম্ভব নহে যে শ্রীহরিকালদেবও দেববংশীয় ছিলেন। কিন্তু তাঁহার নামের অন্তর্গত 'দেব' শব্দ বংশ-পদবী অথবা রাজকীয় সম্মান সূচক পদমাত্র তাহা নিশ্চিত বলা যায় না। তবে রণবঙ্কমল্ল উপাধিধারী শ্রীহরিকালদেবের পর যে পট্টকের রাজ্য দেববংশীয় দামোদরদেবের রাজ্যভুক্ত হইয়াছিল ইহাই সম্ভবপর বলিয়া মনে হয়।

## পঞ্চদশ পরিচ্ছেদ

### রাজ্য শাসন-পদ্ধতি

#### ১। প্রাচীন যুগ

গুপ্ত সাম্রাজ্যের অন্তর্ভুক্ত হওয়ার পূর্বে বাংলার রাজ্যশাসন পদ্ধতি সম্বন্ধে কোন সঠিক বিবরণ পাওয়া যায় না। তবে প্রাচীন গ্রন্থে স্কন্ধ পুত্র প্রভৃতি

জাতি এবং ক্ষুদ্র ক্ষুদ্র রাজ্যের উল্লেখ দেখিয়া অনুমান হয় যে আর্ষাবর্তের অন্তর্গত অংশের স্থায় বাংলা দেশেও প্রথমে কয়েকটি বিশিষ্ট জাতি সংঘবদ্ধভাবে বসবাস করে এবং ইহা হইতেই ক্রমে রাজতন্ত্রের প্রতিষ্ঠা হয়।

গ্রীক লেখকগণ গঙ্গারিডাই রাজ্যের যে বর্ণনা করিয়াছেন তাহাতে কোন সন্দেহ থাকে না যে খৃষ্টপূর্ব চতুর্থ শতাব্দির পূর্বেই বাংলায় রাজতন্ত্রের পূর্ণ বিকাশ হইয়াছিল। কারণ রাজ্যশাসনপদ্ধতি সুনিয়ন্ত্রিত ও বিশেষ শৃঙ্খলার সহিত বিধিবদ্ধ না হইলে এরূপ পরাক্রান্ত রাজ্যের উদ্ভব সম্ভবপর নহে। মহাভারতে উল্লিখিত হইয়াছে যে বাংলার ক্ষুদ্র ক্ষুদ্র রাজ্যগুলি মিলিত হইয়া বহিঃশত্রুর আক্রমণ প্রতিরোধ করিতে চেষ্টা করিয়াছিল এবং তাহারা বিদেশী রাজ্যের সহিতও রাজনৈতিক সম্বন্ধ স্থাপন করিয়াছিল। ইহাও বাংলা দেশে রাজনৈতিক জ্ঞানের প্রসার ও প্রভাব সৃষ্টি করে। রাজকুমার বিজয়ের আখ্যান ( পৃঃ ১৪ ) সত্য হইলে বাংলা দেশে যে প্রজাশক্তি প্রভাবশালী ছিল তাহা স্বীকার করিতে হইবে।

মৌর্যযুগের একখানি মাত্র লিপি মহাস্থানগড়ে অর্থাৎ প্রাচীন পুণ্ড্রবর্ধনে পাওয়া গিয়াছে। ইহাতে একজন মহামাত্যের উল্লেখ আছে। এই লিপির প্রকৃত মর্ম্ম কি তাহা লইয়া পণ্ডিতগণের মধ্যে মতভেদ আছে। ভুক্তির বা অস্থ কোন কারণ বশত প্রজাগণের দুরবস্থা হওয়ায় সরকারী ভাণ্ডার (কোষাগার) হইতে দ্রুত লোকদিগকে শস্ত্র ও নগদ টাকা ধার দিয়া সাহায্য করার আদেশই এই লিপিতে উক্ত হইয়াছে। খুব সম্ভবত মৌর্যগণের সুগরিষ্ঠ রাজ্যশাসন পদ্ধতি বাংলা দেশেও প্রচলিত ছিল।

## ২ গুপ্ত সাম্রাজ্য ও অব্যবহিত পরবর্তী যুগ

বাংলা দেশ গুপ্ত সাম্রাজ্যভুক্ত হইলেও ইহার এক অংশ মাত্র গুপ্ত সম্রাটগণের প্রত্যক্ষ শাসনাধীনে ছিল। শাসন কার্যের সুবিধার জন্য এই অংশে বর্তমান কালের স্থায় কতকগুলি নির্দিষ্ট শাসন-বিভাগ ছিল। সর্বাপেক্ষা বড় বিভাগের নাম ছিল ভুক্তি। প্রত্যেক ভুক্তি কতকগুলি বিষয়, মণ্ডল, বাথি, ও গ্রামে বিভক্ত ছিল। বর্তমানকালে যে অংশকে আমরা রাজসাহী বিভাগ বলি মোটামুটি তাহাই ছিল পুণ্ড্রবর্ধন ভুক্তির সামান্য। প্রাচীন বর্তমান ভুক্তি ও বর্তমান বর্তমান বিভাগ ও মোটামুটি একই বলা যাইতে পারে। বিষয়গুলি ছিল বর্তমান জিলার মত।

গুপ্ত সম্রাট স্বয়ং ভুক্তির শাসনকর্তা নিযুক্ত করিতেন—ইহার উপাধি



ছিল উপরিক-মহারাজ। সাধারণত উপরিক-মহারাজই অধীনস্থ বিষয়গুলির শাসনকর্তা নিযুক্ত করিতেন, কিন্তু কোন কোন স্থলে স্বয়ং সম্রাট কর্তৃক তাঁহাদের নির্বাচনের উল্লেখ দেখিতে পাওয়া যায়। ইহাদের নানা উপাধি ছিল,—কুমারামাত্য, আযুক্তক, বিষয়পতি প্রভৃতি। ইহা ভিন্ন আরও বহু-সংখ্যক রাজকর্মচারীর নাম পাওয়া যায়।

ভুক্তি, বিষয়, বীথি প্রভৃতি প্রত্যেক বিভাগেরই একটি কেন্দ্র ছিল এবং সেখানে তাহাদের একটি অধিকরণ (আফিস) থাকিত। তাম্রপটে উৎকীর্ণ কতকগুলি ভূমি বিক্রয়ের দলিল হইতে এই সমুদয় অধিকরণের কিছু কিছু বিবরণ জানিতে পাওয়া যায়। ইহার কয়েকখানিতে কোটিবর্ষ বিষয়ের অধিকরণের উল্লেখ আছে। কোটিবর্ষ নগরীর ধ্বংসাবশেষ বর্তমানকালে বাণগড় নামে পরিচিত। এই নগরীর নাম অনুসারেই উক্ত বিষয়ের নামকরণ হইয়াছিল এবং এখানেই এই বিষয়ের অধিকরণ অবস্থিত ছিল। বিষয়পতি ব্যতীত এই অধিকরণের আর চারিজন বিশিষ্ট সদস্য ছিলেন। তাঁহারা নগরশ্রেষ্ঠী, প্রথম সার্থবাহ, প্রথম কুলিক ও প্রথম কায়স্থ। এই চারিটি পদবীর প্রকৃত অর্থ নিরূপণ করা দুঃস্ব। সম্ভবত প্রথম তিনটি ধনী মহাজন, বণিক ও শিল্পীগণের প্রতিনিধি স্বরূপ অধিকরণের সদস্য ছিলেন। কায়স্থ শব্দে লেখক ও এক শ্রেণীর রাজকর্মচারী বুঝাইত। সেকালে ধনী মহাজন, বণিক ও শিল্পীগণের বিধিবদ্ধ শ্রেণী বা সংঘ-প্রতিষ্ঠান ছিল। এই সমুদয় সংঘ-মুখ্যগণই সম্ভবত বিষয়-অধিকরণের সদস্য হইতেন। ইহা হইতে সে কালের স্বায়ত্ত-শাসন প্রথার মূল কত দৃঢ় ছিল তাহা বুঝা যায়। প্রতি বিষয়পতি এই সমুদয় বিভিন্ন শ্রেণীর প্রতিনিধির সহিত মিলিত হইয়া বিষয়ের কার্য নির্বাহ করিতেন। কি প্রণালীতে এই সমুদয় অধিকরণ জমি বিক্রয় করিত তাহার বিবরণ পূর্বোক্ত তাম্রশাসনগুলি হইতে জানা যায়। প্রথমে ক্রেতা অধিকরণের সম্মুখে উপস্থিত হইয়া কি উদ্দেশ্যে কোন জমি কিনিতে চান তাহা নিবেদন করিতেন। তখন অধিকরণের আদেশে পুস্তপাল নামক একজন কর্মচারী ঐ জমি সম্বন্ধে অনুসন্ধান করিয়া উহা বিক্রয় করা যাইতে পারে কিনা এবং উহার মূল্য কত প্রভৃতি বিষয় অধিকরণের গোচর করিতেন। তারপর মূল্য দেওয়া হইলে ক্রেতা জমির অধিকার পাইতেন। কোন কোন স্থলে দেখা যায় যে এই জমি বিক্রয়ের কথা পার্শ্ববর্তী গ্রামবাসীগণকে জানান হইত এবং গ্রামের মহন্তর (মাতব্বর) ও কুটুম্বিগণের (গৃহস্থ) সাক্ষাতে জমি মাপিয়া তাহার সীমা নির্দিষ্ট করা হইত।

বাংলার যে অংশ প্রত্যক্ষভাবে গুপ্ত সম্রাটগণের শাসনাধীনে ছিল না তাহা সামন্ত মহারাজগণের অধীনে ছিল। সম্ভবত যে সমুদয় স্বাধীন রাজা গুপ্তগণের পদানত হইয়াছিল তাহাদের রাজ্যরাই গুপ্তগণের অধীনস্থ সামন্ত-রাজরূপে পরিগণিত হইয়াছিলেন। ইহাদের বিভিন্ন উপাধি দেখিয়া অনুমিত হয় যে ইহারা দেশের আভ্যন্তরিক শাসন বিষয়ে সম্পূর্ণ ক্ষমতা পরিচালিত করিতেন। ক্রমে গুপ্তগণের প্রাপ্তি শাসন-পদ্ধতি বাংলাদেশের সর্বত্র প্রচলিত হইয়াছিল। দক্ষিণ ও পূর্ববঙ্গে স্বাধীন রাজ্য প্রতিষ্ঠিত হইবার পরও ভুক্তি, বিষয়, বীথি প্রভৃতি শাসন বিভাগের ও বিষয়-অধিকরণের উল্লেখ দেখিতে পাওয়া যায়। অবশ্য স্বাধীন রাজগণ মহারাজাধিরাজ উপাধি গ্রহণ করিতেন। গুপ্তসম্রাটগণের স্থায়ী ইহারাও বিভিন্ন শ্রেণীর বহুসংখ্যক রাজকর্মচারী নিযুক্ত করিতেন। গোপচন্দ্রের মল্লসাকল তাম্রশাসনে এই কর্মচারীগণের একটি তালিকা পাওয়া গিয়াছে, কিন্তু ইহাদের কতাহার কি কার্য বা কি পরিমাণ ক্ষমতা ও দায়িত্ব ছিল অধিকাংশ স্থলেই তাহা নির্ণয় করা যায় না।

## ৩। পাল সাম্রাজ্য

পালবংশীয় রাজগণের চারিশতাব্দীব্যাপী রাজত্বকালে বাংলার শাসন-প্রণালী দৃঢ়ভাবে প্রতিষ্ঠিত হইয়াছিল। গুপ্তযুগের স্থায়ী ভুক্তি, বিষয়, মণ্ডল প্রভৃতি সুনির্দিষ্ট শাসন বিভাগের বহু উল্লেখ পাওয়া যায়। গুপ্তবর্জন ও বর্জমান ভুক্তি ব্যতীত বাংলায় আরও দুটি ভুক্তির প্রতিষ্ঠা হইয়াছিল ইহার নাম দণ্ডভুক্তি। দণ্ড ইমান মেদিনীপুর জেলায় অবস্থিত ছিল। এতদ্ভুক্তির উত্তর বিহারে হার-ভুক্তি (ত্রিহৃত), দক্ষিণ বিহারে শ্রীনগর-ভুক্তি এবং আসামে প্রাগজ্যোতিষ-ভুক্তির উল্লেখ পাওয়া যায়। কিন্তু এই সমুদয় ভুক্তি বা ইহাদের অধীনস্থিত বিষয়, মণ্ডল প্রভৃতির শাসন-প্রণালী সম্বন্ধে কোন বিবরণ পাওয়া যায় না।

পরাক্রান্ত পালসম্রাটগণ প্রাচীন বাংলার মহারাজ বা পরবর্ত্তীকালের 'মহারাজাধিরাজ' পদবীতে সন্তুষ্ট থাকেন নাই। গুপ্ত সম্রাটগণের স্থায়ী তাহারাও পরমেশ্বর, পরমভট্টারক, মহারাজাধিরাজ প্রভৃতি গৌরবময় উপাধি গ্রহণ করিয়াছিলেন। তাহাদের রাজ্য বহু বিস্তৃত হওয়ায় শাসন প্রণালীরও তদনুরূপ পরিবর্তন হইয়াছিল। এই সময় হইতেই রাজত্বের সমুদয় ব্যাপারে প্রভূত ক্ষমতা সম্পন্ন একজন প্রধান মন্ত্রীর উল্লেখ দেখিতে পাই। গর্গ নামে এক

ব্রাহ্মণ ধর্মপালের প্রধান মন্ত্রী ছিলেন—তারপর তাঁহার বংশধরগণই নারায়ণ-পালের রাজ্যপর্য্যন্ত প্রায় একশত বৎসর বাবৎ এই পদে নিযুক্ত ছিলেন। এই বংশীয় গুরবমিশ্রের একখানি শিলালিপিতে উক্ত হইয়াছে যে সম্রাট দেবপাল স্বয়ং তাঁহার মন্ত্রী দর্ভপাণির অবসরের অপেক্ষায় তাঁহার দ্বারদেশে দণ্ডায়মান থাকিতেন, এবং এই দর্ভপাণি ও তাঁহার পৌত্র কেদারমিশ্রের নীতিকৌশলে ও বুদ্ধিবলেই বহৎ সাম্রাজ্য প্রতিষ্ঠিত করিতে সমর্থ হইয়াছিলেন। এই সমুদয় উক্তি অতিরঞ্জিত হইলেও পালরাজ্যে প্রধান মন্ত্রীগণ যে অসাধারণ প্রভুত্ব ও ক্ষমতার অধিকারী ছিলেন সে বিষয়ে সন্দেহ নাই। পরবর্ত্তী যুগে এইরূপ আর এক মন্ত্রীবংশের পরিচয় পাই। এই বংশীয় যোগদেব তৃতীয় বিগ্রহপালের এবং বৈষ্ণবদেব কুমারপালের মন্ত্রী ছিলেন। বৈষ্ণবদেব পরে কামরূপে এক স্বাধীন রাজ্যের প্রতিষ্ঠা করিয়াছিলেন।

গুপ্তযুগের ঞায় পালরাজ্যের অধীনেও অনেক সামন্তরাজা ছিলেন। ইহাদের মধ্যে রাজা, রাজন্যক, রাজনক, রাণক, সামন্ত ও মহাসামন্ত প্রভৃতি বহু শ্রেণীবিভাগ ছিল। কেন্দ্রীয় রাজশক্তি দুর্বল হইলে এই সমুদয় সামন্তরাজগণ যে স্বাধীন রাজার ঞায় ব্যবহার করিতেন রামপালের প্রসঙ্গে তাহা বর্ণিত হইয়াছে।

প্রাচীন ভারতে রাজগণ রাজ্যের শাসন সংরক্ষণ ব্যতীত সমাজ ও অর্থনীতি, এমন কি ধর্মের ব্যাপারেও হস্তক্ষেপ করিতেন। ধর্মপাল শাস্ত্রানুসারে বর্ণাশ্রম ধর্ম প্রতিপালন করিতেন। তিনি নিজে বৌদ্ধধর্মাবলম্বী হইলেও হিন্দু প্রজাগণকে তাঁহাদের ধর্মব্যবস্থা অনুসারেই শাসন করিতেন। পালরাজগণের প্রধান মন্ত্রীগণ যে ব্রাহ্মণবংশীয় ছিলেন ইহাও সে যুগের ধর্মমত বিষয়ে উদারতা প্রমাণিত করে।

পালরাজগণের তান্ত্রশাসনে রাজকর্মচারীগণের যে সুদীর্ঘ তালিকা আছে তাহা হইতে বেশ বোঝা যায় যে রাজ্যশাসন প্রণালী বেশ বিধিবদ্ধ ও সুনিয়ন্ত্রিত ছিল। দুঃখের বিষয় এই সমুদয় রাজকর্মচারীগণের অনেকের সম্বন্ধেই আমাদের কিছু জানা নাই। তাঁহাদের নাম বা উপাধি হইতে যেটুকু অনুমান করা যায় তাহা ব্যতীত শাসন-প্রণালী ও বিভিন্ন কর্মচারীর কর্তব্য ও ক্ষমতা সম্বন্ধে আর কিছুই জানিবার উপায় নাই। এই কর্মচারীর তালিকা বিশ্লেষণ করিয়া যে সামান্য তথ্য পাওয়া যায় এখানে মাত্র তাহারই উল্লেখ করিতেছি।

কোর্টিল্যের অর্থশাস্ত্রে বর্ণিত শাসন-প্রণালীতে যেরূপ এক একজন অধ্যক্ষের অধীনে পরিচালিত ভিন্ন ভিন্ন সুনির্দিষ্ট বহুসংখ্যক বিভাগের দ্বারা

সমৃদ্ধ শাসনকার্য্য নির্বাহের ব্যবস্থা আছে পালরাজগণও মোটামুটি তাই অনুসরণ করিতেন। কয়েকটি প্রধান প্রধান শাসন বিভাগ ও তাদের কর্মচারীদের সম্বন্ধে যাহা জানা যায় তাহা সংক্ষেপে লিপিবদ্ধ হইল।

১। কেন্দ্রীয় শাসন—প্রধান মন্ত্রী এবং আরও অনেক মন্ত্রী ও অমাত্যের সাহায্যে রাজা স্বয়ং এই বিভাগ পরিচালনা করিতেন। এই সমৃদ্ধের মধ্যে ‘মহাসাক্ষিবিগ্রহিক’ একজন প্রধান অমাত্য ছিলেন। পররাষ্ট্রের সহিত সম্বন্ধ রক্ষা করাই ছিল তাঁহার কাজ। ‘দূত’ ও একজন প্রধান কর্মচারী ছিলেন এবং পররাষ্ট্রের সহিত প্রত্যক্ষভাবে যোগসূত্র রক্ষা করিতেন। ‘রাজ-স্থানীয়’ ও ‘অঙ্গরক্ষ’ নামে দুইজন অমাত্যের নাম পাওয়া যায়। ইহারা সম্ভবত যথাক্রমে রাজার প্রতিনিধি ও ‘সহরক্ষী’ মতেই নামক ছিলেন। অনেক সময়, বিশেষত রাজা বৃদ্ধ হইলে, যুবরাজ শাসন বিষয়ে পিতাকে সাহায্য করিতেন। পালগণের লিপিতে ও রামচরিতে যুবরাজগণের উল্লেখ আছে।

২। রাজস্ব বিভাগ—বিভিন্ন প্রকার রাজস্ব আদায়ের জন্য বিভিন্ন শ্রেণীর কর্মচারী নির্দিষ্ট ছিল। উৎপন্ন শস্যের উপর নানাবিধ কর নির্দিষ্ট ছিল, যথা, ভাগ, ভোগ, কব, হিব্যা, উপরিকর প্রভৃতি,--এবং সম্ভবত গ্রামপতি ও বিষয়-পতিরাই ইহা সংগ্রহ করিতেন। ‘ষষ্ঠাধিকৃত’ নামে একজন কর্মচারীর উল্লেখ আছে। মনুস্মৃতি অনুসারে কতকগুলি দ্রব্যের ষষ্ঠভাগ রাজার প্রাপ্য ছিল, সম্ভবত উক্ত কর্মচারী এই কর আদায় করিতেন। ‘চৌরোদ্ধরণিক’, ‘শৌক্ষিক’, ‘দাশাপরাশিক’ ও ‘তরিক’ নামক কর্মচারীরা সম্ভবত যথাক্রমে, সম্ভবত বস্ত্রের ভয় হইতে রক্ষার জন্য দ্রব্যের, বাণিজ্যদ্রব্যের শুদ্ধ, চৌধারী আদায়ের নিমিত্ত অর্গদণ্ড এবং খেয়াঘাটের মাগুল আদায় করিতেন।

৩। ‘মহাক্ষপটলিক’ ও ‘জোষ্ঠকায়স্থ’ সম্ভবত হিসাব ও দলিল বিভাগ পর্য্যবেক্ষণ করিতেন।

৪। ‘ক্ষেত্রপ’ ও ‘প্রমাতৃ’ সম্ভবত জমির জরীপ বিভাগের অধাক্ষ ছিলেন।

৫। ‘মহাদণ্ডনায়ক’ অথবা ‘ধর্ম্মাধিকার’ বিচার বিভাগের কর্তা ছিলেন।

৬। ‘মহাপ্রতীহার’, ‘দাণ্ডিক’, ‘দাণ্ডপাশিক’ ও ‘দণ্ডশক্তি’ সম্ভবত পুলিশ বিভাগের প্রধান কর্মচারী ছিলেন।

৭। সৈনিক বিভাগ—এই বিভাগের অধ্যক্ষের উপাধি ছিল সেনাপতি অথবা মহাসেনাপতি। পদাতিক, অশ্বরোহী, হস্তী, উষ্ট্র, ও রণতরী—

সৈন্যদলের এই কয়টি প্রধান বিভাগ ছিল। ইহার প্রত্যেকের জ্ঞাত একজন স্বতন্ত্র অধ্যক্ষ ছিল। এতদ্ব্যতীত ‘কোটপাল’ (দুর্গরক্ষক), ‘প্রাস্তপাল’ (রাজ্যের সীমান্তরক্ষক) প্রভৃতি নামও পাওয়া যায়।

বাংলাদেশে, বিশেষত দক্ষিণ ও পূর্ববঙ্গে, রণতরী যুদ্ধসজ্জার একটি প্রধান উপকরণ ছিল। বহু প্রাচীনকাল হইতেই বাংলার নৌবাহিনী প্রসিদ্ধিলাভ করিয়াছিল। কালিদাস রঘুবংশে ইহার উল্লেখ করিয়াছেন। বাংলার প্রাচীন লিপিতেও তরীর উল্লেখ আছে। কুমারপাল ও বিজয়সেনের রাজত্বে যে নৌযুদ্ধ হইয়াছিল তাহা পূর্বেই উল্লিখিত হইয়াছে। বাংলার সামরিক হস্তীর প্রসিদ্ধিও প্রাচীনকাল হইতে প্রচলিত। ভারতের পূর্ব প্রান্তে বহু হস্তী পাওয়া যাইত এবং এখনও যায়। কিন্তু বাংলায় উৎকৃষ্ট অশ্বের অভাব ছিল। পালরাজগণ সুদূর কাশ্মীর হইতে যুদ্ধের অশ্ব সংগ্রহ করিতেন। ভারতের এই প্রদেশ চিরকালই অশ্বের জ্ঞাত প্রসিদ্ধ। পালরাজগণের একখানি মাত্র তাম্রশাসনে রথের উল্লেখ আছে। কিন্তু এই যুগের যুদ্ধে রথের খুব ব্যবহার হইত না।

পালরাজগণের তাম্রশাসনে অমাত্যগণের তালিকার শেষে “গোড়-মালব-খশ-জ্ঞ-কুলিক-কর্ণাট-লাট” প্রভৃতি জাতির উল্লেখ আছে। খুব সম্ভবত ভারতের এই সমুদয় জাতি হইতে পালরাজগণ সৈন্য সংগ্রহ করিতেন এবং বর্তমানকালের মারহাট্টা, বেলুচি, গুর্খা রেজিমেন্টের স্থায়ী এই সমুদয় ভিন্ন ভিন্ন জাতীয় সৈন্যদ্বারা বিভিন্ন সৈন্যদল গঠিত হইত।

### ৪। সেনরাজ্য ও অন্যান্য খণ্ডরাজ্য

পালরাজ্যে যে শাসন পদ্ধতি প্রচলিত হইয়াছিল তাহা মোটামুটিভাবে সেন, কাশ্মীর, চন্দ্র ও বর্ম্মবংশীয় রাজগণ গ্রহণ করিয়াছিলেন। অবশ্য কোন কোন বিষয়ে কিছু কিছু পরিবর্তন ঘটিয়াছিল।

ভুক্তি, মণ্ডল ও বিষয় ব্যতীত পাটক, চতুরক, আবাস্তি প্রভৃতি কয়েকটি নূতন শাসনকেন্দ্রের উল্লেখ পাওয়া যায়। সেনরাজ্যে পুণ্ড্রবর্ধন ভুক্তির সীমা অনেক বাড়িয়াছিল। বর্তমানকালের রাজসাহী, ঢাকা ও প্রেসিডেন্সী বিভাগ এবং সম্ভবত চট্টগ্রাম বিভাগেরও কতক অংশ এই ভুক্তির অন্তর্ভুক্ত ছিল। অর্থাৎ ইহা উত্তরে হিমালয় হইতে দক্ষিণে সমুদ্র এবং পশ্চিমে ভাগীরথী হইতে মেঘনা অথবা তাহার পূর্বভাগের প্রদেশ পর্য্যন্ত বিস্তৃত হইয়াছিল। অপর

দ্রষ্টব্য বর্ধমান ভুক্তির সীমা কুমাইয়া ইহার উত্তর অংশে কঙ্কগ্রাম নামে নূতন একটি ভুক্তি প্রতিষ্ঠিত হইয়াছিল।

সেনবংশীয় লক্ষ্মণসেন ও তাঁহার পুত্রগণ পরমেশ্বর পরমভট্টারক মহারাজাধিরাজ ব্যতীত ‘অস্থপতি, গজপতি, নরপতি, রাজত্ৰয়াধিপতি’ প্রভৃতি নূতন পদবী গ্রহণ করিয়াছিলেন। তাঁহাদের অনুকরণে দেববংশীয় দশরথদেবও এই সমুদয় উপাধি ব্যবহার করিতেন।

পালরাজগণের ন্যায় সেনরাজগণের তাম্রশাসনেও সামন্ত, অমাত্য প্রভৃতির সুদীর্ঘ তালিকা পাওয়া যায়। কিন্তু ইহার মধ্যে কিছু কিছু নূতনও আছে। সেনরাজগণের তালিকায় রাণীর নাম আছে কিন্তু পালরাজগণের একখানি তাম্রশাসনেও এই সুদীর্ঘ তালিকায় রাণীর নাম পাওয়া যায় না। চন্দ্র, বর্ষ ও কাশ্বোজ রাজগণের তাম্রশাসনোক্ত তালিকায়ও রাণীর নাম পাওয়া যায়। এই যুগে রাজ্যশাসন বিষয়ে রাণীর কোন বিশেষ ক্ষমতা ছিল, অথবা বাংলার বাহির হইতে আগত এই সমুদয় রাজবংশের আদিম বাসস্থানে রাণীর বিশেষ কোন অধিকার ছিল বলিয়াই তাঁহারা বাংলায় এই নূতন প্রথার প্রবর্তন করিয়াছিলেন, তাহা বলা কঠিন। কাশ্বোজ, বর্ষ ও সেনরাজবংশের তাম্রশাসনে পুরোহিতের নাম পাওয়া যায়। সেনরাজগণের শেষযুগে পুরোহিতের স্থানে মহাপুরোহিতের উল্লেখ আছে। ব্রাহ্মণ্য-ধর্মাবলম্বী এই তিন রাজবংশের রাজ্যকালে হিন্দুধর্ম ও সমাজের সহিত রাজশক্তির সম্বন্ধ যে পূর্বাপেক্ষা ঘনিষ্ঠ হইয়াছিল ইহা তাহারই প্রমাণ স্বরূপ গ্রহণ করা যাইতে পারে।

‘মহামুদ্রাধিকৃত’ ও ‘মহাসর্বাধিকৃত’ নামে দুইজন নূতন উচ্চপদস্থ অমাত্যের নাম পাওয়া যায়। এই শেষোক্ত নাম হইতেই বাংলার ‘সর্বাধিকারী’ পদবীর উদ্ভব হইয়াছে বলিয়া বোধ হয়। এইরূপ বিচার বিভাগে ‘মহাধ্যক্ষ’, রাজস্ব বিভাগে ‘হট্টপতি’ এবং সৈন্য বিভাগে ‘মহাপীলুপতি’, ‘মহাগণস্থ’ এবং ‘মহাবাহুপতি’ প্রভৃতি আরও কয়েকটি নূতন নাম পাই।

কাশ্বোজরাজ নয়পালের তাম্রশাসনে যেভাবে অমাত্যগণের উল্লেখ আছে তাহা বিশেষ প্রণিধানযোগ্য। এই তালিকায় আছে “করণসহ অধ্যক্ষবর্গ; সৈনিক-সজ্জ-মুখ্যসহ সেনাপতি; গুপ্তপুরুষসহ দূত; এবং মন্ত্রপাল”। “করণসহ অধ্যক্ষবর্গ” এই সমষ্টিসূচক শব্দ হইতে প্রমাণিত হয় যে একজন অধ্যক্ষ কয়েকজন করণ অর্থাৎ কেরাণীর সহযোগে এক বিভাগ তদন্ত করিতেন, এবং এইরূপ কতকগুলি অধ্যক্ষের মধ্যে দেশের সমুদয় আভ্যন্তরিক শাসনের কার্য বিভক্ত হইত। সৈন্য বিভাগেও বিভিন্ন শ্রেণীর সৈন্যদলের সজ্জ ছিল এবং

তাহাদের অধিনায়কদের সহযোগে সেনাপতি এই বিভাগের কার্য নিৰ্বাহ করিতেন। পররাষ্ট্র বিভাগ স্বতন্ত্র ছিল এবং ‘দূত’ ‘গুপ্তপুরুষ’ ( গুপ্তচর ) গণের সহায়তায় ইহার কার্যনিৰ্বাহ করিতেন। সর্বোপরি ছিলেন ‘মন্ত্রপাল’ অর্থাৎ মন্ত্রীগণ। কোটিলোর অর্থশাস্ত্রে যে শাসন পদ্ধতির বর্ণনা আছে ইহার সহিত তাহার খুবই সাদৃশ্য লক্ষিত হয়। চন্দ্র, বর্ষ ও সেনরাজগণের তাম্রশাসনে অমাত্যের যে সুদীর্ঘ তালিকা আছে তাহার শেষে “এবং অধ্যক্ষ-প্রচারোক্ত অগ্ন্যাগ্ন কৰ্মচারীগণ” এই উক্তি দেখিতে পাওয়া যায়। অর্থশাস্ত্রের যে অধ্যায়ে শাসন পদ্ধতির বিবরণ আছে তাহার নাম ‘অধ্যক্ষপ্রচার’। এই সমুদয় কারণে এরূপ অনুমান করা অসঙ্গত হইবে না যে কোটিলোর অর্থশাস্ত্রে যে শাসনপদ্ধতি বর্ণিত আছে তাহার অনুকরণেই বাংলার শাসন পদ্ধতি গড়িয়া উঠিয়াছিল।

বাংলার শাসনপদ্ধতি সম্বন্ধে যাহা বলা হইল তাহা অতিশয় সামান্য এবং ইহা হইতে এ সম্বন্ধে স্পষ্ট বা সঠিক কোন ধারণা করা কঠিন। কিন্তু আপাতত ইহার বেশী জানিবার উপায় নাই। তবে যেটুকু জানা গিয়াছে তাহা হইতেই এরূপ সিদ্ধান্ত করা যায় যে বাংলায় পঞ্চম ও ষষ্ঠ শতাব্দী বা তাহার পূর্ব হইতেই ধীরে ধীরে একটি বিধিবদ্ধ শাসন প্রণালী গড়িয়া উঠিয়াছিল এবং পাল ও সেন যুগে তাহা দৃঢ়ভাবে প্রতিষ্ঠিত হইয়াছিল। ইহা ভারতের অন্যান্য প্রদেশের শাসনপদ্ধতির অনুরূপ ছিল বলিয়াই মনে হয়। অন্তত বাংলাদেশ যে এই বিষয়ে কম অগ্রসর হইয়াছিল এরূপ মনে করিবার কোন-সঙ্গত কারণ নাই।

## ষোড়শ পরিচ্ছেদ

### ভাষা ও সাহিত্য

#### ১। বাংলা ভাষার উৎপত্তি

সর্বপ্রাচীন যুগে আৰ্য্যগণ যে ভাষা ব্যবহার করিতেন, এবং যে ভাষায় বৈদিক গ্রন্থাদি লিখিত হইয়াছিল, কাল প্রভাবে তাহার অনেক পরিবর্তন হয়, এবং এই পরিবর্তনের ফলেই প্রাচীন ও বর্তমান কালে প্রচলিত বহু ভাষার উদ্ভব হইয়াছে। এই ভাষা বিবর্তনের সুদীর্ঘ ইতিহাস বর্ণনা করা এই গ্রন্থে

সম্ভবপর নহে। তবে নিম্নলিখিত তিনটি শ্রেণী বিভাগ হইতে এসম্বন্ধে কতক ধারণা করা যাইবে।

- ১। প্রাচীন সংস্কৃত — স্বর্গদেবের সময় হইতে ৬০০ খৃঃ পূঃ পর্য্যন্ত
- ২। পালি-প্রাকৃত-অপভ্রংশ — ৬০০ খৃঃ পূঃ—১০০০ খৃষ্টাব্দ
- ৩। অপভ্রংশ হইতে বাংলা ও

অগ্ন্যগ্নি দেশীয় ভাষার উৎপত্তি—১০০০ খৃষ্টাব্দ হইতে

আর্য্যগণ বাংলায় আসিবার পূর্ব্বে বাংলার অধিবাসীগণ যে ভাষার ব্যবহার করিতেন তাহার কোন নিদর্শন বর্তমান নাই। তবে ইহার কোন কোন শব্দ বা রচনা পদ্ধতি যে সংস্কৃত ও বর্তমান বাংলায় আত্মগোপন করিয়া আছে তাহা খুবই সম্ভব, এবং ইহার কিছু কিছু চিহ্নও পণ্ডিতগণ আবিষ্কার করিয়াছেন। ভাষাতত্ত্বের দিক দিয়া ইহার মূল্য খুব বেশী হইলেও বর্তমান প্রসঙ্গে এই আলোচনা নিম্প্রয়োজন। বতদূর প্রমাণ পাওয়া যায় তাহাতে অনুমিত হয় যে আর্য্যগণের সম্পর্শে ও প্রভাবে বাংলার প্রাচীন অধিবাসীগণ নিজেদের ভাষা ত্যাগ করিয়া সম্পূর্ণভাবে আর্য্যভাষা গ্রহণ করেন। উপরে যৈ শ্রেণীভাগ করা হইয়াছে তাহা হইতে দেখা যাইবে যে, যে যুগে আর্য্যগণ এদেশে বসবাস করিতে আরম্ভ করেন তখন প্রাচীন সংস্কৃত হইতে প্রথমে পালি, পরে প্রাকৃত, ও সর্ব্বশেষে অপভ্রংশ, এই তিন ভাষার উৎপত্তি হয়। বাংলা দেশেও এই সমুদয় ভাষা প্রচলিত ছিল, কিন্তু ইহাতে কোন সাহিত্য রচিত হইয়া থাকিলেও তাহার বিশেষ কোন নিদর্শন বর্তমান নাই। অপভ্রংশ হইতে বাংলা ও ভূতি দেশীয় ভাষার উৎপত্তি হইয়াছে। বাংলার যে সর্ব্বপ্রাচীন দেশীয় ভাষার নমুনা পাওয়া গিয়াছে তাহা দশম শতাব্দীর পূর্ব্বেকার বলিয়া পণ্ডিতগণ মনে করেন না। এই ভাষা হইতেই কালে বর্তমান বাংলা ভাষার সৃষ্টি হইয়াছে, কিন্তু সে হিন্দু যুগের পরের কথা। এই দেশীয় ভাষায় রচিত যে কয়েকটি পদ পাওয়া গিয়াছে তাহার সংখ্যা বেশী নহে। কিন্তু তাহা ছাড়া হিন্দুযুগে বাঙ্গালীর সাহিত্য প্রধানত সংস্কৃত ভাষায়ই রচিত। সুতরাং প্রথমে বাংলার সংস্কৃত সাহিত্যেরই আলোচনা করিব।

## ২। পালযুগের পূর্ব্বেকার সংস্কৃত সাহিত্য

মহাস্থানগড়ে প্রাপ্ত বাংলার সর্ব্বপ্রাচীন প্রস্তর-লিপি প্রাকৃত ভাষায় লিখিত। ইহাই বাংলায় মৌর্য্যযুগের একমাত্র সাহিত্যিক নিদর্শন। ইহার পাঁচশত বৎসরেরও অধিক পরে কুম্ভনিয়া পর্ব্বতগাত্রে উৎকীর্ণ রাজা চন্দ্রবর্ম্মার লিপি ও



গুপ্তযুগের তাম্রশাসনগুলি সংস্কৃত ভাষায় রচিত। ইহা হইতে প্রমাণিত হয় যে চতুর্থ ও পঞ্চম শতাব্দীতে, এবং সম্ভবত তাহার বহু পূর্বেই, এদেশে সংস্কৃত ভাষা ও সাহিত্যের যথেষ্ট চর্চা ছিল, কিন্তু এই যুগের অল্প কোন রচনা এ পর্যন্ত পাওয়া যায় নাই। বাংলা দেশে যে উচ্চ শিক্ষা ও বিদ্যাচর্চার বিশেষ প্রসার ছিল, চীন পরিব্রাজক ফাহিয়ান ( ৫ম শতাব্দী ), ছুয়েন-সাং ও ইং-সিং ( ৭ম শতাব্দী ) তাহার বিশেষ উল্লেখ করিয়াছেন।

এই চর্চার ফলে সপ্তম শতাব্দীতে বাংলার সংস্কৃত সাহিত্য একটি বিশিষ্ট রূপ ধারণ করিয়াছিল। বাণভট্টের একটি প্রসিদ্ধ শ্লোকে উক্ত হইয়াছে যে সং সাহিত্যের যে সমুদয় আদর্শ গুণ তাহার সবগুলি একত্রে কোন দেশেই প্রায় দেখা যায় না, কিন্তু এক এক দেশের সাহিত্যে এক একটি গুণ প্রকটিত হয়; যেমন উত্তর দেশীয় সাহিত্যে ‘শ্লেষ’, পাশ্চাত্যে ‘অর্থ’, দক্ষিণে ‘উৎপ্রেক্ষা’ এবং গোড়দেশে ‘অক্ষর-ডম্বর’। কেহ কেহ এই শ্লোক হইতে সিদ্ধান্ত করিয়াছেন যে গোড়দেশের রাজা শশাঙ্কের আয় গোড়দেশীয় সাহিত্যকেও বাণভট্ট বিদ্বেষের চক্ষে দেখিতেন এবং এই শ্লোকে তাহার নিন্দাই করিয়াছেন। কিন্তু এই অনুমান সঙ্গত বলিয়া মনে হয় না। শব্দ-বিজ্ঞাস সং সাহিত্যের অস্তুতম গুণ, এবং গোড়ীয় সাহিত্যে যে শ্লেষ, অর্থ ও উৎপ্রেক্ষা অপেক্ষা এই গুণেরই প্রাচুর্য্য ছিল ইহা ব্যক্ত করাই সম্ভবত বাণভট্টের অভিপ্রায় ছিল। ভামহ ও দণ্ডী ( ৭ম ও ৮ম শতাব্দী ) যে ভাবে গোড় মার্গ ও গোড়ী রীতির উল্লেখ করিয়াছেন তাহাও উপরোক্ত অনুমানের সমর্থন করে। তাঁহাদের মতে তখন সংস্কৃত কাব্যে গোড়ী ও বৈদৰ্ভী এই দুইটিই প্রধান রীতি ছিল। ভামহের মতে গোড়ী এবং দণ্ডীর মতে বৈদৰ্ভী ইহাদের মধ্যে শ্রেষ্ঠ।

মোটের উপর একথা নিঃসন্দেহে বলা যায় যে সপ্তম শতাব্দীর পূর্বেই বাঙ্গালীর প্রতিভা সংস্কৃত সাহিত্যে একটি অভিনব রচনারীতির প্রবর্তন করিয়াছিল। এই রচনারীতির কিছু কিছু নিদর্শন ত্রিপুরায় প্রাপ্ত ‘লোকনাথের তাম্রশাসন ও নিধানপুরে প্রাপ্ত ভাস্করবর্ম্মার তাম্রশাসনে পাওয়া যায়। প্রথমটি পড়ে ও দ্বিতীয়টি গড়ে লিখিত। এ যুগে যে অনেক গ্রন্থ রচিত হইয়াছিল সে বিষয়ে কোন সন্দেহ নাই—কিন্তু তাহার অধিকাংশই বিলুপ্ত হইয়াছে। যাহা আছে তাহাও গোড়ীয় সাহিত্যের অন্তর্ভুক্ত বলিয়া নিঃসন্দেহে গ্রহণ করার কোন উপায় নাই।

এই যুগের দুই একখানি গ্রন্থ বাঙ্গালীর রচিত বলিয়া কেহ কেহ মত প্রকাশ করিয়াছেন। তাহার মধ্যে হস্তাযুর্বেদ একখানি। চারি খণ্ডে ও ১৬০

অধ্যায়ে বিভক্ত এই বিশাল গ্রন্থে হস্তীর নানারূপ ব্যাধির আলোচনা করা হইয়াছে। ঋষি পালকাপা চম্পা নগরীতে অঙ্গ দেশের রাজা রোমপাদের নিকট ইহা বিবৃত করেন এবং ব্রহ্মপুত্র নদের তীরে তাঁহার আশ্রম ছিল—উক্ত গ্রন্থে এইরূপ বর্ণিত হইয়াছে। ইহা হইতে অনুমিত হয় যে এই গ্রন্থ বাংলাদেশে লিখিত হইয়াছিল, কিন্তু ইহার রচনা কাল সম্বন্ধে পণ্ডিতগণ একমত নহেন। ৩৭২ খ্রিস্টাব্দে শাস্ত্রী ইহার তারিখ খৃষ্টপূর্ব পঞ্চম বা ষষ্ঠ শতাব্দীতে নির্দেশ করিয়াছেন। কিন্তু ইহার সমর্থক কোন প্রমাণ নাই। অমরকোষ ও অগ্নি-পুরাণে এই গ্রন্থের উল্লেখ আছে এবং কালিদাসের রঘুবংশে সম্ভবত ইহার ইঙ্গিত করা হইয়াছে। ইহা সত্য হইলে হস্তাযুর্বেদ গ্রন্থ অন্তত কালিদাসের পূর্ববর্তী বলিয়া স্বীকার করিতে হয়। গ্রন্থ প্রণেতা ঋষি পালকাপা সম্ভবত কাল্পনিক নাম। এক হস্তিনীর গর্ভে তাঁহার জন্ম হইয়াছিল বলিয়া কথিত হইয়াছে।

চান্দ্র ব্যাকরণ একখানি প্রসিদ্ধ গ্রন্থ। ইহার প্রণেতা চন্দ্রগোমিন্ সম্ভবত বাঙ্গালী ছিলেন। ইনি পঞ্চম অথবা ষষ্ঠ শতাব্দীতে জীবিত ছিলেন, এবং পাণিনির সূত্রগুলি নূতন প্রণালীতে বিভক্ত করিয়া যে ব্যাকরণগ্রন্থ ও তাহার ব্যক্তি রচনা করেন তাহা সমগ্র ভারতবর্ষে বিশেষ খ্যাতি লাভ করিয়াছিল। কাশ্মীর, নেপাল, তিব্বত ও সিংহল দ্বীপে ইহার পঠন পাঠন বিশেষভাবে প্রচলিত ছিল। চন্দ্রগোমিন্ বৌদ্ধ ছিলেন। তিব্বতীয় কিংবদন্তী অনুসারে ‘অ্যাসিন্দালোক’ নামক দার্শনিক গ্রন্থ এবং ৩৬ খানি তন্ত্রশাস্ত্রের রচয়িতা চন্দ্রগোমিন্ ও উল্লিখিত বৈয়াকরণিক চন্দ্রগোমিন্ একই ব্যক্তি ; তিনি বরেন্দ্রভূমিতে এক ক্ষত্রিয় বংশে জন্মগ্রহণ করেন, তথা হইতে নিকরাসিত হইয়া চন্দ্রদ্বীপে বাস করেন এবং পরে নালন্দায় স্থিরমতির শিষ্য হইয়া গ্রহণ করেন। ইহার সম্বন্ধে তিব্বতে যে সমুদয় আখ্যান প্রচলিত আছে একবিংশ অধ্যায়ে তাহা বিবৃত হইবে। চন্দ্রগোমিন্ উপরোক্ত গ্রন্থগুলি ব্যতীত তাহা ও মঞ্জুশ্রীর স্তোত্র, ‘লোকানন্দ’ নাটক ও ‘শিষ্য-লেখ-ধর্ম্ম’ নামক একখানি কাব্যগ্রন্থ রচনা করেন বলিয়া প্রসিদ্ধি আছে। লোকানন্দ নাটকের তিব্বতীয় অনুবাদ মাত্র পাওয়া গিয়াছে। কিন্তু শিষ্য-লেখ-ধর্ম্মের মূল ও অনুবাদ উভয়ই বর্তমান।

প্রসিদ্ধ দার্শনিক গোড়পাদ সম্ভবত বাঙ্গালী ছিলেন—কারণ তিনি গোড়াচার্য্য নামে অভিহিত হইয়াছেন। প্রচলিত প্রবাদ অনুসারে ইনি শঙ্করাচার্য্যের পরমগুরু অর্থাৎ গুরুর গুরু ছিলেন। ইহার রচিত আগম-শাস্ত্র ‘গোড়পাদকারিকা’ নামে পরিচিত। ইহার দার্শনিক তথ্য শঙ্করের পূর্বে প্রচলিত বেদান্ত মতবাদ ও মাধ্যমিক শূন্যবাদের সমন্বয় ; ইহার কোন কোন

অংশে বৌদ্ধ প্রভাব লক্ষিত হয়। গোড়পাদ এতদ্ব্যতীত ঈশ্বরকৃষ্ণ রচিত সাংখ্যাকারিকার টীকা করেন; মাঠরবৃত্তির সহিত ইহার অনেক সাদৃশ্য আছে।

চন্দ্রগোমিন্ ও গোড়পাদ ব্যতীত এই যুগের আর কোন বাঙ্গালী গ্রন্থকারের নাম এ পর্য্যন্ত পাওয়া যায় নাই। কিন্তু এ যুগে যে বাংলায় বহু সংস্কৃত কবি ও পণ্ডিত জন্মিয়াছিলেন এবং তাঁহাদের গ্রন্থ ভারতবর্ষের সর্বত্র প্রসিদ্ধি লাভ করিয়াছিল বাণভট্ট, ভামহ ও দণ্ডী এবং চীন দেশীয় পরিব্রাজকগণের লেখা হইতে তাহা আমরা নিঃসন্দেহে জানিতে পারি।

### ৩। পাল যুগে সংস্কৃত সাহিত্য

পালরাজগণের বহুসংখ্যক তাত্ত্বশাসনে যে সমুদয় সংস্কৃত শ্লোক আছে তাহা হইতে প্রমাণিত হয় যে এই যুগে বাংলায় সংস্কৃত কাব্য চর্চা ও কাব্য রচনা আরও প্রসার লাভ করিয়াছিল। সংস্কৃত সাহিত্যের অগ্রাগ্র বিভাগেও যে এইযুগে বাঙ্গালীরা পারদর্শিতা লাভ করিয়াছিলেন এই সমুদয় তাত্ত্বশাসনে তাহারও প্রকৃষ্ট প্রমাণ আছে। নারায়ণ পালের মন্ত্রী গুরব-মিশ্র তাঁহার পূর্বপুরুষগণের প্রশস্তিতে লিখিয়াছেন যে দেবপালের মন্ত্রী দর্ভপাণি চতুর্বেদে বুৎপন্ন ছিলেন ও কেশর মিশ্র চতুর্বিজ্ঞাপয়োধি পান করিয়াছিলেন। তিনি নিজে বেদ, আগম, নীতি ও জ্যোতিষশাস্ত্রে পারদর্শিতা ও বেদের ব্যাখ্যা দ্বারা প্রসিদ্ধিলাভ করিয়াছিলেন। এইরূপে পালযুগের অগ্রাগ্র তাত্ত্বশাসনে ভিন্ন ভিন্ন ব্যক্তির বৈদিক সাহিত্য, মীমাংসা, ব্যাকরণ, তর্ক, বেদান্ত ও প্রমাণশাস্ত্রে পাণ্ডিত্যের কথা লিপিবদ্ধ হইয়াছে। চতুর্ভূজ তাঁহার হরিচরিত কাব্যে লিখিয়াছেন যে বারেন্দ্র ব্রাহ্মণগণ শ্রুতি, স্মৃতি, পুরাণ, ব্যাকরণ ও কাব্যে বিচক্ষণ ছিলেন। হরিবর্ষদেবের মন্ত্রী ভট্ট ভবদেবের কথা পূর্বেই উল্লিখিত হইয়াছে। প্রশস্তিকার লিখিয়াছেন যে তিনি দর্শন, মীমাংসা, অর্থশাস্ত্র, ধর্মশাস্ত্র, আয়ুর্বেদ, অস্ত্রবেদ, সিদ্ধান্ত, তন্ত্র এবং গণিতে পারদর্শী ছিলেন এবং হোরাশাস্ত্রে গ্রন্থ লিখিয়া ‘দ্বিতীয় বরাহ’ উপাধি প্রাপ্ত হইয়াছিলেন। বিভিন্ন তাত্ত্বশাসনে ভূমিদান-গ্রহণকারী ব্রাহ্মণগণের যে পরিচয় আছে তাহা হইতে তাঁহাদের বেদের বিভিন্ন শাখায় পাণ্ডিত্য ও বৈদিক ক্রিয়াকলাপে প্রচুর জ্ঞানের পরিচয় পাওয়া যায়।

সুতরাং বাংলায় যে সংস্কৃত সাহিত্যের চর্চা বহুল পরিমাণে ছিল তাহাতে সন্দেহ নাই। হুংখের বিষয় বৌদ্ধ তাত্ত্বিক গ্রন্থ ব্যতীত এই যুগে বাঙ্গালীর

রচিত গ্রন্থ যাহা পাওয়া গিয়াছে তাহা এইরূপ বহু শতাব্দী ব্যাপী বিস্তৃত চর্চার নিদর্শন হিসাবে নিতান্তই সামান্য ও অকিঞ্চিৎকর।

মুদ্রারাক্ষস প্রণেতা নাট্যকার বিশাখদত্ত, অনর্থরাঘবের কবি মুরারি, চণ্ডকৌশিক নাটকের গ্রন্থকার ক্ষেমীশ্বর, কীচকবধ কাব্য প্রণেতা নীতিবন্দ্য এবং নৈষধ-চরিত রচয়িতা ত্রীহর্ষ—এই সকল প্রসিদ্ধ লেখক বাঙ্গালী ছিলেন বলিয়া কেহ কেহ মত প্রকাশ করিয়াছেন। কিন্তু উপযুক্ত প্রমাণের অভাবে ইহাদের কাহাকেও বাঙ্গালার সম্ভান বলিয়া নিঃসন্দেহে গ্রহণ করা যায় না।

অভিনন্দ নামে একজন বাঙ্গালী কবির সম্ভান পাওয়া যায়। শার্ঙ্গধর-পদ্ধতিতে ইহাকে গোড় অভিনন্দ বলা হইয়াছে, সুতরাং ইনি যে বাঙ্গালী ছিলেন সে বিষয়ে সন্দেহ নাই। অভিনন্দের রচনা বলিয়া যে সমুদয় শ্লোক বিভিন্ন প্রসিদ্ধ পণ্ড সংগ্রহ গ্রন্থে উদ্ধৃত হইয়াছে, সম্ভবত সে সমুদয় তাঁহারই রচনা। কেহ কেহ মনে করেন যে ইনিই কাদম্বরী-কথা-সার নামক কাব্যগ্রন্থের প্রণেতা। অভিনন্দ সম্ভবত নবম শতাব্দীতে জীবিত ছিলেন।

পালযুগের একখানি মাত্র কাব্যগ্রন্থ এ পর্য্যন্ত আবিষ্কৃত হইয়াছে। ইহা সন্ধ্যাকরনন্দী প্রণীত ‘রামচরিত’ কাব্য। ইহার রচনা প্রণালী, ঐতিহাসিক মূল্য ও আখ্যানভাগ রামপালের ইতিহাস প্রসঙ্গে সংক্ষেপে আলোচিত হইয়াছে। এই দুইগ্রন্থ শ্লেষাত্মক কাব্যের প্রতি শ্লোক এমন সুকৌশলে রচিত হইয়াছে যে পৃথক পৃথক ভাবে পদবিগ্রাস ও শব্দযোজনা করিলে ইহা একদিকে রামায়ণের রামচন্দ্রের ও অপরদিকে পালসম্রাট রামপালের পক্ষে প্রযোজ্য হইবে। এই গ্রন্থের উপসংহারে একটি কবিপ্রশস্তি আছে। তাহা হইতে জানা যায় যে সন্ধ্যাকরনন্দী বরেন্দ্রে পুণ্ড্রবর্ধনের নিকট বাস করিতেন। তাঁহার পিতা প্রজাপাতনন্দী রামপালের সাক্ষিবিগ্রহিক ছিলেন। মদনপালের রাজত্ব-কালে এই কাব্য রচিত হয়। দ্ব্যর্থবোধক শ্লোকের দ্বারা ঐতিহাসিক আখ্যান বর্ণনা হেতু এই কাব্যে কবিত্বশক্তি সর্বত্র পরিস্ফুট হইবার সুযোগ পায় নাই। কিন্তু বরেন্দ্র ও রামাবতী নগরীর বর্ণনা ও ভীমের সহিত যুদ্ধের বিবরণ প্রভৃতি সাহিত্যের দিক দিয়াও উপভোগ্য। উচ্চাঙ্গের কবিত্ব না থাকিলেও ‘রামচরিত’ বাঙ্গালীর সংস্কৃত কাব্যে নির্ভা ও নৈপুণ্যের পরিচয় হিসাবে চিরদিনই সমাদৃত হইবে।

দর্শন শাস্ত্রে আমরা এই যুগের মাত্র একজন প্রসিদ্ধ বাঙ্গালী লেখকের নাম জানি। ইনি বিখ্যাত শ্রায়কন্দলী প্রণেতা ত্রীধরভট্ট। ইহার পিতার নাম বলদেব, মাতার নাম অম্বোকা, এবং জন্মভূমি দক্ষিণ রাঢ়ের অন্তর্গত

ভূরিশ্রেষ্ঠি (বর্ধমানের নিকটবর্তী ভূরশুট গ্রাম)। প্রশস্তপাদ বৈশেষিক সূত্রের যে ‘পদার্থ-ধর্ম সংগ্রহ’ নামক ভাষ্য রচনা করেন শ্রীধরভট্ট তাহার শ্রায়-কন্দলী টীকা দ্বারা শ্রায়-বৈশেষিক মতের উপর আস্তিক্যবাদ প্রতিষ্ঠা করিয়া প্রসিদ্ধি লাভ করিয়াছেন। শ্রীধর ‘অদ্বয়-সিদ্ধি’, ‘তত্ত্বসংবাদিনী’, ‘তত্ত্বপ্রবোধ’ এবং ‘সংগ্রহটীকা’ প্রভৃতি বেদান্ত ও মীমাংসা বিষয়ক কয়েকখানি গ্রন্থ রচনা করেন—কিন্তু ইহার একখানিও পাওয়া যায় নাই। শ্রায়কন্দলীর রচনা-কাল ৯১০ (অথবা ৯১০) শকাব্দ (৯৯১ অথবা ৯৮৮ অব্দ)।

জিনেন্দ্রবুদ্ধি, মৈত্রেয়রক্ষিত এবং বিমলমতি প্রভৃতি এই যুগের কয়েকজন বিখ্যাত বৈয়াকরণিক এবং অমরকোষের টীকাকার সুভূতিচন্দ্রকে কেহ কেহ বাঙ্গালী বলিয়া গ্রহণ করিয়াছেন—কিন্তু ইহার সমর্থক সন্তোষজনক প্রমাণ এখনও কিছু পাওয়া যায় নাই।

বৈয়াকরণ শাস্ত্রে কয়েকজন বাঙ্গালী গ্রন্থকার প্রসিদ্ধি লাভ করিয়াছেন। সুবিখ্যাত ‘রূপবিনিস্চয়’ অথবা ‘নিদান’ গ্রন্থের প্রণেতা মাধব বাঙ্গালী ছিলেন কিনা সন্দেহের বিষয়। কিন্তু চরক ও সুশ্রুতের প্রসিদ্ধ টীকাকার চক্রপাণিদত্ত যে বাঙ্গালী ছিলেন সে বিষয়ে সন্দেহ নাই। তাঁহার ‘চিকিৎসা সংগ্রহ’ গ্রন্থে তিনি নিজের যে সংক্ষিপ্ত পরিচয় দিয়াছেন তাহা হইতে জানা যায় যে তিনি লোপ্রবংশীয় কুলীন ছিলেন; তাঁহার পিতা নারায়ণ গোঁড়াধিপের পাত্র ও রসবত্যাধিকারী (অর্থাৎ রত্ননশালার অধ্যক্ষ), এবং তাঁহার ভ্রাতা ভানু একজন বিচক্ষণ চিকিৎসক ছিলেন। ষোড়শ শতাব্দীতে শিবদাসসেন যশোধর এই গ্রন্থের টীকায় লিখিয়াছেন যে উক্ত গোঁড়াধিপ নয়পাল। ইহা সত্য হইলে চক্রপাণিদত্ত একাদশ শতাব্দীর মধ্যভাগে জীবিত ছিলেন এরূপ অনুমান করা যাইতে পারে। তিনি ‘চিকিৎসা সংগ্রহ’ এবং ‘আয়ুর্বেদ দীপিকা’ নামক চরকের ও ‘ভানুমতী’ নামক সুশ্রুতের টীকা ব্যতীত ‘শব্দচন্দ্রিকা’ ও ‘দ্রব্যগুণ সংগ্রহ’ নামক আরো দুইখানি গ্রন্থ রচনা করেন।

সুরেশ্বর অথবা সুরপাল নামে আর একজন বাঙ্গালী বৈয়াকরণ গ্রন্থকার দ্বাদশ শতাব্দে প্রাদুর্ভূত হইয়াছিলেন। ইহার পিতামহ দেবগণ রাজা গোবিন্দচন্দ্রের এবং পিতা ভদ্রেশ্বর রামপালের সভায় রাজবৈয়াকরণ ছিলেন। তিনি নিজে রাজা ভীমপালের বৈয়াকরণ ছিলেন। সুরেশ্বর আয়ুর্বেদোক্ত উদ্ভিদের পরিচয় দিবার জন্য ‘শব্দ-প্রদীপ’ ও ‘বৃক্ষায়ুর্বেদ’ নামে দুইখানি এবং ঔষধে লৌহের ব্যবহার সম্বন্ধে ‘লৌহ-পদ্ধতি’ বা ‘লৌহ-সর্বস্ব’ নামে একখানি গ্রন্থ প্রণয়ন করেন।

‘চিকিৎসা-সার-সংগ্রহে’র গ্রন্থকার বঙ্গসেন সম্ভবত বাঙ্গালী ছিলেন, কিন্তু এসম্বন্ধে নিশ্চিত কিছু বলা যায় না।

বাংলায় যে বৈদিক সাহিত্যের চর্চা হইত তাহা পূর্বেই উল্লিখিত হইয়াছে। দশম শতাব্দীতে ‘কুশুম্ভজলি’ প্রণেতা উদয়ন (কেহ কেহ ইহাকে বাঙ্গালী বলেন) লিখিয়াছেন যে বাংলার মৌমাংসকগণ বেদের প্রকৃত মর্মে অনভিজ্ঞ। ত্রয়োদশ শতাব্দীতে গঙ্গেশ উপাধ্যায়ও ইহার পুনরুজ্জীবিত করিয়াছেন। মৌমাংসা শাস্ত্রে বিশেষ ব্যুৎপত্তির অভাব সূচিত করিলেও ইহা হইতে প্রমাণিত হয় যে বাংলায় এই বিষয়ে চর্চা ও গ্রন্থ রচিত হইত। অনিরুদ্ধভট্ট ও ভবদেবভট্ট উভয়েই কুমারিলের গ্রন্থে ব্যুৎপন্ন ছিলেন। কিন্তু ভবদেব প্রণীত ‘ভৌতাত্ত্বিক-মত-তিলক’ গ্রন্থে বাঙ্গালী রচিত আর কোন মৌমাংসা গ্রন্থের সন্ধান পাওয়া যায় নাই। বৈদিক কশ্মাশুষ্ঠান সম্বন্ধে উত্তর রাঢ় নিবাসী নারায়ণ ‘ছান্দোগ্য পরিশিষ্টে’র ‘প্রকাশ’ নামক টীকা রচনা করিয়াছিলেন। নারায়ণ দেবপালের সমসাময়িক ছিলেন। ভবদেবভট্টও ‘ছান্দোগ্য-কশ্মাশুষ্ঠান পদ্ধতি’ লিখিয়াছিলেন। ইহা ‘দশকর্ষ্মপদ্ধতি’, ‘দশকর্ষ্মদীপিকা’ ও ‘সংস্কারপদ্ধতি’ নামেও পরিচিত।

ধর্মশাস্ত্র সম্বন্ধে অনেক বাঙ্গালী গ্রন্থ লিখিয়াছেন। জিতেন্দ্রিয়, বালক এবং যোগ্যোক নামে তিনজন লেখকের বচন ও মত পরবর্তী লেখকগণ বহুস্থানে উল্লেখ করিয়াছেন—কিন্তু ইহাদের মূল গ্রন্থগুলি পাওয়া যায় নাই। ভবদেবভট্ট প্রণীত ‘প্রায়শ্চিত্ত-প্রকরণ’ এবিষয়ে একগায়ে প্রসিদ্ধ গ্রন্থ। ইহা সম্পূর্ণ পাওয়া গিয়াছে। কিন্তু তাহার ‘ব্যবহার তিলক’ গ্রন্থ পাওয়া যায় নাই। আচার সম্বন্ধে ইহাও গ্রন্থও পাওয়া যায় নাই। ভবদেবভট্টের এই সমুদয় গ্রন্থ ভারতের প্রসিদ্ধ স্মার্তগণ শ্রদ্ধার সহিত উল্লেখ করিয়াছেন।

জীমূতবাহন সম্ভবত ভবদেবভট্টের পরবর্তী, কিন্তু তাহার সঠিক কাল নির্ণয় সম্ভব নহে। জীমূতবাহন রাঢ়দেশীয় পারিভজকুলে জন্মগ্রহণ করেন। এই পারিভজকুল রাঢ়ীয় ব্রাহ্মণের ‘পারিহাল’ বা ‘পারি’ গাঁঞির অন্তর্গত। জীমূতবাহন প্রণীত ‘দায়ভাগ’ অনুসারে এখন পর্যন্তও বাংলার উত্তরাধিকার, স্ত্রীধন প্রভৃতি বিধিগুলি পরিচালিত হইতেছে। বাংলার বাহিরে ভারতের সর্বত্র মিতাক্ষরা আইন প্রচলিত। সুতরাং জীমূতবাহনের মত বাঙ্গালীর একটি বৈশিষ্ট্য সূচিত করিতেছে। তৎপ্রণীত ‘ব্যবহার-মাতৃকা’ বিচারপদ্ধতি সম্বন্ধীয় গ্রন্থ। ইহাও বিশেষ প্রসিদ্ধি লাভ করিয়াছে। তাহার তৃতীয় গ্রন্থ ‘কাল বিবেক’। হিন্দুগণের আচরিত বিবিধ অনুষ্ঠানের কাল

নিরূপণ করাই এই গ্রন্থের উদ্দেশ্য। সৌভাগ্যের বিষয় জীমূতবাহনের তিনখানি গ্রন্থই অবিকৃত অবস্থায় পাওয়া গিয়াছে এবং বহুবার মুদ্রিত হইয়াছে।

পালরাজগণ বৌদ্ধ ছিলেন এবং এই সময় ভারতবর্ষে একমাত্র তাঁহাদের রাজ্যেই অর্থাৎ বাংলায় ও বিহারেই বৌদ্ধধর্মের প্রতিষ্ঠা ও প্রতিপত্তি বেশ দৃঢ় ছিল। এইযুগে বৌদ্ধধর্মের প্রকৃতিও অনেক পরিবর্তিত হইয়াছিল এবং মহাযানের পরিবর্তে সহজযান বা সহজিয়া ধর্ম প্রতিপত্তি লাভ করিয়াছিল। সপ্তদশ পরিচ্ছেদে এই বিষয় বিস্তারিত উল্লিখিত হইবে। সহজিয়া বৌদ্ধধর্মের এক বিপুল সাহিত্য আছে। তাহার অধিকাংশই বাঙ্গালীর রচিত। তাঁহারা যে সমুদয় গ্রন্থ লিখিয়াছিলেন তাহার অধিকাংশই বিলুপ্ত হইয়াছে। কিন্তু তিব্বতীয় ভাষায় এই সমুদয় গ্রন্থের যে অনুবাদ হইয়াছিল তাহা অবলম্বন করিয়া আমরা এই বিরাট ধর্মসাহিত্যের স্বরূপ নির্ণয় করিতে পারি। যে সমুদয় গ্রন্থের প্রণেতা বাঙ্গালী ছিলেন বলিয়া তিব্বতীয় সাহিত্যে স্পষ্ট উল্লেখ আছে তাহা ছাড়াও হয়ত আরও অনেক বাঙ্গালী গ্রন্থকার ছিলেন। কিন্তু এ বিষয়ে আর কোন প্রমাণ না পাওয়া পর্য্যন্ত আমরা তাঁহাদিগকে বাঙ্গালী বলিয়া গ্রহণ করিতে পারি না। কিন্তু যেটুকু জানা গিয়াছে তাহা হইতে নিঃসন্দেহে বলা যাইতে পারে যে পালযুগের এই তান্ত্রিক বৌদ্ধসাহিত্য বাঙ্গালীর একটি বিশেষ মূল্যবান সম্পদ বলিয়া গণ্য হইবার যোগ্য। গ্রন্থকারগণের নাম, পরিচয় ও কাল-নির্ণয় লইয়া অনেক গোলমাল ও বিভিন্ন মতবাদ আছে; এখানে তাহার উল্লেখের প্রয়োজন নাই। যে সমুদয় বাঙ্গালীর লেখায় এই তান্ত্রিক সাহিত্য সৃষ্ট ও পরিপুষ্ট হইয়াছিল মোটামুটিভাবে তাঁহাদের নাম ও সংক্ষিপ্ত পরিচয় লিপিবদ্ধ হইল।

পালযুগের পূর্ববর্তী হইলেও এই প্রসঙ্গে সর্বপ্রথম মহাযান লেখক শীলভদ্রের নাম করিতে হয়। তাঁহার মাত্র একখানি গ্রন্থ ('আর্য্য-বুদ্ধ-ভূমি-ব্যাখ্যান') তিব্বতীয় অনুবাদে রক্ষিত হইয়াছে।

শাস্তিদেব নামে দুইজন তান্ত্রিক সাহিত্যের রচয়িতা ছিলেন। আবার ঠিক এই নামধারী একজন মহাযান গ্রন্থের লেখকও আছেন। এই দুই শাস্তিদেব এক কিনা এবং তিনি বাঙ্গালী কিনা নিশ্চিত বলা যায় না। শাস্তি রক্ষিত সম্বন্ধেও এই কথা খাটে। জেতারি নামে দুইজন বাঙ্গালী বৌদ্ধ সাহিত্যিক ছিলেন। প্রাচীন জেতারি বরেন্দ্রে রাজা সনাতনের রাজ্যে বাস করিতেন এবং দীপঙ্কর শ্রীজ্ঞানের গুরু ছিলেন। তৎপ্রণীত তিনখানি গ্রন্থের এবং অপর

ক্বেতারির রচিত ১১ খানি বজ্রযান সাধন গ্রন্থের তিব্বতীয় অনুবাদ মাত্র পাওয়া যায়।

দীপঙ্কর শ্রীজ্ঞান বাংলার একজন শ্রেষ্ঠ ও জগদ্বিখ্যাত পণ্ডিত ছিলেন। তিনি ১৬৮ খানি গ্রন্থের রচয়িতা। এই সমুদয়ের অধিকাংশই বজ্রযান সাধন গ্রন্থ।

জ্ঞানশ্রীমিত্র ‘কার্য্য-কারণ-ভাব-সিদ্ধি’ নামক গ্রন্থে গ্রন্থের প্রণেতা। চতুর্দশ শতাব্দীতে মাধব তাঁহার ‘সর্বদর্শন-সংগ্রহে’ এই গ্রন্থের উল্লেখ করিয়াছেন। ইহার তিব্বতীয় অনুবাদ মাত্র পাওয়া যায়।

অভয়াবর গুপ্ত ২০ খানি বজ্রযান গ্রন্থের লেখক। ইহার মধ্যে মাত্র চারিখানির মূল সংস্কৃত পুঁথি পাওয়া গিয়াছে।

এ পর্য্যন্ত যে সমুদয় গ্রন্থকারের নামোল্লেখ করা হইল ইহারা সকলেই বাংলার বাহিরে বহু খ্যাতি ও কীৰ্ত্তি অর্জন করিয়াছেন এবং ইহাদের সংক্ষিপ্ত জীবনী একবিংশ অধ্যায়ে আলোচিত হইয়াছে।

অত্যাশ্চর্য্য যে সমুদয় বৌদ্ধ গ্রন্থকার তিব্বতীয় কিংবদন্তী অনুসারে বাঙ্গালী ছিলেন তাঁহাদের নাম, রচিত গ্রন্থ ও সংক্ষিপ্ত পরিচয় নিম্নে লিপিবদ্ধ হইল

নাম	গণ্য তিব্বতীয় অনুবাদক	সংক্ষিপ্ত পরিচয়
১। দিবাকরচন্দ্র	হেরুক সাধন ও ২ খানি অনুবাদ	নয়পালের রাজ্যকালে মৈত্রীপার শিষ্য ছিলেন।
২। কুমারচন্দ্র	৩ খানি তান্ত্রিক পঞ্জিকা	বিক্রমপুরী বিহারের প্রধান আচর্য্যক।
৩। কুমারবজ্র	১০ ক সাধন	
৪। দানশঙ্কর	‘পুস্তক পাঠোপায়’ ও ৬০ খানি তান্ত্রিকগ্রন্থের অনুবাদক	জগদল বিহারে ছিলেন।
৫। পুতলি	বোধিচিহ্ন-বায়ু-চরণ-ভাবনোপায়	বঙ্গাল দেশীয় শূদ্র এবং ৮৪ সিদ্ধের অগ্রতম।
৬। নাগবোধি	১৩ খানি তান্ত্রিকগ্রন্থ	বঙ্গালদেশে শিবসেরা নামক স্থানে জন্মগ্রহণ করেন।
৭। প্রজ্ঞাবর্ষণ	তান্ত্রিকগ্রন্থের ২ খানি টীকা ও অনুবাদ।	

এতদ্ব্যতীত তিব্বতীয় গ্রন্থে বাংলার বিভিন্ন বৌদ্ধ বিহারের কয়েকজন প্রসিদ্ধ গ্রন্থকারের উল্লেখ আছে, কিন্তু তাঁহারা বাঙ্গালী ছিলেন কিনা তাহ



সঠিক জানা যায় না। ইহাদের মধ্যে সোমপুর বিহারের বোধিভদ্র এবং জগদ্দল বিহারের মোক্ষাকরগুপ্ত, বিভূতিচন্দ্র এবং শুভাকরের নাম করা যাইতে পারে।

দশম হইতে দ্বাদশ শতাব্দীর মধ্যে বাংলায় বহু বৌদ্ধ সহজিয়া সম্প্রদায়ের উদ্ভব হইয়াছিল ; এ সম্বন্ধে সপ্তদশ অধ্যায়ে বিস্তারিত আলোচনা করা হইবে। এই সম্প্রদায়ের প্রবর্তকগণ সিদ্ধাচার্য্য নামে খ্যাত। এই সমুদয় সিদ্ধাচার্য্যগণ অনেকেই অপভ্রংশ অথবা প্রাচীন বাংলায় তাঁহাদের ধর্ম্মমত প্রচার করিয়াছেন। এই সমুদয় গ্রন্থের তিব্বতীয় অনুবাদ ও কতকগুলির মূল পাওয়া গিয়াছে। এই সিদ্ধাচার্য্যগণের নাম, তারিখ ও বিবরণ সম্বন্ধে বহু মতভেদ আছে ; তাহার সবিস্তার উল্লেখ না করিয়া সংক্ষেপে ইহাদের পরিচয় দিতেছি। ইহাদের দ্রষ্টব্য দোহা অর্থাৎ প্রাচীন বাংলায় রচিত পদ পরে আলোচিত হইবে।

কুকুরপাদ বঙ্গদেশীয় ব্রাহ্মণ ছিলেন। তিব্বতীয় প্রবাদ অনুসারে তিনি ডাকিনী দেশ হইতে মন্ত্রযান ( হেরুকসাধন ) এবং অশ্রাশ্র তন্ত্রমত আনিয়া এদেশে প্রচার করেন। শবরীপাদ বঙ্গালদেশের পাহাড়ে শিকার করিয়া জীবিকা নির্বাহ করিতেন। তিনি ও তাঁহার দুই স্ত্রী, লোকী ও গুণী, নাগার্জ্জুনের নিকট দীক্ষা লাভ করেন।

সিদ্ধাচার্য্যগণের মধ্যে লুইপাদ ( অথবা লুই-পা ) সমধিক প্রসিদ্ধ। তিনি সম্ভবত দীপঙ্কর শ্রীজ্ঞানের সমসাময়িক। তিনি ৪ খানি ব্রজযান গ্রন্থ এবং বহু দোহা রচনা করেন। তিব্বতীয় প্রবাদ অনুসারে তিনি বাংলা দেশে ধীর বংশে জন্মগ্রহণ করেন এবং যোগিনী তন্ত্রের প্রবর্তন করেন।

অনেকে মনে করেন লুইপাদ ও মৎস্যেন্দ্রনাথ একই ব্যক্তি। কারণ মৎস্যেন্দ্রনাথ যে নূতন ধর্ম্মমতের প্রবর্তন করেন তাহার সহিত যোগিনীতন্ত্রের অনেক সাদৃশ্য আছে এবং তিনিও বাংলা দেশের চন্দ্রদ্বীপে ধীর বংশে জন্ম গ্রহণ করেন। তাঁহার ধর্ম্মমত সংস্কৃত গ্রন্থ ও দোহায় প্রচারিত হয়। সংস্কৃত গ্রন্থের মধ্যে 'কৌলজ্ঞান-নির্ণয়' সর্বপ্রাচীন ও সমধিক প্রসিদ্ধ।

মৎস্যেন্দ্রনাথের শিষ্য গোরক্ষনাথ সম্বন্ধে বহু কিংবদন্তী প্রচলিত আছে। বাংলার রাজা গোপীচাঁদের সন্ন্যাস অবলম্বনে রচিত বহু গীতিকা সমস্ত আর্য্যাবর্ষে সুপ্রসিদ্ধ। এই গোপীচাঁদ ও তাঁহার মাতা ময়নামতীর গুরু জালন্ধরিপাদ গোরক্ষনাথের শিষ্য ছিলেন। এই সম্প্রদায় 'নাথ' নামে পরিচিত এবং ইহার আচার্য্যগণ সংস্কৃত, অপভ্রংশ ও প্রাচীন বাংলায় বহু গ্রন্থ ও পদ রচনা করিয়াছেন।

অশ্রাশ্র সিদ্ধাচার্য্যগণের মধ্যে কুকুরপাদ ( অথবা কাকুপা ), সরহপাদ প্রভৃতির নাম করা যাইতে পারে।

## ৪। সেন যুগে সংস্কৃত সাহিত্য

সেনরাজগণের অভ্যুদয়ের ফলে অপভ্রংশ ও বাংলায় রচিত তান্ত্রিক সহজিয়া সাহিত্যের প্রসার কমিয়া পুনরায় সংস্কৃত সাহিত্যের উন্নতির যুগ আরম্ভ হয়। সেনরাজগণ শৈব ও বৈষ্ণবধর্মের উপাসক ছিলেন এবং বৈদিক যাগযজ্ঞ ও ক্রিয়াকাণ্ডের অনুষ্ঠান করিতেন। সুতরাং তাঁহাদের পৃষ্ঠপোষকতায় ভারত-বর্ষের অগাধ প্রদেশের আয় বঙ্গদেশেও সংস্কৃত সাহিত্য ও হিন্দুধর্মের নবজাগরণের সূত্রপাত হয়।

বৌদ্ধ ও তান্ত্রিক মতের প্রভাবে হিন্দুর আনুষ্ঠানিক ক্রিয়া পদ্ধতি অনেকটা লোপ পাইয়াছিল। সুতরাং এই সম্বন্ধীয় গ্রন্থের বিশেষ প্রয়োজন ছিল। বল্লালসেনের গুরু অন্তিকর দুই গ্রন্থ ‘প্রতিষ্ঠা-সংগ্ৰহ’ ও ‘প্রতিষ্ঠা-সংগ্ৰহ’ নামক দুইখানি গ্রন্থে অশৌচ, শ্রাদ্ধ, সন্ধ্যা, তর্পণ প্রভৃতি হিন্দুর বিবিধ অনুষ্ঠানের ও নিত্য-কর্মের বিস্তৃত আলোচনা করেন। বল্লালসেন নিজে ‘আচার-সাগর’, ‘প্রতিষ্ঠা-সাগর’, ‘দান-সাগর’ ও ‘অনুষ্ঠান-সাগর’ নামক চারিখানি গ্রন্থ রচনা করেন। কিন্তু মাত্র শেষোক্ত দুইখানি গ্রন্থ পাওয়া গিয়াছে। প্রাচীন বহু ধর্মশাস্ত্র হইতে মত ও উক্তি উদ্ধৃত করিয়া বল্লালসেন এই সমুদয় গ্রন্থে হিন্দুর নানা আচার, প্রতিষ্ঠান, দান-কর্মাদি ও শুভাশুভাদি নানা নৈমিত্তিক লক্ষণ প্রভৃতির বিবরণ লিপিবদ্ধ করেন। বল্লালসেনের এই সমুদয় গ্রন্থ যে বাংলায় ও বাংলার বাহিরে প্রামাণিক বলিয়া গণ্য হইত তাহার যথেষ্ট প্রমাণ আছে।

হলায়ুধ এইযুগের একজন প্রসিদ্ধ গ্রন্থকার। তিনি বাংলাবঙ্গসেই রাজ-পণ্ডিত ছিলেন; লক্ষ্মণসেন নামক যৌবনে মহামাত্য এবং প্রোট বয়সে ধর্ম-ধ্যানের পদে নিয়োজিত ছিলেন। হলায়ুধ ‘ব্রাহ্মণ-সর্বস্ব’, ‘মৌমাংসা-সর্বস্ব’, ‘বৈষ্ণব-সর্বস্ব’, ‘শৈব-সর্বস্ব’ ও ‘পণ্ডিত-সর্বস্ব’ প্রভৃতি গ্রন্থ রচনা করেন; কিন্তু ‘ব্রাহ্মণ-সর্বস্ব’ ব্যতীত আর কোন গ্রন্থ এ যাবৎ আবিষ্কৃত হয় নাই। হলায়ুধ লিখিয়াছেন যে রাত ও বরেন্দ্রের ব্রাহ্মণগণ বেদ পড়িতেন না এবং বৈদিক অনুষ্ঠান সম্বন্ধে তাঁহাদের প্রকৃত জ্ঞান ছিল না—এইজন্য হিন্দুর আঙ্গিক অনুষ্ঠান ও বিবিধ সংস্কারে ব্যবহৃত বৈদিক মন্ত্রের তাৎপর্য ব্যাখ্যা কবিরার জন্য তিনি ব্রাহ্মণ-সর্বস্ব গ্রন্থ রচনা করিয়াছেন। এই গ্রন্থ বঙ্গদেশে ও বাহিরে বিশেষ প্রসিদ্ধিলাভ করিয়াছে। হলায়ুধের দুই জ্যেষ্ঠ ভ্রাতা ঈশান ও পশুপতি শ্রাদ্ধ ও অগাধ দৈনিক অনুষ্ঠান সম্বন্ধে দুইখানি ‘পদ্ধতি’ রচনা করেন। পশুপতি ‘শ্রাদ্ধপদ্ধতি’ ব্যতীত পাকযজ্ঞ সম্বন্ধেও একখানি গ্রন্থ রচনা করেন।

ভাষাতত্ত্বেও এই যুগের দুই একজন গ্রন্থকার প্রসিদ্ধিলাভ করিয়াছেন।

ইহাদের মধ্যে আর্তিহর-পুত্র বন্দ্যটীয় সর্বানন্দের নাম বিশেষভাবে উল্লেখযোগ্য। ‘টীকাসর্বস্ব’ নামে ইহার রচিত অমর কোষের টীকা ভারতের সর্বত্র প্রসিদ্ধিলাভ করিয়াছে। সর্বানন্দ ১১৫২-৬০ অব্দে এই গ্রন্থ রচনা করেন। এই গ্রন্থে তিনি অপূর্ব পাণ্ডিত্যের পরিচয় দিয়াছেন এবং বহু দেশী শব্দের উল্লেখ করিয়াছেন। এই সমুদয় দেশী শব্দের অধিকাংশই এখনও বাংলাভাষায় প্রচলিত।

‘ভাষাবৃদ্ধি’, ‘ত্রিকাণ্ডশেষ’, ‘হারাবালী’, ‘বর্ণদেশনা’ ও ‘দ্বিরূপকোশ’ প্রভৃতি কোষ ও ব্যাকরণ গ্রন্থের রচয়িতা পুরুষোত্তম বাঙ্গালী ছিলেন বলিয়া অনেকে মত প্রকাশ করিয়াছেন; কিন্তু এই মতের সমর্থক নিশ্চিত কোন প্রমাণ নাই।

সেনরাজগণ প্রায় সকলেই কবিতা রচনা করিতেন, এবং এই যুগকে বাংলায় সংস্কৃত কাব্যের স্বর্ণময়যুগ বলা যাইতে পারে। লক্ষ্মণসেনের সভাসদ ও মুহুদ বটুদাসের পুত্র শ্রীধর দাস ১২০৬ অব্দে ‘সহুজিকর্ণামৃত’ নামে সংস্কৃত কবিতা সংগ্রহ প্রকাশিত করেন। ইহাতে ৪৮৫ জন কবির রচিত ২৩৭০টি মনোজ্ঞ কবিতা সংগৃহীত হইয়াছে। এই কবিগণের মধ্যে অনেকেই অজ্ঞাত এবং সম্ভবত বঙ্গদেশীয় ছিলেন; কিন্তু ইহা সঠিক জানিবার উপায় নাই। সহুজিকর্ণামৃতে রাজা বল্লালসেন, লক্ষ্মণসেন এবং কেশবসেনের রচিত কবিতা আছে। লক্ষ্মণসেনের রাজসভায় ধোয়ী, উমাপতিধর, গোবর্দ্ধন, শরণ ও জয়দেব এই পাঁচজন প্রসিদ্ধ কবি ছিলেন। ইহাদের বহু কবিতা শ্রীধরদাসের সংগ্রহে পাওয়া যায়।

কবি ধোয়ী তাঁহার একটি শ্লোকে লক্ষ্মণসেনকে রাজা বিক্রমাদিত্যের সহিত তুলনা করিয়াছেন। এই তুলনা কেবলমাত্র কবিশুলভ অত্যাতি নহে। তাঁহার সভার উক্ত পঞ্চ কবি সত্য সত্যই পঞ্চ রত্ন ছিলেন।

কবি ধোয়ীর ‘পবনদূত’ কাব্য মেঘদূতের অনুকরণে রচিত। গৌড়ের রাজা লক্ষ্মণসেন যখন দিগ্বিজয়ে প্রবৃত্ত হইয়া দাক্ষিণাত্যে গিয়াছিলেন তখন মলয় পর্বতের গন্ধর্ব্বকন্যা কুবলয়বতী তাঁহার রূপে মুগ্ধ হন এবং পবন-মুখে তাঁহার প্রণয়কাহিনী রাজার নিকট প্রেরণ করেন—এই ভূমিকার উপর ১০৪টি শ্লোকে সম্পূর্ণ এই দূতকাব্য রচিত হইয়াছে। কালিদাসের মেঘদূতের অনুকরণে যে সমুদয় দূতকাব্য রচিত হইয়াছে তাহার মধ্যে পবনদূতের স্থান খুব উচ্চে। পবনদূত ব্যতীত ধোয়ী সম্ভবত অল্প কাব্যও লিখিয়া ছিলেন, কিন্তু ইহা পাওয়া যায় না। জয়দেব ধোয়ীকে কবিশ্রীপতি অর্থাৎ কবিগণের রাজা এবং শ্রুতিধর বলিয়া বর্ণনা করিয়াছেন।

উমাপতিধর সম্বন্ধে জয়দেব লিখিয়াছেন ‘বাচঃ পল্লবয়তি’ অর্থাৎ তিনি বাক্যবিশ্বাসে পটু। তাঁহার রচিত বিজয়সেনের প্রশস্তি ( দেওপাড়া লিপি ) এই মন্তব্যের সমর্থন করে। মাধাইনগর শাসনের একটি শ্লোকও সছত্ৰিকর্ণা-মৃতে উমাপতিধরের রচিত বলিয়া উদ্ধৃত হইয়াছে। সুতরাং এই তাম্রশাসনও সম্ভবত তাঁহারই রচনা। সছত্ৰিকর্ণামৃতে উমাপতিধরের ৯০টি শ্লোক উদ্ধৃত হইয়াছে এবং উমাপতিরচিত ‘চন্দ্রচূড়-চরিত’ কাব্যের উল্লেখ আছে। সম্ভবত এই উমাপতি ও উমাপতিধর একই ব্যক্তি।

আচার্য্য গোবর্দ্ধন সম্বন্ধে জয়দেব লিখিয়াছেন যে শৃঙ্গার রসাত্মক কবিতা রচনায় তাঁহার সমকক্ষ কেহ ছিল না। এই কবি গোবর্দ্ধনই যে ‘আর্য্যাসপ্ত-শতীর’ কবি গোবর্দ্ধনাচার্য্য সে বিষয়ে বিদেহ কোন সন্দেহ নাই। এত কাব্যগ্রন্থ গোবর্দ্ধনের অপূর্ব কবিত্ব ও পাণ্ডিত্যশক্তির পরিচায়ক। সম্ভবত তাঁহার পাণ্ডিত্যের জগাই তিনি আচার্য্য বলিয়া অভিহিত হইতেন।

কবি শরণ সম্বন্ধে জয়দেব লিখিয়াছেন যে তিনি “শ্লাঘ্য দুঃকহ-দ্রুতে” অর্থাৎ দুঃকহ রচনায় তিনি দ্রুত ও সিদ্ধহস্ত ছিলেন। ইহা হইতে কেহ কেহ মনে করেন যে তিনি ও “দুঃখটবৃদ্ধির” গ্রন্থকার বৈয়াকরণিক শরণ একই ব্যক্তি। কিন্তু ইহা অনুমান মাত্র। সছত্ৰিকর্ণামৃতে শরণের কবিতা উদ্ধৃত হইয়াছে, কিন্তু তাঁহার কোন কাব্যগ্রন্থ পাওয়া যায় নাই।

লক্ষ্মণসেনের সভাকবিদের মধ্যে জয়দেব যে সর্ব্বশ্রেষ্ঠ ছিলেন তাহাতে কোন সন্দেহ নাই। তাঁহার গীতগোবিন্দের প্রচলন-কালপন্যাসী কবল মাত্র বৈষ্ণবগণের নহে, মাধব রস-পিপাসু মাত্রেরই চিত্তে চিরদিন আনন্দ দান করিবে। স. ৩৫৩ ভাগ্য একরূপ শ্রুতি-মধুর, জনপ্রিয়, অথচ উচ্চাঙ্গের রস সম্পন্ন কাব্য খুব বেশী নাই। ইহার ৪০ খানি বা ততোধিক টীকা আছে, এবং ইহার অনুকরণে প্রায় ১২১৪ খানি কাব্যগ্রন্থ রচিত হইয়াছে। সমগ্র ভারতে গীতগোবিন্দ যে কিরূপ সমাদর লাভ করিয়াছে ইহাই তাহার প্রকৃষ্ট প্রমাণ। এই অসাধারণ জনপ্রিয়তার জগাই কবি জয়দেবকে মিথিলা ও উড়িষ্যার অধিবাসীরা তাঁহাদের স্বদেশবাসী বলিয়া দাবী করিয়া থাকেন। কিন্তু অজয় নদের তীরে কেন্দুবিল্বগ্রাম তাঁহার জন্মভূমি, এই প্রবাদ এত দৃঢ়ভাবে প্রচলিত যে বিশেষ প্রমাণ না পাইলে অন্তরূপ বিশ্বাস করা কঠিন। এখনও প্রতি বৎসর মাঘী সংক্রান্তিতে জয়দেবের স্মৃতি রক্ষার্থে কেন্দুবিল্বে বিরাট মেলার আধিবেশন হয়। তাঁহার জীবনী সম্বন্ধে বিশেষ কোন বিবরণ পাওয়া যায় না। গীতগোবিন্দের একটি শ্লোক হইতে জানা যায় যে তাঁহার পিতার নাম ভোজদেব এবং মাতার

নাম রামাদেবী ( পাঠাস্তুর-রাধাদেবী, বামাদেবী ) । তাঁহার জ্বর নাম সম্ভবত পদ্মাবতী । জয়দেব যে সঙ্গীতে নিপুণ ছিলেন তাঁহার গীতগোবিন্দ রচনা হইতেই তাহা বুঝা যায় । কারণ ইহার অনেক পদ প্রকৃতপক্ষে সঙ্গীতের উপযোগী করিয়াই রচিত এবং এখনও গীত হয় ।

গীতগোবিন্দে রাধাকৃষ্ণের প্রেমকাহিনী বর্ণিত হইয়াছে, এবং বাংলার বৈষ্ণব সম্প্রদায় রসশাস্ত্রের আধ্যাত্মিক ব্যাখ্যা হিসাবে ইহাকে তাঁহাদের একখানি বিশিষ্ট ধর্মগ্রন্থ বলিয়া গণ্য করেন । কিন্তু ইহার আধ্যাত্মিক ব্যাখ্যা ছাড়িয়া দিলেও কেবলমাত্র ভাব ও রসের বিচারে ইহা সংস্কৃত সাহিত্যে একখানি উৎকৃষ্ট কাব্য বলিয়া বিবেচিত হইবার যোগ্য । ইহা প্রচলিত সংস্কৃত কাব্য হইতে সম্পূর্ণ ভিন্ন প্রকৃতির এবং সাহিত্যিক জগতে এক নূতন সৃষ্টি । রচনা প্রণালীর দিক হইতে সংস্কৃত কাব্য অপেক্ষা অপভ্রংশ এবং বাংলা ও মৈথিলী ভাষায় রচিত পদাবলীর সহিত ইহার সাদৃশ্য অনেক বেশী । কেহ কেহ মনে করেন যে গীতগোবিন্দ প্রথমে অপভ্রংশ অথবা প্রাচীন বাংলায় রচিত হইয়াছিল এবং পরে সংস্কৃতে রূপান্তরিত হয় । কিন্তু অনেকেই এই মত গ্রহণ করেন নাই ।

দ্বাদশ শতাব্দীর শেষার্দ্ধে বাংলায় সংস্কৃত সাহিত্যের শ্রেষ্ঠ যুগ বলা যাইতে পারে । একদিকে ধর্মশাস্ত্র ও অপরদিকে উচ্চাঙ্গের কাব্য এই যুগকে অমর করিয়া রাখিয়াছে । অর্দ্ধ শতাব্দীর মধ্যে অনিরুদ্ধ ভট্ট, হলায়ুধ, বল্লালসেন, সর্বানন্দ, জয়দেব, উমাপতি, ধোয়ী, গোবর্দ্ধন ও শরণ—এতগুলি পণ্ডিত ও কবির সমাবেশ যে কোন দেশের পক্ষেই গৌরবজনক ।

### ৫। বাংলা ভাষা ও সাহিত্য

স্বাভাবিক বিবর্তনের ফলে সংস্কৃত ভাষা হইতে ক্রমে ক্রমে পালি, প্রাকৃত, অপভ্রংশ ও দেশীয় ভাষার উৎপত্তির কথা পূর্বেই বলা হইয়াছে । কোন সময়ে বাংলা ভাষার সৃষ্টি হয় তাহা নিশ্চিত বলা যায় না । ৬মহামহো-পাধ্যায় হরপ্রসাদ শাস্ত্রী নেপালে কতকগুলি প্রাচীন বৌদ্ধ-চর্যাপদ আবিষ্কার করেন এবং ‘বৌদ্ধগান ও দোহা’ নামক গ্রন্থে প্রকাশিত করেন । বর্তমান বাংলা ভাষার সহিত অনেক প্রভেদ থাকিলেও এই চর্যাপদগুলিই যে সর্বপ্রাচীন বাংলা ভাষার নিদর্শন তাহা সকলেই স্বীকার করেন ।

এই চর্যাপদগুলির প্রত্যেকটিতে চারি হইতে ছয়টি পদ আছে । এগুলির বিষয়বস্তু সহজিয়া বৌদ্ধমতের গুঢ় আধ্যাত্মিক ব্যাখ্যা । এ পর্য্যন্ত মোট

২২ জন কবি রচিত ৪৭টি চর্যাপদ পাওয়া গিয়াছে। এই পদগুলির সংস্কৃত টীকা আছে—কিন্তু তাহাও এত ছুঁহ যে সকল স্থলে মূলের তাৎপর্য বোধগম্য হয় না। এই প্রাচীন বাংলায় রচিত চর্যাপদের সঙ্গে শৌরসেনী অপভ্রংশ ভাষায় রচিত শরহ ও কাহ্নের দোহা এবং ‘ডাকার্ণব’ এই তিনখানি পুঁথি পাওয়া গিয়াছে। পণ্ডিতেরা অনুমান করেন যে দশম শতাব্দে এইগুলি রচিত হয়। ঐযুগে বাংলায় ও বাংলার বাহিরে শৌরসেনী অপভ্রংশই বহুল পরিমাণে সাহিত্যের ভাষা ছিল। কিন্তু সঙ্গে সঙ্গে প্রাচীন বাংলাও ক্রমশ পরিপুষ্ট হইয়া সাহিত্যের উপযুক্ত ভাষা বলিয়া পরিগণিত হয়, এবং একই কবি শৌরসেনী অপভ্রংশ ও বাংলা এই দুই ভাষাতেই কবিতা রচনা করেন। খুব সম্ভব এই প্রাচীন বাংলা আরও দুই একশত বৎসর পূর্বে হইতেই অর্থাৎ পালযুগের প্রারম্ভেই প্রচলিত ছিল, কিন্তু যে চর্যাপদগুলি ইহার সর্বপ্রাচীন নিদর্শন তাহা সম্ভবত দশম শতাব্দীতে রচিত। তখনও শৌরসেনী অপভ্রংশই আধাবর্ষের পূর্বভাগে সাধুভাষা বলিয়া সম্মানের আসন পাইত। কিন্তু ক্রমে ক্রমে বাংলা ভাষা প্রতিষ্ঠা লাভ করিয়া বাংলার একমাত্র সাহিত্যিক ভাষায় পরিণত হয়। মোটামুটি ভাবে বলা যাইতে পারে যে নব্বই হইতে দ্বাদশ এই চারি শতাব্দীই বাংলা ভাষা ও সাহিত্যের আদিম যুগ।

পূর্বে যে ৮৪ জন সিদ্ধাচার্যের কথা উল্লিখিত হইয়াছে তাঁহারা পূর্বোক্ত দোহা ও চর্যাপদগুলির রচয়িতা। এগুলি তিব্বতীয় ভাষায় অনূদিত হইয়াছিল। তেজুর নামক বিখ্যাত তিব্বতীয় গ্রন্থে ২০টি চর্যাপদের অনুবাদ পাওয়া গিয়াছে। ‘সুশ্রী’ পূর্বোক্ত ৪৭টি ব্যতীত আরও তিনটি প্রাচীন বাংলা চর্যাপদ ছিল। গোপী মহাশয়ের আবিষ্কৃত পুঁথি খণ্ডিত হওয়ায় এই তিনটির মূল পাওয়া যায় নাই।

বাংলায় প্রচলিত ময়নামতীর গানে চর্যাপদ রচয়িতা এই সিদ্ধাচার্যগণের কিছু কিছু বিবরণ পাওয়া যায়। ময়নামতী রাজা গোপীচাঁদের মাতা ও গোরক্ষনাথের শিষ্যা ছিলেন। তিনি যোগবলে জানিতে পারিলেন যে তাঁহার পুত্র সন্ন্যাস গ্রহণ না করিলে অকালে মৃত্যুমুখে পতিত হইবেন। গোপীচাঁদ তাঁহার দুই রাণী অহ্না ও পছনার বহু বাধা সত্ত্বেও মাতার আজ্ঞায় সন্ন্যাসী হইলেন এবং গোরক্ষনাথের শিষ্য জালন্ধরিপাদ অথবা হাড়িপার শিষ্য গ্রহণ করিলেন।

সিদ্ধ ও যোগীপুরুষ হিসাবে গোরক্ষনাথের খ্যাতি ভারতের সর্বত্র বিস্তৃত, এবং তৎপ্রবর্তিত কানফাটা যোগী সম্প্রদায় সমগ্র হিন্দুস্থানে, বিশেষত পঞ্জাবে ও রাজপুতনায়, এখন পর্যন্ত বিশেষ প্রভাবশালী। তাঁহার পুত্র মীননাথ অথবা

মৎশ্বেন্দ্রনাথ । স্বয়ং শিব তাঁহাকে গুহ মন্ত্র প্রদান করেন এবং তিনি আদি সিদ্ধ নামে কথিত হইয়া থাকেন । ময়নামতীর গানে এই সম্প্রদায়ের নিম্নলিখিত রূপ গুরুপরম্পরা পাওয়া যায় ।

মৎশ্বেন্দ্রনাথ ( মীননাথ )  
|  
গোরক্ষনাথ ( গোরখনাথ )  
|  
জালন্ধরিপাদ ( হাড়ি-পা )  
|  
কৃষ্ণপাদ ( কান্তপা, কাহু-পা )

যে ৪৭টি চর্যাপদ পাওয়া গিয়াছে তাহাব মধ্যে ১১টির রচয়িতা কৃষ্ণপাদ বা কাহু-পা । তিনি একটি পদে যে ভাবে জালন্ধরিপাদের উল্লেখ করিয়াছেন তাহাতে মনে হয় যে ইনি তাঁহার গুরু । সুতরাং পদরচয়িতা কৃষ্ণপাদ ও গোরক্ষনাথের প্রশিষ্য কৃষ্ণপাদ একই ব্যক্তি এইরূপ অনুমান করা যাইতে পারে । লুইপা দুইটি চর্যাপদের রচয়িতা । তিব্বতীয় আখ্যানের উপর নির্ভর করিয়া কেহ কেহ ইহাকে আদি সিদ্ধ মৎশ্বেন্দ্রনাথের সহিত অভিন্ন মনে করেন, ইহা পূর্বেই বলা হইয়াছে । এই সমুদয় পদরচয়িতা সিদ্ধ গুরুদিগের কাল-নির্ণয় সম্বন্ধে পণ্ডিতেরা একমত নহেন । ডাঃ সুনীতিকুমার চট্টোপাধ্যায় অনুমান করেন যে, গোরক্ষনাথ দ্বাদশ শতাব্দীর প্রথম ভাগে বর্তমান ছিলেন । কিন্তু ডাঃ শহীদুল্লাহ্ নেপালে প্রচলিত কিংবদন্তীর উপর নির্ভর করিয়া সিদ্ধান্ত করিয়াছেন যে মৎশ্বেন্দ্রনাথ সপ্তম শতাব্দের লোক । কিন্তু অনেকেই এই মত গ্রহণ করেন না । চর্যাপদের ভাষা দশম শতাব্দীর পূর্বেকার নহে, ইহাই প্রচলিত মত ।

চর্যাপদগুলিকে বাংলা সাহিত্যের আদিম উৎস বলা যাইতে পারে এবং ইহার প্রভাবেই পরবর্তী যুগের বাংলায় সহজিয়া গান, বৈষ্ণব পদাবলী, শাক্ত ও বাউল গান প্রভৃতির সৃষ্টি হইয়াছে । সুতরাং বাংলা ভাষা ও সাহিত্যের ইতিহাসের দিক দিয়া ইহার মূল্য খুব বেশী । নিছক সাহিত্য হিসাবে ইহার স্থান খুব উচ্চ নহে । জটিল ও দুর্জহ তত্ত্বের চাপে ইহার সাহিত্যিক সৌন্দর্য্য বিকাশ হইবার সুযোগ পায় নাই—কিন্তু মাঝে মাঝে ইহাতে প্রকৃত কবিত্বের পরিচয় পাওয়া যায় । নিম্নে নমুনাস্বরূপ একটি প্রাচীন চর্যাপদ ও বর্তমান বাংলাভাষায় তাহার যথাসম্ভব রূপান্তর দেখান হইতেছে । ইহা হইতে প্রাচীন চর্যাপদের ভাষা ও ভাব সম্বন্ধে ধারণা অনেকটা স্পষ্ট হইবে ।

## চর্যাপদ ১৫

- ১। গঙ্গা জউনা মাঝে রে বহই নাই ।  
তহিঁ চড়িলী মাতঙ্গি পোইআ লীলে পার করেই ।
- ২। বাহ তু ডোম্বী বাহ লো ডোম্বী বাটত ভইল উছারা ।  
সদগুরু পাঅ-পসাএঁ জাইব পুণু জিনউরা ॥
- ৩। পাঞ্চ কেড়ু আল পড়ন্তে মাঞ্জে পীঠত কাছী বাক্ষী ।  
গঅন উখোলৈঁ সিকছ পাণী ন পইসই সাক্ষি ॥
- ৪। চান্দ সূজ দুই চাকা সিঠি সংহার পুলিন্দা ।  
বাম দাহিণ দুই মাগ ন চেবই বাহ তু ছন্দা ॥
- ৫। কবড়ী ন লেই সোড়ী ন লেই সচ্ছন্দে পার করেই ।  
জো রথে চড়িলা বাহবা এ জানি কুলে কুল বুলই ॥

## বর্তমান বাংলায় রূপান্তর

- ১। গঙ্গা যমুনা মধ্যে রে বহে নৌকা ।  
তাহাতে চড়িয়া চণ্ডালী ডোবা লোককে অবলীলাক্রমে পার করে ।
- ২। বাহ্ ডোমনী ! বাহ্ লো ডোমনী ! পথে হইল বেলা গত ।  
সদগুরু-পাদ-প্রসাদে যাইব পুনঃ জিনপুর ( জিন=বুদ্ধ ) ॥
- ৩। পাঁচ দাঁড় পড়িতে নৌকার গলুইয়ে, পিঠে কাছি বাক্ষিয়া ।  
গগন-উখলিতে ( বাবা ) ছেচ পানি, ন পসে সাক্ষিতে ( ভিত্তে জল  
প্রবেশ করিলে না ) ॥
- ৪। চান্দ সূর্য্য দুই চাকা, সৃষ্টি-সংহার ( দুই ) মাস্তুল ।  
বাম ডাহিনে দুই মার্গ না বোধ হয়, বাহ্ সচ্ছন্দে ॥
- ৫। কড়ি না লয়, বুড়ি ( পয়সা ) না লয়, অমনি পার করে ।  
যে রথে চড়িল, ( নৌকা ) বাহিতে না জানিয়া কুলে কুলে বেড়ায় ॥

চর্যাপদ ব্যতীত যে ঐয়ুগে প্রাচীন বাংলায় রচিত অগাণ্ড শ্রেণীর সাহিত্য ছিল তাহা সহজেই অনুমান করা যাইতে পারে। এবিষয়ে কিছু কিছু প্রমাণও আছে। চালুকারাজ তৃতীয় সোমেশ্বরের রাজ্যকালে ( ১১২৭-১১৩৮ অব্দ ) রচিত ‘মানসোল্লাস’ গ্রন্থের ‘গীত-বিনোদ’ অধ্যায়ে বিভিন্ন দেশীয় ভাষায় রচিত গীতের দৃষ্টান্ত আছে। ইহার মধ্যে বিষ্ণুর অবতার ও গোপীগণের সহিত কৃষ্ণের লীলা বিষয়ক কয়েকটি বাংলা গীতের অংশ আছে। গীতগোবিন্দের রচনাভঙ্গী



যে প্রাচীন বাংলা ও অপভ্রংশে রচিত গীতিকবিতার অনুরূপ, তাহা পূর্বেই বলা হইয়াছে। রামায়ণ, মহাভারত প্রভৃতি জনপ্রিয় সংস্কৃত মহাকাব্য অবলম্বনে যে বাংলাভাষায় একটি লৌকিক সাহিত্য গড়িয়া উঠিয়াছিল ইহাও খুবই সম্ভব। কিন্তু এরূপ রচনার কোন নিদর্শন পাওয়া যায় নাই। মোটের উপর একথা বলা যাইতে পারে যে, বৌদ্ধ সহজিয়া মতের চর্যাপদগুলি ছাড়া প্রাচীন বাংলায় রচিত এমন আর কিছুই পাওয়া যায় নাই, যাহা দ্বাদশ শতাব্দীর পূর্বেকার বলিয়া গ্রহণ করা যাইতে পারে। মধ্যযুগে বৈষ্ণব ধর্মের প্রভাবে যে বাংলা সাহিত্যের অপূর্ব পরিপুষ্টি ও শ্রীবৃদ্ধি হইয়াছিল, সম্ভবত পুরাতন বৌদ্ধ সহজিয়া ধর্মের প্রভাবেই সেই সাহিত্যের প্রথম সৃষ্টি হয়। পণ্ডিত ও প্রচলিত ব্রাহ্মণ্য ধর্মের পৃষ্ঠপোষকগণ সংস্কৃতকেই একমাত্র সাধুভাষা ও সাহিত্যের বাহন মনে করিতেন, কিন্তু নূতন ও অর্বাচীন ধর্মমত জনসাধারণে প্রচলিত করার জন্য ইহার আচার্য্যগণ জনসাধারণের ভাষায়ই ইহাকে প্রচার করিতে যত্নবান ছিলেন। ইহাই বাংলা ভাষা ও সাহিত্যের সৃষ্টি ও পরিপুষ্টির প্রধান কারণ বলিয়া গ্রহণ করা যাইতে পারে।

### ৫। বাংলা লিপি

অনেকের বিশ্বাস যে প্রাচীনকালেও সংস্কৃত ভাষা নাগরী অক্ষরেই লিখিত হইত, এবং বাংলা ভাষার স্থায় বাংলায় প্রচলিত অক্ষরগুলিও অপেক্ষাকৃত আধুনিক। কিন্তু এই দুইটি মতই ভ্রান্ত। সর্বত্রই সংস্কৃত, প্রাকৃত ও দেশীয় ভাষা সবই একরকম অক্ষরে লিখিত হইত, এবং দেশ ও কাল অনুসারে তাহার ভিন্ন ভিন্ন রূপ ছিল। কেবলমাত্র সংস্কৃত লেখার জন্য কোন পৃথক অক্ষর ব্যবহৃত হইত না।

মৌর্য্য সম্রাট অশোক খৃষ্টপূর্ব তৃতীয় শতাব্দীতে যে ব্রাহ্মী লিপিতে তাহার অধিকাংশ শাসনমালা উৎকীর্ণ করান তাহা হইতেই ক্রমে ভারতের বিভিন্ন প্রদেশে বিভিন্ন বর্ণমালার উদ্ভব হইয়াছে। সম্রাট অশোকের সময়ে ভারতের উত্তর-পশ্চিম সীমান্ত প্রদেশ ব্যতীত আর সর্বত্রই এক প্রকার লিপির প্রচলন ছিল। কালক্রমে ও স্থানীয় লোকের বিভিন্ন রুচি অনুযায়ী বিভিন্ন প্রদেশে ইহার কিছু কিছু পরিবর্তন আদ্রস্ত হয়। এই সমুদয় পরিবর্তন সত্ত্বেও গুপ্তযুগের পূর্ব পর্য্যন্ত ভারতের বিভিন্ন অঞ্চলে যে সমুদয় বিভিন্ন বর্ণমালা প্রচলিত ছিল তাহাদের মধ্যে প্রভেদ খুব বেশী ছিল না। এক দেশের লোক অল্প দেশের বর্ণমালা পড়িতে পারিত।

গুপ্তযুগেই প্রথম প্রাদেশিক বর্ণমালার মধ্যে স্বাতন্ত্র্য ও প্রভেদ বাড়িয়া

উঠে। বর্ষ ও সপ্তম শতাব্দীতে পূর্বভারতের ও পশ্চিমভারতের বর্ণমালা দুইটি স্বতন্ত্র পদ্ধতি অবলম্বন করে। পশ্চিমভারতের সিদ্ধমাতৃকা-বর্ণমালা ক্রমশ রূপান্তর হইতে হইতে নাগরীতে পরিণত হয়। আর পূর্বভারতের বর্ণমালা হইতেই অবশেষে বাংলা বর্ণমালার উৎপত্তি হয়।

সমাচার দেবের কোটালিপাড়া তাম্রশাসনে পূর্বভারতে প্রচলিত এই বিশিষ্ট পদ্ধতির বর্ণমালার নিদর্শন পাওয়া যায়। সপ্তম হইতে নবম শতাব্দী পর্য্যন্ত ইহার ক্রমশ অনেক পরিবর্তন হয়। দশম শতাব্দীতে পশ্চিম ভারতের বর্ণমালা ইহার উপর কিছু প্রভাব বিস্তার করে। কিন্তু ঐ শতাব্দীর শেষভাগে প্রথম মহীপালের রাজত্বে এই প্রভাব দূর হয়, এবং পূর্বভারতীয় বর্ণমালায় বাংলা বর্ণমালার পূর্বাভাস পাওয়া যায়। প্রথম মহীপালের বাণগড়-লিপিতে ব্যবহৃত অ, উ, ক, খ, গ, ঘ, ন, ম, ল এবং ক্ষ অনেকটা বাংলা অক্ষরের আকার ধারণ করিয়াছে। জ একেবারে সম্পূর্ণ বাংলা জ'য়ের অনুরূপ। দ্বাদশ শতাব্দীতে উৎকীর্ণ বিজয়সেনের দেওপাড়া-প্রস্তিতে যে বর্ণমালা ব্যবহৃত হইয়াছে, তাহার মধ্যে ২২টি পুরাপুরি অথবা প্রায় বাংলা অক্ষরের মতন। দ্বাদশ শতাব্দীর শেষে এবং ত্রয়োদশ শতাব্দীর প্রথমে তাম্রশাসনের অক্ষর প্রায় সম্পূর্ণ আধুনিক বাংলা অক্ষরে পরিণত হইয়াছে। ইহার পর তিন চারিশত বৎসর পর্য্যন্ত স্বাভাবিক নিয়মে এই অক্ষরের কিছু কিছু পরিবর্তন ঘটিয়াছে। সপ্তদশ ও অষ্টাদশ শতাব্দীতে পরিবর্তন বিশেষ কিছু হয় নাই। ঊনবিংশ শতাব্দী হইতে মুদ্রাযন্ত্রের প্রচলনের ফলে বাংলা অক্ষরগুলি একটি নির্দিষ্ট রূপ-ধারণ করিয়াছে। ভবিষ্যতে ইহার আর কোনরূপ পরিবর্তন হইবে বলিয়া মনে হয় না। ইহা দেখা যায় যে গুপ্তযুগের পরবর্ত্তীকালে বাংলায় যখন একটি স্বাধীন পরাক্রান্ত রাজ্য স্থাপিত হয়, সেই সময় হইতেই পূর্বভারতে একটি বিশিষ্ট বর্ণমালার প্রচলন হয়। ক্রমে এই বর্ণমালা পরিবর্তিত হইয়া বাংলার নিজস্ব একটি বর্ণমালায় পরিণত হয়। বলা বাহুল্য যে চিরকালই বাংলার প্রচলিত অক্ষরেই বাংলায় সংস্কৃত, প্রাকৃত ও দেশীয় ভাষা প্রভৃতি লিখিত হয়। সংস্কৃত ভাষা লিখিবার জন্ত নাগরী অক্ষরের ব্যবহার অতি আধুনিক কালেই হইয়াছে। প্রাচীন বাংলার সংস্কৃত ভাষায় লিখিত সমুদয় তাম্রশাসন ও পুঁথিই তৎকালে প্রচলিত বাংলা অক্ষরেই লেখা হইয়াছে। আর নাগরী অক্ষর বাংলা অপেক্ষা প্রাচীন নহে; অর্থাৎ দশম শতাব্দীতে বাংলাদেশে ব্যবহৃত অক্ষরের সহিত বর্ত্তমান বাংলা অক্ষরের যে সম্বন্ধ, ঐ সময়ে পশ্চিম ভারতে ব্যবহৃত অক্ষরের সহিত বর্ত্তমান নাগরী অক্ষরের সম্বন্ধ তদপেক্ষা অধিকতর ঘনিষ্ঠ নহে।

# সপ্তদশ পরিচ্ছেদ

## ধর্ম

### প্রথম খণ্ড—ধর্মমত

#### ১। আর্য্যধর্মের প্রতিষ্ঠা

আর্য্যগণের সংস্পর্শে ও প্রভাবে তাঁহাদের ধর্মমত ও সামাজিক রীতিনীতি ক্রমে ক্রমে বাংলায় প্রতিষ্ঠা লাভ করিয়াছিল। খৃষ্টপূর্ব চতুর্থ শতাব্দির শেষ ভাগে যখন আলেকজান্ডার ভারত আক্রমণ করিয়াছিলেন তখন গঙ্গাসাগর-সঙ্গম হইতে পঞ্চনদের পূর্বসীমা পর্য্যন্ত ভূভাগ এক অখণ্ড বিরাট রাজ্যের অধীন ছিল। সুতরাং এই সময়ে যে বাংলায় আর্য্যপ্রভাব বিস্তৃত হইয়াছিল তাহা সহজেই অনুমান করা যাইতে পারে। বৌদ্ধায়ন-ধর্মসূত্র প্রভৃতি গ্রন্থ হইতে প্রমাণিত হয় যে তখনও বাংলা দেশে আর্য্য সভ্যতা বিস্তৃত হয় নাই। সুতরাং খৃষ্টপূর্ব ষষ্ঠ ও চতুর্থ শতাব্দির মধ্যে আর্য্য সভ্যতা বাংলায় প্রভাব বিস্তার করিয়াছিল এরূপ অনুমান করা যাইতে পারে।

ইহার পূর্বে যাহারা বাংলায় বাস করিতেন, তাঁহাদের ধর্মমত বিকল্প ছিল তাহা জানিবার উপায় নাই। কারণ ঐতিহাসিক যুগে তাঁহারা সকলেই বৌদ্ধ, জৈন ও ব্রাহ্মণ্য প্রভৃতি আর্য্যগণের ধর্ম গ্রহণ করিয়াছিলেন। তবে ইহা খুবই সম্ভব যে তাঁহাদের প্রাচীন ধর্মমত, সংস্কার, পূজাপদ্ধতি প্রভৃতি রূপান্তরিত হইয়া আর্য্য ধর্মের সহিত মিশিয়া গিয়াছে। ভারতবর্ষের ভিন্ন ভিন্ন প্রদেশে ব্রাহ্মণ্য ধর্মের যে গুরুতর প্রভেদ দেখা যায়, সম্ভবত প্রাচীন অধিবাসীগণের ধর্ম ও সংস্কারের প্রভাব তাহার অগ্রতম কারণ। বর্তমান কালে বাংলায় ও ভারতের অন্যান্য দেশে প্রচলিত ধর্ম অনুষ্ঠানের মধ্যে অনেক প্রভেদ দেখা যায়। অসম্ভব নহে যে ইহা অন্তত কতকাংশে বাংলার প্রাচীন অধিবাসীদিগের আচার অনুষ্ঠানের প্রভাবের ফল। কিন্তু ইহা সত্য বলিয়া গ্রহণ করিলেও প্রাচীন বাঙ্গালীর ধর্মমত সম্বন্ধে কোন সুস্পষ্ট ধারণা করা যায় না। সুতরাং বাংলায় আর্য্য ধর্মের প্রতিষ্ঠার পূর্বে যে ধর্ম প্রচলিত ছিল তাহার কোন বিবরণ দেওয়া সম্ভবপর নহে। আর্য্য সভ্যতার প্রভাবে খুব প্রাচীন কালেই বাংলায় বৌদ্ধ, জৈন ও ব্রাহ্মণ্য ধর্ম প্রতিষ্ঠা লাভ করিয়াছিল। কিন্তু গুপ্ত যুগের অর্থাৎ খৃষ্টীয় চতুর্থ কি পঞ্চম শতাব্দির পূর্বে বাংলার এই সমুদয় ধর্ম সম্বন্ধে বিস্তৃত কোন বিবরণ জানিবার উপায় নাই।

## ২। বৈদিক ধর্ম

গুপ্ত যুগের তাম্রশাসনগুলি হইতে স্পষ্টই প্রমাণিত হয় যে, বৈদিক যাগযজ্ঞাদি ক্রিয়া বাংলায় বহুল পরিমাণে অনুষ্ঠিত হইত। এই সমুদয় তাম্রশাসনে অগ্নিহোত্র ও পঞ্চ মহাযজ্ঞ প্রভৃতি অনুষ্ঠান এবং মন্দির নির্মাণ ও দেবদেবীর পূজার ব্যয় নির্বাহের জন্য ব্রাহ্মণদিগকে ভূমিদানের উল্লেখ আছে। এই সমুদয় ব্রাহ্মণদিগের পরিচয় প্রসঙ্গে উল্লিখিত হইয়াছে যে তাঁহারা ঋক, যজু অথবা সামবেদ অধ্যয়ন করিতেন। ভূমিদান করিয়া ব্রাহ্মণ প্রতিষ্ঠা করা বিশেষ পুণ্যের কার্য বলিয়া বিবেচিত হইত এবং একখানি তাম্রশাসনে বাংলার পূর্ব সীমান্তে ব্যাঘ্রাদি হিংস্র জন্তু সমাকুল নিবিড় অরণ্য প্রদেশেও মন্দির নির্মাণ এবং বেদজ্ঞ ব্রাহ্মণ প্রতিষ্ঠার উল্লেখ আছে। উদ্ভবে হিমালয় শিখরেও মন্দির নির্মিত হইত। সুতরাং সমস্ত বাংলা দেশেই যে গুপ্ত যুগে ব্রাহ্মণ্য ধর্মের, বিশেষত বৈদিক অনুষ্ঠানের, প্রতিষ্ঠা হইয়াছিল সে বিষয়ে কোন সন্দেহ নাই। কামরূপরাজ ভাস্করবর্মার নিধানপুরে প্রাপ্ত তাম্রশাসনে শ্রীহট্ট অঞ্চলে ষষ্ঠীয় যষ্ঠ শতাব্দীতে ভূমিদান পূর্বক ২০৫ জন ব্রাহ্মণের প্রতিষ্ঠার কথা লিখিত আছে। এই ব্রাহ্মণগণের বিভিন্ন বৈদিক শাখা “গোত্রের নামও উল্লিখিত হইয়াছে।

পালরাজগণের তাম্রশাসনেও বেদ, বেদাঙ্গ, মীমাংসা প্রভৃতিতে ব্যুৎপন্ন এবং বৈদিক যজ্ঞাদি অনুষ্ঠানে অভিজ্ঞ ব্রাহ্মণ বংশের বহু উল্লেখ পাওয়া যায়। বর্মণ ও সেন রাজগণের পৃষ্ঠপোষকতায় বৈদিক ধর্ম বাংলায় আরও প্রসার লাভ করে। ভট্ট ভবদেবের দেশস্থিতে বেদাবদ্ সাবণ গোত্র ব্রাহ্মণ অনুষ্ঠিত শত গ্রামের উল্লেখ আছে। বর্মণ রাজগণ বৈদিক ধর্মের রক্ষক বলিয়া তাম্রশাসনে অভিহিত হইয়াছেন। ‘ব্রহ্মবাদী’ সামন্তসেন শেষ বয়সে যজ্ঞধূমে পরিপূর্ণ গজাতীরস্থিত পবিত্র ঋষির আশ্রমে বাস করিতেন। সমসাময়িক লিপির এই সমুদয় উক্তি হইতে প্রমাণিত হয় যে গুপ্ত যুগ হইতে হিন্দু যুগের শেষ পর্য্যন্ত বাংলায় বৈদিক যাগ যজ্ঞের অনুষ্ঠান হইত। সেন যুগে রচিত কয়েকখানি গ্রন্থও এই অনুমানের সমর্থন করে।

তাম্রশাসন হইতে জানা যায় যে মধ্যদেশ হইতে আসিয়া কোন কোন বেদজ্ঞ ব্রাহ্মণ বাংলা দেশে বসতি স্থাপন করিয়াছিলেন। ইহা হইতে এক্রূপ মনে করিবার কারণ নাই যে বাংলাদেশে বেদজ্ঞ ব্রাহ্মণের অভাব ছিল। কারণ বেদজ্ঞ ব্রাহ্মণ ভারতবর্ষের এক প্রদেশ হইতে অথবা প্রদেশে যাইয়া বাস-স্থাপন করিয়াছেন, এক্রূপ বহু দৃষ্টান্ত তাম্রশাসন হইতে জানা যায়। বাংলা দেশ

হইতেও বহু বেদজ্ঞ ব্রাহ্মণের দেশান্তরে গমনের কথা তাত্ত্বশাসনে পাওয়া যায়। এদেশে বিশেষ ভাবে প্রচলিত একটি জনশ্রুতি অনুসারে বেদজ্ঞ ব্রাহ্মণের অভাব হওয়ায় রাজা আদিশূর কাণ্ডকুজ হইতে যে পাঁচজন ব্রাহ্মণ আনয়ন করেন, বাংলার রাঢ়ীয় ও বারেন্দ্র ব্রাহ্মণগণ, অর্থাৎ বৈদিক প্রভৃতি কয়েকটি ক্ষুদ্র সম্প্রদায় ব্যতীত প্রায় সকল ব্রাহ্মণই, তাঁহাদের বংশ সম্বৃত। পূর্বে যাহা বলা হইয়াছে তাহা এই মতের সম্পূর্ণ বিরোধী, এবং বাংলায় যে গুপ্তযুগের পরবর্তী কোনও কালে বৈদিক অনুষ্ঠানে অভিজ্ঞ ব্রাহ্মণের একেবারে অভাব ছিল, একরূপ মনে করিবার কারণ নাই। তবে হয়ত ভারতবর্ষের অত্র কোন কোন প্রদেশের তুলনায় বাংলায় বৈদিক চর্চা খুবই কম হইত। পালযুগে বহুশতাব্দী পর্য্যন্ত বৌদ্ধ ধর্মের প্রভাবের কথা স্মরণ করিলে ইহাই খুব সম্ভব বলিয়া মনে হয়।

কুলশাস্ত্রমতে যে রাঢ়ীয় ও বারেন্দ্র ব্রাহ্মণগণ বৈদিক অনুষ্ঠানের জ্ঞান এদেশে প্রতিষ্ঠিত হইয়াছিলেন, পণ্ডিতপ্রবর হলায়ুধ স্পষ্টত তাঁহাদেরই বৈদিক জ্ঞানের অভাবের উল্লেখ করিয়াছেন। হলায়ুধের উক্তি হইতে প্রমাণিত হয় যে (সম্ভবত অন্য প্রদেশের তুলনায়) তাঁহার কালে বাংলায় বৈদিক জ্ঞানের খুব প্রসার ছিল না, এবং কোন কোন শ্রেণীর ব্রাহ্মণের এ বিষয়ে যথেষ্ট শৈথিল্য ছিল। কিন্তু তাঁহার সময়েও যে বাংলায় বেদের পঠন পাঠন ও বৈদিক অনুষ্ঠান বিশেষ ভাবেই প্রচলিত ছিল তাঁহার নিজের জীবনী এবং অন্যান্য গ্রন্থ হইতে তাহা স্পষ্ট প্রমাণিত হয়।

### ৩। পৌরাণিক ধর্ম

ভারতের অত্রাণ্ড প্রদেশের ঞ্চায় গুপ্তযুগে বাংলায় পৌরাণিক ধর্মের যথেষ্ট প্রসার ছিল। বাংলায় যে সমুদয় তাত্ত্বশাসন আবিষ্কৃত হইয়াছে তাহাতে অনেক পৌরাণিক দেব-দেবী ও তাঁহাদের বহু আখ্যান পাওয়া যায়। দেবরাজ ইন্দ্র অথবা পুরন্দর, এবং দৈত্যরাজ বলির হস্তে তাঁহার পরাজয়; বিষ্ণু ( হরি, মুরারি ), লক্ষ্মী এবং তাঁহাদের বাহন গরুড় ; বিষ্ণুর নাভিকমল হইতে ব্রহ্মার উৎপত্তি ; সত্যযুগে বলি এবং দ্বাপরে কর্ণের দানশীলতা ; অগস্ত্য কর্তৃক সমুদ্র-পান ; পরশুরাম কর্তৃক ক্ষত্রিয়কুল সংহার ; রামচন্দ্রের বীরত্ব ; পৃথু, সগর, নল, ধনঞ্জয়, যযাতি ও অশ্বরীষ প্রভৃতির কাহিনী,—এই সমুদয় তাত্ত্বশাসনে পুনঃ পুনঃ উল্লিখিত হইয়াছে।

বাংলায় যে বৈষ্ণব ও শৈব ধর্মের বিশেষ প্রসার ছিল তাহাও এই সমুদয়

তাম্রশাসন হইতে জানা যায়। ভাগবত সম্প্রদায়ের উপাস্ত্র দেবতা বিষ্ণু এখন কৃষ্ণে রূপান্তরিত হইয়াছেন। কৃষ্ণের জন্ম ও বাল্য লীলা, বিশেষতঃ গোপী-দিগের সহিত ক্রীড়া প্রভৃতির অনেক প্রসঙ্গ আছে—এবং তিনি যে বিষ্ণুর অবতার তাহারও উল্লেখ আছে। বিষ্ণুর অন্ত্যান্ত অবতারগণেরও নাম ও কীর্তি বর্ণিত হইয়াছে। শিবের ভিন্ন ভিন্ন নাম (যথা সদাশিব, অর্দ্ধনারীশ্বর, ধূর্জটি ও মহেশ্বর); তাঁহার শক্তি সর্বাঙ্গী, উমা অথবা সতী; দক্ষযজ্ঞে সতীর দেহত্যাগ; কার্তিক গণেশ নামে তাঁহার দুই পুত্র প্রভৃতিরও উল্লেখ দেখিতে পাওয়া যায়। এই সমুদয় দেবদেবীর মূর্তির সংখ্যা ও গঠন প্রণালীর বিভিন্নতা হইতে সহজেই অনুমান করা যায় যে, বাংলায় ইহাদের পূজা বিশেষভাবে প্রচলিত ছিল এবং উপাসকগণ বহুসংখ্যক বিশিষ্ট সম্প্রদায়ে বিভক্ত ছিলেন।

### ৪। বৈষ্ণব ধর্ম

বাঁকুড়া নগরীর ১২ মাইল উত্তর-পশ্চিমে অবস্থিত স্মুনিয়া নামক পর্বতের গুহায় উৎকীর্ণ রাজা চন্দ্রবর্মার একখানি লিপিতে বাংলায় সর্বপ্রথমে বিষ্ণুপূজার উল্লেখ পাওয়া যায়। এই গুহাখাত্রে একটি চক্র খোদিত আছে। সুতরাং অনুমিত হয় যে ইহা একটি বিষ্ণুর মন্দির ছিল। রাজা চন্দ্রবর্মা চতুর্থ শতাব্দীতে রাজত্ব করিতেন এবং চক্রস্বামী অর্থাৎ বিষ্ণুর ভক্ত ছিলেন। পঞ্চম শতাব্দীতে উত্তর বঙ্গে, এবং এমন কি সুদূর হিমালয় শিখরে গোবিন্দস্বামী, শ্বেতবরাহস্বামী, কোকামুখস্বামী প্রভৃতির মন্দির প্রতিষ্ঠিত হইয়াছিল। সম্ভবত এ সমুদয়ই বিষ্ণুমূর্তি। সপ্তম শতাব্দীতে উৎকীর্ণ লিপিতে বাংলার পূর্বপ্রান্তে ত্রিপুর ও সমাকুল গভীর অরণ্য প্রদেশেও ভগবান অনন্তনারায়ণের মন্দির ও পূজার উল্লেখ আছে। সুতরাং ইহার বহু পূর্বেই যে বৈষ্ণব ধর্ম বাংলার সর্বত্র বিস্তৃত হইয়াছিল তাহা সহজেই অনুমান করা যাইতে পারে।

বাংলার বৈষ্ণব ধর্মে কৃষ্ণ-লীলার বিশেষ প্রাধান্য ছিল। পাহাড়পুর মন্দিরগাত্রে কৃষ্ণের বাল্য-লীলার অনেক কাহিনী উৎকীর্ণ আছে। সঙ্গপ্রসূত কৃষ্ণকে লইয়া বনুদেবের গোকুলে গমন, গোপগোপীগণের সহিত ক্রীড়া, গোবর্দ্ধনধারণ, যমলার্জুন সংহার, কেশীবধ, চাপুর ও মুষ্টিকের সহিত যুদ্ধ প্রভৃতি কাহিনী যে ষষ্ঠ শতাব্দী বা তাহার পূর্বেই এদেশে প্রচলিত ছিল পাহাড়পুরের প্রস্তর শিল্প হইতেই তাহা প্রমাণিত হয়। একখানি প্রস্তরে কৃষ্ণ ও একটি স্ত্রীমূর্তি খোদিত আছে। কেহ কেহ অনুমান করেন যে ইহা রাধাকৃষ্ণের যুগলমূর্তি। পরবর্তীকালে রাধা বৈষ্ণব সম্প্রদায়ে প্রাধান্য লাভ

করিলেও হালের সপ্তশতী ব্যতীত প্রাচীন কোন গ্রন্থে রাধার উল্লেখ নাই। পাহাড়পুরে রাধাকৃষ্ণের যুগলমূর্তি থাকিলে বাংলায় ইহাই রাধার আখ্যানের সর্বপ্রাচীন নিদর্শন। কিন্তু খুব সম্ভবত পাহাড়পুরের উক্ত দ্বীমূর্তি রুস্তগী অথবা সত্যভামা। সুতরাং সপ্তম শতাব্দীতে কৃষ্ণ-লীলা বাংলায় খুব জনপ্রিয় হইলেও ঐ সময়ে রাধা-কৃষ্ণের কাহিনী প্রচলিত ছিল কিনা তাহা নিঃসংশয়ে বলা যায় না।

অষ্টম হইতে দ্বাদশ শতাব্দী পর্য্যন্ত যে বৈষ্ণবধর্ম বিশেষভাবে প্রচলিত ছিল ঐযুগের বহুসংখ্যক বিষ্ণু-মূর্তি হইতেই তাহা প্রমাণিত হয়। রাজা লক্ষ্মণ-সেন পরম বৈষ্ণব ছিলেন এবং তাঁহার সময় হইতে রাজকীয় শাসনের প্রারম্ভে শিবের পরিবর্তে বিষ্ণুর স্তবের প্রচলন হয়। তাঁহার সভাকবি জয়দেবের গীত-গোবিন্দ যে বৈষ্ণব সম্প্রদায়ে বিশেষ সম্মানিত ও আদৃত তাহা পূর্বেই বলা হইয়াছে। গীতগোবিন্দে যে বিষ্ণুর দশ অবতারের বর্ণনা আছে কালে তাহাই সমগ্র ভারতে গৃহীত হইয়াছে। ইহার পূর্বে অবতার সম্বন্ধে কোন নির্দিষ্ট বা স্পষ্ট ধারণা ছিল না। ভাগবত পুরাণে অবতারের যে তিনটি তালিকা আছে তাহাতে অবতারের সংখ্যা যথাক্রমে ২২, ২৩ ও ১৬। হরিবংশে দশ অবতারের উল্লেখ থাকিলেও তাহার সহিত জয়দেবের কথিত এবং বর্তমানে প্রচলিত দশ অবতারের অনেক প্রভেদ। মহাভারত ও বায়ুপুরাণে এই দশ অবতারের তালিকা আছে—কিন্তু তাহার পাশেই বিভিন্ন তালিকাও দেওয়া হইয়াছে। জয়দেব বর্ণিত যে অবতারবাদ ক্রমে ভারতের সর্বত্র প্রামাণিক বলিয়া গৃহীত হইয়াছে তাহা ভারতে বাংলার বৈষ্ণব সম্প্রদায়ের একটি প্রধান দান বলিয়া গ্রহণ করা যাইতে পারে। জয়দেব বর্ণিত রাধাকৃষ্ণ লীলাও সম্ভবত বাংলায়ই প্রথমে প্রচলিত হয় ও পরে সমগ্র ভারতে প্রসিদ্ধি লাভ করে।

### ৫। শৈবধর্ম

বৈষ্ণব ধর্মের স্থায়ী শৈবধর্মও গুপ্তযুগে এদেশে প্রচলিত ছিল। পঞ্চম শতাব্দীর লিপিতে হিমালয় গিরিশিখরে পূর্বোক্ত শ্বেতবরাহস্বামী ও কোকামুখস্বামীর মন্দিরপার্শ্বে শিবলিঙ্গ প্রতিষ্ঠার উল্লেখ পাওয়া যায়। ষষ্ঠ শতাব্দীতে মহারাজ বৈষ্ণুগুপ্ত ও সপ্তম শতাব্দীতে মহারাজাধিরাজ শশাঙ্ক ও ভাস্করবর্মা শৈবধর্মের পৃষ্ঠপোষক ছিলেন। পাহাড়পুরের মন্দির গাত্রে শিবের কয়েকটি মূর্তি উৎকীর্ণ দেখিতে পাওয়া যায়।

আর্য্যাবর্তে পাণ্ডুপত মতাবলম্বীরাই সর্বপ্রাচীন শৈব সম্প্রদায়। সত্ৰাট

নারায়ণপালের একখানি তাম্রশাসন হইতে জানা যায় যে তিনি নিজ একটি শিবমন্দির প্রতিষ্ঠা করিয়া তত্রত্য পাশুপত্যাচার্য্য-পরিষদের ব্যবহারার্থ একটি গ্রাম দান করিয়াছিলেন। ইহা হইতেই প্রমাণিত হয় যে বাংলায় পাশুপত সম্প্রদায় খুব প্রবল ছিল। সদাশিব সেনরাজগণের ইষ্টদেবতা ছিলেন এবং রাজকীয় মুদ্রায় তাঁহার মূর্তি উৎকীর্ণ দেখিতে পাওয়া যায়। বিজয়সেন ও বল্লালসেন শৈব ছিলেন। লক্ষ্মণসেন ও তাঁহার বংশধরগণ বৈষ্ণব হইলেও কুলদেবতা সদাশিবকে পরিত্যাগ করেন নাই।

খুব প্রাচীনকাল হইতেই বাংলায় শক্তিপূজার প্রচলন হইয়াছিল। দেবী-পুরাণে উক্ত হইয়াছে যে রাঢ় ও বরেন্দ্রে বামাচারী শাক্তসম্প্রদায় বিভিন্নরূপে দেবীর উপাসনা করিতেন। দেবীপুরাণ সম্ভবতঃ সপ্তম শতাব্দির শেষে অথবা অষ্টম শতাব্দির প্রারম্ভে রচিত হইয়াছিল। বাংলার বহু তান্ত্রিক গ্রন্থে শাক্ত মত প্রচারিত হইয়াছে। কিন্তু এই শ্রেণীর কোন গ্রন্থ দ্বাদশ শতাব্দির পূর্বে রচিত হইয়াছিল কিনা বলা কঠিন। তবে তদ্রোক্ত শাক্তমত যে হিন্দুযুগ শেষ হইবার পূর্বেই বাংলায় প্রসার লাভ করিয়াছিল ইহাই সম্ভব বলিয়া মনে হয়। পাহাড়পুরের মন্দিরগাত্রে একটি মল্লভাস্ত্রমূর্তি বাম হস্তে মঙ্গলকর শিখা ধরিয়া দক্ষিণ হস্তে তরবারির দ্বারা নিজের গ্রীবাদেশ কাটিতে উত্তত এরূপ একটি দৃশ্য উৎকীর্ণ আছে। কেহ কেহ অনুমান করেন যে ইহা দেবীর নিকট শাক্তভক্তের শির-চ্ছেদের দৃশ্য। সুতরাং ইহা সপ্তম বা অষ্টম শতাব্দিতে শাক্ত সম্প্রদায়ের অস্তিত্বের প্রমাণ স্বরূপ গ্রহণ করা যাইতে পারে।

### ৩. অন্যান্য পৌরাণিক ধর্ম সম্প্রদায়

বিষ্ণু, শিব, ও শক্তি ব্যতীত অগ্ণ্য পৌরাণিক দেব দেবীর পূজাও বাংলায় প্রচলিত ছিল। কিন্তু এই সব সম্প্রদায় সম্বন্ধে বিশেষ কিছুই জানা যায় না। রাজতরঙ্গিনীতে উক্ত হইয়াছে যে পুণ্ড্রবর্ধনে কার্তিকেয়ের এক মন্দির ছিল। কেশবসেন ও বিশ্বরূপসেন তাঁহাদের তাম্রশাসনে পরমসৌর বলিয়া উল্লিখিত হইয়াছেন। সুতরাং সূর্য্য দেবতার উপাসক সৌর সম্প্রদায় বাংলায় প্রতিপত্তি লাভ করিয়াছিল এরূপ অনুমান করা যাইতে পারে। এই সূর্য্য বৈদিক সূর্য্য দেবতা নহেন। সম্ভবতঃ মগ ব্রাহ্মণগণ কুশাণযুগে শকদ্বীপ হইতে এই সূর্য্য পূজার প্রচলন করেন।

কিন্তু সমসাময়িক লিপি বা সাহিত্যে অগ্ণ্য সম্প্রদায়ের উল্লেখ না থাকিলেও বাংলায় কার্তিক ও সূর্য্য ব্যতীত অগ্ণ্য দেব দেবীর বহুসংখ্যক মূর্তি আবিষ্কৃত



হইয়াছে। সুতরাং ইহাদের পূজাও যে এদেশে প্রচলিত ছিল তাহা সহজেই বুঝা যায়।

### ৭। জৈনধর্ম

প্রাচীন জৈন ধর্মগ্রন্থে লিখিত আছে যে বর্দ্ধমান মহাবীর রাঢ় প্রদেশে আসিয়াছিলেন, কিন্তু সেখানকার লোকেরা তাঁহার সহিত অভ্যস্ত অসদ্ব্যবহার করিয়াছিল। কোন্ সময়ে জৈন ধর্ম বাংলায় প্রথম প্রতিষ্ঠা লাভ করে তাহা সঠিক বলা যায় না। দিব্যাবদানে অশোকের সম্বন্ধে একটি গল্প আছে। পুণ্ড্রবর্দ্ধন নগরীর জৈনগণ মহাবীরের চরণতলে পতিত বুদ্ধদেবের চিত্র অঙ্কিত করিয়াছে শুনিয়া তিনি নাকি পাটলিপুত্রের সমস্ত জৈনগণকে হত্যা করিয়াছিলেন। এই গল্পটির মূলে কতটা সত্য আছে বলা কঠিন—সুতরাং অশোকের সময়ে উত্তরবঙ্গে জৈন সম্প্রদায় বর্দ্ধমান ছিল এরূপ সিদ্ধান্ত করা সম্ভব নহে।

কিন্তু অশোকের সময় না থাকিলেও খৃষ্টপূর্ব দ্বিতীয় শতাব্দীতে যে বঙ্গে জৈনধর্ম দৃঢ়ভাবে প্রতিষ্ঠিত হইয়াছিল তাহার প্রমাণ আছে। প্রাচীন জৈনগ্রন্থ কল্পসূত্র মতে নোর্ঘ্য সম্রাট চন্দ্রগুপ্তের সমসাময়িক জৈন আচার্য্য ভদ্রবাহুর শিষ্য গোদাস যে গোদাস-গণ প্রতিষ্ঠিত করেন কালক্রমে তাহা চারি শাখায় বিভক্ত হয়। ইহার তিনটির নাম তাম্রলিপিক, কোটীবর্ষীয় এবং পুণ্ড্রবর্দ্ধনীয়। এই তিনটি যে বাংলার তিনটি সুপরিচিত নগরীর নাম হইতে উদ্ভূত তাহাতে কোন সন্দেহ নাই। কল্পসূত্রোক্ত এই শাখাগুলি কাল্পনিক নহে, সত্য সত্যই ছিল, কারণ খৃষ্টপূর্ব প্রথম শতাব্দীতে উৎকীর্ণ শিলালিপিতে তাহাদের উল্লেখ আছে। সুতরাং উত্তরবঙ্গ (পুণ্ড্রবর্দ্ধন, কোটীবর্ষ) ও দক্ষিণ বঙ্গে (তাম্রলিপ্তি) যে খুব প্রাচীনকাল হইতেই জৈন সম্প্রদায় প্রসার লাভ করিয়াছিল তাহাতে কোন সন্দেহ নাই।

পাহাড়পুরে প্রাপ্ত একখানি তাম্রশাসন হইতে জানা যায় যে খৃষ্টীয় চতুর্থ শতাব্দী বা তাহার পূর্বে ঐ স্থানে একটি জৈন বিহার ছিল। চীন দেশীয় পরিব্রাজক হুয়েনসাং লিখিয়াছেন যে তাঁহার সময়ে বাংলায় দিগম্বর জৈনের সংখ্যা খুব বেশী ছিল। কিন্তু তাহার পরই বাংলায় জৈন ধর্মের প্রভাব হ্রাস হয়। পাল ও সেনরাজগণের তাম্রশাসনে এই সম্প্রদায়ের কোন উল্লেখ নাই। তবে ইহা যে একেবারে লুপ্ত হয় নাই, প্রাচীন জৈনমূর্তি হইতেই তাহা প্রমাণিত হয়।

## ৮। বৌদ্ধধর্ম

সম্রাট অশোকের সময় বৌদ্ধধর্ম বাংলায় প্রতিষ্ঠা লাভ করিয়াছিল। ইহার পূর্বেও সম্ভবত এদেশে বৌদ্ধ ধর্মের প্রচার হইয়াছিল, তবে এ সম্বন্ধে নিশ্চিত কিছু জানা যায় না। খৃষ্টীয় তৃতীয় শতাব্দীতে উৎকীর্ণ একখানি শিলালিপি হইতে জানা যায় যে বঙ্গদেশ বৌদ্ধধর্মের একটি প্রধান কেন্দ্র ছিল।

পঞ্চম শতাব্দীতে বৌদ্ধধর্ম বাংলায় বিশেষ প্রভাব বিস্তার করিয়াছিল। ফা-হিয়ান লিখিয়াছেন যে তখন তাম্রলিপ্ত নগরীতে ২২টি বৌদ্ধ বিহার ছিল। তিনি তথায় দুই বৎসর থাকিয়া বৌদ্ধ গ্রন্থ লিখিয়া ছিলেন এবং বৌদ্ধ মূর্তির ছবি আঁকিয়া ছিলেন। তাহার বর্ণিত তাম্রলিপ্তর বিশাল বৌদ্ধ সংঘের একটি উজ্জল চিত্র ফুটিয়া উঠিয়াছে।

৫০৬-৭ অব্দে উৎকীর্ণ একখানি শিলালিপি হইতে জানা যায় যে কুমিল্লা অঞ্চলে তখন বহু বৌদ্ধ বিহার ছিল। তাহার মধ্যে একটির নাম রাজ-বিহার; সম্ভবত কোন রাজা কর্তৃক হই। প্রতিষ্ঠিত হইয়াছিল। সুতরাং পঞ্চম শতাব্দীতে বাংলার সর্বত্রই যে বৌদ্ধধর্মের খুব প্রতিপত্তি ছিল এরূপ সিদ্ধান্ত করা যাইতে পারে।

সপ্তম শতাব্দীতে বাংলায় যে বৌদ্ধধর্ম বেশ প্রভাবশালী ছিল বহু চীনদেশীয় পবিত্রাজকের উক্তি হইতে তাহা জানা যায়। ইহাদের মধ্যে হুয়েন সাংয়ের বিবরণ বিশেষভাবে উল্লেখযোগ্য। তিনি বাংলার বিভিন্ন অঞ্চলে ভ্রমণ করিয়া স্বচক্ষে দেখিয়া যাহা লিখিয়াছেন তাহার সারমর্ম নিয়ে দিতেছি।

“কজঙ্গল (রাজমহলের নিকটবর্তী) প্রদেশে ছয় সাতটি বিহারে তিন শতেরও অধিক ভিক্ষু বাস করেন। অগ্ন্যাগ্ন ধর্ম সম্প্রদায়ের দশটি মন্দির আছে। এই প্রদেশের উত্তর ভাগে গঙ্গাতীরের নিকট বিশাল উচ্চ দেবালয় আছে। ইহা প্রস্তর ও ইষ্টকে নির্মিত এবং ইহার ভিত্তি গাত্রে ক্ষোদিত ভাস্কর্য্য উচ্চ শিল্পকলার নিদর্শন। চতুর্দিকের দেওয়ালে বিভিন্ন প্রকোষ্ঠে বুদ্ধ, অগ্ন্যাগ্ন দেবতা ও সাধু পুরুষদের মূর্তি উৎকীর্ণ।

“পুণ্ড্রবর্ধনে (উত্তর বঙ্গ) ২০টি বিহারে তিন শতেরও অধিক হীনযান ও মহাযান সম্প্রদায়ের বৌদ্ধ ভিক্ষু বাস করেন। অগ্ন্যাগ্ন সম্প্রদায়ের প্রায় একশত দেবমন্দির আছে। উলঙ্গ নিগ্রহ্মপন্থীদের (জৈন) সংখ্যা খুব বেশী। রাজধানীর তিন চারি মাইল পশ্চিমে পো-চি-শো সংঘারাম। ইহার অঙ্গনগুলি

যেমন প্রশস্ত, কক্ষ ও শিখরগুলিও তেমনি উচ্চ। ইহার ভিক্ষুসংখ্যা ৭০০। সকলেই মহাযান মতাবলম্বী। পূর্ব ভারতের বহু প্রসিদ্ধ বৌদ্ধ আচার্য্য এখানে বাস করেন। সমতট (পূর্ববঙ্গ) প্রদেশের রাজনীতে প্রায় ৩০টি বৌদ্ধ বিহারে ২০০০ ভিক্ষু থাকেন। অগ্ন্যগ্ন ধর্মসম্প্রদায়ের মন্দিরের সংখ্যা একশত। জৈনগণ সংখ্যায় খুব বেশী। তাম্রলিপ্তে দশটি বিহারে সহস্র বৌদ্ধ ভিক্ষু বাস করেন। অগ্ন্যগ্ন সম্প্রদায়ের মন্দির সংখ্যা পঞ্চাশ। কর্ণসুবর্ণে দশটি বৌদ্ধ বিহারে হীনযান মতাবলম্বী দুই সহস্র ভিক্ষু বাস করেন। অন্যান্য ধর্মাবলম্বীর সংখ্যা খুব বেশী—তাহাদের দেবমন্দিরের সংখ্যা পঞ্চাশ। রাজধানীর নিকটে লো-টো-বি-চি বিহার। ইহার কক্ষগুলি প্রশস্ত ও উচ্চ। বহুতালায় নির্মিত বিহারটিও খুব উচ্চ। রাজ্যের সমুদয় সম্ভ্রান্ত শিক্ষিত ও প্রসিদ্ধ ব্যক্তিগণ এখানে সমবেত হন।”

এই সংক্ষিপ্ত বর্ণনা হইতে বেশ বুঝা যায় যে তখন বাংলায় বৈষ্ণব, শৈব, বৌদ্ধ ও জৈন প্রভৃতি বিবিধ ধর্ম সম্প্রদায়ের বহুসংখ্যক মন্দির ও বিহার বর্তমান ছিল। জৈন ভিক্ষুগণ সংখ্যায় বৌদ্ধ ভিক্ষু অপেক্ষা বেশী ছিলেন বলিয়াই মনে হয়। বৌদ্ধগণ সংখ্যা-গরিষ্ঠ না হইলেও বাংলায় বৌদ্ধ ধর্মের বেশ প্রভাব ছিল। ইংসিং তাম্রলিপ্তির বৌদ্ধ বিহারের যে বিস্তৃত বিবরণ দিয়াছেন তাহাতে জানা যায় যে তথাকার ভিক্ষুগণের জীবন বৌদ্ধ ধর্মের উচ্চ আদর্শ ও বিধি বিধানের সম্পূর্ণ অনুবর্তী ছিল। শেংচি নামে ইংসিংয়ের সমসাময়িক আর একজন চীন দেশীয় বৌদ্ধ পরিব্রাজক লিখিয়াছেন যে সমতটের রাজধানীতে চারি সহস্রেরও বেশী বৌদ্ধ ভিক্ষু ও ভিক্ষুণী ছিলেন এবং ঐ দেশের রাজা রাজভট প্রতিদিন বুদ্ধের লক্ষ মৃণ্ময়মূর্তি নির্মাণ করিতেন এবং মহাপ্রজ্ঞাপারমিতার লক্ষ শ্লোক পাঠ করিতেন। রাজভট সম্ভবত খড়্গবংশীয় রাজা ছিলেন। এই সমুদয় বর্ণনা হইতে বেশ বোঝা যায় যে সপ্তম শতাব্দীতে বৌদ্ধধর্ম বাংলায় খুব শক্তিশালী ছিল এবং বাংলার বৌদ্ধগণ জ্ঞান, ধর্মনিষ্ঠা ও আচার ব্যবহারে সমগ্র বৌদ্ধজগতের শ্রদ্ধা ও সম্মানের পাত্র হইয়াছিলেন।

সপ্তম শতাব্দীতে একজন বাঙ্গালী বৌদ্ধজগতে বিশেষ প্রসিদ্ধিলাভ করিয়াছিলেন। ইহার নাম শীলভদ্র—সমতটের রাজবংশে ইহঁদের জন্ম হয়। ইনি জগদ্বিখ্যাত নালন্দা বিশ্ববিদ্যালয়ের প্রধান আচার্য্য ও সর্বাধ্যক্ষের পদ অলঙ্কৃত করিয়া বাঙ্গালীর মুখ উজ্জ্বল করিয়া গিয়াছেন। ইহার জীবনী পরবর্তী এক অধ্যায়ে আলোচিত হইবে।

অষ্টম শতাব্দীতে বৌদ্ধ পালরাজগণের অভ্যুদয়ে বাংলায় বৌদ্ধধর্মের

প্রভাব খুব বৃদ্ধি পাইয়াছিল। এই সময় হইতেই ভারতের অগ্ৰাণ্ণ প্রদেশে বৌদ্ধধর্ম ক্রমশ ক্ষীণবল হইয়া আসিতেছিল এবং দুই এক শত বৎসরের মধ্যেই তাহার প্রভাব প্রায় সম্পূর্ণভাবে বিলুপ্ত হইয়াছিল। কিন্তু পালরাজগণের সুদীর্ঘ চারিশত বৎসর রাজত্বকালে বাংলা ও বিহারে বৌদ্ধধর্ম প্রবল ছিল। দ্বাদশ শতাব্দীর শেষে তুর্কী আক্রমণের ফলে যখন প্রথমে মগধের ও পরে উত্তর বাংলার বৌদ্ধ বিহার ও মন্দিরগুলি ধ্বংস হয়, তখনই বৌদ্ধ সংঘ ভারতের পূর্ব-প্রান্তস্থিত এই সর্বশেষ আশ্রয় স্থান হইতে বিতাড়িত হইয়া আত্মরক্ষার জন্য নেপাল ও তিব্বতে গমন করে। বৌদ্ধসংঘই ছিল বৌদ্ধধর্মের প্রধান কেন্দ্র। কাজেই বৌদ্ধ সংঘের সঙ্গে সঙ্গে বৌদ্ধধর্মও ভারতবর্ষ হইতে বিলুপ্ত হয়।

অষ্টম হইতে দ্বাদশ শতাব্দীর মধ্যে বাংলায় ও বিহারে বৌদ্ধধর্মের অনেক গুরুতর পরিবর্তন ঘটিয়াছিল। কিন্তু এই চারিশত বৎসরে ইহা উত্তরে তিব্বত ও দক্ষিণে যবদ্বীপ, সুমাত্রা, মালয় প্রভৃতি অঞ্চলে যথেষ্ট প্রভাব বিস্তার করিয়াছিল। বাংলার পালরাজগণ ভারতে বৌদ্ধধর্মের শেষ রক্ষক হিসাবে সমগ্র বৌদ্ধজগতে শ্রেষ্ঠ সম্মানের আসন পাইয়াছিলেন। ইহার ফলে বাংলায় ও বিহারে বৌদ্ধধর্মের যে পরিবর্তন ঘটিয়াছিল তাহা এই সমুদয় দেশেও ছড়াইয়া পড়িয়াছিল। বাংলা ও বিহারের প্রসিদ্ধ আচার্য্যগণ এই সমুদয় দেশে গিয়া এই নূতন ধর্মের ভিত্তি দৃঢ় করিয়াছিলেন।

পাল সম্রাটগণ বহু বৌদ্ধ বিহার প্রতিষ্ঠা করিয়াছিলেন। ইহার মধ্যে ধর্মপাল প্রতিষ্ঠিত বিক্রমশীল মহাবিহারই সমগ্র বৌদ্ধ ভাগীরথী তীরে এক গিরিশীর্ষে এই মহাবিহারটি অবস্থিত ছিল। বর্তমান পাণ্ডুরঘাটায় (ভাগলপুর জেলা) কেহ কেহ ইহার অবস্থিতি নির্দেশ করিয়াছেন, কিন্তু এ সম্বন্ধে নিশ্চিত কিছু বলা যায় না। ধর্মপাল প্রতিষ্ঠিত এই মহাবিহার এবং সোমপুর ও ওদন্তপুরী বিহারের কথা পূর্বেই (৪০ পৃঃ) উল্লিখিত হইয়াছে সুতরাং এস্থলে ইহাদের বর্ণনা অনাবশ্যক।

সোমপুর ব্যতীত বাংলায় আরও কয়েকটি প্রসিদ্ধ বিহার ছিল। যে ত্রৈকূটক বিহারে আচার্য্য হরিভদ্র অভিসময়ালঙ্কার গ্রন্থের প্রসিদ্ধ টীকা প্রণয়ন করেন তাহা সম্ভবত পশ্চিম বঙ্গে অবস্থিত ছিল। বরেন্দ্রের দেবীকোট ও জগদল, চট্টগ্রামের পণ্ডিতবিহার, এবং বিক্রমপুর ও পট্টিকের (কুমিল্লা নিকটবর্তী) প্রভৃতি বৌদ্ধবিহারে যে সমুদয় বৌদ্ধ আচার্য্য ছিলেন তাহাদের অনেকে তিব্বতীয় বৌদ্ধ সাহিত্যে বিশেষ প্রসিদ্ধি লাভ করিয়াছেন।

পালযুগে বাংলায় অগ্ৰাণ্ণ বৌদ্ধরাজবংশেরও পরিচয় পাওয়া যায়।

দৃষ্টান্তস্বরূপ বিক্রমপুরের চন্দ্ররাজবংশ এবং হরিকেলরাজ কান্তিদেবের উল্লেখ করা যাইতে পারে। সেনরাজগণের অভ্যুদয়ের ফলে বাংলায় শৈব ও বৈষ্ণবধর্ম এবং প্রাচীন বৈদিক ও পৌরাণিক ধর্মাবলুষ্ঠান ও আচার ব্যবহার পুনরুজ্জীবিত করিবার এক প্রবল চেষ্টা হয়। ইহাও বাংলায় বৌদ্ধধর্মের পতনের একটি কারণ। কিন্তু তুর্কী আক্রমণের ফলে বৌদ্ধবিহারগুলি ধ্বংস না হইলে সম্ভবত বৌদ্ধধর্ম বাংলা হইতে একেবারে বিলুপ্ত হইত না। বর্তমানে এক চট্টগ্রাম জেলায় কয়েক সহস্র বৌদ্ধ ব্যতীত বাংলা ও বিহারে বৌদ্ধধর্মের চিহ্ন বিলুপ্ত হইয়াছে।

### ৯। সহজিয়া ধর্ম

প্রাচীনকাল হইতেই বৌদ্ধধর্মের মধ্যে অনেক পরিবর্তন ঘটিয়াছে। ভারতে বৌদ্ধধর্মের এই বিবর্তনের ইতিহাস এক্ষেত্রে আলোচনা করা সম্ভব নহে। সংক্ষেপে বলা যাইতে পারে যে ছয়েন সাং সপ্তম শতাব্দীতে ভারতে যে বৌদ্ধধর্ম প্রচলিত দেখিয়াছিলেন তাহা গোতম বুদ্ধ, অশোক, এমন কি কনিষ্কের সময়কার বৌদ্ধধর্ম অপেক্ষা অনেক পৃথক। কিন্তু পালযুগে বাংলায় বৌদ্ধধর্ম যে রূপ ধারণ করিয়াছিল তাহার প্রকৃতি ইহা হইতেও সম্পূর্ণ বিভিন্ন। প্রাচীন সর্বাস্তিবাদ, সন্মিতীয় প্রভৃতি বৌদ্ধ মত তখন বিলুপ্ত হইয়াছে। এমন কি, অপেক্ষাকৃত আধুনিক মহাযান মতবাদও বজ্রযান ও তন্ত্রযান প্রভৃতিতে পরিণত হইয়া সম্পূর্ণ নূতন আকার ধারণ করিয়াছে।

ছোটখাট প্রভেদ থাকিলেও এই নূতন ধর্মমতগুলির মধ্যে যথেষ্ট ঐক্য ছিল এবং মোটের উপর ইহাদিগকে সহজযান বা সহজিয়া ধর্ম বলা যাইতে পারে। এই ধর্মের আচার্য্যগণ সিদ্ধাচার্য্য নামে খ্যাত। মোট ৮৪ জন সিদ্ধাচার্য্য ছিলেন বলিয়া প্রসিদ্ধি আছে। দশম হইতে দ্বাদশ শতাব্দীর মধ্যেই সম্ভবত এই সমুদয় সিদ্ধাচার্য্যগণ জন্মগ্রহণ করেন। ইহারা অপভ্রংশ ও প্রাদেশিক ভাষায় গ্রন্থ লিখিতেন। তিব্বতীয় বৌদ্ধ আচার্য্যগণ বাংলা ও বিহারের বৌদ্ধ পণ্ডিতগণের সহায়তায় এই সমুদয় গ্রন্থ তিব্বতীয় ভাষায় তর্জমা করেন এবং সে তর্জমা তিব্বতীয় তেঙ্গুর নামক গ্রন্থে আছে। মূল গ্রন্থগুলি কিন্তু প্রায় সবই বিলুপ্ত হইয়াছে। প্রাচীন বাংলা ভাষায় রচিত যে চর্যাপদগুলির কথা পূর্ববর্তী অধ্যায়ে উল্লিখিত হইয়াছে তাহা এই সিদ্ধাচার্য্যগণেরই রচিত। এই চর্যাপদ ও সিদ্ধাচার্য্য সরহ ও কৃষ্ণের দোহাকোষ প্রভৃতি যে কয়েকখানি মূল সহজিয়া গ্রন্থ পাওয়া গিয়াছে তাহা হইতে এই নূতন ধর্মমত সম্বন্ধে কতকটা ধারণা করা যাইতে পারে।

এই ধর্মের গুরুর স্থান খুব উচ্চ। “ধর্মের সূক্ষ্ম উপদেশ গুরুর মুখ হইতে শুনিতে হইবে, পুস্তক পড়িয়া কিছু হইবে না ; গুরু বুদ্ধ অপেক্ষাও বড় ; গুরু বাহা বলিবেন বিচার না করিয়া তাহা তৎক্ষণাৎ করিতে হইবে”—ইহাই এই ধর্ম সম্প্রদায়ের মূলনীতি।

বৈদিক ধর্ম, পৌরাণিক পূজা পদ্ধতি, জৈন এবং এমন কি বৌদ্ধ ধর্ম-সম্প্রদায়ের প্রতি যেরূপ তীব্র শ্লেষ, কটাক্ষ ও ব্যঙ্গোক্তি এই সমুদয় গ্রন্থে স্থান পাইয়াছে তাহা পড়িলে উনবিংশ শতাব্দীতে খ্রীষ্টীয় মিশনারী কর্তৃক হিন্দুধর্মের সমালোচনার কথা স্মরণ হয়। সরহের দোহাইকোষ হইতে দুই একটি দৃষ্টান্ত দিতেছি। “হোম করিলে মুক্তি যত হোক না হোক, ধোয়ায় চক্ষের পীড়া হয় এই মাত্র।” “ঈশ্বরপবায়ণের! গায়ে ছাই মাখে, মাথায় জটা ধরে, প্রদীপ জালিয়া ঘরে বসিয়া থাকে, ঘরের ঈশান কোণে বসিয়া ঘটা চালে, আসন করিয়া বসে, চক্ষু মিট মিট করে, কাণে খুসখুস করে ও লোককে ধাঁধা দেয়।” “ক্ষপণকেরা কপট মায়াজাল বিস্তার করিয়া লোক ঠকাইতেছে ; তাহারা তত্ত্ব জানে না, মলিন বেশ ধারণ করিয়া থাকে এবং আপনার শরীরকে কষ্ট দেয় ; নগ্ন হইয়া থাকে এবং আপনার কেশোৎপাটন করে। যদি নগ্ন হইলে মুক্তি হয়, তাহা হইলে শৃগাল কুকুরের মুক্তি আগে হইবে”।

বৌদ্ধ ভ্রমণদের সম্বন্ধে উক্তি এইরূপ :

“বড় বড় স্থবির আছেন, কাহারও দশ শিষ্য, কাহারও কোটি শিষ্য, সকলেই গেরুয়া কাপড় পড়ে, সন্ন্যাসী হয় ও লোক ঠকাইয়া খায়। যাহারা হীনযান ( তাহারা যদি শীল রক্ষা করে ) তাহাদের না হয় স্বর্গই হউক, মোক্ষ হইতে পারে না। যাহারা মহাযান আশ্রয় করে, তাহাদেরও মোক্ষ হয় না, কারণ তাহারা কেহ কেহ সূত্র ব্যাখ্যা করে, কিন্তু তাহাদের ব্যাখ্যা অদ্ভুত, সে সকল নূতন ব্যাখ্যায় কেবল নরকই হয়”। উপসংহারে বলা হইয়াছে “সহজ পন্থা ভিন্ন পন্থাই নাই। সহজ পন্থা গুরুর মুখে শুনিতে হয়”।

জাতিভেদ সম্বন্ধে সরহ বলেন :—“ব্রাহ্মণ ব্রাহ্মার মুখ হইতে হইয়াছিল ; যখন হইয়াছিল তখন হইয়াছিল, এখন ত অশ্রেণেও যেরূপে হয়, ব্রাহ্মণও সেইরূপে হয়, তবে আর ব্রাহ্মণত্ব রহিল কি করিয়া ? যদি বল সংস্কারে ব্রাহ্মণ হয়, চণ্ডালকে সংস্কার দেও, সে ব্রাহ্মণ হোক ; যদি বল বেদ পড়িলে ব্রাহ্মণ হয়, তারাতো পড়ুক। আর তারাতো পড়েও ত, ব্যাকরণের মধ্যে ত বেদের শব্দ আছে”।

এইরূপে সিদ্ধাচার্য্যগণ সমুদয় প্রাচীন সংস্কার ও ধর্মমতের তীব্র সমালোচনা করিয়া যে স্বাধীন চিন্তা ও বিচারবুদ্ধির পরিচয় দিয়াছেন, তাহা

পড়িলে মনে হয় যে মধ্যযুগে ও বর্তমানকালে যে সমুদয় প্রাচীন-পন্থা-বিরোধী ধর্মমতবাদ এদেশে প্রচারিত হইয়াছে তাহা কেবল ইসলাম বা খৃষ্টীয় ধর্ম এবং পাশ্চাত্য শিক্ষার ফল বলিয়া গ্রহণ করা যায় না। যে সংস্কার-বিমুক্ত স্বাধীন চিন্তা ও চিন্তাশক্তির উপর এগুলি প্রতিষ্ঠিত তাহার মূল সহজিয়া মতবাদে স্পষ্ট দেখিতে পাওয়া যায়। কিন্তু আশ্চর্যের বিষয় এই যে এই সহজিয়া মতই আবার চরম গুরুবাদের উপর প্রতিষ্ঠিত। একদিকে সূক্ষ্ম স্বাধীন চিন্তা, অপরদিকে নির্বিচারে গুরুর প্রতি আস্থা—এই পরস্পর-বিরুদ্ধ মনুষ্য-প্রবৃত্তির উপর কিরূপে সহজিয়া ধর্মের ভিত্তি স্থাপিত হইয়াছিল তাহা ভাবিলে বিস্মিত হইতে হয়। কিন্তু পরবর্তীকালের বাংলার ধর্ম ও সমাজের ইতিহাসে এরূপ বিরুদ্ধ মনোবৃত্তির একত্র সমাবেশ বিরল নহে।

যে ধর্মে কেবলমাত্র গুরুর বচনই প্রামাণিক তাহার সাধন প্রণালী অনেক পরিমাণেই গুহা ও রহস্যে আবৃত। সুতরাং সহজিয়া ধর্মের সাধারণ বিবরণ ব্যতীত বিস্তৃত বিশ্লেষণ সম্ভবপর নহে। এই ধর্মে গুরু প্রথমত সাধকের আধ্যাত্মিক শক্তির উৎকর্ষ অপকর্ষ বিবেচনা করিয়া তাহার জন্ম তদনুযায়ী সাধন-মার্গ নির্দিষ্ট করিয়া দিবেন। এই শক্তির পরিমাণ অনুসারে পাঁচটি কুল (শ্রেণী) কল্পিত হইয়াছিল—ইহাদের নাম ডোহী, নটী, রজকী, চণ্ডালী ও ব্রাহ্মণী। যে পঞ্চ মহাভূত দেহের প্রধান উপকরণ (স্কন্ধ) তাহার উপরই এই কুল-বিভাগ প্রতিষ্ঠিত। উপাসকের মধ্যে কোন্ স্কন্ধটি কিরূপ প্রবল তাহার দ্বারা গুরু তাঁহার প্রজ্ঞা বা শক্তির স্বরূপ নির্ণয় করেন। পরে যে সাধন প্রণালী অনুসরণ করিলে ঐ বিশেষ শক্তির বৃদ্ধি হইতে পারে প্রতি সাধকের জন্ম তিনি তাহা স্থির করেন।

এই সাধন প্রণালী একপ্রকার যোগ বিশেষ। শরীরের মধ্যে যে ৩২টি নাড়ী আছে তাহার মধ্য দিয়া শক্তিকে মস্তকের সর্বোচ্চ প্রদেশে (মহাসূক্ষ্ম স্থানে) প্রবাহিত করা এই যোগের লক্ষ্য। এই স্থানটী চতুঃষষ্ঠী অথবা সহস্রদল পদ্ম রূপে কল্পিত হইয়াছে। রেলওয়ে লাইনে যেমন স্টেশন ও জংশন আছে, দেহাভ্যন্তরে নাড়ীগুলিরও সেইরূপ বিরাম বা সংযোগস্থল আছে; ইহাদিগকে পদ্ম ও চক্রের সহিত তুলনা করা হইয়াছে এবং উর্দ্ধগমনকালে শক্তিকে এই সমুদয় অতিক্রম করিতে হয়। শক্তি যখন মহাসূক্ষ্মস্থানে পৌঁছে তখন সাধনার শেষ ও সাধকের পরম ও চরম আনন্দ অর্থাৎ মহাসুখ লাভ হয়। সাধকের নিকট তখন বহির্জগৎ লুপ্ত হয়, ইন্দ্রিয়াদি কিছুই জ্ঞান থাকে না। সাধক, জগৎ, বুদ্ধ সব একাকার হইয়া যায়,—এই অদ্বৈত জ্ঞান

ব্যতীত আর সকলই শূন্যতা প্রাপ্ত হয়।

সহজিয়া ধর্মের ইহাই মূল তত্ত্ব। তবে বজ্রযান, সহজযান, কালচক্রযান প্রভৃতি ভিন্ন ভিন্ন সম্প্রদায়ের সাধন প্রণালীর মধ্যে কিছু পার্থক্য আছে। বজ্রযানে সাধক সাংকেতিক মন্ত্রোচ্চারণের সাহায্যে দেব-দেবীকে পূজা করেন। ইহার ফলে দেব-দেবীগণ মণ্ডলাকারে সাধকের চতুর্দিকে উপবিষ্ট হন। তখন আর তাঁহার মন্ত্র উচ্চারণ করিবার শক্তি থাকে না, কেবলমাত্র মুদ্রা অর্থাৎ হস্তের ও অঙ্গুলির নানারূপ বিস্থাপন দ্বারাই পূজা করিতে হয়। সহজযানে এই সব পূজার বিধি নাই। কালচক্রযানেও উল্লিখিত যে সাধনাই প্রধান, এবং এই সাধনার উপযুক্ত কাল, অর্থাৎ যুহুর্ভূত, তিথি, নক্ষত্রের উপরেই বেশী জোর দেওয়া হইয়াছে।

৫ম গুরুবাদের উপর প্রতিষ্ঠিত ৬ গোপন রহস্যে আবৃত থাকায় সহজিয়া ধর্ম ক্রমেই আধ্যাত্মিক অধঃপতনের পথে অগ্রসর হইতে লাগিল। বৌদ্ধধর্মের বিধিবিধান যেটুকু অবশিষ্ট ছিল, তাহা নিশ্চিহ্ন হইয়া লোপ পাইল। অমুরূপ কারণে হিন্দুর তত্ত্বোক্ত সাধনাও এই অবস্থায় পরিণত হইয়াছিল। ক্রমে সহজিয়া ধর্ম ও তান্ত্রিক সাধনা একাকার হইয়া বাংলার ধর্ম-জগতে যে বীভৎসতার সৃজন করিল তাহার বিস্তৃত পরিচয় অনাবশ্যক।

বাংলার শাক্ত ধর্মও এই সহজিয়া মতের সহিত মিলিত হইয়া গেল। ফলে একদিকে নূতন নূতন শাক্ত সম্প্রদায় ও অপরদিকে নাথপন্থী, সহজিয়া, অবধূত, বাউল প্রভৃতির সৃষ্টি হইল।

সম্প্রতি নেপালে এই প্রকার এক নূতন শাক্ত সম্প্রদায়ের কতকগুলি শাস্ত্রগ্রন্থ আবিষ্কৃত হইয়াছে। এই সম্প্রদায় কোল নামে অভিহিত এবং ইহার গুরু মংসোল্লনাথ। কোল নামটি কুল শব্দ হইতে উৎপন্ন, এবং এই কুল বা শ্রেণীবিভাগ যে সহজিয়া ধর্মের একটি প্রধান অঙ্গ, তাহা পূর্বেই বলা হইয়াছে। এই কোল সম্প্রদায়ের লোকেরা কোল, কুলপুত্র অথবা কুলীন নামে অভিহিত হইয়াছে এবং ইহাদের শাস্ত্রের নাম কুলাগম অথবা কুলশাস্ত্র। কুলই শক্তি; শিব অকুল; এবং দেহাভ্যন্তরে প্রচ্ছন্ন দৈবী শক্তির নাম কুল-কুণ্ডলিনী। এই ধর্মের আলোচনা করিলে সন্দেহমাত্র থাকে না যে, ইহার প্রধান তত্ত্বগুলি সহজিয়া মতবাদ হইতে গৃহীত। কিন্তু একটি বিষয়ে ইহার প্রভেদ ছিল। ইহা জাতিভেদ মানিয়া চলিত। এই জন্মই ইহা ব্রাহ্মণ্য শাক্ত সম্প্রদায়ের সহিত মিশিতে পারিয়াছিল এবং হিন্দু সমাজে ইহার প্রাধিক্য সহজে নষ্ট হয় নাই। যাহারা বর্ণাশ্রম মানিত না, তাহারাই ক্রমে নাথপন্থী, সহজিয়া, অবধূত, বাউল



প্রভৃতি বর্তমানকালে সুপরিচিত সম্প্রদায়গুলি সৃষ্টি করিয়াছে। এই সকল সম্প্রদায়ের প্রাচীন ইতিহাস সম্বন্ধে বিশেষ কিছুই জানা যায় না। তবে ইহার। সকলেই কালক্রমে—হিন্দুযুগের অবসানের পরে—বাংলার ধর্মজগতে বিশিষ্ট স্থান অধিকার করিয়াছিল। নাথপন্থীদের গুরু মংসোল্লনাথ ও তাঁহার শিষ্য গোরক্ষনাথের কথা পূর্বেই উল্লিখিত হইয়াছে। ময়নামতীর গান হইতে বুঝা যায় যে এককালে বাংলা দেশে ইহাদের প্রভাব খুব বেশী ছিল। সহজিয়া সম্প্রদায়ও মহাপ্রভু চৈতন্যের পূর্বেই প্রাধান্য লাভ করিয়াছিল। বৈষ্ণব কবি চণ্ডীদাস একজন সহজিয়া ছিলেন। পরবর্তীকালে সহজিয়া সম্প্রদায় বৈষ্ণব ভাবাপন্ন হইয়া, পরম সত্যকে কৃষ্ণ ও তাঁহার শক্তিকে রাধারূপে কল্পনা করে; কিন্তু নাড়ী, চক্র প্রভৃতি প্রাচীন বৌদ্ধ সহজিয়া ধর্মের যোগসাধন প্রণালী একেবারে পরিত্যাগ করে নাই। চণ্ডীদাসের রজকিনী প্রেম প্রাচীন সহজিয়া ধর্মের পঞ্চকূলের অশ্রুতম রজকীর কথা স্মরণ করাইয়া দেয়। বাউল সম্প্রদায় বৈষ্ণব প্রভাব হইতে মুক্ত থাকিয়া প্রাচীন বৌদ্ধ সহজিয়া ধর্মের সহিত ঘনিষ্ঠ যোগসূত্র রক্ষা করিতে পারিয়াছে।

বাংলায় বৌদ্ধধর্মের যে রূপান্তর ঘটিয়াছিল, তাহার অপেক্ষাকৃত বিস্তৃত আলোচনা করা হইল,—কারণ যতদূর জানা যায় তাহাতে ইহাই ধর্মজগতে বাংলার বিশিষ্ট দান বলিয়া গ্রহণ করা যাইতে পারে। অশ্রু যে সমুদয় ধর্মমত বাংলায় প্রচলিত ছিল—তাহা মোটামুটিভাবে নিখিল ভারতবর্ষীয় ধর্মেরই অনুরূপ, তাহার মধ্যে বাংলার বৈশিষ্ট্য কিছু থাকিলেও তাহা নিরূপণ করিবার কোন উপায় নাই। কিন্তু অষ্টম হইতে দ্বাদশ শতাব্দীর মধ্যে বৌদ্ধধর্মের যে রূপান্তর ঘটিয়াছিল তাহার উপর বাঙ্গালীর প্রভাবই যে বেশী একথা সকলেই স্বীকার করেন। এই রূপান্তরই আবার বাংলার অন্যান্য ধর্মমতের উপর প্রভাব বিস্তার করিয়া বাংলার ধর্ম ও সমাজে যে বিপ্লব ঘটাইয়াছিল, বাংলার মধ্যযুগে, এমন কি বর্তমান কালেও তাহার স্পষ্ট পরিচয় পাওয়া যায়। বৌদ্ধধর্ম বাংলা হইতে বিলুপ্ত হইয়াছে—একথা এক হিসাবে সত্য। কিন্তু এত বড় একটা ধর্মমত যে একেবারে নিশ্চিহ্ন হইয়া মুছিয়া গিয়াছে ইহা বিশ্বাস করা কঠিন। ৬হরপ্রসাদ শাস্ত্রী মত প্রকাশ করিয়াছিলেন যে ধর্মঠাকুরের পূজাই বৌদ্ধধর্মের শেষ। কিন্তু বাংলার বৌদ্ধধর্ম কেবলমাত্র এই সব লৌকিক অনুষ্ঠানেই পর্যাবসিত হয় নাই। উল্লিখিত আলোচনা হইতে বুঝা যাইবে যে, যে-সমুদয় ধর্মমত মধ্যযুগে বাংলায় প্রাধান্যলাভ করিয়াছিল তাহা অনেকাংশে প্রত্যক্ষ অথবা প্রচ্ছন্নভাবে বৌদ্ধমতের পরিণতি মাত্র।

## ১০। বাংলার ধর্মমত

এ পর্য্যন্ত আমরা বিভিন্ন ধর্মসম্প্রদায় সম্বন্ধে পৃথকভাবে আলোচনা করিয়াছি। উপসংহারে বাংলার ধর্মমত সম্বন্ধে কয়েকটি সাধারণ তথ্যের উল্লেখ আবশ্যিক। প্রাচীন বাংলায় বৈদিক, পৌরাণিক, বৌদ্ধ, জৈন প্রভৃতি বিভিন্ন ধর্মের আপেক্ষিক প্রভাব ও প্রতিপত্তি কিরূপ ছিল তাহা জানিতে স্বতই ইচ্ছা হয়। পূর্বের ছয়েন সাংয়ের যে উক্তি উদ্ধৃত হইয়াছে তাহা হইতে স্পষ্টই বুঝা যায় যে সপ্তম শতাব্দীতে বৌদ্ধ ও জৈনদিগের তুলনায় ব্রাহ্মণ্য ~~ব্রাহ্মণ~~ বালস্বীর সংখ্যা খুব বেশী ছিল। ঐ সময়ে জৈনগণের সংখ্যাও অনেক ছিল। পরবর্ত্তীকালে জৈনগণের সংখ্যা খুবই কমিয়া যায়, কিন্তু পৌরাণিক ধর্ম পূর্ববৎ বৌদ্ধধর্ম অপেক্ষা অধিকতর শক্তিশালী ছিল কিনা ইহা নিশ্চিত বলা যায় না। পালরাজ-গণের পৃষ্ঠপোষকতায় বৌদ্ধধর্ম যথেষ্ট প্রতিপত্তি লাভ করিলেও ইহার প্রভাব যে ব্রাহ্মণ্যধর্মকে ছাড়িয়া উঠিয়াছিল, অনেকে এরূপ মনে করেন না। কারণ অষ্টম হইতে দ্বাদশ শতাব্দীর যে সমুদয় মূর্ত্তি বা লিপি এযাবৎ পাওয়া গিয়াছে, তাহার অধিকাংশই পৌরাণিক ধর্মের প্রভাব সূচিত করে। তবে অসম্ভব নহে যে বৌদ্ধধর্ম জনসাধারণের মধ্যে বেশী প্রচলিত ছিল এবং পৌরাণিক ধর্ম সাধারণত ধনী, শিক্ষিত ও উচ্চশ্রেণীর মধ্যে সীমাবদ্ধ ছিল। সহজিয়া ধর্মের বিবরণ হইতে এরূপ ধারণা করা অসঙ্গত হইবে না যে সমাজের নিম্নস্তরের মধ্যেই ইহার বিশেষ প্রসার ছিল। ডোম্বী, নটী, রজকী, চণ্ডালী প্রভৃতি কুলের নামে ইহার স্পষ্ট ইঙ্গিত পাওয়া যায় এবং চর্যাপদগুলি পাঠ করিলেও এই ধারণাই বদ্ধমূল হয়। পরবর্ত্তীকালে সহজিয়া বৌদ্ধমত হইতে যে সমুদয় ধর্মসম্প্রদায়ের উদ্ভব হইয়াছিল তাহাও সমাজের নিম্নশ্রেণীর মধ্যেই বেশী প্রচলিত ছিল। সরহের দোহা হইতে জানা যায় যে সিদ্ধাচার্য্যগণ ব্রাহ্মণের প্রভুত্বের বিরুদ্ধে তীব্র মত পোষণ করিতেন, এবং স্বীয় সম্প্রদায়ে জাতিভেদ প্রথা দূর করিয়াছিলেন। অসম্ভব নহে যে সহজিয়া মতের জনপ্রিয়তার ইহাও একটি কারণ। বাংলাদেশে মোট জনসংখ্যার তুলনায় উচ্চ শ্রেণীর হিন্দুগণ সংখ্যায় এত কম কেন, এই সমস্তার কোন সন্তোষজনক মীমাংসা হয় নাই। বাংলায় হিন্দুগণের শেষে বৌদ্ধমতের প্রভাব ইহার অশ্রুতম কারণ বলিয়া অনুমান করা খুব অসঙ্গত নহে।

শৈব ও বৈষ্ণব এই দুই ধর্মমতের মধ্যে কোনটি প্রবল ছিল তাহা বলা শক্ত। তবে হিন্দুগণের শেষ দুই তিন শতাব্দীর যে সমুদয় মূর্ত্তি পাওয়া

গিয়াছে, তাহার সংখ্যামূলক তুলনা করিলে বৈষ্ণব ধর্মমতেরই প্রাধান্য সূচিত হয়।

রাজগণের ধর্মমত অনেক সময়ে অন্তত কতক পরিমাণে জনসাধারণের ধর্মমত প্রতিফলিত করে। সুতরাং বাংলার রাজগণের ধর্মমত কিরূপ ছিল তাহার আলোচনা অপ্ৰাসঙ্গিক নহে। পূর্ববর্তী কয়েকটি অধ্যায়ে বিভিন্ন রাজবংশের যে ইতিহাস বর্ণিত হইয়াছে তাহা হইতে জানা যায় যে খড়্গ, চন্দ্র ও পালবংশ এবং কাশ্মিরদেব, রণবঙ্কমল্ল প্রভৃতি রাজা বৌদ্ধ ছিলেন। বৈষ্ণবগুপ্ত, শশাঙ্ক, লোকনাথ, ডোমনপাল এবং সেনবংশীয় বিজয়সেন ও বল্লালসেন শৈব ছিলেন। বস্মণ ও দেববংশ এবং বল্লালসেনের পরবর্তী সেনবংশীয় রাজগণ বৈষ্ণব ছিলেন। গুপ্তযুগের পরবর্তী বাংলার প্রথম স্বাধীন রাজগণ,—গোপচন্দ্র, ধর্মাদিত্য, সমাচারদেব ব্রাহ্মণ্য ধর্মাবলম্বী ছিলেন; কিন্তু তাঁহারা শৈব, বৈষ্ণব প্রভৃতি সম্প্রদায়ভুক্ত ছিলেন কিনা তাহা নির্ণয় করিবার উপায় নাই।

এই সমুদয় বিভিন্ন সম্প্রদায় বর্তমান থাকিলেও ভারতের অগ্ণাত প্রদেশের জায় বাংলায়ও যে ইহাদের মধ্যে কলহ ও দ্বেষ হিংসা ছিল না, বরং যথেষ্ট সম্ভাব ছিল তাহার বহু প্রমাণ আছে। রাজগণ ধর্ম বিষয়ে উদার মত পোষণ করিতেন। বৌদ্ধ পালরাজগণ যে ব্রাহ্মণ্য ধর্মবিষয়ে বিশেষ শ্রদ্ধাশীল ছিলেন তাহাদের শাসনলিপি হইতেই তাহা প্রমাণিত হয়। ধর্মপাল ও তৃতীয় বিগ্রহপাল যে বর্ণাশ্রম ধর্ম মানিয়া চলিতেন, দুইখানি তাম্রশাসনে তাহার স্পষ্ট উল্লেখ আছে। নারায়ণপাল নিজে একটি শিব-মন্দির প্রতিষ্ঠা করিয়াছিলেন, এবং তাহার ব্রাহ্মণ মন্ত্রী যজ্ঞস্থলে উপস্থিত হইয়া “অনেকবার শ্রদ্ধা-সলিলাপ্লুত-সুদয়ে, নতশিরে, পবিত্র [ শাস্তি ] বারি গ্রহণ করিয়াছিলেন”। মদনপালের প্রধানা মহিষী চিত্রমতিকা মহাভারত-পাঠ শ্রবণ করিয়া দক্ষিণা স্বরূপ ব্রাহ্মণকে ভূমিদান করিয়াছিলেন। বৌদ্ধ দেবখজ্জোব মহিষী প্রভাবতী চণ্ডীমূর্তির প্রতিষ্ঠা করিয়াছিলেন। অপরদিকে শৈব রাজা বৈষ্ণবগুপ্ত বৌদ্ধ বিহার নিৰ্ম্মাণ, এবং একজন ব্রাহ্মণ সস্ত্রীক সোমপুরের জৈন বিহারের ব্যয় নির্বাহার্থ ভূমি দান করিয়াছিলেন। এই সমুদয় দৃষ্টান্ত হইতে বুঝা যায় যে সেকালে পরস্পরের ধর্মমতের প্রতি যথেষ্ট শ্রদ্ধা ছিল। কাশ্মিরদেবের তাম্রশাসনে ইহার আরও ব্যাপক পরিচয় পাই। তাঁহার পিতা ধনদত্ত বৌদ্ধ ছিলেন, কিন্তু তাঁহার মাতা ছিলেন শিবের উপাসিকা। ধনদত্ত বৌদ্ধ হইলেও রামায়ণ, মহাভারত ও পুরাণ প্রভৃতিতে অভিজ্ঞ ছিলেন একথা তাঁহার পুত্রের তাম্রশাসনে স্পষ্ট উল্লিখিত হইয়াছে।

তৎকালে শৈব, বৈষ্ণব, সৌর প্রভৃতি পৌরাণিক বিভিন্ন ধর্মসম্প্রদায়ের মধ্যে কেবলমাত্র যে সম্ভাব ছিল তাহা নহে, ইহাদের ব্যবধানরেখাও সুস্পষ্ট ও সুনির্দিষ্ট হইয়া ওঠে নাই। বৈষ্ণবদের তাম্রশাসনে তাঁহাকে পরম-মাহেশ্বর ও পরম-বৈষ্ণব এই দুই উপাধিতেই ভূষিত করা হইয়াছে। পরম-মাহেশ্বর ডোম্বনপালের তাম্রশাসনে ভগবান নারায়ণের প্রতি ভক্তি ও শ্রদ্ধা জ্ঞাপন করা হইয়াছে। বিশ্বরূপসেন ও কেশবসেনের সদাশিব-মুদ্রা-সংযুক্ত তাম্রশাসনে প্রথমে নারায়ণ ও পরে সূর্য্যের স্তব আছে,—কিন্তু উক্ত রাজগণ পরমসৌর বলিয়া অভিহিত হইয়াছেন। এই তাম্রশাসনগুলি শৈব, বৈষ্ণব ও সৌর সম্প্রদায়েব অপূর্ব সমন্বয়ের দৃষ্টান্ত। বাংলার ধর্মজীবনের এই বৈশিষ্ট্য এখন পর্য্যন্তও দেখিতে পাওয়া যায়। এখনও নির্মলান বাঙ্গালী হিন্দু সমান ভক্তি সহকারে প্রত্যহ নারায়ণশিলা ও শিবপূজা এবং শরৎকালে দুর্গাপূজা করেন। কাঞ্চিক, গণেশ, সূর্য্য, লক্ষ্মী, প্রভৃতির উপাসনা ও পূজাও প্রতিগৃহে শ্রদ্ধাভরে অনুষ্ঠিত হয়।

প্রাচীন বাংলার ইতিহাসে ধর্মদ্বৈষের কেবলমাত্র একটি দৃষ্টান্ত আছে। ইহা জয়েনসাং-বর্ণিত শশাঙ্কের কাহিনী। জয়েনসাং লিখিয়াছেন যে শশাঙ্ক গয়ার বোধিবৃক্ষ সমূলে উৎপাটন করেন, পাটলিপুত্রে বুদ্ধের পদচিহ্ন সম্বলিত একখানি প্রস্তর গঙ্গায় নিক্ষেপ করেন, কুশীনগরের একটি বিহার হইতে বৌদ্ধ দিগকে বিতাড়িত করেন এবং গয়ায় একটি মন্দিরে বুদ্ধমূর্ত্তির পরিবর্তে শিবমূর্ত্তি স্থাপন কবিত্তে আদেশ করেন। মঞ্জুশ্রীমূলকল্প নামক একখানি বৌদ্ধগ্রন্থে উক্ত হইয়াছে যে শশাঙ্ক বৌদ্ধ ও জৈন উভয়ের উপরই উৎপাটন করিয়াছেন। এই সমুদয় কাহিনী কতদূর সত্য তাহা বলা কঠিন। যে কারণে জয়েনসাং শশাঙ্কের বিরুদ্ধবাদী ছিলেন এবং শশাঙ্কের সম্বন্ধে তাঁহার উক্তি বিশ্বাসযোগ্য নহে তাহা পূর্বেই উক্ত হইয়াছে। জয়েনসাং শশাঙ্কের মৃত্যুর অনতিকাল পরেই বাংলায় আসিয়াছিলেন। বাংলার সর্বত্র, বিশেষত শশাঙ্কের রাজধানী কর্ণসুবর্ণে, তিনি বৌদ্ধধর্মের যেরূপ সমৃদ্ধি ও প্রভাব প্রত্যক্ষ করিয়াছিলেন, তাহার সহিত বৌদ্ধ-বিদ্বেষী শশাঙ্কের চিত্রের সামঞ্জস্য করা কঠিন। আশ্চর্য্যের বিষয় যে শশাঙ্কের মূল রাজ্য গোড় ও বঙ্গের কোনস্থানে তাঁহার বৌদ্ধবিদ্বেষের কোন কাহিনী জয়েনসাংও উল্লেখ করেন নাই। এই সমুদয় কারণে এবং প্রাচীনকালে বাংলার ইতিহাসে এইরূপ ধর্মদ্বৈষের আর কোন নিদর্শন না থাকায় জয়েনসাং-বর্ণিত শশাঙ্কের অনন্যসাধারণ বৌদ্ধবিদ্বেষের কথা সত্য কিনা, এবং সত্য হইলেও কেবলমাত্র অল্পদূর সংকীর্ণ ধর্মমতই ইহার কারণ

কিনা সে সম্বন্ধে সন্দেহ করিবার যথেষ্ট কারণ আছে। হুয়েনসাংয়ের বিবরণ সত্য হইলেও একমাত্র শশাঙ্কের কাহিনীর উপর নির্ভর ও পূর্বোক্ত দৃষ্টান্তগুলির উপেক্ষা করিয়া প্রাচীন বাংলায় ধর্মমতের উদারতা সম্বন্ধে কোন সন্দেহ করা যায় না।

হুয়েনসাং বাংলার যে সমুদয় বিহার ও মন্দিরের উল্লেখ ও সংখ্যা নির্দেশ করিয়াছেন, তাহা কেবল পাঁচটি রাজধানী অথবা ঐ সকল রাজ্যের সম্বন্ধে প্রযুক্ত। তাহা সকল সময় নিঃসন্দেহে নির্ণয় করা কঠিন। তাঁহার বর্ণনা অনুসারে বাংলায় অন্তত ৭০টি বিহার ও আট হাজার বৌদ্ধভিক্ষু এবং ৩০০ দেবমন্দির ছিল। দেবমন্দির দ্বারা হুয়েনসাং বিভিন্ন ব্রাহ্মণ্য ধর্মসম্প্রদায়ের মন্দিরই নির্দেশ করিয়াছেন। [তিব্বতীয় গ্রন্থ ও প্রাচীন ধ্বংসাবশেষ হইতে সহজেই অনুমান করা যায় যে পরবর্তীকালে বৌদ্ধবিহার ও হিন্দুমন্দির এ উভয়েরই সংখ্যা অনেক বাড়িয়াছিল। প্রাচীন বঙ্গের প্রতি নগরে এবং প্রায় প্রতি গ্রামে অবস্থিত এই সমুদয় মন্দির ও বিহার বাঙ্গালীর ধর্মজীবন নিয়ন্ত্রিত করিত। তখন নিষ্ঠাবান বৌদ্ধভিক্ষুগণ ও আচারশীল ব্রাহ্মণ পণ্ডিতগণ শাস্ত্রানুযায়ী আদর্শ জীবন যাপন করিয়া জনসাধারণের চরিত্র ও ধর্মমত গঠনে সহায়তা করিতেন। ইং-সিং তান্ত্রলিপি বিহারের বৌদ্ধগণের যে অপূর্ব ইন্দ্রিয়-সংযম ও উচ্চ নৈতিক আদর্শের বর্ণনা করিয়াছেন তাহাতে এই যুগের বাঙ্গালীর ধর্ম-জীবনের এক উজ্জল চিত্র ফুটিয়া উঠিয়াছে। পরবর্তী কালে বৌদ্ধ ও ব্রাহ্মণ উভয় সম্প্রদায়েই যেরূপ নৈতিক অধোগতি, অসংযম ও উচ্ছৃঙ্খলতা দেখা দিয়াছিল তাহার সহিত তুলনায় এই প্রাচীন যুগ আমাদের নিকট আরও উজ্জল হইয়া ওঠে। কালক্রমে বাঙ্গালীর ধর্মজীবন নানা কারণে কলুষিত হইলেও ইহার পুরাতন আদর্শ ও পদ্ধতি যে মহান ও উচ্চ ছিল তাহা স্মরণ রাখা উচিত। সর্ব সাধারণের মধ্যে যে ধর্মভাব বিশেষ ব্যাপক ও প্রভাবশালী ছিল, সাহিত্যে ও শিল্পে তাহার বহু প্রমাণ পাওয়া যায়। সুতরাং ধর্মমতের উৎকর্ষ ও অপকর্ষ উভয়ই সমগ্র বাঙ্গালী জাতির মানসিক উন্নতি ও অবনতির একটি প্রধান কারণ বলিয়া পরিগণিত হইবার যোগ্য।

## দ্বিতীয় খণ্ড—দেবদেবীর মূর্তি পরিচয়

বাংলা দেশের প্রায় সর্বত্রই বহু দেবদেবীর মূর্তি আবিষ্কৃত হইয়াছে। ইহাদের উল্লেখ বা বিস্তৃত বর্ণনা করা বর্তমান গ্রন্থে সম্ভবপর নহে। সুতরাং সংক্ষেপেই এ বিষয়টি আলোচনা করিব।

### ১। বিষ্ণু মূর্তি

বিষ্ণুমূর্তির চারিহস্তে শঙ্খ, চক্র, গদা, পদ্ম থাকে। কোন কোন স্থলে চক্র ও গদার প্রতিকৃতির পরিবর্তে একটি পুরুষ ও নারীমূর্তি দেখা যায়, ইহাদের নাম চক্রপুরুষ ও গদা-দেবী। বিষ্ণুর ভিন্ন ভিন্ন হস্তে এই চারিটি ভূষণ পরিবর্তন করিয়া ২৪টি বিভিন্ন প্রকারের বিষ্ণুমূর্তি পরিকল্পিত হইয়াছে। বাংলায় সচরাচর ত্রিবিক্রম রূপের বিষ্ণুই দেখা যায়। ইহার নিম্ন ও উর্দ্ধবাম এবং উর্দ্ধ ও নিম্নদক্ষিণ হস্তে যথাক্রমে শঙ্খ, চক্র, গদা ও পদ্ম, এবং দুই পার্শ্বে শ্রী ও পুষ্টি অর্থাৎ লক্ষ্মী ও সরস্বতীর মূর্তি। মালদহ জিলার হাঁকরাইল গ্রামে প্রাপ্ত মূর্তিই সম্ভবত বাঙ্গালার সর্বপ্রাচীন বিষ্ণুমূর্তি। ইহার পদদ্বয় ও দুইহস্ত ভগ্ন এবং নিম্নদক্ষিণ হস্তে পদ্ম ও উপরের বামহস্তে শঙ্খ। মূর্তিটির মস্তকে কিরীট, কর্ণে কুণ্ডল, গলায় হার, বাহুতে অঙ্গদ ও বক্ষোদেশে যজ্ঞোপবীত।

বরিশাল জিলার অন্তর্গত লক্ষ্মণকাটি গ্রামে একটি প্রকাণ্ড বিষ্ণুমূর্তি পাওয়া গিয়াছে। ইহার উচ্চতা ৬'-৩"। উর্দ্ধে উড্ডীয়মান ত্রিনেত্র গরুড়ের পক্ষোপরি বিষ্ণু ললিতাসনে উপবিষ্ট। তাঁহার উর্দ্ধদক্ষিণ ও বামহস্তে ধৃত পদ্মনালের উপর যথাক্রমে লক্ষ্মী (গজ-লক্ষ্মী) ও বীণাবাদিনী বাণীমূর্তি। অগ্র দুইহস্তে চক্রপুরুষসহ চক্র ও গদাদেবী। মস্তকের ষট্‌কোণ কিরীটের মধ্যস্থলে ধ্যানস্থ চতুর্ভুজ দেবমূর্তি। হস্তোপরি লক্ষ্মী ও সরস্বতী (শ্রী ও পুষ্টি) এবং কিরীটস্থ ধ্যানী দেবমূর্তি,—এই দুইটিই আলোচ্য মূর্তির বিশেষত্ব, এবং ইহা সম্ভবত বৌদ্ধ মহাযান মতের প্রভাব সূচিত করে। কেহ কেহ এই মূর্তিটি গুপ্তযুগের বলিয়া মনে করেন, কিন্তু ইহা সম্ভবত আরও অনেক পরবর্তী কালের।

চৈতনপুরের (বর্ধমান) একটি বিষ্ণুমূর্তির পরিকল্পনায়ও বিশেষত্ব আছে। গদা ও চক্রের নীচে গদাদেবী ও চক্রপুরুষ। দণ্ডায়মান বিষ্ণুর দুইহস্ত ইহাদের

মাথায় আর দুইহস্তে শঙ্খ ও পদ্ম। মূর্তিটির মুখাকৃতি ও পরিহিত বসন সবই একটু অদ্ভুত রকমের। ইহা সম্ভবত বৈখানসাগমে বর্ণিত অভিচারক-স্থানক মূর্তি।

সাগরদীঘিতে প্রাপ্ত অষ্টধাতুনির্মিত বিষ্ণুমূর্তির বিশেষত্ব এই যে তাঁহার তিনটি ভূষণ, শঙ্খ, চক্র ও গদা, এক একটি পূর্ণ প্রক্ষুটিত পদ্মের উপর রক্ষিত এবং প্রতি পদ্মের নালটি বিষ্ণু হস্তে ধরিয়া আছেন।

দিনাজপুর জিলার সুরোহর গ্রামে প্রাপ্ত বিষ্ণুমূর্তি সাতটি নাগফণার নীচে দণ্ডায়মান। শ্রী ও পুষ্টির পরিবর্তে দুইপার্শ্বে দুইটি পুরুষমূর্তি (সম্ভবত শঙ্খপুরুষ ও চক্রপুরুষ)। মধ্যস্থিত নাগফণার উপরিভাগে ক্ষুদ্র দ্বিভুজ ধ্যানী মূর্তি এবং পাদপীঠের মধ্যভাগে ষড়ভুজ নৃত্যপরায়ণ শিব। অনেকে অনুমান করেন যে উপরিস্থিত ধ্যানীমূর্তি ব্রহ্মা এবং সমগ্র মূর্তিটি ব্রহ্মা-বিষ্ণু-শিব এই ত্রিমূর্তির পরিকল্পনা। কিন্তু ব্রহ্মার দুইভুজ ও একমুখ বড় দেখা যায় না। সুতরাং এ মূর্তিটিও সম্ভবত মহাযান মতের প্রভাবের ফল।

এইরূপ বিশেষত্ব খুব কম মূর্তিতেই দেখা যায়। সচরাচর যে সমুদয় বিষ্ণুমূর্তি দেখিতে পাওয়া যায় বাঘাউরা গ্রামে প্রাপ্ত সম্রাট মহীপালের তৃতীয় রাজ্য সম্বৎসরে উৎকীর্ণ লিপি সংযুক্ত মূর্তিটি তাহার একটি উৎকৃষ্ট নিদর্শন। শঙ্খ-চক্র-গদা-পদ্মধারী দণ্ডায়মান বিষ্ণুমূর্তি উত্তম বসন ভূষণে সজ্জিত; কিরীট, কুণ্ডল, অঙ্গদ, বনমালা, মেখলা, বসন প্রভৃতি বিচিত্র কারুকার্যখচিত; উর্দ্ধে মস্তকোপরি প্রভাবলী, তাহার দুইপার্শ্বে পুষ্পমাল্য হস্তে উড্ডায়মান বিদ্যাপর যুগলের মূর্তি; মূর্তির পশ্চাতে সিংহাসন ও অধোদেশে দুইপার্শ্বে লক্ষ্মী ও সরস্বতী; পাদপীঠের মধ্যস্থলে প্রক্ষুটিত পদ্মদলের উপর বিষ্ণুর চরণ যুগল; ইহার দক্ষিণভাগে দুইটি ও বামভাগে একটি মনুষ্য মূর্তি, সম্ভবত ইহার মূর্তি-প্রতিষ্ঠাকারী ও তাঁহার পরিবারবর্গ।

বিষ্ণুমূর্তি সাধারণত দণ্ডায়মান, কিন্তু কোন কোন স্থলে অর্দ্ধশয়ান, অথবা যোগাসনে উপবিষ্ট। কোন কোন মূর্তিতে বিষ্ণু ও লক্ষ্মী একত্র উপবিষ্ট দেখা যায়। ঢাকা জিলাস্থিত বাস্তা গ্রামের লক্ষ্মী-নারায়ণ মূর্তি ইহার একটি উৎকৃষ্ট নিদর্শন। বিষ্ণু ও তাঁহার বাম উরুর উপর লক্ষ্মী, এই যুগলমূর্তি গরুড়ের পৃষ্ঠদেশে বসিয়া আছেন। উভয়েরই একটি চরণ গরুড়ের প্রসারিত এক এক হস্তের উপর স্থাপিত। গরুড়ের অগ্র দুইটি হস্ত সম্মুখে অঞ্জলিবদ্ধ।

বিষ্ণুর দশ অবতারের মূর্তি সম্বলিত প্রস্তরখণ্ড অনেক পাওয়া গিয়াছে। পৃথকভাবে বরাহ, নরসিংহ ও বামন অবতারের মূর্তিই সাধারণত দেখা যায়।

মৎস্য, বলরাম ও পরশুরাম এই তিন অবতারেরও মূর্তি পাওয়া গিয়াছে। মৎস্য মূর্তি চতুর্ভুজ ; উর্দ্ধদেশ মানুষের ও অধোদেশ মৎস্যের আকৃতি। বরাহ মূর্তিরও কেবল মুখটি বরাহের, অগ্ন্যাশ্র অংশ মানুষের মতন।

রাজসাহী চিত্রশালায় একটি দণ্ডায়মান মূর্তির বিশ হস্তে গদা, অঙ্কুশ, খড়্গা, মুদগর, শূল, শর, চক্র, খেটক, ধনু, পাশ, শঙ্খ প্রভৃতি আয়ুধ। দুই পার্শ্বে স্থলোদর দুইটি মূর্তি। মূল মূর্তি বনমালা ও অগ্ন্যাশ্র ভূষণে ভূষিত। ইহা সম্ভবত বিষ্ণুর বিশ্বরূপ মূর্তি।

ব্রহ্মা বিষ্ণুর একাত্মক একটি মূর্তি উত্তরবঙ্গে পাওয়া গিয়াছে। চতুর্শুখ ব্রহ্মার তিনটি মুখই কেবল দেখা যায় ; তাঁহার চারি হস্তে স্রক, স্রব, অক্ষমালা ও কমণ্ডলু। মূর্তির দুই পার্শ্বে লক্ষ্মী, সরস্বতী, শশ্বপুরুষ ও চক্রপুরুষ এবং গলে বনমালা বিষ্ণুর নিদর্শন। পাদপীঠের একপার্শ্বে ব্রহ্মার বাহন হংস ও অপর পার্শ্বে বিষ্ণুর বাহন গরুড়ের মূর্তি।

ব্রহ্মার যে সমুদয় পৃথক মূর্তি পাওয়া গিয়াছে তাহাও চতুর্শুখ ( একটি অদৃশ্যমান ) ও স্থলোদর, এবং তাঁহার বাহন ও চারি হস্তে স্রুত অব্যাদি উক্ত মূর্তির অনুরূপ।

সাধারণত বিষ্ণুমূর্তির বাহন ও পার্শ্বচরীরূপে পরিকল্পিত হইলেও গরুড়, লক্ষ্মী ও সরস্বতীর পৃথক মূর্তিও পাওয়া গিয়াছে। রাজসাহী চিত্রশালায় এইরূপ একটি গরুড়মূর্তি রক্ষিত আছে। ইহার অঞ্জলিবদ্ধ হস্তে ও মুখশ্রীতে সেবকের ভক্তি ও শ্রদ্ধার ভাব চমৎকার ফুটিয়া উঠিয়াছে।

বগুড়ায় একটি চমৎকার অষ্টধাতু নির্মিত লক্ষ্মী মূর্তি পাওয়া গিয়াছে। ত্রিভঙ্গ ভঙ্গীতে দণ্ডায়মানা দেবীর তিন হস্তে ফল, অঙ্কুশ ও বাঁপি ( আর এক হস্ত ভগ্ন ) ; দুই পার্শ্বে চামর হস্তে পার্শ্বচরী ; মস্তকোপরি প্রস্ফুটিত পদ্মদলের দুই দিক হইতে দুইটি হস্তী শুণ্ডধৃত কলসীর জল দিয়া দেবীকে স্নান করাইতেছে। লক্ষ্মীর এই প্রকার গজমূর্তিই সাধারণত দেখা যায়। কিন্তু দুই হস্ত বিশিষ্ট সাধারণ লক্ষ্মী মূর্তিও পাওয়া গিয়াছে।

সরস্বতীর মূর্তি সাধারণত চারি হস্ত বিশিষ্ট। দেবী দুই হস্তে বীণা বাজাইতেছেন, অপর দুই হস্তে অক্ষমালা ও পুস্তক। দেবীর দুই পার্শ্বে চামর ধারিণী, পাদপীঠে কোন কোন স্থলে তাঁহার সুপরিচিত বাহন হংস, কিন্তু কোন স্থলে আবার একটি মেঘের মূর্তিদেখিতে পাওয়া যায়।



## ২। শৈব মূর্তি

শিব সাধারণত লিঙ্গরূপেই পূজিত হইতেন। লিঙ্গ প্রধানত দুই শ্রেণীতে বিভক্ত করা যায়। সাধারণ শিবলিঙ্গ বাংলায় সুপরিচিত এবং চতুর্ভূজ বিষ্ণুমূর্তির স্থায় ইহাও এদেশে বহু সংখ্যায় পাওয়া গিয়াছে। কিন্তু আর এক প্রকার লিঙ্গ আছে। ইহাতে লিঙ্গের উপর শিবের মুখ খোদিত থাকে, ইহার নাম মুখলিঙ্গ। মুখের সংখ্যা অনুসারে মুখলিঙ্গ একমুখ বা চতুর্মুখ। একমুখ লিঙ্গই বেশী পাওয়া যায়। ত্রিপুরা জিলায় উনকোটি গ্রামে প্রস্তর নির্মিত এবং মুর্শিদাবাদে অষ্টধাতুর চতুর্মুখ লিঙ্গ পাওয়া গিয়াছে।

শিবের মূর্তি নানারূপে কল্পিত হইয়াছে। ইহার মধ্যে চন্দ্রশেখর, নটরাজ বা নৃত্যমূর্তি, সদাশিব, উমা-মহেশ্বর, অর্দ্ধনারায়ণ ও কল্যাণ-সুন্দর, শিবের সৌম্য ভাব দ্যোতক, এবং অঘোর-রুদ্র তাঁহার উগ্রভাবের পরিকল্পনা। পাহাড়পুরে শিবের তিনটি চন্দ্রশেখর মূর্তি খোদিত আছে। ইহাদের তিন নেত্র, উর্দ্ধলিঙ্গ ও জটামুকুট এবং দুই হস্তে ত্রিশূল, অক্ষমালা ও কমণ্ডলু প্রভৃতি লক্ষিত হয়। একটি মূর্তিতে সর্প শিবের গলদেশ জড়াইয়া আছে। বিবসন হইলেও শিবের গলায় হার, কর্ণে কুণ্ডল এবং বাহুতে কেয়ুর প্রভৃতি ভূষণ ও গলায় যজ্ঞোপবীত আছে।

পরবর্তীকালে শিবের মূর্তিতে আরও অনেক বৈচিত্র্য ও উপাদান-বাহুল্য দেখা যায়। রাজসাহী জিলার গণেশপুরে প্রাপ্ত মূর্তি ইহার এক উৎকৃষ্ট দৃষ্টান্ত। চতুর্ভূজ মূর্তির এক হস্তে দীর্ঘদল বিশিষ্ট পদ্ম, আর এক হস্তে শূল অথবা খট্টাঙ্গ (অপর দুই হস্ত ভগ্ন)। বিচিত্র কারুকার্য শোভিত সপ্তরথ পাদদলীর কেন্দ্রস্থলে বিশ্বপদ্মের উপর নানা বিভূষণে সজ্জিত শিব ত্রিভঙ্গ ভঙ্গিমায় দণ্ডায়মান। মস্তকের চতুর্দিকে বিচিত্র প্রভাবলী,—ইহার দুইপার্শ্বে মালা হস্তে উড্ডীয়মান গন্ধর্ব্ব। মূর্তির পশ্চাতে কারুকার্য খচিত সিংহাসন ও নিয়ে দুইপার্শ্বে দুইজন কিঙ্কর ও কিঙ্করী। কিঙ্করগণের হস্তে শূল ও কপাল এবং কিঙ্করীগণের হস্তে চামর। ইহা শিবের ঈশান মূর্তি। বরিশাল জিলার অন্তর্গত কাশীপুর গ্রামে বিরূপাক্ষ রূপে পূজিত চতুর্ভূজ শিব সম্ভবত নীলকণ্ঠ। সারদাতিলক তন্ত্র অনুসারে নীলকণ্ঠের পাঁচটি মুখ। এই মূর্তির মুখ মাত্র একটি, কিন্তু উক্ত তন্ত্রের বর্ণনা অনুযায়ী ইহার হস্তে অক্ষমালা, ত্রিশূল, খট্টাঙ্গ ও কপাল আছে। বর্ণনার অতিরিক্ত এই মূর্তিতে কীর্তিমুখের পরিবর্তে ছত্র, প্রভাবলীর দুই পার্শ্বে কাক্তিক গণেশের মূর্তি ও নিয়ে দুই পার্শ্বে মকরবাহিনী গঙ্গা ও সিংহবাহিনী পার্বতীর মূর্তি প্রভৃতি বিশেষ লক্ষ্য করিবার বিষয়। মূর্তির অধোভাগে শিবের বাহন নন্দীর মূর্তি।

বাংলায় নটরাজ শিবের যে সমুদয় মূর্তি পাওয়া গিয়াছে তাহার হস্তসংখ্যা দশ অথবা বারো, এবং শিব বৃষপৃষ্ঠে নৃত্যপরায়ণ। দক্ষিণ ভারতের নটরাজ বৃষারূঢ় নহে এবং তাহার মাত্র চারি হাত। বাংলার দশভুজ নটরাজ মূর্তির সহিত মৎস্যপুরাণের বর্ণনার ঐক্য আছে। এই বর্ণনা অম্বুযায়ী শিবের দক্ষিণ চারি হস্তে খড়্গ, শক্তি, দণ্ড, ত্রিশূল এবং বাম চারি হস্তে খেটক, কপাল, নাগ ও খট্টাক ; নবম হস্তে অক্ষমালা, এবং দশম হস্ত বরদমুদ্রায়ুক্ত। দ্বাদশভুজ শিবের মূর্তি অশ্লুরূপ। শিব দুই হস্তে বীণা বাজাইতেছেন, দুই হস্তে তাল দিতেছেন ও আর দুই হস্তে ছত্রের আয় সর্প ধরিয়া আছেন ; বাকী হস্ত গুলিতে শিবের সুপরিচিত আয়ুধাদি আছে। ঢাকা জিলাস্থিত শঙ্করবাঁধা গ্রামে প্রাপ্ত একটি মূর্তি নটরাজ শিবের সুন্দর দৃষ্টান্ত। ইহার দশ হস্তে মৎস্য পুরাণোক্ত আয়ুধাদি আছে। শিবের বাহন বৃষটিও নৃত্যশীল প্রভুর দিক মুখ ফিরাইয়া দুই পা উর্দ্ধে তুলিয়া নৃত্য করিতেছে। ইহার দুই পার্শ্বে মকরবাহিনী গঙ্গা ও সিংহবাহিনী পার্বতী। মূর্তির উপরে ও উভয় পার্শ্বে প্রধান প্রধান দেব দেবীর মূর্তি। পাদপীঠে ক্ষুদ্র ক্ষুদ্র অসংখ্য নাগ নাগিনী ও গণের নৃত্যপরায়ণ মূর্তি। শিল্পী পারিপার্শ্বিকের সাহায্যে নটরাজ শিবের সৌন্দর্য্য উজ্জল রূপে ফুটাইয়া তুলিয়াছেন।

সদাশিব মূর্তি বাংলায় অনেক পাওয়া গিয়াছে। সেনরাজগণের তান্ত্র-শাসন মুদ্রায় যে এই মূর্তি উৎকীর্ণ তাহা পূর্বেই বলা হইয়াছে। মহানির্ব্বাণ-তন্ত্র, উত্তরকামিকাগম এবং গরুড়পুরাণে সদাশিব মূর্তির বর্ণনা আছে। শেষোক্ত দুইখানি গ্রন্থের বর্ণনার সহিত বাংলার সদাশিবমূর্তির অধিকতর সঙ্গতি দেখা যায়। এই বর্ণনা অনুসারে বক্রপদ্মাসনস্থিত সদাশিব মূর্তির পাঁচটি মুখ ও দশটি হস্ত থাকিবে। দক্ষিণ দুই হস্ত অভয় ও বরদ মুদ্রায়ুক্ত এবং অবশিষ্ট তিন হস্তে শক্তি, ত্রিশূল ও খট্টাক ; বাম পাঁচ হস্তে সর্প, অক্ষমালা, ডমরু, নীলোৎপল ও লেবুফল থাকিবে। তাঁহার পার্শ্বে মনোম্মানীর মূর্তি থাকিবে। দিনাজপুর জিলার অন্তর্গত রাজিবপুরে তৃতীয় গোপালের লিপিবদ্ধ সদাশিবমূর্তি বাংলার এই জাতীয় মূর্তির একটি সুন্দর নিদর্শন। ইহাতে মনোম্মানীর মূর্তি নাই, কিন্তু পঞ্চরথ পাদপীঠের মধ্যস্থলে শূলধারী দুইটি শিবকিঙ্করের মূর্তি আছে। বাংলার সদাশিব মূর্তিগুলির সহিত দক্ষিণ ভারতে রচিত শাস্ত্রের বর্ণনার সামঞ্জস্য এবং সেনরাজগণের শাসন মুদ্রায় সদাশিব মূর্তি দেখিয়া কেহ কেহ অনুমান করেন যে সেনরাজগণই দাক্ষিণাত্য হইতে বাংলায় সদাশিবমূর্তির প্রচলন করেন। কিন্তু যে শৈব আগম হইতে সদাশিব পূজার উৎপত্তি তাহা

উত্তর ভারতেই রচিত হয়। সম্ভবত এই আগমোক্ত সদাশিব-পূজা প্রথমে উত্তর ভারত হইতে দাক্ষিণাত্যে প্রচারিত হয়, পরে সেনরাজগণ তথা হইতে ইহা বাংলায় প্রচলন করেন।

শিবের আলিঙ্গন অথবা উমা-মহেশ্বর মূর্তি বাংলায় সুপরিচিত। শিবের বাম জাহ্নুর উপর উপবিষ্টা উমা দক্ষিণ হস্তে শিবের গলদেশে বেষ্টন করিয়াছেন এবং বাম হস্তে একখানি দর্পণ ধরিয়া আছেন। শিবের দক্ষিণ হস্তে একটি পদ্ম, এবং বাম হস্ত দ্বারা তিনি দেবীকে আলিঙ্গন করিয়া আছেন। সম্ভবত তান্ত্রিক ধর্মমতের প্রভাবেই বাংলায় এই মূর্তির বহুল প্রচার হইয়াছিল। কারণ তন্ত্রমতে সাধকগণকে শিবের ক্রোড়ে উপবিষ্টা দেবী মূর্তিকে ধ্যান করিতে হয় এবং এই প্রকার মূর্তি সম্মুখে রাখিলে এই ধ্যানযোগের সুবিধা হয়।

বৈবাহিক অথবা কল্যাণ-সুন্দর মূর্তিতে শিবের ঠিক সম্মুখেই গৌরী দাঁড়াইয়া আছেন। শেষোক্ত দুই প্রকার মূর্তিতে শিব ও উমার মূর্তি একত্র হইলেও পৃথক। কিন্তু অর্দ্ধনারীশ্বর মূর্তিতে উভয়ে এক দেহে পরিণত হইয়াছেন। এই মূর্তির দক্ষিণ-অর্দ্ধ শিবের ও বাম-অর্দ্ধ উমার। অর্দ্ধনারীশ্বর ও কল্যাণ-সুন্দর মূর্তি বাংলায় খুব বেশী পাওয়া যায় নাই।

এ পর্য্যন্ত শিবের যে সমুদয় মূর্তি আলোচিত হইয়াছে তাহা সৌমাভাবের দ্রোতক। শিবের রুদ্র মূর্তি ভারতের অগ্ন্যাগ্ন প্রদেশে খুব প্রচলিত থাকিলেও বাংলায় মাত্র অল্প কয়েকটি পাওয়া গিয়াছে। এইগুলিতে শিবের দিগম্বর, নরমুণ্ডমালা-বিভূষিত, উলঙ্গ নর-দেহের উপর দণ্ডায়মান মূর্তি এবং গৃধ্র-শকুনী-পরিবেষ্টিত নরমুণ্ড-রচিত পাদপীঠ প্রভৃতি বীভৎস ভাবের পরিকল্পনা দেখা যায়।

শিবের পুত্র গণেশের বহুসংখ্যক মূর্তি বাংলায় পাওয়া গিয়াছে। উপবিষ্ট, দণ্ডায়মান ও নৃত্যশীল, গণেশের এই তিন প্রকার মূর্তিই পরিকল্পিত হইয়াছে। কার্তিকের পৃথক মূর্তি খুবই কম। কিন্তু উত্তর বঙ্গে ময়ূরবাহন কার্তিকের একটি সুন্দর মূর্তি পাওয়া গিয়াছে।

### ৩। শক্তি মূর্তি

বাংলায় বহুসংখ্যক ও বিভিন্নশ্রেণীর দেবীমূর্তি পাওয়া গিয়াছে। ইহার কোন কোনটিতে বৈষ্ণব প্রভাব দেখিতে পাওয়া যায়, কিন্তু অধিকাংশই শাক্ত-গণের আরাধ্যা দেবী।

ত্রিপুরা জিলার দেউলবাড়ী স্থানে প্রাপ্ত অষ্টধাতু নির্মিত দেবী মূর্তির পাদপীঠে খড়াবংশীয়া রাণী প্রভাবতীর লিপি উৎকীর্ণ আছে। সুতরাং ইহা

সপ্তম শতাব্দীর এবং এই শ্রেণীর মূর্তির সর্বপ্রাচীন নিদর্শন। দেবী অষ্টভূজা ও সিংহবাহিনী, এবং তাঁহার হস্তে শঙ্খ, তীর, অসি, চক্র, ঢাল, ত্রিশূল, ঘণ্টা ও ধনু। পরবর্তীকালে রচিত শারদাতিলক-তন্ত্রে এই দেবী ভদ্রভূগা, ভদ্রকালী, অম্বিকা, ক্ষেমধরী ও বেদগর্ভা প্রভৃতি নামে অভিহিত হইয়াছেন, কিন্তু উৎকীর্ণ লিপি অনুসারে ইহার নাম সর্বানী।

বাংলায় এক শ্রেণীর চতুর্ভূজা দেবীমূর্তি সচরাচর দেখা যায়। কেহ কেহ ইহাকে চণ্ডী, এবং কেহ কেহ ইহাকে গৌরী-পার্বতী নামে অভিহিত করিয়াছেন। এই দণ্ডায়মানা দেবীমূর্তির হস্তে অক্ষসহ শিবলিঙ্গ, ত্রিদণ্ডী অথবা ত্রিশূল, দাড়িম্ব ও কমণ্ডলু এবং পাদপীঠে একটি গোধিকার মূর্তি। কোন কোন মূর্তিতে দেবীর দুই পার্শ্বে কার্তিক-গণেশ অথবা লক্ষ্মী-সরস্বতী, সিংহ, মৃগ, ও কদলী বৃক্ষ, উর্দ্ধে ব্রহ্মা, বিষ্ণু, শিব, এবং নিম্নে নবগ্রহ প্রভৃতির মূর্তি দেখিতে পাওয়া যায়।

উপবিষ্টা ভূগা মূর্তি ও অনেক দেখিতে পাওয়া যায়। ইহার কোনটি চতুর্ভূজা, কোনটি ষড়্ভূজা। বিংশভূজা একটি মূর্তি ও পাওয়া গিয়াছে—ইনি সম্ভবত মহালক্ষ্মী। বিক্রমপুরের কাগজিপাড়ায় পাষণ লিঙ্গের উর্দ্ধভাগ হইতে আবিভূতা একটি দেবীমূর্তি পাওয়া গিয়াছে। ইহার চারিহস্ত। দুইটি হস্ত ধ্যানমুদ্রায়ুক্ত ও বক্ষোদেশের নিম্নভাগে সংগৃহীত। তৃতীয় হস্তে অক্ষমালা ও চতুর্থ হস্তে পুঁথি। ইনি সম্ভবত মহামায়া অথবা ত্রিপুরভৈরবী।

দেবীর রূপভাবভ্রাতক অনেক মূর্তি পাওয়া যায়। ঈহার মধ্যে মহিষ-মর্দিনীই সমধিক প্রসিদ্ধ। বর্তমানে শরৎকালে বাংলায় যে ভূর্গার পূজা হয় তাঁহা এই মহিষ-মর্দিনীর মূর্তি হইতেই উদ্ভূত। এই মূর্তি কেবল ভারতের সর্বত্র নহে, সুদূর যবদ্বীপেও সুপরিচিত ছিল। মার্কণ্ডেয় পুরাণের চণ্ডী অধ্যায়ে এই দেবীর সবিশেষ বিবরণ আছে। অষ্ট অথবা দশভূজা সিংহবাহিনী দেবী সন্তানহন্ত মহিষের দেহ হইতে নিজ্জাস্ত অশুরের সহিত যুদ্ধে নিরত; তাঁহার হস্তে ত্রিশূল, খেটক, শর, খড়্গা, ধনু, পরশু, অঙ্কুশ, নাগপাশ প্রভৃতি আয়ুধ। দিনাজপুর জিলার পোশী গ্রামে নবভূর্গার মূর্তি পাওয়া গিয়াছে। ইহাতে মধ্যস্থলে একটি বড় এবং ইহার চতুর্পার্শ্বে ক্ষুদ্র আটটি মহিষ-মর্দিনীর মূর্তি। বড় মূর্তিটির অষ্টাদশ এবং ক্ষুদ্র মূর্তিগুলির বোড়শ ভূজ। ভবিষ্যৎ পুরাণে এই দেবীর বর্ণনা আছে। দিনাজপুরের বেৎনা গ্রামে ৩২টি হস্তবিশিষ্টা অশুরের সহিত যুদ্ধরতা একটি দেবীর মূর্তি পাওয়া গিয়াছে। কোন গ্রন্থেই ইহার বর্ণনা নাই এবং এরূপ অল্প কোন মূর্তিও এ পর্যন্ত পাওয়া যায় নাই। বাখরগঞ্জের

অন্তর্গত শিকারপুর গ্রামে পূজিতা উগ্রতার দেবীমূর্তির চারি হস্তে খড়্গ, তরবারি, নীলোৎপল ও নরমুণ্ড। শবের উপর দণ্ডায়মানা দেবী মূর্তির উপরিভাগে ব্রহ্মা, বিষ্ণু, শিব, কার্তিক ও গণেশের মূর্তি উৎকীর্ণ।

বাংলায় পাশাপাশি উৎকীর্ণ সপ্তমাতৃকার মূর্তিযুক্ত প্রস্তরখণ্ড অনেক পাওয়া গিয়াছে। এই মাতৃকাগণ দেবগণের শক্তিরূপে কল্পিত। ইহাদের নাম ব্রহ্মাণী, মাহেশ্বরী, কোমারী, ইন্দ্রাণী, বৈষ্ণবী, বারাহী ও চামুণ্ডা। চামুণ্ডার পৃথক ও বিভিন্নরূপের মূর্তি অনেক পাওয়া যায়। ইহার কোন কোনটি বড়ভুজা, নানা আয়ুধধারিণী ও নৃত্যপরায়ণ। বর্দ্ধমান জিলার অট্টহাস গ্রামে চামুণ্ডা দেবীর দন্তরূপের এক অদ্ভুত মূর্তি পাওয়া গিয়াছে। ইহার অতিক্রীণ শীর্ণ দেহ, গোলাকৃতি চক্ষু, বিকশিত দন্ত, পৈশাচিক হাস্য, কোটরগত জঠর ও উর্দ্ধজাহ্নু হইয়া বসিবার ভঙ্গী—সকলই একটা অদ্ভুত ভৌতিক রহস্যের স্রোতক।

চামুণ্ডা ব্যতীত ব্রহ্মাণী, বারাহী ও ইন্দ্রাণী এই তিন মাতৃকারও পৃথক মূর্তি পাওয়া গিয়াছে। তবে তাহা সংখ্যায় অল্প।

প্রধান প্রধান ধর্মমত ব্যতীত এদেশে অনেক লৌকিক ধর্ম্মানুষ্ঠান ও দেব দেবীর পূজা জনসাধারণের মধ্যে প্রচলিত ছিল। পরবর্ত্তীকালে এই সমুদয় দেব দেবী শিব অথবা বিষ্ণুর পরিবারভুক্ত বলিয়া গণ্য হইলেও আদিতে ইহারা লৌকিক দেবতা মাত্র ছিলেন এরূপ অনুমানই সঙ্গত বলিয়া মনে হয়। এইরূপ যে সমুদয় দেবীর মূর্তি পাওয়া গিয়াছে তাঁহাদের মধ্যে মনসা, হারীতী, ষষ্টি, শীতলা প্রভৃতির উল্লেখ করা যাইতে পারে। গঙ্গা ও যমুনার মূর্তি সাধারণত মন্দিরের দরজার দুই পার্শ্বে খোদিত থাকে, কিন্তু তাঁহাদের পৃথক মূর্তিও পাওয়া গিয়াছে।

বাংলাদেশে ও পূর্বভারতের অগ্ণাত প্রদেশে এক শ্রেণীর দেবীমূর্তি বহুসংখ্যায় দেখিতে পাওয়া যায়। দেবী একটি শিশুপুত্র পার্শ্বে লইয়া শুইয়া আছেন এবং একটি কিকরী তাঁহার পদসেবা করিতেছে। উর্দ্ধদেশে শিবলিঙ্গ এবং কার্তিক, গণেশ ও নবগ্রাহের ক্ষুদ্র ক্ষুদ্র মূর্তি। কেহ কেহ ইহাকে কৃষ্ণ-যশোদার মূর্তি বলিয়া ব্যাখ্যা করিয়াছেন, আবার কেহ কেহ মনে করেন যে শিশুটি সন্তোজাত শিবের মূর্তি।

## ২। অগ্ৰাণ্য পৌরাণিক দেবমূৰ্ত্তি

রাজসাহী জিলার অন্তৰ্গত কুমারপুর ও নিয়ামংপুরে যে দুইটি সূৰ্য্যমূৰ্ত্তি পাওয়া গিয়াছে তাহা গুপ্তযুগে নিৰ্ম্মিত বলিয়া অনুমিত হয়। এই প্রাচীন মূৰ্ত্তিতে সূৰ্য্যের দুই হস্তে সনাল পদ্ম, দুই পার্শ্বে অম্বুচর ও পাদপীঠে সপ্তাশ্ব উৎকর্ণ দেখিতে পাওয়া যায়। বগুড়া জিলার দেওড়া গ্রামে প্রাপ্ত রথাকৃৎ সূৰ্য্য মূৰ্ত্তিতে সারথি অৰুণের দুই পার্শ্বে দণ্ডী ও পিঙ্গল নামক দুই অম্বুচর বাতীত শরনিষ্কপকারিণী উষা ও প্রত্যাষা নামে দুই দেবী আছেন। পরবর্ত্তী-কালের সূৰ্য্য মূৰ্ত্তিতে সজ্জা ও ছায়া নামে সূৰ্য্যের দুই রাণী ও মহাশ্বেতা নামে আর এক পার্শ্বচারিণীর মূৰ্ত্তি এবং মূল মূৰ্ত্তির নক্ষত্রাদেশে উপবীত ও পদদ্বয়ে জুতা দেখা যায়। সূৰ্য্য মূৰ্ত্তি সাধারণত দ্বিভুজ কিন্তু দিনাজপুরের অন্তৰ্গত মহেন্দ্র নানক স্থানে একটি ষড়ভুজ সূৰ্য্যমূৰ্ত্তি পাওয়া গিয়াছে। দক্ষিণ ভারতের সূৰ্য্যমূৰ্ত্তির ছায় বাংলায় কচিং দুই একটি মূৰ্ত্তিতে জুতা দেখিতে পাওয়া যায় না। রাজসাহী জিলার অন্তৰ্গত মান্দায় প্রাপ্ত একটি সূৰ্য্যমূৰ্ত্তির তিনটি মুখ ও দশটি বাহু। পার্শ্বের দুইটি মুখের ভাব অতিশয় উগ্র ও দশ বাহুতে শক্তি, খট্টাঙ্গ, ডমরু প্রভৃতি দেখিয়া অনুমিত হয় যে ইহা মার্ত্তণ্ড-ভৈরবের মূৰ্ত্তি। কিন্তু শারদাতিলক তন্ত্র অনুসারে মার্ত্তণ্ড ভৈরবের চারিটি মুখ।

পুরাণ অনুসারে রেবন্ত সূৰ্য্যের পুত্র। রেবন্তের কয়েকটি মূৰ্ত্তি পাওয়া গিয়াছে। দিনাজপুর জিলার ঘাটনগরে প্রাপ্ত মূৰ্ত্তিটি বৃট্জুতা পরিহিত ও অশ্বাকৃৎ; এক হস্তে কলা, অগ্ৰ হস্তে অশ্বের বল্গা; একটি অম্বুচর দেবমূৰ্ত্তির মস্তকে ছত্র দাবণ করিয়া আছে; সম্মুখ হইতে একটি ও পশ্চাতে বুক্ষের উপর হইতে আর একটি দম্বা রেবন্তকে আক্রমণ করিতে উদ্যত। ত্রিপুরা জিলায় বড়কামতা গ্রামে প্রাপ্ত ভগ্ন একটি মূৰ্ত্তিতে অশ্বাকৃৎ রেবন্তের হস্তে একটি পাত্র এবং তাঁহার পশ্চাতে কুকুর, বাদক ও অম্বুচরের দল। সম্ভবত এটি যুগ্মা-যাত্রার দৃশ্য। বৃহৎ সাংহিতা ও অগ্ৰাণ্য গ্রন্থে রেবন্তের এইরূপ বর্ণনা আছে। ঘাটনগরের মূৰ্ত্তিটি মার্কণ্ডেয় পুরাণের বর্ণনার অনুরূপ।

নবগ্রহের সহিতও সূৰ্য্যের ঘনিষ্ঠ সম্বন্ধ। নবগ্রহের মূৰ্ত্তি সাধারণত এক সঙ্গে পৃথক কোন প্রস্তরখণ্ডে অথবা অগ্ৰ কোন দেবমূৰ্ত্তির পারিপার্শ্বিকরূপে উৎকর্ণ দেখা যায়। চব্বিশ পরগণার অন্তৰ্গত কাঁকলদৌঘি গ্রামে নবগ্রহের একটি সুন্দর মূৰ্ত্তি পাওয়া গিয়াছে। নয়টি গ্রহদেবতা তাঁহাদের বিশিষ্ট লাজন হস্তে এক পংক্তিতে দাঁড়াইয়া আছেন এবং তাঁহাদের বাহনগুলি যথাক্রমে পাদ-

পীঠের নিম্নভাগে উৎকীর্ণ হইয়াছে। অগ্রভাগে গণেশের একটি মূর্তি আছে। এই প্রকার নবগ্রহমূর্তির সাহায্যে সম্ভবত স্বস্তায়ন অথবা গ্রহযাগ সম্পন্ন হইত। নবগ্রহের পৃথক পৃথক মূর্তি বড় একটা পাওয়া যায় না। তবে পাহাড়পুরের প্রধান মন্দিরের তলভাগে যে সমুদয় প্রস্তর ফলক আছে তাহাতে চন্দ্র ও বৃহস্পতির দুইটি মূর্তি উৎকীর্ণ আছে।

ইন্দ্র, অগ্নি, যম, বরুণ, কুবের প্রভৃতি দিবপালের মূর্তিও পাহাড়পুরে ও বাংলার অন্যান্য স্থানে পাওয়া গিয়াছে।

### ৫। জৈন মূর্তি

সাধারণত বাংলায় যে সকল দেবমূর্তি পাওয়া গিয়াছে তাহা অষ্টম শতাব্দীর পরবর্তী। সম্ভবত এই সময় হইতেই বাংলায় জৈন ধর্মের প্রভাব ও প্রতিপত্তি খুবই কমিয়া যায় এবং এই কারণেই জৈন মূর্তি বাংলায় খুব কমই পাওয়া গিয়াছে।

দিনাজপুর জিলার অন্তর্গত সুরহর গ্রামে তীর্থঙ্কর ঋষভনাথের একটি অপূর্ব মূর্তি পাওয়া গিয়াছে। মন্দিরাকারে গঠিত শিলাপটের ঠিক মধ্যস্থলে বন্ধ-পদ্মাসনে জিন ঋষভনাথ উপবিষ্ট, এবং পাদপীঠের নিম্নে তাঁহার বিশেষ লাজ্জন বৃষমূর্তি। এই মূর্তির উদ্ধে তিন সারিতে ও দুই পার্শ্বে দুই শ্রেণীতে অনুরূপ ক্ষুদ্র ক্ষুদ্র মন্দিরে উপবিষ্ট অবশিষ্ট তেইশজন তীর্থঙ্করের ক্ষুদ্র মূর্তি। মূল মূর্তির দুই ধারে চৌরী হস্তে দুইজন অনুরূপ ও মস্তকের দুই পার্শ্বে মালা হস্তে দুইজন গন্ধর্ব্ব। এই সুন্দর মূর্তিটি সূক্ষ্ম শিল্পজ্ঞানের পরিচায়ক এবং সম্ভবত পালযুগের প্রথমভাগে নির্মিত। মেদিনীপুর জিলার বরভূমে ঋষভনাথের আর একটি মূর্তি পাওয়া গিয়াছে। ইহাতে কেন্দ্রস্থলে মূল মূর্তির দুই পার্শ্বে চব্বিশজন তীর্থঙ্করের মূর্তি ; সকলেই কায়োৎসর্গ মুদ্রায় দণ্ডায়মান।

বাঁকুড়ার অন্তর্গত দেউলভিরে জিন পার্শ্বনাথের একটি মূর্তি পাওয়া গিয়াছে। জিন যোগাসনে বসিয়া আছেন এবং তাঁহার মস্তকের উপর একটি সর্প সাতটি ফণা বিস্তার করিয়া আছে। চব্বিশ পরগণার কাঁটাবেনিয়ার কায়োৎসর্গ মুদ্রায় দণ্ডায়মান একটি পার্শ্বনাথের মূর্তির দুই পার্শ্বে অবশিষ্ট তেইশজন তীর্থঙ্করের মূর্তি উৎকীর্ণ হইয়াছে।

বর্ধমান জিলার উজানী গ্রামে জিন শাস্তিনাথের একটি দণ্ডায়মান মূর্তি পাওয়া গিয়াছে। পাদপীঠে তাঁহার বিশেষ লাজ্জন যুগ এবং পশ্চাতে নবগ্রহের মূর্তি খোদিত।

### ৬। বৌদ্ধ মূর্তি

বাংলাদেশে যে সমুদয় বুদ্ধ মূর্তি পাওয়া গিয়াছে তাহার মধ্যে রাজসাহী জিলার অন্তর্গত বিহারৈল গ্রামে প্রাপ্ত একটি মূর্তিই সর্বপ্রাচীন। ইহা গুপ্তযুগে নির্মিত সারনাথের বুদ্ধ মূর্তিগুলির অনুরূপ।

খুলনা জিলার অন্তর্গত শিববাটি গ্রামে শিবরূপে পূজিত একটি মূর্তি পরবর্তীকালের বুদ্ধমূর্তির একটি চমৎকার দৃষ্টান্ত। জটিল ও বিচিত্র কারুকাৰ্য্য-খচিত প্রস্তরখণ্ডের মধ্যস্থলে মন্দির মধ্যে বুদ্ধ ভূমিস্পর্শমুদ্রায় উপবিষ্ট। বুদ্ধের জীবনের প্রধান প্রধান কতকগুলি ঘটনা—জন্ম, প্রথম উপদেশ, মহাপরিনির্বাণ, নালাগিরি-দমন, ত্রয়স্থি শ স্বর্গ হইতে অবতরণ প্রভৃতি—মূল মূর্তির প্রভাবলীতে খোদিত। এই ঘটনাগুলি পৃথকভাবেও খোদিত দেখিতে পাওয়া যায়।

মহাযান ও বজ্রযান সম্প্রদায় যে পালযুগে এদেশে বিশেষ প্রসার লাভ করিয়াছিল এই দুই মতের অনুযায়ী বহুসংখ্যক দেবদেবীর মূর্তিই তাহার সাক্ষ্য প্রদান করে। ইহাদের মধ্যে ধ্যানীবুদ্ধ, অবলোকিতেশ্বর ( অথবা লোকেশ্বর ) ও মঞ্জুশ্রী নামক দুই বোধিসত্ত্ব, এবং তারা এই কয়েকটি প্রধান এবং জম্বুল, হেরুক ও হেবজ্র এই কয়টি অপ্রধান।

ধ্যানীবুদ্ধের মূর্তি খুব বেশী পাওয়া যায় নাই। ঢাকা জিলার সুখবাসপুরে বজ্রসত্ত্বের একটি মূর্তি পাওয়া গিয়াছে। বীরাসনে উপবিষ্ট এই মূর্তিটির দক্ষিণ হস্তে বজ্র এবং বাম হস্তে ঘণ্টা। পশ্চাদ্ভাগে উৎকীর্ণ লিপি হইতে অনুমিত হয় যে মূর্তিটি দশম শতাব্দীতে নির্মিত।

অবলোকিতেশ্বরের বহুসংখ্যক এবং খসপর্ণ, সুগতি-সন্দর্শন, ষড়ক্ষরী প্রভৃতি বহুশ্রেণীর মূর্তি পাওয়া গিয়াছে। ঢাকা জিলায় মহাকালীতে একাদশ শতাব্দীতে নির্মিত খসপর্ণের একটি অতিশয় সুন্দর মূর্তি পাওয়া গিয়াছে। সপ্তরথ পাদপীঠের উপর সনাল পদ্মহস্তে ললিতাসনে উপবিষ্ট অবলোকিতেশ্বর যেন পরমকরণাভরে পৃথিবী অবলোকন করিতেছেন। তাহার দক্ষিণ পার্শ্বে তারা ও সুধনকুমার ও বামপার্শ্বে ভূকুটী ও হয়গ্রীব পৃথক পৃথক পদ্মপরে আসীন। উর্দ্ধে প্রভাবলীতে পাঁচটি মন্দিরাভাস্তরে পঞ্চতথাগতের ধ্যানমূর্তি এবং নিম্নে পাদপীঠে সূচীমুখমূর্তি এবং নানা রত্ন ও উপচার খোদিত। রাজসাহী চিত্রশালায় ষড়ভূজ লোকেশ্বরের যে মূর্তি আছে তাহা সম্ভবত সুগতি-সন্দর্শন লোকেশ্বর। ইহার এক হস্তে বরদমুদ্রা এবং অগ্র পাঁচ হস্তে পুঁথি, পাশ, ত্রিদণ্ডী ( অথবা ত্রিশূল ), অক্ষমালা এবং কমণ্ডলু। মালদহ জিলায়



বাণীপুরে প্রাপ্ত ষড়ক্ষরী লোকেশ্বরের মূর্তি বজ্রপর্যায় আসনে উপবিষ্ট ও চতুর্ভুজ ; দুই হস্ত অঞ্জলিবদ্ধ ও অপর দুই হস্তে অক্ষমালা ও পদ্ম। মূর্তির মস্তকে বজ্রমুকুট এবং দুই পার্শ্বে মণিধর ও ষড়ক্ষরী মহাবিহার ক্ষুদ্র মূর্তি।

মহাস্থানের নিকটে বলাইধাপে একটি সুন্দর মঞ্জুশ্রীর মূর্তি পাওয়া গিয়াছে। মূর্তিটি অষ্টধাতু নির্মিত কিন্তু স্বর্ণপটে আচ্ছাদিত, এবং ইহার মস্তকের জটামধ্যে ধ্যানীবুদ্ধ অক্ষোভোর মূর্তি। দ্বিভঙ্গ ভঙ্গীতে দণ্ডায়মান মঞ্জুশ্রীর বাম হস্তে ব্যাখ্যান বা বিতর্ক মুদ্রা—কারণ ইনি হিন্দু দেবতা ব্রহ্মার আয় জ্ঞান ও পাণ্ডিত্যের আকর। পরিধেয় ধৃতি মেখলাদ্বারা আবদ্ধ এবং চাদরখানি উপবীতের আয় বামস্বাক্ষের উপর দিয়া দেহের উর্দ্ধভাগ বেঁধেন করিয়া আছে। ঢাকা জিলার জালকুণ্ডী গ্রামে মঞ্জুশ্রীর অরপচন রূপের একখানি মূর্তি পাওয়া গিয়াছে। তরবারিধৃত দক্ষিণ হস্তখানির অগ্রভাগ ভাস্কিয়া গিয়াছে ; বামহস্তে বুদ্ধের নিকট একখানা পুঁথি ধরিয়া আছেন। চারি পাশে জালিনী, উপকেশিনী, সূর্য্যপ্রভা ও চন্দ্রপ্রভা নামে তাঁহার চারিটি ক্ষুদ্র প্রতিমূর্তি এবং প্রভাবলীর উপরিভাগে বৈরোচন, অক্ষোভা, অমিতাভ ও রত্নসম্ভব এই চারিটি ধ্যানীবুদ্ধের মূর্তি।

বৌদ্ধ দেবতা জম্বুল পৌরাণিক দেবতা কুবেরের আয় যক্ষগণের অধিপতি ও ধনসম্পদের অধিষ্ঠাতৃ-দেবতা। বাংলায় বহু জম্বুল মূর্তি পাওয়া গিয়াছে। সুলোদর এই মূর্তির দক্ষিণ হস্তে অক্ষমালা ; বামহস্তে একটি নকুলের গলা টিপিয়া ইহার মুখ হইতে ধন রত্ন বাহির করিতেছেন। মূর্তির নিম্নে একটি ধনপূর্ণ ঘট উপুড় হইয়া পড়িয়া আছে।

হেরুকের মূর্তি খুব কমই পাওয়া যায়। ত্রিপুরা জিলার শুভপুর গ্রামে হেরুকের একটি মূর্তি পাওয়া গিয়াছে। নৃত্যপরায়ণ, দংষ্ট্রাকরালবদন এই মূর্তির বামহস্তে কপাল ও দক্ষিণ হস্তে বজ্র ; মস্তকে ধ্যানীবুদ্ধ অক্ষোভোর মূর্তি, গলদেশে নরমুণ্ডমালা এবং বামস্বাক্ষে খট্টাঙ্গ।

হেবজের একটি মূর্তি মুর্শিদাবাদে পাওয়া গিয়াছে। শক্তির সহিত নিবিড় আলিঙ্গনবদ্ধ দণ্ডায়মান মূর্তির আট মস্তক ও ষোল হাত ; প্রতি হাতে একটি নরকপাল ও পদতলে কতকগুলি নর-শব।

মহাযান ও বজ্রযানে উপাস্তা দেবীর সংখ্যা অনেক। তন্মধ্যে প্রজ্ঞা-পারমিতা, মারীচী, পর্ণশবরী, চুণ্ডা ও হারীতী এবং বিভিন্ন ধ্যানীবুদ্ধ হইতে প্রসূত বিভিন্ন তারা বিশেষ ভাবে উল্লেখযোগ্য। প্রজ্ঞাপারমিতা দিব্যজ্ঞানের প্রতীক। তাঁহার মূর্তি কমই পাওয়া গিয়াছে, কিন্তু অনেক প্রজ্ঞাপারমিতা-পুঁথির

আচ্ছাদনের উপর তাঁহার ছবি উজ্জ্বল ও নানা রঙ্গে চিত্রিত আছে। পদ্মাসনে আসীনা দেবীর মুখমণ্ডলে জ্ঞানের দীপ্তি, এবং বক্ষোদেশ-সন্নদ্ধ এক হস্তে ব্যাখ্যান-মুদ্রা, অপর হস্তে জ্ঞানমুদ্রা ও প্রজ্ঞাপারমিতা-পুঁথি দেখিতে পাওয়া যায়।

মারীচীর তিন মুখ (একটি শূকরীর মুখ) ; আট হাতে বজ্র, অঙ্কুশ, শর, অশোকপত্র, সূচী, ধনু, পাশ ও তর্জ্জনীমুদ্রা ; মস্তকে ধ্যানীবুদ্ধ বৈরোচনের মূর্তি। সূর্যের ন্যায় তিনি প্রত্যাহের দেবী। সারথি রাহুচালিত সপ্তশূকর-বাহিত রথে প্রত্যালীড় ভঙ্গীতে দণ্ডায়মানা মারীচী মূর্তিই সাধারণত এদেশে পাওয়া যায়।

রাজসাহী যাত্ৰঘরে অষ্টাদশভুজা একটি চুণ্ডা মূর্তি আছে। বিক্রমপুর পর্ণশবরীর দুইটি মূর্তি পাওয়া গিয়াছে। ইহা দুই দিনি মাথা ও ত্রয়খানি হাত ; হাতে বজ্র, পরশু, শর, ধনু, পর্ণপিচ্ছিক প্রভৃতি। কয়েকটি বৃক্ষপত্র ব্যতীত অন্য কোন পরিধান নাই। সম্ভবত পার্বত্য শবরজাতির উপাস্তা দেবী বৌদ্ধ দেবীতে পরিণত হইয়াছেন।

অমোঘসিদ্ধি, রত্নসম্ভব এবং অমিতাভ এই তিন ধ্যানীবুদ্ধ হইতে প্রসূত তারা যথাক্রমে শ্যামভারা, বজ্রভারা ও ভূকুণ্ডিতারা নামে পরিচিত। শ্যামভারার মূর্তি খুব বেশী পাওয়া যায়। তাঁহার হাতে একটি নীলপদ্ম এবং পার্শ্বে অশোককাস্তা ও একজটার মূর্তি। ফরিদপুর জিলায় মাজবাড়ী গ্রামে অষ্টধাতু-নির্মিত একটি বজ্রভারার মূর্তি পাওয়া গিয়াছে। ইহা একটি পদ্মের আকার। পদ্মের কেন্দ্রস্থলে দেবী মূর্তি এবং আটটি দলের মধ্যে তাঁহার আটটি অনুচরীর মূর্তি। এই আটটি দল ইচ্ছা করিলে বন্ধ করিয়া রাখা যায়—তখন বাহির হইতে ইহা কেবলমাত্র একটি অষ্টদল পদ্ম বলিয়া মনে হয়। ঢাকা জিলার অন্তর্গত ভবানীপুর গ্রামে বীরাসনে উপবিষ্টা একটি দেবীমূর্তি পাওয়া গিয়াছে। ইহার তিন মাথা ও আট হাত। মূর্তির মস্তকে অমিতাভ ও পাদপীঠে গণেশের মূর্তি। কেহ কেহ মনে করেন যে ইহা ভূকুণ্ডিতার মূর্তি।

এতদ্ভিন্ন আরও অনেক বৌদ্ধ দেবী বা শক্তিমূর্তি পাওয়া গিয়াছে। অষ্টভুজা একটি সুন্দর দেবীমূর্তি কেহ কেহ সিতাতপত্রা বলিয়া ব্যাখ্যা করিয়াছেন। আর একটি দেবীমূর্তি মহাপ্রতিসরা বলিয়া কেহ কেহ অনুমান করেন। কিন্তু প্রাচীন সাধনমালায় এই সমুদয় দেবীর যে বর্ণনা আছে তাহার সহিত এই দুই মূর্তির সামঞ্জস্য নাই।

# অষ্টাদশ পরিচ্ছেদ

## সমাজের কথা

### ১। জাতিভেদ

যে যুগে মনুষ্যত্ব, মহাভারত প্রভৃতি রচিত হয় সেই যুগেই যে আৰ্য্য ধর্ম ও সামাজিক রীতিনীতি প্রভৃতি বাংলা দেশে প্রভাব বিস্তার করে তাহা পূর্বেই ( ১১ পৃ ) বলা হইয়াছে । ইহার পূর্বেকার বাঙ্গালীর ধর্ম ও সমাজ সম্বন্ধে আমাদের জ্ঞান খুবই অল্প । সামান্য যাত্রা কিছু জানা গিয়াছে তাহাও সংক্ষেপে পূর্বেই উল্লিখিত হইয়াছে ( ১১ পৃ ) ।

জাতিভেদ আৰ্য্যসমাজের একটি প্রধান বৈশিষ্ট্য । আৰ্য্যগণ এদেশে বসবাস করিবার ফলে বাংলায়ও ইহার প্রবর্তন হয় । ইহার ফলে বদ্ধ, শূদ্র, শবর, পুলিন্দ, কিরাত, পুণ্ড্র প্রভৃতি বাংলার আদিম অধিবাসীগণ প্রাচীন গ্রন্থে ক্ষত্রিয় বলিয়া গণ্য হয় । অল্পসংখ্যক বাঙ্গালী যে ব্রাহ্মণ বলিয়া পরিগণিত হইত ইহা খুবই সম্ভবপর বলিয়া মনে হয়, কিন্তু কোন প্রাচীন গ্রন্থে ইহার উল্লেখ পাওয়া যায় নাই । দ্বিতীয় পরিচ্ছেদে ( ১২ পৃ ) দীর্ঘতমা ঋষির যে কাহিনী উল্লিখিত হইয়াছে তাহা হইতে স্পষ্টই প্রমাণিত হয় যে আৰ্য্য ব্রাহ্মণগণ বাঙ্গালী কন্যা বিবাহ করিতেন । এইরূপ বিবাহের ফলেই আৰ্য্যপ্রভাব এদেশে পরিপুষ্টি লাভ করিয়াছিল ।

যে সমুদয় বাঙ্গালী ব্রাহ্মণ অথবা ক্ষত্রিয় হইয়াছিল তাহারা সম্ভবত সংখ্যায় খুব বেশী ছিল না । বাংলার আদিম অধিবাসীদের অধিকাংশই শূদ্র-জাতিভুক্ত হইয়াছিল । মনুসংহিতাতে উক্ত হইয়াছে যে পুণ্ড্রক এবং কিরাত এই দুই ক্ষত্রিয় জাতি ব্রাহ্মণের সহিত সংশ্রব না থাকায় ও শাস্ত্রীয় ক্রিয়াকর্মাদির অনুষ্ঠান না করায় শূদ্রত্ব লাভ করিয়াছে । কৈবর্তজাতি মনুসংহিতায় সংকর জাতি বলিয়া বর্ণিত হইয়াছে, কিন্তু বিষ্ণুপরাণে অত্রক্ষণ্য বলিয়া অভিহিত হইয়াছে । সম্ভবত এইরূপে আরও অনেকের জাতি-বিপর্য্যয় ঘটিয়াছে । সুতরাং ইহা সহজেই অনুমান করা যায় যে বাংলা দেশের জাতি-বিভাগ বহু পরিবর্তনের মধ্য দিয়া বর্তমান আকার ধারণ করিয়াছে ।

খৃষ্টীয় পঞ্চম ও ষষ্ঠ শতাব্দীতে যে এদেশে বহুসংখ্যক ব্রাহ্মণ বাস করিতেন তাহা পূর্বেই ( ১৩৫ পৃ ) উল্লিখিত হইয়াছে । তাহার পরবর্তী সকল

যুগেই যে এদেশে বহু ব্রাহ্মণ বাস করিতেন তাহার বহুবিধ প্রমাণ আছে। বাংলার বহু রাজবংশ—পাল, সেন, বর্ম্ম প্রভৃতি—তাঁহাদের লিপিতে ক্ষত্রিয় বলিয়া অভিহিত হইয়াছেন। এদেশে এরূপ একটি মত প্রচলিত আছে যে বাংলায় কলিকালে ক্ষত্রিয় ও বৈশ্য ছিল না, কেবল ব্রাহ্মণ ও শূদ্র এই দুই বর্ণ ছিল। ইহার কোন ভিত্তি নাই। প্রাচীনকালে বাংলায় ব্রাহ্মণ, ক্ষত্রিয়, বৈশ্য ও শূদ্র এই চারি বর্ণই ছিল এবং হিন্দুযুগের শেষভাগে বাংলায় রচিত প্রামাণিক শাস্ত্রীয় গ্রন্থাদিতে চারি বর্ণেরই উল্লেখ এবং তাহাদের বৃত্তি প্রভৃতি নির্দিষ্ট আছে।

কিন্তু আৰ্য্য সমাজ আদিতে চারি বর্ণে বিভক্ত হইলেও ক্রমে বহু সংখ্যক বিভিন্ন জাতির সৃষ্টি হয়। যে সময় বাংলায় আৰ্য্যপ্রভাব বিস্তৃত হয় সে সময় আৰ্য্য সমাজে এরূপ বহু জাতির উদ্ভব হইয়াছে। মনুসংহিতা প্রভৃতি প্রাচীন ধর্ম্মশাস্ত্রে উক্ত হইয়াছে যে বিভিন্ন বর্ণের পুরুষ ও স্ত্রীর সম্মিলন হইতেই এই সমুদয় মিশ্রবর্ণের সৃষ্টি হইয়াছে এবং কোন্ কোন্ বর্ণ অথবা জাতির মিশ্রণের ফলে কোন্ কোন্ মিশ্রবর্ণের সৃষ্টি হইল তাহার সুদীর্ঘ তালিকা আছে। এই তালিকাগুলির মধ্যে অনেক বৈষম্য দেখা যায়। তাহার কারণ বিভিন্ন সময়ে বিভিন্ন স্থানে বিভিন্ন মিশ্রবর্ণের উদ্ভব হইয়াছিল। প্রতি ধর্ম্মশাস্ত্রে সাধারণত তৎকালে স্থানীয় সমাজে প্রচলিত মিশ্রবর্ণের উল্লেখ আছে, সুতরাং স্থান ও কাল অনুসারে এই মিশ্রবর্ণের যে পরিবর্তন হইয়াছে ধর্ম্মশাস্ত্রে তাহার পরিচয় পাওয়া যায়। ধর্ম্মশাস্ত্রে মিশ্রবর্ণের উৎপত্তির যে ব্যাখ্যা দেওয়া হইয়াছে তাহা যে অধিকাংশস্থলেই কাল্পনিক তাহার সম্বন্ধে কোন সন্দেহ নাই। কিন্তু একথাও অস্বীকার করা কঠিন যে এই রূপ ব্যাখ্যার উপর নির্ভর করিয়াই প্রধানত সমাজে এই সমুদয় মিশ্রবর্ণের উচ্চ-নীচ ভেদ নির্দিষ্ট হইয়াছে। বাংলাদেশের সমাজে যখন এই জাতিভেদ প্রথা দৃঢ়ভাবে প্রতিষ্ঠিত হয় তখন ভারতের সর্বত্রই আৰ্য্যসমাজে আদিম চতুর্বর্ণের পরিবর্তে এইরূপ মিশ্রজাতিই সমাজের প্রধান অঙ্গে পরিণত হইয়াছে। সুতরাং বাঙ্গালী সমাজের প্রকৃত পরিচয় জানিতে হইলে বাংলার এই মিশ্রজাতি সম্বন্ধে সঠিক ধারণা করার প্রয়োজন।

হিন্দুযুগে বাংলা দেশে রচিত কোন শাস্ত্রগ্রন্থে মিশ্রজাতির তালিকা থাকিলে বাংলার জাতিভেদ সম্বন্ধে জ্ঞান লাভ সম্ভবপর হইত, কিন্তু এরূপ কোন গ্রন্থের অস্তিত্ব এখন পর্য্যন্তও সঠিকভাবে জানা যায় নাই। তবে বৃহৎসমুদ্রপুরাণ ও ব্রহ্মবৈবর্তপুরাণ এই দুইখানি গ্রন্থ হিন্দুযুগে না হইলেও ইহার

অবসানের অব্যবহিত পরেই রচিত, এবং ইহাতে মিশ্রজাতির যে বর্ণনা আছে তাহা বাংলা দেশ সম্বন্ধে বিশেষভাবে প্রযোজ্য, এক্ষণে অনুমান করিবার যুক্তি-সঙ্গত কারণ আছে। সুতরাং এই দুইখানি গ্রন্থের সাহায্যে বাংলা সমাজের জাতিভেদ প্রথা সম্বন্ধে আলোচনা করিলে হিন্দুযুগের অবসান কালে ইহা কিরূপ ছিল তাহার সম্বন্ধে একটা মোটামুটি ধারণা করা যাইবে।

বৃহদ্রশ্মপুরাণ সম্ভবত ত্রয়োদশ শতাব্দী বা তাহার অব্যবহিত পরে রচিত হইয়াছিল। ইহাতে ব্রাহ্মণের মাছ মাংস খাওয়ার বিধি আছে এবং ব্রাহ্মণের সমুদয় লোককে ৩৬টি শূদ্র জাতিতে বিভক্ত করা হইয়াছে। এই দুইটিই বাংলা দেশের সমাজের বৈশিষ্ট্য বলিয়া ধরা যাইতে পারে। কারণ আর্য্যাবর্তের অন্তর ব্রাহ্মণেরা নিরামিষাশী, এবং বাংলায় চলিত কথায় এখনও ছত্রিশ জাতির উল্লেখ আছে। এই গ্রন্থে পদ্মা ও বাংলার যমুনা নদীর উল্লেখও বাংলার সহিত ইহার ঘনিষ্ঠ সম্বন্ধ সূচিত করে। তবে ব্রাহ্মণ ভিন্ন সকলেই যে শূদ্র-জাতীয় ইহা সম্ভবত হিন্দুযুগের সম্বন্ধে প্রযোজ্য নহে; ইহার পরবর্তী যুগের অর্থাৎ উক্ত গ্রন্থরচনা-কালের ধারণা।

বৃহদ্রশ্মপুরাণে উক্ত হইয়াছে যে রাজা বেন বর্ণাশ্রম ধর্ম্ম নষ্ট করিবার অভিপ্রায়ে বলপূর্ব্বক বিভিন্ন বর্ণের নরনারীর সংযোগ সাধন করেন এবং ইহার ফলে বিভিন্ন মিশ্রবর্ণের উৎপত্তি হয়। এই মিশ্রবর্ণগুলি সবই শূদ্র জাতীয় এবং উত্তম, মধ্যম ও অধম এই তিন সংকর শ্রেণীতে বিভক্ত।

করণ, অম্বষ্ঠ, উগ্র, মাগধ, তনুবায, গান্ধিক-বণিক, নাপিত, গোপ (লেখক), কর্ম্মকার, তৌলিক (সুপারি-বাবসায়ী), কুস্তকার, কংসকার, শংখিক, দাস (কৃষিজীবী), বারজীবী, মোদক, মালাকার, সূত্র, রাজপুত্র ও তাম্বুলী এই কুড়িটি উত্তম সংকর।

তক্ষণ, রজক, স্বর্ণকার, স্বর্ণবণিক, আভীর, তৈলকারক, ধীবর, শৌণ্ডিক, নট, শাবাক, শেখর, জালিক—এই বারটি মধ্যম সংকর। মলেগ্রাহি, কুড়ব, চাণ্ডাল, বরুড়, তক্ষ, চর্ম্মকার, ঘট্টজীবী, দোলাবাহী ও মল্ল এই নয়টি অধম সংকর; ইহারা অস্ত্রাজ ও বর্ণাশ্রম-বহিষ্কৃত অর্থাৎ বর্ণাশ্রমের অন্তর্গত নহে।

গ্রন্থে ৩৬টি জাতির উল্লেখ আছে—কিন্তু এই তালিকায় আছে ৪১টি; সুতরাং ৫টি পরবর্তীকালে যোজিত হইয়াছে। যাহাদের পিতা মাতা উভয়ই চতুর্বর্ণভুক্ত তাহারা উত্তম সংকর, যাহাদের মাতা চতুর্বর্ণভুক্ত কিন্তু পিতা উত্তম সংকর তাহারা মধ্যম সংকর, এবং যাহাদের পিতামাতা উভয়ই সংকর তাহারা অধম সংকর, এই সাধারণ বিধি অনুসারে উপরোক্ত তিনটি শ্রেণী বিভাগ

পরিকল্পিত হইয়াছে। প্রত্যেক বর্ণেরই পৃথক বৃত্তি নির্দিষ্ট হইয়াছে। শ্রোত্রিয় ব্রাহ্মণেরা কেবলমাত্র উত্তম সংকর শ্রেণীভুক্ত বর্ণের পৌরোহিত্য করিবেন। অশ্রু হই শ্রেণীর পুরোহিতেরা পতিত ব্রাহ্মণ বলিয়া গণিত এবং যজ্ঞমানের বর্ণ প্রাপ্ত হইবেন। এতদ্ব্যতীত দেবল ব্রাহ্মণের উল্লেখ আছে। গরুড় কর্তৃক শকদ্বীপ হইতে আনীত বলিয়া ইহারা শাকদ্বীপী ব্রাহ্মণ নামে অভিহিত হইতেন। দেবল পিতা ও বৈশ্য মাতার গর্ভজাত সন্তান গণক অথবা গুহবিপ্র। উপসংহারে উক্ত হইয়াছে যে বেণের দেহ হইতে স্নেচ্ছ নামে এক পুত্র জন্মে এবং তাঁহার সন্তানগণ পুলিন্দ, পুকস, খস, যবন, মুক্ষ, কম্বোজ, শবর, খর ইত্যাদি নামে খ্যাত হয়।

উল্লিখিত উত্তম ও মধ্যম সংকরভুক্ত বর্ণের অধিকাংশই এখনও বাংলায় সুপরিচিত জাতি। বৃহদ্রথপুরাণ অনুসারে করণ ও অম্বষ্ঠ সংকর বর্ণের মধ্যে শ্রেষ্ঠ। অম্বষ্ঠগণ চিকিৎসা ব্যবসায় করিত বলিয়া বৈজ্ঞ নামেও অভিহিত হইয়াছে। করণেরা লিপিকর ও রাজকার্য্যে অভিজ্ঞ এবং সংশূজ বলিয়া কথিত হইয়াছে। এই কবণই পরে বাংলায় কায়স্থজাতিতে পরিণত হইয়াছে। এখনও বাংলাদেশে ব্রাহ্মণের পরেই বৈজ্ঞ ও কায়স্থ উচ্চ জাতি বলিয়া পরিগণিত হয়। শংখকার, দাস (কৃষিজীবী), তন্তুবায, মোদক, কর্ম্মকার ও সুবর্ণবণিক জাতি বাংলায় সুপরিচিত, কিন্তু বাংলার বাহিরে বড় একটা দেখা যায় না। বৃহদ্রথপুরাণ যে প্রাচীন বাংলার সমাজ অবলম্বনে লিখিত এই সমুদয় কারণেও তাহা সম্ভবপর বলিয়া মনে হয়।

ব্রহ্মবৈবর্তপুরাণে দ্বিশ্রবর্ণের যে তালিকা আছে তাহার সহিত বৃহদ্রথশ্রোক্ত তালিকার যথেষ্ট সাদৃশ্য আছে। তবে কিছু কিছু প্রভেদও দেখিতে পাওয়া যায়। ইহাতে প্রথমে গোপ, নাপিত, ভিল্ল, মোদক, কুবর, তাম্বুলি, স্বর্ণকার ও বণিক ইত্যাদি সংশূজ বলিয়া অভিহিত হইয়াছে, এবং ইহার পরই করণ ও অম্বষ্ঠের কথা আছে। তৎপর বিশ্বকর্ম্মার ঔরসে শূদ্রা-গর্ভজাত নয়টি শিল্পকার জাতির উল্লেখ আছে। ইহাদের মধ্যে মালাকার, কর্ম্মকার, শংখকার, কুবিন্দক (তন্তুবায), কুম্ভকার ও কংসকার এই ছয়টি উত্তম শিল্পী জাতি। কিন্তু স্বর্ণ চুরির জন্ত স্বর্ণকার ও কর্তব্য অবহেলার জন্ত সূত্রধর ও চিত্রকর এই তিনটি শিল্পী জাতি ব্রহ্ম-শাপে পতিত। স্বর্ণকারের সংসর্গহেতু এবং স্বর্ণ চুরির জন্ত এক শ্রেণীর বণিকও (সম্ভবত সুবর্ণবণিক) ব্রহ্ম-শাপে পতিত। ইহার পর পতিত সংকর জাতির এক সুদীর্ঘ তালিকার মধ্যে অট্টালিকাকার, কোটক, ভীষর, তৈলকার, লেট, মল্ল, চর্ম্মকার, গুণ্ডী, পৌণ্ড্রক, মাংসচ্ছেদ, রাজপুত্র,

কৈবর্ত ( কলিযুগে ধীবর ), রজক, কোয়ালী, গঙ্গাপুত্র, যুগ্ম প্রভৃতির নাম আছে। বৃহদ্রথপুরাণোক্ত অধিকাংশ উক্তম ও মধ্যম সংকর জাতিই ব্রাহ্ম-বৈবর্তে সংশ্লিষ্ট বলিয়া কথিত হইয়াছে। বৃহদ্রথের জায় ইহাতেও নানাবিধ মেল্জাজাতির কথা আছে। ইহারা বলবান, দুরন্ত, অবিদ্বাকর্ণ, ক্রুর, নির্ভয়, রণতুর্জয়, তুর্দ্বন্দ্ব, ধর্মবর্জিত ও শৌচাচার-বিহীন বলিয়া বর্ণিত হইয়াছে। এতদ্ব্যতীত বাধ, ভড়, কোল, কোঞ্চ, হুড্ডি, ডোম, জোলা, বাগতীত ( বাগদি ? ), বালগ্রাহী ( বেদে ? ) এবং চাণ্ডাল প্রভৃতি যে-সমুদয় নীচ জাতির উল্লেখ আছে তাহার প্রায় সমস্তই এখনও বাংলা দেশে বর্তমান। উপসংহারে ব্রাহ্মবৈবর্তে বৈজ্য জাতির উৎপত্তি সম্বন্ধে এক বিস্তৃত আখ্যান এবং গণক ও অগ্রদানী ব্রাহ্মণের পাতিতোর কারণ উল্লিখিত হইয়াছে।

বল্লালচরিতে ( ৮১ পৃ ) যে সমুদয় আখ্যান উদ্ধৃত হইয়াছে তাহা হইতে মনে হয় যে রাজা মনে করিলে কোন জাতিকে উন্নত ও কোন জাতিকে অবনত করিতে পারিতেন। কিন্তু পালরাজগণের লিপিতে তাঁহাদের বর্ণাশ্রমধর্ম প্রতি-পালনের উল্লেখ হইতে প্রমাণিত হয় যে সাধারণত রাজগণ সমাজের নিধান সম্বন্ধে রক্ষা করিয়া চলিতেন; বিশেষত রক্ষণশীল হিন্দু সমাজে কোনরূপ গুরুতর পরিবর্তন সহজসাধ্য ছিল না। অবশ্য কালক্রমে একরূপ পরিবর্তন নিশ্চয়ই অল্পবিস্তর হইয়াছে। কিন্তু বৃহদ্রথ ও ব্রাহ্মবৈবর্তপুরাণে সামাজিক জাতিভেদের যে চিত্র পাওয়া যায় তাহার সহিত বর্তমান কালের প্রভেদ এতটী কম যে, হিন্দুযুগের অবসানে বাঙ্গালী সমাজের এই সমুদয় বিভিন্ন জাতি—অন্যতঃ ইহার অধিকাংশই—যে বর্তমান ছিল এবং তাহাদের শ্রেণী বিভাগ যে মোটামুটি একই প্রকারের ছিল তাহা নিঃসন্দেহে গ্রহণ করা যাউতে পারে।

প্রাচীন শাস্ত্রমতে সমাজের প্রত্যেক জাতিরই নির্দিষ্ট বৃত্তি ছিল। কিন্তু ইহা যে খুব কঠোরভাবে অনুসরণ করা হইত না তাহার বহু প্রমাণ বিদ্যমান। অধ্যয়ন, অধ্যাপনা, যজ্ঞ, যাজন—ইহাই ছিল ব্রাহ্মণের নির্দিষ্ট কর্ম। কিন্তু সমসাময়িক লিপি হইতে জানা যায় যে, ব্রাহ্মণেরা রাজ্যশাসন ও যুদ্ধ বিভাগে কার্য্য করিতেন। এইরূপ আমরা দেখিতে পাই যে কৈবর্ত উচ্চ রাজকার্য্যে নিযুক্ত ছিলেন, করণ যুদ্ধ ও চিকিৎসা করিতেন, বৈজ্য মস্তুর কাজ করিতেন এবং দাসজাতীয় ব্যক্তি রাজকর্মচারী ও সভাকবি ছিলেন।

বিভিন্ন জাতির মধ্যে অল্পগ্রহণ ও বৈবাহিক সম্বন্ধ বিষয়ে ঊনবিংশ শতাব্দীর জায় কঠোরতা প্রাচীন হিন্দুযুগে ছিল না। একজাতির মধ্যেই সাধারণত বিবাহাদি হইত, কিন্তু উচ্চশ্রেণীর বর ও নিম্নশ্রেণীর কন্যার বিবাহ

শাস্ত্রে অনুমোদিত ছিল এবং সত্যসত্যই সমাজে অনুষ্ঠিত হইত। শিল্পালিপিতে স্পষ্ট প্রমাণ আছে যে ব্রাহ্মণ শূদ্রকন্যা বিবাহ করিতেন, এবং তাঁহাদের সম্মান সমাজে ও রাজদরবারে বেশ সম্মান লাভ করিতেন। হিন্দুযুগের শেষ পর্য্যন্ত যে এইরূপ বিবাহ প্রচলিত ছিল ভট্টভদেব ও জীমূতবাহনের গ্রন্থ হইতে তাহা বেশ বোঝা যায়। তবে দ্বিজাতির শূদ্রকন্যা বিবাহ যে ক্রমশ নিন্দনীয় হইয়া উঠিয়াছিল সে বিষয়ে সন্দেহ নাই।

বিভিন্ন জাতির মধ্যে পান ও ভোজন সম্বন্ধে নিষেধের কঠোরতাও এইরূপ আন্তে আস্তে গড়িয়া উঠিয়াছে। প্রাচীন স্মৃতি অনুসারে সাধারণত কেবলমাত্র ব্রাহ্মণেরা শূদ্রের অন্ন ও জল গ্রহণ করিতেন না, এবং এই বিধিও খুব কঠোরভাবে প্রতিপালিত হইত না। এ সম্বন্ধে হিন্দুযুগের অবসান কালে বাংলা সমাজে কিরূপ বিধি প্রচলিত ছিল ভদেবভট্ট প্রণীত ‘প্রায়শ্চিত্ত-প্রকরণ’ গ্রন্থে তাহার কিছু পরিচয় পাওয়া যায়।

ভদেব বিধান করিয়াছেন যে চাণ্ডালস্পৃষ্ট ও চাণ্ডালদি অস্বাজ জাতির পাত্র রক্ষিত জল পান করিলে ব্রাহ্মণাদি চতুর্বর্ণের প্রায়শ্চিত্ত করিতে হইবে। শূদ্রের জল পান করিলে ব্রাহ্মণের সামান্য প্রায়শ্চিত্ত করিলেই শুদ্ধি হইত। ব্রাহ্মণের জাতির পক্ষে এরূপ কোন নিষেধ দেখা যায় না।

অন্নবিষয়েও কেবল চাণ্ডালস্পৃষ্ট এবং চাণ্ডাল, অস্বাজ ও নটনর্ভকাদি কতকগুলি জাতির পক্ষে অন্ন বিষয়ে নিষেধ-বিধি দেখা যায়। আপস্তম্বের একটি শ্লোকে উক্ত হইয়াছে যে, ব্রাহ্মণ শূদ্রের অন্ন গ্রহণ করিলে তাঁহাকে প্রায়শ্চিত্ত করিতে হইবে। ভদেব এই শ্লোকের উল্লেখ করিয়া নিম্নলিখিতরূপ মন্তব্য করিয়াছেন :—ব্রাহ্মণ বৈশ্যাদি গ্রহণ করিলে প্রায়শ্চিত্তের মাত্রা চতুর্থাংশ কম এবং ক্ষত্রিয়াদি গ্রহণ করিলে অর্দ্ধেক ; ক্ষত্রিয় শূদ্রাদি ভোজন করিলে প্রায়শ্চিত্তের মাত্রা চতুর্থাংশ কম ও বৈশ্যাদি গ্রহণ করিলে অর্দ্ধেক ; এবং বৈশ্য শূদ্রাদি গ্রহণ করিলে প্রায়শ্চিত্ত অর্দ্ধেক—এইরূপ বুঝিতে হইবে। ভদেব যে মূল শ্লোক উদ্ধৃত করিয়াছেন তাহাতে কিন্তু এরূপ কোন কথা নাই, এবং এই উক্তির সমর্থক অন্য কোন শাস্ত্রবাক্য থাকিলে ভদেব নিশ্চয়ই তাহার উল্লেখ করিতেন। ইহা হইতে অনুমিত হয় যে শূদ্র ও অস্বাজ বাতীত অন্য জাতির অন্নগ্রহণ করা পূর্বে ব্রাহ্মণের পক্ষেও নিষিদ্ধ ছিল না ; ক্রমে হিন্দুযুগের অবসান কালে এই প্রথা ধীরে ধীরে গড়িয়া উঠিতেছিল। ভদেব—শূদ্রের কন্দুপক, তৈল-পক, পায়স, দধি প্রভৃতি ভোজ্য গ্রহণীয়—তাহার এই উক্তি এবং আপস্তম্বের একটি বচন সমর্থন করিয়াছেন—তাহাতে বলা হইয়াছে যে ব্রাহ্মণ যদি আপৎকালে শূদ্রের



অন্ন ভোজন করেন তাহা হইলে মনস্তাপ দ্বারাই শুদ্ধ হন। দ্বাদশ শতাব্দীর প্রসিদ্ধ বাঙ্গালী স্মার্ত্ত ভবদেবভট্টের প্রায়শ্চিত্তপ্রকরণোক্ত এই সমুদয় উক্তি হইতে অনুমিত হয় যে ভোজ্যন্নতা সম্বন্ধে নিষেধের বিধিগুলি তখনও পরবর্ত্তী কালের গ্রায় কঠোর রূপ ধারণ করে নাই এবং চাণ্ডালান্ন গ্রহণ করিলেও ব্রাহ্মণের জাতিপাত হইত না—প্রায়শ্চিত্ত করিলেই শুদ্ধি হইত।

## ২। ব্রাহ্মণ

হিন্দুযুগে বাংলায় ক্ষত্রিয় ও বৈশ্যজাতির সম্বন্ধে বিস্তৃত কোন বিবরণ পাওয়া যায় না। কিন্তু প্রাচীন কাল হইতেই যে এদেশে ব্রাহ্মণের প্রাধান্য ছিল সে বিষয়ে সন্দেহ নাই। গুপ্তযুগে বাংলার সর্বত্র ব্রাহ্মণের বসবাসের কথা পূর্বেই আলোচিত হইয়াছে। তাম্রশাসন ও শিলালিপি হইতে দেখা যায় যে পরবর্ত্তী-কালে বিদেশ হইতে আগত বহুসংখ্যক ব্রাহ্মণ এদেশে স্থায়ীভাবে বাস করিয়াছেন, আবার এদেশ হইতেও বহুসংখ্যক ব্রাহ্মণ অন্য দেশে গিয়াছেন। কালক্রমে বাংলার ব্রাহ্মণগণ রাঢ়ীয়, বারেন্দ্র, বৈদিক, শাকদ্বীপী প্রভৃতি শ্রেণীতে বিভক্ত হইয়াছিলেন। রাজা অথবা ধনীলোক ব্রাহ্মণদিগকে ভূমি, কখনও বা সমস্ত গ্রাম, দান করিয়া প্রতিষ্ঠা করিতেন। এই সমুদয় গ্রামের নাম হইতে ব্রাহ্মণদের গাঁঞীর সৃষ্টি হয় এবং ইহা তাঁহাদের নামের শেষে উপাধিস্বরূপ ব্যবহৃত হয়। এইরূপে বন্দ্যোপাধ্যায়, মুখাঢ়ী, গাঙ্গুলী প্রভৃতি গ্রামের নাম ও গাঁঞী হইতে বন্দ্যোপাধ্যায়, মুখোপাধ্যায়, গঙ্গোপাধ্যায় প্রভৃতি সুপরিচিত উপাধির সৃষ্টি হইয়াছে। পুতিতুণ্ড, পিপলাই, ভট্টশালী, কুশারী, মাসচটক, বটব্যাল, ঘোষাল, মৈত্র, লাহিড়ী প্রভৃতি উপাধিও এইরূপে উদ্ভূত হইয়াছে। হিন্দুযুগের অবসানের পূর্বেই যে ব্রাহ্মণদের পূর্বোক্ত শ্রেণীবিভাগ এবং গাঁঞী-প্রথা প্রচলিত ছিল তাহাতে কোন সন্দেহ নাই। কিন্তু বাংলার কুলজীগ্রন্থে ইহাদের উৎপত্তির যে বিস্তৃত বিবরণ আছে তাহা সত্য বলিয়া গ্রহণ করা যায় না।

রাঢ়ীয় ও বারেন্দ্র ব্রাহ্মণ সম্বন্ধে কুলজীর উক্তি সংক্ষেপত এই :—  
“গৌড়ের রাজা আদিশূর বৈদিক যজ্ঞ অনুষ্ঠান করিবার জন্ত কাণ্ডকুজ হইতে পাঁচজন সাম্বিক ব্রাহ্মণ আনয়ন করেন, কারণ বাংলার ব্রাহ্মণেরা বেদে অনভিজ্ঞ ছিলেন। এই পঞ্চব্রাহ্মণ জ্ঞীপুত্রাদি সহ বাংলাদেশে বসবাস করেন এবং আদিশূর তাঁহাদের বাসের জন্ত পাঁচখানি গ্রাম দান করেন। কালক্রমে পঞ্চব্রাহ্মণগণের সন্তানগণমধ্যে যখন অন্তর্বিচ্ছেদ ঘটিল তখন কতক রাঢ়দেশে ও

কর্তক বরেন্দ্রভূমে বাস করিতে লাগিলেন। পরে মহারাজা বল্লালসেনের রাজ্য-কালে বাসস্থানের নাম অনুসারে তাঁহারা রাঢ়ী অথবা বারেন্দ্র নামে দুইটি নির্দিষ্ট শ্রেণীতে অভিহিত হইলেন। কালক্রমে তাঁহাদের বংশধরেরা সংখ্যায় বৃদ্ধি পাইল। আদিশূরের পৌত্র ক্ষিতিশূরের সময় রাঢ়ীয় ব্রাহ্মণগণের মোট সংখ্যা হয় ঊনষাট। ক্ষিতিশূর তাঁহাদের বাসের জায়গা ঊনষাট খানি গ্রাম দান করেন। এই সমুদয় গ্রামের নাম হইতেই রাঢ়ীয় ব্রাহ্মণদের গাঁঞীর উৎপত্তি হইয়াছে। রাজা ক্ষিতিশূরের পুত্র ধরানুর এই সমুদয় ব্রাহ্মণদিগকে মুখা কুলীন, গৌণ কুলীন এবং শ্রোত্রিয় এই তিন শ্রেণীতে বিভক্ত করেন। বারেন্দ্র ব্রাহ্মণগণ মহারাজা বল্লালসেনের সময়ে কুলীন, শ্রোত্রিয় ও কাপ এই তিন ভাগে বিভক্ত হন। তাঁহাদের গাঁঞীর সংখ্যা এক শত”।

উপরে যে সংক্ষিপ্ত বিবরণ দেওয়া হইল তাহার প্রত্যেকটি বিষয় সম্বন্ধে বিভিন্ন কুলজীগ্রন্থে মতের গুরুতর অনৈক্য আছে। মহারাজা আদিশূরের বংশ ও তারিখ, পঞ্চ ব্রাহ্মণের নাম ও আনয়নের কারণ, বঙ্গদেশে তাঁহাদের প্রতিষ্ঠা, রাঢ়ী ও বারেন্দ্র এই দুই শ্রেণীর উৎপত্তির কারণ, গাঁঞীর নাম ও সংখ্যা, পৌলীয়া প্রথার প্রবর্তনের কারণ ও বিবর্তনের ইতিহাস প্রভৃতি প্রত্যেক বিষয়েই পরস্পর-বিরোধী বহু উক্তি কুলগ্রন্থে দেখিতে পাওয়া যায়। এই সমুদয় কুলগ্রন্থের কোন খানিই খৃষ্টীয় ষোড়শ শতাব্দির পূর্বে রচিত নহে। সুতরাং এই সমুদয় গ্রন্থের উপর নির্ভর করিয়া বঙ্গীয় ব্রাহ্মণগণের ইতিহাস রচনা করা কোন মতেই সম্ভবপর নহে। কুলজীর মতে আদিশূর কর্তৃক পঞ্চ ব্রাহ্মণ আনয়নের পূর্বে বাংলায় মাত্র সাতশত ঘর ব্রাহ্মণ ছিলেন। তাঁহাদের বংশধরেরা সপ্তশতী নামে খ্যাত ছিলেন এবং ব্রাহ্মণ সমাজে বিশেষ শ্রী বলিয়া বিবেচিত হইতেন। কালক্রমে সাতশতী ব্রাহ্মণ বাংলাদেশ হইতে বিলুপ্ত হইয়াছে। সুতরাং পরবর্তীকালে আগত বৈদিক প্রভৃতি শ্রেণীর অতি অল্পসংখ্যক ব্রাহ্মণ ব্যতীত বাংলাদেশের প্রায় সকল ব্রাহ্মণই কান্যকুব্জ হইতে আগত পঞ্চ ব্রাহ্মণের সন্তান। এই উক্তি বা প্রচলিত মত বিশ্বাসের সম্পূর্ণ অযোগ্য। কান্যকুব্জ হইতে পাঁচজন বা ততোধিক ব্রাহ্মণ এদেশে আসিয়াছিলেন ইহা অবিশ্বাস করিবার কারণ নাই। কারণ তাম্রশাসন হইতে জানা যায় যে মধ্যদেশ হইতে আগত বহু ব্রাহ্মণ এদেশে ও ভারতের অন্তর বসবাস করিয়াছেন। ইহারা বাংলা দেশের ব্রাহ্মণদের সহিত মিশিয়া গিয়াছেন, এবং বাসস্থানের নাম অনুসারে রাঢ়ীয়, বারেন্দ্র প্রভৃতি বিভিন্ন ব্রাহ্মণ শ্রেণীর উদ্ভব হইয়াছে, ইহাই সঙ্গত ও স্বাভাবিক সিদ্ধান্ত বলিয়া

মনে হয়। কৌলীন্দ্ৰ মর্যাদার উৎপত্তি ও প্রকৃতি সম্বন্ধে কুলগ্রন্থের বর্ণনাও অধিকাংশই কাল্পনিক ও অতিরঞ্জিত।

বাংলার বৈদিক ব্রাহ্মণগণ সংখ্যায় অল্প হইলেও বিশেষ সম্মানভাজন। ইহারা দাক্ষিণাত্য ও পাশ্চাত্য এই দুই শ্রেণীতে বিভক্ত। রাঢ়ীয় ও বারেন্দ্র ব্রাহ্মণের স্থায় ইহাদের কোন গাঁঞী বা কৌলীন্দ্ৰপ্রথা নাই।

দাক্ষিণাত্য বৈদিকগণের মতে তাঁহাদের পূর্বপুরুষেরা উৎকল, দ্রাবিড় প্রভৃতি দেশ হইতে আসিয়া বাংলায় বসবাস করেন। ইহারা বলেন যে আর্য্যাবর্ষে মুসলমানদিগের রাজ্য প্রতিষ্ঠা হইলে সেখানে বেদাদি শাস্ত্রচর্চার ক্রমশ হ্রাস হইল। কিন্তু দ্রাবিড়াদি দাক্ষিণাত্য প্রদেশে বেদের বিলক্ষণ চর্চা থাকায় বঙ্গদেশীয় ব্রাহ্মণগণ তাঁহাদিগকে সাদরে স্বদেশে বাস করাইলেন।

পাশ্চাত্য বৈদিকগণের কুলগ্রন্থে তাঁহাদের যে বিবরণ পাওয়া যায় তাহা সংক্ষেপত এই :—

“গৌড়দেশের রাজা শ্যামলবর্মা বিক্রমপুরে রাজধানী স্থাপন করেন। একদিন তাঁহার রাজপ্রাসাদে একটি শকুনি পতিত হওয়ায় শাস্ত্র যজ্ঞের অনুষ্ঠান আবশ্যক হইল। গৌড়ের ব্রাহ্মণগণ নিরগ্নিক ও যজ্ঞে অনভিজ্ঞ, সুতরাং রাজা শ্যামলবর্মা তাঁহার শ্বশুর কাশ্যকুজের (মতান্তরে কাশীর) রাজা নীলকণ্ঠের নিকট গমন করিয়া তথা হইতে যশোধর মিশ্র ও অগ্নি চারিজন সাগ্নিক ব্রাহ্মণকে সঙ্গে লইয়া ১০০১ শাকে (১০৭৯ অব্দে) স্বীয় রাজ্যে প্রত্যাবর্তন করেন। যজ্ঞ সমাপনান্তে শ্যামলবর্মা গ্রামাদি দান করিয়া তাঁহাদিগকে এই দেশে প্রতিষ্ঠিত করিলেন। তাঁহাদের সম্মানেরাই পাশ্চাত্য বৈদিক নামে খ্যাত হইয়াছেন।”

পূর্বোক্ত রাঢ়ীয় ও বারেন্দ্র ব্রাহ্মণদের কুলগ্রন্থের স্থায় উল্লিখিত বিবরণের প্রায় প্রত্যেক বিষয়েই বৈদিক কুলজীগ্রন্থে পরস্পর-বিরোধী মত পাওয়া যায়। এমন কি কোন কোন কুলগ্রন্থে রাজার নাম শ্যামলবর্মার পরিবর্তে হরিবর্মা বলিয়া লিখিত হইয়াছে। অবশ্য এই দুই জনই বর্মাবংশীয় প্রসিদ্ধ রাজা (৭২পৃ)। কোন কোন কুলগ্রন্থে বর্ণিত হইয়াছে যে শ্যামলবর্মা কর্তৃক আনীত পঞ্চ গোত্রীয় বৈদিক ব্রাহ্মণেরা কালক্রমে ‘বেদজ্ঞান-বিমূঢ়’ হওয়াতে ১১০২ শকাবে অগ্নি ষড়্-গোত্রীয় ব্রাহ্মণেরা আসিয়া বৈদিক কুলে মিলিত হন। সুতরাং এই সমুদয় মত তাঁহাদের সত্যতা সম্বন্ধে সন্দেহ করার যথেষ্ট কারণ আছে।

বাংলায় গ্রহ-বিপ্র নামে এক শ্রেণীর ব্রাহ্মণ আছেন। ইহারা শাকদ্বীপী ব্রাহ্মণ বলিয়াও পরিচিত। ইহাদের কুলপঞ্জিকায় উক্ত হইয়াছে যে গৌড়ের

রাজা শশাঙ্ক (২৩ পৃ) রোগাক্রান্ত হইয়া বৈজ্ঞানের চিকিৎসায় মুফল না পাওয়ায় সরযু নদীর তীরবাসী জপ-যজ্ঞ-পরায়ণ দ্বাদশ জন ব্রাহ্মণকে আনাঠয়া গ্রহ-যজ্ঞ অনুষ্ঠান করেন ও রোগমুক্ত হন। রাজার আদেশে ইহারা সপরিবারে গোড় দেশে বাস করেন। ইহারা শাকদ্বীপ-বাসী মার্ত্তণ্ডাদি আট জন মুনির বংশধর। গরুড় শাকদ্বীপ হইতে ইহাদের পূর্বপুরুষগণকে মধ্যদেশে আনয়ন করিয়াছিলেন।

এতদ্ব্যতীত অণ্ড কোন কোন শ্রেণীর ব্রাহ্মণও সম্ভবত হিন্দুযুগে বাংলায় ছিলেন। কিন্তু তাঁহাদের সম্বন্ধে বিশ্বাসযোগ্য কোন বিবরণ পাওয়া যায় না। বল্লালসেন তাঁহার গুরু অনিরুদ্ধভট্ট সম্বন্ধে যাহা লিখিয়াছেন তাহাতে অনুমিত হয় যে তিনি সারস্বত শ্রেণীর ব্রাহ্মণ ছিলেন। কুলজী অনুসারে অন্ধ-বাজ শূদ্রক সরস্বতী নদীর তীর হইতে তাঁহাদিগকে আনয়ন করেন। কুলজী গ্রন্থে ব্যাস, পরাশর, কোণ্ডিয়া, সপ্তশতী প্রভৃতি অণ্ড যে সমুদয় ব্রাহ্মণশ্রেণীর উল্লেখ আছে তাহার কোনটিই যে প্রাচীন হিন্দুযুগে বাংলায় বিদ্যমান ছিল, ইহার বিশ্বস্ত প্রমাণ এখন পর্য্যন্তও পাওয়া যায় নাই।

ব্রাহ্মণগণ যে সমাজে সর্বশ্রেষ্ঠ মর্যাদা লাভ করিতেন এবং তাঁহাদের মধ্যে অনেকে প্রকৃত ব্রাহ্মণের উচ্চ আদর্শ অনুযায়ী জীবন যাপন করিতেন সে বিষয়ে সন্দেহ করিবার কারণ নাই। তাঁহাদের পাণ্ডিত্য, চরিত্র, ও অনাড়ম্বর জীবনযাত্রা সমাজের আদর্শ ছিল। কিন্তু সকল ব্রাহ্মণই যে এইরূপ আদর্শ অনুসারে চলিতেন এরূপ মনে করা ভুল। এমন কি শাস্ত্রের ব্রাহ্মণদের যে সমুদয় নির্দিষ্ট কর্তব্য আছে, অনেক বিশিষ্ট ব্রাহ্মণও তাহা মানিয়া চলেন নাই। ভবদেবভট্ট : দত্তপাণি বংশানুক্রমিক রাজমন্ত্রী ছিলেন। সমগ্রটে ছুটি ব্রাহ্মণ বংশ সপ্তম শতাব্দীতে রাজত্ব করিতেন। ব্রাহ্মণেরা যুদ্ধ বিজ্ঞায়ও পারদর্শী ছিলেন। ব্রাহ্মণেরা যে অণ্ড নানাবিধ বৃত্তি দ্বারা জীবিকা নির্বাহ করিতেন শাস্ত্রে তাহার প্রমাণ পাওয়া যায়। ইহার কোন কোনটি—যেমন কৃষিকার্য্য--অনুমোদিত ছিল। কিন্তু অনেকগুলিই নিন্দনীয় ছিল এবং তাহার জন্য ব্রাহ্মণগণকে প্রায়শ্চিত্ত করিতে হইত। ভবদেবভট্ট এইরূপ কার্য্যের এক সুদীর্ঘ তালিকা দিয়াছেন। শূদ্রের অধ্যাপনা ও যাজন ইহার অণ্ডতম। তৎকালে জাতিভেদের কুফল ও সমাজের অধঃপতন কতদূর পৌছিয়াছিল ইহা হইতেই তাহা জানা যায়। ভবদেবভট্ট রাজার মন্ত্রীত্ব ও যুদ্ধ করিয়াও ব্রাহ্মণের সর্বোচ্চ পদে প্রতিষ্ঠিত ছিলেন, কিন্তু ব্রাহ্মণের আদর্শ বৃত্তি অধ্যাপন ও যাজন অবলম্বন করিয়া কোন ব্রাহ্মণ যদি শূদ্রের জ্ঞান লাভে ও ধর্ম্মকার্য্যে সহায়তা

করিত তবে তাহাকে প্রায়শ্চিত্ত করিয়া শুদ্ধ হইতে হইত। অর্থাৎ ধর্ম ও জ্ঞান লাভের জন্ত ব্রাহ্মণের উপদেশ যাহাদের সর্বাপেক্ষা বেশী প্রয়োজন, তাহাদিগকে সাহায্য করা ব্রাহ্মণের পক্ষে নিন্দনীয় ছিল। চিত্রাদি শিল্প, বৈজ্ঞানিক ও জ্যোতিষশাস্ত্র প্রভৃতির চর্চাও ব্রাহ্মণগণের পক্ষে নিষিদ্ধ ছিল। কিন্তু রাজ্যশাসন, যুদ্ধ করা প্রভৃতি ব্রাহ্মণের আদর্শের সম্পূর্ণ বিরোধী কাজ করিয়াও ভবদেবের দ্বারা ব্রাহ্মণগণ আত্মপ্রাণাঘাত করিতেন। ব্রাহ্মণগণের এই মনোবৃত্তিই যে সামাজিক অবনতি ও জ্ঞান বিজ্ঞানের অহুন্নতির একটি প্রধান কারণ সে বিষয়ে কোন সন্দেহ নাই।

### ৩। করণ-কায়স্থ

প্রাচীন বঙ্গসমাজে ব্রাহ্মণের পরেই সম্ভবত করণ জাতির প্রাধান্য ছিল। বৃহৎসমুদ্রপুরাণে সংকর জাতির মধ্যে প্রথমেই করণের উল্লেখ আছে। করণগণ যে খুব উচ্চপদে অধিষ্ঠিত ছিলেন তাহারও প্রমাণ আছে। সামন্ত রাজা লোকনাথ করণ ছিলেন এবং বৈষ্ণবগুপ্তের তাম্রশাসনে একজন করণ কায়স্থ সাক্ষিবিগ্রহিক বলিয়া উক্ত হইয়াছেন। শব্দ-প্রদীপ নামক একখানি বৈজ্ঞানিক গ্রন্থের প্রণেতা নিজেকে করণাশ্রয় বলিয়াছেন। তিনি নিজে রাজবৈজ্ঞানিক ছিলেন এবং তাঁহার পিতা ও পিতামহ রামপাল ও গোবিন্দচন্দ্রের রাজবৈজ্ঞানিক ছিলেন। রামচরিত-প্রণেতা সঙ্কাকর নন্দীর পিতা সাক্ষিবিগ্রহিক ও করণগণের শ্রেষ্ঠ বলিয়া উল্লিখিত হইয়াছেন।

প্রাচীন ধর্মশাস্ত্রে করণ শব্দে একটি জাতি ও একশ্রেণীর কর্মচারী (লেখক, হিসাব রক্ষক প্রভৃতি) বুঝায়। কায়স্থ শব্দও প্রথমে এই শ্রেণীর রাজকর্মচারী বুঝাইত, পরে জাতিবাচক সংজ্ঞায় পরিণত হয়। কোষকার বৈজয়ন্তী কায়স্থ ও করণ প্রতিশব্দরূপে ব্যবহার করিয়াছেন। প্রাচীন লিপিতেও করণ ও কায়স্থ একই অর্থে ব্যবহৃত হইয়াছে। করণজাতি হিন্দুযুগের পরে ক্রমে বঙ্গদেশে লোপ পাইয়াছে, আবার কায়স্থজাতি হিন্দুযুগের পূর্বে এদেশে সুপরিচিত ছিল না, পরে প্রাধান্য লাভ করিয়াছে। সুতরাং এরূপ অনুমান করা অসঙ্গত হইবে না যে, ভারতবর্ষের অল্প কোন কোন প্রদেশের দ্বারা বাংলা দেশেও করণ কায়স্থ পরিণত হইয়াছে অর্থাৎ উভয়ে মিলিয়া এক জাতিতে পরিণত হইয়াছে।

খৃষ্টীয় পঞ্চম, ষষ্ঠ ও অষ্টম শতাব্দীর তাম্রশাসনে ‘প্রথম-কায়স্থ’ ও ‘জ্যেষ্ঠ-কায়স্থ’ প্রভৃতির উল্লেখ দেখিয়া মনে হয় যে তখনও বাংলায় কায়স্থ শব্দে এক

শ্রেণীর রাজকর্মচারী মাত্র বুঝাইত। খৃষ্টীয় দশম শতাব্দীর একখানি শিলালিপিতে গোড়-কায়স্থ বংশের উল্লেখ আছে। সুতরাং এই সময়ে বাংলায় কায়স্থ জাতির উৎপত্তি হইয়াছে এরূপ মনে করা যাইতে পারে। কিন্তু আশ্চর্যের বিষয় এই যে বৃহদ্ধর্ম ও ব্রহ্মবৈবর্ত পুরাণে কায়স্থের কোন উল্লেখ নাই। কুলজীগ্রন্থের মতে আদিশূর কর্তৃক আনীত পঞ্চ ব্রাহ্মণের সঙ্গে যে পঞ্চ ভৃত্য আসিয়াছিল তাহারা ই ঘোষ, বসু, গুহ, মিত্র, দত্ত প্রভৃতি কুলীন কায়স্থের আদিপুরুষ।

### ৩। অশ্বষ্ঠ-বৈজ্ঞ

বৈজ্ঞ শব্দে প্রথমে চিকিৎসক মাত্র বুঝাইত—পরে ইহা একটি জাতিবাচক সংজ্ঞায় পরিণত হইয়াছে। ঠিক কোন সময়ে বাংলাদেশে এই জাতির প্রতিষ্ঠা হয় তাহা বলা কঠিন। সপ্তম ও অষ্টম শতাব্দীর চারিখানি লিপিতে দক্ষিণ ভারতবর্ষে বৈজ্ঞজাতির উল্লেখ আছে। ইহারা রাজ্যে ও সমাজে উচ্চ মর্যাদার অধিকারী ছিলেন এবং ইহাদের কেহ কেহ ব্রাহ্মণ বলিয়া বিবেচিত হইতেন। কিন্তু দ্বাদশ শতাব্দীর পূর্বে বাংলায় বৈজ্ঞজাতির অস্তিত্বের কোন বিশ্বস্ত প্রমাণ পাওয়া যায় নাই। শ্রীহট্টের রাজা ঈশানদেবের (১০৪ পৃঃ) তাম্রশাসনে তাঁহার মন্ত্রী (পট্টনিক) বনমালীকর ‘বৈজ্ঞবংশপ্রদীপ’ বলিয়া উল্লিখিত হইয়াছেন। পূর্বেই বলা হইয়াছে যে একাদশ ও দ্বাদশ শতাব্দীতে বাংলার তিনজন রাজার রাজ-বৈজ্ঞ করণ-বংশীয় ছিলেন। সুতরাং হিন্দুযুগে বাংলার চিকিৎসা-ব্যবসায়ীরা যে বৈজ্ঞনামক বিশিষ্ট কোন জাতি বলিয়া পরিগণিত হইতেন ইহা সম্ভব বলিয়া মনে হয় না।

প্রাচীন ধর্মশাস্ত্রে অশ্বষ্ঠ জাতির উল্লেখ আছে। মনুসংহিতা অনুসারে চিকিৎসাই ইহাদের বৃত্তি। মধ্যযুগে বাংলাদেশে অশ্বষ্ঠ বৈজ্ঞজাতির অপর নাম বলিয়া গৃহীত হইত। বর্তমান কালে অনেক বৈজ্ঞ ইহা স্বীকার করেন না, কিন্তু সুপ্রসিদ্ধ ভরতমল্লিক অশ্বষ্ঠ ও বৈজ্ঞ বলিয়া নিজের পরিচয় দিয়াছেন। বৃহদ্ধর্মপুরাণে অশ্বষ্ঠ ও বৈজ্ঞ একই জাতির নাম, কিন্তু ব্রহ্মবৈবর্তপুরাণ অনুসারে এ দুইটি ভিন্ন জাতি। সম্ভবত বাংলায় বৈজ্ঞ ও অশ্বষ্ঠ, কায়স্থ ও করণের স্রায় একসঙ্গে মিশিয়া গিয়াছে। কিন্তু এ সম্বন্ধে নিশ্চিত কিছু বলা যায় না। বিহার ও বুদ্ধপ্রদেশে অনেক কায়স্থ অশ্বষ্ঠ বলিয়া পরিচয় দেন। মনুসংহিতায় অশ্বষ্ঠকে সাহিব্য বলা হইয়াছে, কিন্তু ভরতমল্লিক বৈজ্ঞ ও অশ্বষ্ঠের অভিন্নত্ব-সূচক

ব্যাস, অগ্নিবেশ ও শত্ৰুশ্রুতি হইতে তিনটি শ্লোক উদ্ধৃত করিয়াছেন। ইহার কোন শ্রুতিই খুব প্রাচীন নহে, এবং শ্লোকগুলিও অকৃত্রিম কিনা সে বিষয়ে যথেষ্ট সন্দেহ আছে।

### ৩। অন্যান্য জাতি

বাংলার অন্যান্য জাতি সম্বন্ধে বিশেষ কিছু জানা যায় না। যুগী, সুবর্ণবর্ণিক ও কৈবর্তজাতি সম্বন্ধে বল্লালচরিতে অনেক কথা আছে, কিন্তু এই সমুদয় কাহিনী বিশ্বাসযোগ্য নহে। রামপালের প্রসঙ্গে দিব্য নামক কৈবর্ত-নায়কের বিজ্রোহের উল্লেখ করা হইয়াছে। দিব্য, রুদোক ও ভীম এই তিনজন কৈবর্ত রাজা বরেন্দ্রে রাজত্ব করেন, সুতরাং রাজ্যে ও সমাজে কৈবর্তজাতির যে বিশেষ প্রতিপত্তি ছিল ইহা অনুমান করা যাউতে পারে। কিন্তু সমসাময়িক স্মার্ত পণ্ডিত ভবদেবভট্ট কৈবর্তকে অস্ত্যাজ জাতি বলিয়া উল্লেখ করিয়াছেন। কৈবর্ত ও মাহিষ্য সম্ভবত একই জাতি, কারণ উভয়েই শ্রুতি ও পুরাণে ঋত্বিয় পিতা ও বৈশ্য মাতার সম্ভান বলিয়া উল্লিখিত হইয়াছে। বর্তমান কালে পূর্ববঙ্গের মাহিষ্য এবং পশ্চিমবঙ্গের চাষী কৈবর্ত এক জাতি বলিয়া পরিগণিত। ইহাদের মধ্যে অনেক জমিদার ও তালুকদার আছেন এবং মেদিনীপুর জিলায় ইহারাই খুব সম্ভ্রান্ত শ্রেণী। কিন্তু আর এক শ্রেণীর কৈবর্ত ধীবর বলিয়া পরিচিত এবং মংস্র বিক্রয়ই ইহাদের ব্যবসায়। ব্রহ্মবৈবর্তপুরাণে উক্ত হইয়াছে যে তীবর-সংসর্গহেতু কলিযুগে কৈবর্তগণ পতিত হইয়া ধীবরে পরিণত হইয়াছে। সম্ভবত বর্তমান কালের শ্রায় প্রাচীন কালেও কৈবর্ত জাতি হালিক ও জালিক এই দুই বিভিন্ন শ্রেণীতে বিভক্ত ছিল। বিষ্ণুপুরাণে যে কৈবর্ত জাতিকে অব্রহ্মণ্য বলা হইয়াছে, এবং বল্লালসেন যে কৈবর্ত জাতিকে জলাচরণীয় করিয়াছিলেন বলিয়া বল্লালচরিতে উক্ত হইয়াছে, তাহা সম্ভবত কেবল মাত্র শেষোক্ত শ্রেণীর সম্বন্ধেই প্রযোজ্য। বাংলার আরও অনেক জাতির মধ্যে এইরূপ উচ্চ ও নীচ শ্রেণী দেখিতে পাওয়া যায়। বৃহদ্রশ্মপুরাণে উত্তম সংকর শ্রেণীর মধ্যে গোপের উল্লেখ আছে, ইহারা লেখক; কিন্তু মধ্যম সংকরের মধ্যে আভৌর জাতির উল্লেখ আছে, ইহারা সম্ভবত দুগ্ধ ব্যবসায়ী। বর্তমান কালেও সদেগাপ ও গয়লা দুইটি বিভিন্ন জাতি।

বৃহদ্রশ্ম ও ব্রহ্মবৈবর্ত পুরাণে যে সমুদয় নীচ জাতির উল্লেখ আছে তাহার প্রায় সকলগুলিই বর্তমানকালে সুপরিচিত। বৃহদ্রশ্মপুরাণে ইহাদিগকে

বর্ণাশ্রম-বহিষ্কৃত ও অস্বাজ বলা হইয়াছে। ভবদেবভট্টের মতে রজক, চর্ম্মকার, নট, বকড়, কৈবর্ত, মেদ ও ভিল্ল এই সাতটি অস্বাজ জাতি। কিন্তু বৃহজ্জন্ম অনুসারে রজক ও নট মধ্যম সংকর জাতীয় এবং ব্রহ্মবৈবর্ত মতে ভিল্ল সংশ্রুজ। ইহা হইতে অনুমিত হয় যে স্থান ও কাল অনুসারে সমাজে বিভিন্ন জাতির উন্নতি ও অবনতি হইয়াছে।

প্রাচীন বৌদ্ধ চর্যাপদে ডোম, চণ্ডাল, ও শবরের কিছু বিবরণ আছে। ডোমেরা সহরের বাহিরে বাহিরে বাস করিত এবং অস্পৃশ্য বলিয়া গণ্য হইত। তাহারা বাঁশের বুড়ি ও তাঁত বুনিত। ডোম মেয়েদের স্বভাব-চরিত্র ভাল ছিল না, তাহারা নাচিয়া গাহিয়া বেড়াইত। চণ্ডালেরা মাঝে মাঝে গৃহস্থের বধু চুরি করিয়া নিত। শবরেরা পাহাড়ে বাস করিত। তাহাদের মেয়েরা কাণে তুল এবং ময়ূর-পুচ্ছ ও গুঞ্জাফলের মালা পরিত। নৈহাটি তাম্রশাসনে পুলিন্দ নামে আর এক শ্রেণীর আদিম জাতির উল্লেখ আছে। তাহারা বনে বাস করিত, এবং তাহাদের মেয়েরাও গুঞ্জাফলের মালা পরিত। শবর জাতির কথা প্রাচীন বাংলার অণ্ড গ্রন্থেও আছে। সম্ভবত পাহাড়পুরের মন্দির গাত্রে যে কয়েকটি আদিম অসভ্য নর-নারীর মূর্তি আছে তাহারা শবর অথবা পুলিন্দ জাতীয়। ইহাদের মধ্যে নর-নারী উভয়েরই কটিদেশে কয়েকটি বৃক্ষপত্র বাতীত আর কোন আবরণ নাই। মেয়েরা কিন্তু পরিপাটি করিয়া কেশ-বিষ্ণাস করিত এবং পত্রপুষ্পের অনেক অলঙ্কার পরিত। পুরুষ ও স্ত্রীলোক উভয়েই বেশ সবলকায় এবং হীর-ময়ূক ও খড়্গ ব্যবহাৰ করিতে জানিত। একটি উৎসাহ ফলকে দেখা যায় একজন স্ত্রীলোক একটি মৃৎ জন্তু হাতে বুলাইয়া গীরদর্পে চলিয়াছে,—সম্ভবত নিজেই ইহা শিকার করিয়া আনিয়াছে এবং ইহাই তাহাদের প্রধান খাদ্য ছিল। বাংলাদেশে সর্ব-প্রাচীন কালে যে সমুদয় জাতি বাস করিত সম্ভবত ইহারা তাহাদেরই বংশধর, এবং সহস্রাধিক বৎসরেও ইহাদের জীবনযাত্রার বিশেষ কোন পরিবর্তন হয় নাই।

### ৬। পূজা-পার্বণ এবং আমোদ উৎসব

দেব-দেবীর পূজা ব্যতীত ধর্ম্মের অনেক লৌকিক অনুষ্ঠানও প্রাচীনকালের সামাজিক জীবনে একটি বিশিষ্ট স্থান অধিকার করিত। ধর্ম্মশাস্ত্রে বহুবিধ সংস্কারের উল্লেখ আছে,—জন্মের পূর্ব হইতে মৃত্যুর পর পর্য্যন্ত জীবনের প্রত্যেকটি বিশিষ্ট অবস্থায় এইগুলি পালন করিতে হয়। শিশুর জন্মের পূর্বেই তাহার



মঙ্গলের জন্য গর্ভাধান, পুংসবন, সীমন্তোন্নয়ন ও শোণ্যস্তী-হোম অনুষ্ঠিত হইত। জন্মের পর জাতকর্ষ, নিজ্জমণ, নামকরণ, পৌষ্টিককর্ষ, অন্নপ্রাশন, চূড়াকরণ ও উপনয়ন। তাহার পর ছাত্রজীবনের আরম্ভ। শিক্ষা সমাপ্ত হইলে গৃহে প্রত্যাগত হইয়া সমাবর্তন উৎসব; তৎপরে বিবাহ ও নূতন গৃহ প্রবেশ উপলক্ষে শালাকর্ষ অনুষ্ঠান করিতে হইত। মৃত্যুর অব্যবহিত পূর্বে ও পরে নানাবিধ ঔর্দ্ধদৈহিক ক্রিয়ার ব্যবস্থা ছিল এবং অশৌচ পালন ও শ্রাদ্ধাদি শাস্ত্রের নিয়ম অনুসারেই আচরিত হইত। বাংলার স্মার্ত পণ্ডিতেরা এই সমুদয়ের যে বিস্তৃত বিবরণ লিখিয়া গিয়াছেন তাহা হইতে দেখা যায় যে, ভারতবর্ষের অন্যান্য প্রদেশের শাস্ত্রীয় ব্যবস্থার সহিত বাংলার এই বিষয়ে বিশেষ কোন প্রভেদ ছিল না, এবং লোকাচারের যে প্রভেদ ছিল বর্তমানকালেও তাহার প্রায় সবই বর্তমান। এই সমুদয় সংস্কার ছাড়াও বাঙ্গালীর দৈনন্দিন জীবনযাত্রায় ধর্মশাস্ত্রের প্রবল প্রভাব ছিল। কোন্ কোন্ তিথিতে কি কি ঋতু ও কর্ষ নিষিদ্ধ, কোন্ তিথিতে উপবাস করিতে হইবে, এবং অধ্যয়ন, বিদেশযাত্রা, তীর্থগমন প্রভৃতির জন্য কোন্ কোন্ কাল শুভ বা অশুভ ইত্যাদি বিষয়ে শাস্ত্রের পুঙ্খানুপুঙ্খ অনুশাসন দ্বারা প্রত্যেকের জীবন কঠোরভাবে নিয়ন্ত্রিত হইত। কিন্তু তাই বলিয়া সে কালের জীবন একেবারে নিরানন্দ ও বৈচিত্র্যহীন ছিল না। বিবাহাদি উপলক্ষে নৃত্যগীতাদি আমোদ উৎসব হইত। চর্যাপদে উক্ত হইয়াছে যে, ষর বিবাহ করিতে যাইবার সময় পটহ, মাদল, করণ্ড, কসালা, ছন্দুভি প্রভৃতির বাজ হইত। ইহা ছাড়া তখনও বাংলায় বারমাসে তের পার্বণ হইত এবং এই সমুদয় পূজা-পার্বণ প্রভৃতি উপলক্ষে নানাবিধ আমোদ উৎসব অনুষ্ঠিত হইত।

এখনকার গ্রায় প্রাচীন হিন্দু যুগেও দুর্গা পূজাই বাংলার প্রধান পর্ব ছিল। সঙ্ঘাকরনন্দী রামচরিতে লিখিয়াছেন যে উমা অর্থাৎ দুর্গার অর্চনা উপলক্ষে বরেন্দ্রে বিপুল উৎসব হইত। অজ্ঞাত প্রাচীন গ্রন্থেও এই উৎসবের বিবরণ আছে। শারদীয় দুর্গাপূজায় বিজয়া দশমীর দিন ‘শাবরোৎসব’ নামে এক প্রকার নৃত্য-গীতের অনুষ্ঠান হইত। শবরজাতির গ্রায় কেবলমাত্র বৃক্ষপত্র পরিধান করিয়া এবং সারা গায়ে কাদা মাখিয়া ঢাকের বাজের সঙ্গে সঙ্গে লোকেরা অগ্নীল গান গাহিত এবং তদনুরূপ কুংসিং অঙ্গভঙ্গী করিত। জীমূত-বাহন ‘কাল-বিবেক’ গ্রন্থে যে ভাষায় এই নৃত্য-গীতের বর্ণনা করিয়াছেন বর্তমান-কালের রুচি অনুসারে তাহার উল্লেখ বা ইঙ্গিত করাও অসম্ভব। অথচ তিনিই লিখিয়াছেন যে, যে ইহা না করিবে ভগবতী ক্রুদ্ধ হইয়া তাহাকে সূদারূপ শাপ

দিবেন। বৃহৎসম্বৎসরে কতিপয় অশ্লীল শব্দ সম্বন্ধে উক্ত হইয়াছে যে ইহা জ্ঞপরের সম্মুখে উচ্চারণ করা কর্তব্য নহে, কিন্তু অশ্লীল মাসে মহাপূজার দিনে ইহা উচ্চারণ করিবে,—তবে মাতা, ভগিনী এবং শক্তিমস্ত্রে অদীক্ষিতা শিষ্টার সম্মুখে নহে। ইহার সপক্ষে এই পুরাণে যে কারণ দেখান হইয়াছে, শ্লীলতা বজায় রাখিয়া তাহার উল্লেখ করা যায় না। ধর্ম্মের নামে এই সমুদয় বীভৎসতা যে অনেক পরিমাণে তান্ত্রিক অনুষ্ঠানের ফল তাহা অস্বীকার করা কঠিন। উপযুক্ত অধিকারীর পক্ষে এই সমুদয় অনুষ্ঠান প্রয়োজনীয় অথবা ফলপ্রদ হইতে পারে, তর্কের খাতিরে ইহা স্বীকার করিলেও সর্বসাধারণের উপর ইহার প্রভাব যে নীতি ও ক্রটির দিক দিয়া অত্যন্ত অশুভ হইয়াছিল, বাংলার সামাজিক ইতিহাস আলোচনা করিলে সে বিষয়ে কোন সন্দেহ থাকে না। চৈত্র মাসে কাম মহোৎসবেও বাছ সহকারে এই প্রকার অশ্লীল গীত গান করা হইত, কারণ ইহাতে পরিতুষ্ট হইয়া কামদেব মন-পুত্র প্রভৃতি দান করিতেন। হোলাকা—বর্তমান কালের হোলি—একটি প্রধান উৎসব ছিল। স্ত্রী পুরুষ সকলেই ইহাতে যোগদান করিত, কিন্তু ইহার কোন বিস্তৃত বিবরণ পাওয়া যায় না। দূত-প্রতিপদ নামে একটি বিশেষ উৎসব কার্তিক মাসের শুক্ল প্রতিপদে অনুষ্ঠিত হইত। প্রাতে বাজী রাখিয়া পাশা খেলা হইত, এবং লোকের বিশ্বাস ছিল যে ইহার ফলাফল আগামী বৎসরের শুভাশুভ নির্দেশ করে। তাহার পর বসন ভূষণ পরিধান ও গন্ধ দ্রব্যাদি লেপন করিয়া সকলে গীতবাছ যোগদান করিত এবং বন্ধুবান্ধব সহ ভোজন করিত। বাত্ৰ শয়নকক্ষ ও শয্যা বিশেষভাবে সজ্জিত হইত এবং প্রণয়ীযুগল একত্রে রাত্রি যাপন করিত। কোজাগরী পূর্ণিমার রাত্রেও অক্ষত্রীড়া হইত এবং আত্মীয় ও বন্ধুবান্ধব একত্র হইয়া ভোজন করিতেন। চিঁড়া ও নারিকেলের প্রস্তুত নানাবিধ দ্রব্য এই রাত্রে প্রধান খাদ্য ছিল। কার্তিক মাসে সুখরাত্রিব্রত পালিত হইত। সন্ধ্যাকালে গরীব-দুঃখীকে খাওয়ান হইত এবং পরদিন প্রভাতে যাহার সহিত দেখা হইত, বন্ধু বা আত্মীয় না হইলেও তাহাকে কুশলবচন এবং পুষ্প, গন্ধ, দধি প্রভৃতি দ্বারা অর্চনা করা হইত। ভাত-দ্বিতীয়া, পাষণ-চতুর্দশীব্রত, আকাশ-প্রদীপ, জন্মাষ্টমী, অক্ষয়-তৃতীয়া, দশহরার গঙ্গাস্নান, অষ্টমীতে ব্রহ্মপুত্র-স্নান প্রভৃতি বর্তমানকালের সুপরিচিত অনুষ্ঠানগুলিও তৎকালে প্রচলিত ছিল। সেই যুগে শক্ৰোথান নামে একটি উৎসব ছিল। ভাদ্রমাসের শুক্লাষ্টমীতে ইন্ড্রের কার্তিনিস্থিত বিশাল ধ্বজ-দণ্ড উত্তোলন করা হইত। এই উপলক্ষ্যে সুরেশধারী নাগরিকগণ সমবেত হইতেন এবং রাজা স্বয়ং দৈবজ্ঞ, সচিব, কঙ্কুকা

ও ব্রাহ্মণগণ সমভিষাহারে উপস্থিত হইয়া উৎসবে যোগদান করিতেন। এই জাতীয় উৎসব এখন একেবারেই লোপ পাইয়াছে। এই সমুদয় পূজা-পার্বণ, উৎসব প্রভৃতি ও তত্পলক্ষ্যে আমোদ প্রমোদ বাঙ্গালীর সামাজিক জীবনের বৈশিষ্ট্য ছিল।

#### ৭। বাঙ্গালীর চরিত্র ও জীবনযাত্রা

এই যুগে সাধারণ বাঙ্গালীর দৈনন্দিন জীবন যাত্রার কোন স্পষ্ট বা বিস্তৃত বিবরণ জানিবার উপায় নাই। প্রাচীন বাংলায় লিখিত চর্যাপদগুলিতে এবিষয়ে কিছু কিছু উল্লেখ আছে। কিন্তু এই পদগুলি দশম শতাব্দী বা তাহার পরে রচিত, এবং অত্যাশ্চর্য যে সমুদয় গ্রন্থে ইহার কোন বিবরণ আছে তাহা ইহারও পরবর্ত্তীকালের রচনা। প্রাচীন লিপি, শিল্প ও বৈদেশিক ভ্রমণকারীর বিবরণী হইতে এ বিষয়ে যে তথ্য সংগ্রহ করা যায় তাহাও অতিশয় সংক্ষিপ্ত। এই সমুদয়ের উপর নির্ভর করিয়াই বাঙ্গালীর জীবনের বিভিন্ন দিক সম্বন্ধে অতি সংক্ষেপে কিছু আলোচনা করিতেছি।

সপ্তম শতাব্দীতে চীন দেশীয় পরিব্রাজক হুয়েন সাং বাংলার বিভিন্ন অঞ্চলে ভ্রমণ করিয়া ইহার অধিবাসীদের সম্বন্ধে যে সমুদয় মন্তব্য করিয়াছেন তাহা বাঙ্গালী মাত্রেরই জ্ঞানার্থে বিষয়। ‘সমতটের লোকেরা স্বভাবতই শ্রম-সহিষ্ণু, তান্ত্রালিপ্তির অধিবাসীরা দৃঢ় ও সাহসী কিন্তু চঞ্চল ও ব্যস্তবাগীশ, এবং কর্ণসুবর্ণ-বাসীরা সাধু ও অমায়িক’—তাহার এই কয়েকটি সংক্ষিপ্ত মন্তব্যে প্রাচীন বাঙ্গালীর চরিত্রের বৈশিষ্ট্য ফুটিয়া উঠিয়াছে। তা ছাড়া তিনি পুণ্ড্রবর্ধন, সমতট ও কর্ণসুবর্ণে সর্ব-সাধারণের মধ্যে লেখাপড়া শিখিবার অদম্য আগ্রহ ও প্রাণপণ চেষ্টার কথা বিশেষভাবে উল্লেখ করিয়াছেন। সহস্রাব্দিক বৎসর পরে আজিও ভারতবর্ষের অত্যাশ্চর্য প্রদেশের তুলনায় বাংলায় স্কুল কলেজের সংখ্যাধিক্য বাঙ্গালীর জাতীয় জীবনের এই বৈশিষ্ট্যের পরিচয় দিতেছে।

বাংলায় সাধারণত বেদ, মীমাংসা, ধর্মশাস্ত্র, পুরাণ, রামায়ণ, মহাভারত, অর্থশাস্ত্র, গণিত, জ্যোতিষ, কাব্য, তর্ক, ব্যাকরণ, অলংকার, ছন্দ, আয়ুর্বেদ, অস্ত্রবেদ, আগম, তন্ত্র প্রভৃতির পঠন পাঠন প্রচলিত ছিল। বৌদ্ধ ও জৈন ধর্মের গ্রন্থাদিও পঠিত হইত। ফাহিয়ান ও ইংসিং উভয়েই বৌদ্ধ গ্রন্থের চর্চায় জন্তু তান্ত্রালিপ্তির বৌদ্ধ বিহারে কিছুকাল অবস্থান করিয়াছিলেন।

জ্ঞান লাভের জন্তু বাঙ্গালী দূরদেশে এমন কি সুদূর কাশ্মীর পর্যন্ত

যাইত। কিন্তু বাঙ্গালী ছাত্রদের কোন কোন বিষয়ে ছুঁর্নাম ছিল। ক্ষেমেস্তু দশোপদেশ নামক হস্তরসাত্মক কাব্যে লিখিয়াছেন যে গোড়ের ছাত্রগণ যখন প্রথম কাশ্মীরে আসে তখন তাহাদের ক্ষীণ দেহ দেখিয়া মনে হয় যেন ছুঁইলেই ভাঙ্গিয়া পড়িবে; কিন্তু এখানকার জলবায়ুর গুণে তাহারা শীঘ্রই এমন উদ্ধত হইয়া উঠে যে, দোকানদার দাম চাহিলে দাম দেয় না, সামান্য উত্তেজনার বংশেই মারিবার জন্য ছুরি উঠায়। বিজ্ঞানস্বরূপ লিখিয়াছেন যে গোড়ের লোকেরা বিবাদপ্রিয়।

কিন্তু বাংলার মেয়েদের সুখ্যাতি ছিল। বাৎস্তায়ন তাহাদিগকে মৃদুভাষিনী, কোমলাঙ্গী ও অমুরাগবতী বলিয়া বর্ণনা করিয়াছেন। পবনদূতে বিজয়পুরের বর্ণনা পড়িয়া মনে হয়, সেকালে মেয়েদের মধ্যে অবরোধ প্রথা ছিল না—তাহারা স্বচ্ছন্দে বাহিরে ভ্রমণ করিত। কিন্তু বাৎস্তায়ন লিখিয়াছেন যে রাজাস্তম্ভপুরের মেয়েরা পর্দার আড়াল হইতে অনাত্মীয় পুরুষের সহিত আলাপ করিত। মেয়েরা লেখাপড়া শিখিত। ভারতবর্ষের অন্য প্রদেশের ন্যায় বাংলায়ও মেয়েদের কোন প্রকার স্বাভাব্য বা স্বাধীনতা ছিল না, প্রথমে পিতা পরে স্বামীর পরিবারবর্গের অধীনে থাকিতে হইত। এক বিষয়ে বাংলার বৈশিষ্ট্য ছিল। জীমূতবাহনের মতে অপুত্রক স্বামীর মৃত্যু হইলে বিধবা তাহার সমস্ত সম্পত্তির অধিকারিণী হইবে। এ বিষয়ে প্রাচীনকালে অনেক বিরুদ্ধমত ছিল, যেমন পুত্রের অভাবে ভ্রাতা উত্তরাধিকারী এবং বিধবা কেবল গ্রাসাচ্ছাদনের অধিকারিণী হইবে। জীমূতবাহন এই সমুদয় মত খণ্ডন করিয়া বিধবার দাবী সমর্থন করিয়া গিয়াছেন, সুতরাং বাংলাদেশে এই বিধি প্রচলিত ছিল ইহা অনুমান করা যাইতে পারে। কিন্তু ইহা সত্ত্বেও সেকালের বিধবার জীবন এখনকার ন্যায়ই ছিল। কারণ জীমূতবাহনের মতে সম্পত্তির অধিকারিণী হইলেও ইহার দান ও বিক্রয় সম্বন্ধে বিধবার কোন অধিকার থাকিবে না, এবং তাহাকে সত্য সাধ্বী স্ত্রীর ন্যায় কেবলমাত্র স্বামীর স্মৃতি বহন করিয়া জীবন ধারণ করিতে হইবে। স্বামীর পরিবারে সর্ববিষয়ে—এমন কি সম্পত্তির ব্যবস্থায় সম্বন্ধেও—তাহাদের আনুগত্য স্বীকার করিয়া থাকিতে হইবে, এবং নিজের প্রাণধারণার্থ যাহা প্রয়োজন, মাত্র তাহা ব্যয় করিয়া অবশিষ্ট স্বামীর পারলৌকিক কল্যাণের জন্য ব্যয় করিতে হইবে। সেকালেও বিধবাকে নিরামিষ আহার করিয়া সর্ববিধ বিলাস-বর্জন ও কৃচ্ছ্র-সাধন করিতে হইত। সধবা অবস্থায় তাহার ব্যক্তিগত প্ৰভাব ও প্রতিপত্তি কিরূপ ছিল ঠিক বলা যায় না। তবে পুরুষের বহু বিবাহ প্রচলিত ছিল এবং অনেক স্ত্রীকেই সপত্নীর সহিত একত্রে

জীবন যাপন করিতে হইত। সহমরণ প্রথা সেকালেও প্রচলিত ছিল এবং বৃহৎপুরাণে ইহার উচ্ছৃঙ্খলিত প্রশংসা আছে।

বাংলার অধিবাসীরা তখন বেশীর ভাগ গ্রামেই বাস করিত। কিন্তু ধন-সম্পদপূর্ণ সহরেরও অভাব ছিল না। রামচরিতে সুজলা সুফলা শস্ত-শ্রামলা বঙ্গভূমির এবং পাল-রাজধানী রামাবতীর মনোরম বর্ণনা আছে। পবন-দূতে সেন-রাজধানী বিজয়পুরের বিবরণ পাওয়া যায়। অত্যাতি দোষে দূষিত হইলেও এই সমুদয় বর্ণনা হইতে সেকালের গ্রাম্য ও নাগরিক জীবনের কিছু আভাস পাওয়া যায়।

রামাবতী বর্ণনা প্রসঙ্গে কবি লিখিয়াছেন যে প্রশস্ত রাজপথের ধারে ‘কনক-পরিপূর্ণ খবল প্রাসাদ-শ্রেণী মেরু-শিখরের ন্যায় প্রতীয়মান হইত’ এবং ইহার উপর স্বর্ণকলস শোভা পাইত; নানা স্থানে মন্দির, স্তূপ, বিহার, উদ্যান, পুষ্করিনী, ক্রীড়াশৈল, ক্রীড়াবাণী ও নানাবিধ পুষ্প, লতা, তরু, গুল্ম নগরের শোভাবৃদ্ধি করিত। হীরক, বৈদূর্য্যমণি, মুক্তা, মরকত, মাণিক্য ও নীলমণিখচিত আভরণ, বহুবিধ স্বর্ণখচিত তৈজসপত্র ও অন্যান্য গৃহোপকরণ, মহামূল্য বিচিত্র সূক্ষ্ম বসন, কস্তুরী, কালাগুরু, চন্দন, কুকুম ও কর্পূরাদি গন্ধদ্রব্য, এবং নানায়ন্ত্রোপ্ত মস্ত্রমধুর ধ্বনির সহিত তানলয়-বিগুঞ্জ সঙ্গীত সেকালের নাগরিকদের ঐশ্বর্য্য, সম্পদ, রুচি ও বিলাসিতার পরিচয় প্রদান করিত। সঙ্ঘ্যাকরনন্দী স্পষ্টই লিখিয়াছেন যে সেকালে সমাজে ব্যভিচারী ও সাংঘিক উভয় শ্রেণীরই লোক ছিল। নগরে বিলাসিতা ও উচ্ছৃঙ্খলতা অবশ্য গ্রামের তুলনায় বেশী মাত্রায়ই ছিল।

বাংলার প্রাচীন ধর্ম্মশাস্ত্রে নৈতিক জীবনের খুব উচ্চ আদর্শের পরিচয় পাওয়া যায়। একদিকে সত্য, শৌচ, দয়া, দান, প্রভৃতি সর্ব্ববিধগুণের মহিমা কীর্ত্তন এবং অপরদিকে ব্রহ্মহত্যা, সুরাপান, চোর্যা ও পরদারগমন প্রভৃতি মহাপাতক বলিয়া গণ্য করিয়া তাহার জন্ত কঠোর শাস্তি ও গুরুতর প্রায়শ্চিত্তের ব্যবস্থা করা হইয়াছে। ব্যক্তিগত জীবনে এই আদর্শ কি পরিমাণে অনুসৃত হইত তাহার সম্বন্ধে সঠিক ধারণা করা যায় না। সামাজিক জীবনের কিছু কিছু দুর্নীতি ও অশ্লীলতার কথা পূর্বেই উল্লিখিত হইয়াছে। ইন্দ্রিয়-সংযম বা দৈহিক পবিত্রতার আদর্শ যে হিন্দুযুগের অবসান কালে অনেক পরিমাণে খর্ব্ব হইয়াছিল এরূপ সিদ্ধান্ত করিবার যথেষ্ট কারণ আছে। এই যুগের কাব্যে ইন্দ্রিয়ের উচ্ছৃঙ্খলতা যে ভাবে প্রতিধ্বনিত হইয়াছে তাহা কেবলমাত্র কবির কল্পনা বলিয়া উড়াইয়া দেওয়া যায় না। যে যুগের স্মার্ত্ত পণ্ডিতগণ প্রামাণিক গ্রন্থে অকৃষ্টিত চিত্রে লিখিয়াছেন যে শূত্রাকে বিবাহ করা অসঙ্গত কিন্তু তাহার সহিত

অবৈধ সহবাস করা তাদৃশ নিন্দনীয় নয় ; যে যুগের কবি রাজপ্রশস্তিতে বাজার-কৃতিত্বের নিদর্শন স্বরূপ গর্বভরে বলিয়াছেন যে রাজপ্রাসাদে ( অথবা রাজধানীতে ) প্রতি সন্ধ্যায় ‘বেশবিলাসিনীজনের মঞ্জীর-মঞ্জুশবনে’ আকাশ প্রতিধ্বনিত হয় ; যে যুগের কবি মন্দিরের একশত দেবদাসীর রূপ-যৌবন বর্ণনায় উচ্ছ্বসিত হইয়া লিখিয়াছেন যে ইহারা ‘কামিজনের কারাগার ও সঙ্গীত-কেলি-শ্রীর সঙ্গমগৃহ’ এবং ইহাদের দৃষ্টিমাত্রে ভস্মীভূত কাম পুনরুজ্জীবিত হয় ; যে যুগের কবি বিষ্ণু-মন্দিরে লীলাকমলহস্তে দেবদাসীগণকে লক্ষ্মীর সহিত তুলনা করিতে দ্বিধা বোধ করেন নাই ; সে যুগের নরনারীর যৌন-সম্বন্ধের ধারণা ও আদর্শ বর্তমান কালের মাপকাঠিতে বিচার করিলে খুব উচ্চ ও মহৎ ছিল একরূপ বিশ্বাস করা কঠিন । এ বিষয়ে বাঙ্গালীর যে খুব সন্মান ছিল না, তাহারও কিছু কিছু প্রমাণ আছে । বাংলার গৌড় ও বঙ্গের রাজাস্তঃপুরবাসিনীদের ব্যভিচারের উল্লেখ করিয়াছেন । বৃহস্পতি ভারতের বিভিন্ন জনপদের আচার ব্যবহার বর্ণনা প্রসঙ্গে লিখিয়াছেন যে, পূর্বদেশের দ্বিজাতিগণ মংস্ত্রাহারী এবং তাহাদের স্ত্রীগণ হুনীতি-পরায়ণ ।

ভাত, মাছ, মাংস, শাকসব্জী, ফলমূল, দুগ্ধ এবং দুগ্ধজাত নানাপ্রকার দ্রব্য ( ক্ষীর, দধি, ঘৃত ইত্যাদি ) বাঙ্গালীর প্রধান খাদ্য ছিল । বাংলার বাহিরে ব্রাহ্মণেরা সাধারণত মাছ মাংস খাইতেন না এবং ইহা নিন্দনীয় মনে করিতেন । কিন্তু বাংলায় ব্রাহ্মণেরা আমিষ-ভোজন করিতেন, এবং ভবদেবভট্ট নানাবিধ যুক্তি প্রয়োগে ইহার সমর্থন করিয়াছেন । বৃহদ্রত্নপু্রাণে বোঝিত, সকল, শফর এবং অন্যান্য শস্য ও শস্যযুক্ত মংস্ত্র-ভক্ষণের ব্যবস্থা আছে । সেকালে ইলিশ মংস্ত্র এবং পূর্ববঙ্গে শুটুকী মংস্ত্রের খুব আদর ছিল । নানারূপ মাদক পানীয় ব্যবহৃত হইত । ভবদেবভট্টের মতে সুরাপান সকলের পক্ষেই নিষিদ্ধ, কিন্তু এই ব্যবস্থা কতদূর কার্যকরী ছিল বলা কঠিন । চর্যাপদে শৌণ্ডিকালয়ের উল্লেখ আছে ।

পাহাড়পুরের মূর্তিগুলি দেখিলে মনে হয় যে সেকালের বাঙ্গালী নরনারী সাধারণত এখনকার মতই একখানা ধুতি বা শাড়ী পরিত । পুরুষেরা মালকোছা দিয়া খাটো ধুতি পরিত এবং অধিকাংশ সময়ই ইহা হাঁটুর নীচে নামিত না । কিন্তু মেয়েদের শাড়ী পায়ের গোড়ালি পর্যন্ত পৌছিত । ধুতি ও শাড়ী কেবল দেহের নিম্নার্দ্ধ আবৃত করিত । নাভির উপরের অংশ কখনও খোলা থাকিত, কখনও পুরুষেরা উত্তরীয় এবং মেয়েরা ওড়না ব্যবহার করিত । মেয়েরা কদাচিৎ চৌলি বা স্তনপট্ট এবং বডিসের ত্রায় জামাও

ব্যবহার করিত। উৎসবে বা বিশেষ উপলক্ষে সম্ভবত বিশেষ পরিচ্ছদের ব্যবস্থা ছিল।

পুরুষ ও মেয়েরা উভয়েই অঙ্গুরী, কাণে কুণ্ডল, গলায় হার, হাতে কেয়ুর ও বলয়, কটিদেশে মেখলা ও পায়ে মল পরিত। শঙ্খ-বলয় কেবল মেয়েরাই ব্যবহার করিত। পুরুষ ও মেয়ে উভয়েই একাধিক হার গলায় দিত এবং মেয়েরা অনেক সময় এখনকার পশ্চিমদেশীয় স্ত্রীলোকের ন্যায় হাতে অনেকগুলি চুড়িবালা পরিত। ধনীর সোণা, রূপা, মণি, মুক্তার অনেক আভরণ ব্যবহার করিত।

পুরুষ ও স্ত্রী কেহই কোনরূপ শিরোভূষণ ব্যবহার করিত না। কিন্তু উভয়েরই সুদীর্ঘ কুঞ্চিত কেশদাম নিপুন কৌশলে বিছন্ত হইত। পুরুষদের চুল বাবরির ন্যায় কাঁধের উপর ঝুলিয়া পড়িত, মেয়েরা নানা রকম খোপা বাঁধিত।

সেকালের সাহিত্যে চামড়ার জুতা, কাঠের খড়ম এবং ছাতার উল্লেখ আছে। বাংলার প্রস্তর মূর্তিতে কেবল যোদ্ধাদের পায়ে কখনও কখনও জুতা দেখা যায়। সম্ভবত ইহা সাধারণত ব্যবহৃত হইত না। কয়েকটি মূর্তিতে ছাতার ব্যবহার দেখা যায়।

মেয়েরা বিবাহ হইলে কপালে সিন্দূর পরিত। তাছাড়া চরণদ্বয় অলঙ্কৃত, ও নিম্নাধর সিন্দূর দ্বারা রঞ্জিত করিত। কুঙ্কুমাদি নানা গন্ধ দ্রব্যের ব্যবহার ছিল।

সেকালে নানাবিধ ক্রীড়া কৌতুক ছিল। পাশা ও দাবা খেলা এবং নৃত্য গীত অভিনয়ের খুব প্রচলন ছিল। চর্যাপদে নানাবিধ বাগ্গযন্ত্রের নাম আছে। পাহাড়পুরের খোদিত মূর্তিতে নানা প্রকার বাগ্গযন্ত্র দেখিতে পাওয়া যায়। বীণা, বাঁশী, মৃদঙ্গ, করতাল, ঢাক, ঢোল প্রভৃতি তো ছিলই, এমন কি মাটির ভাণ্ডও বাগ্গযন্ত্ররূপে ব্যবহৃত হইত। পুরুষেরা শিকার, মল্লযুদ্ধ, ব্যায়াম ও নানাবিধ বাজীকরের খেলা করিত। মেয়েরা উত্তান রচনা, জলক্রীড়া প্রভৃতি ভালবাসিত।

গরুর গাড়ী ও নৌকা স্থল ও জলপথের প্রধান যান-বাহন ছিল। ধনী লোকেরা হস্তী, অশ্ব, রথ, অশ্ব-শকট প্রভৃতি ব্যবহার করিত। বিবাহের পর বর গরুর গাড়ীতে বধূকে লইয়া বাড়ী ফিরিতেন। গরুর গাড়ী কিংস্ক ও শাম্মলী কাঠে নির্মিত হইত। গ্রামের লোকেরা ভেলা ব্যবহার করিত।

## উনবিংশ পরিচ্ছেদ

### অর্থনৈতিক অবস্থা

#### ১। কৃষি

বাংলা চিরকালই কৃষিপ্রধান দেশ। এদেশের লোকেরা বেশীর ভাগ গ্রামে বাস করিত এবং গ্রামের চতুষ্পার্শ্বস্থ জমি চাষ করিয়া নানা শস্ত্র ও ফলাদি উৎপাদন করিত। এখনকার ছায় তখনও ধান্যই প্রধান শস্ত্র ছিল, এবং ইহার চাষের প্রণালীও বর্তমান কালের ছায়ই ছিল। খুব প্রাচীন কাল হইতেই এখানে ইক্ষুর চাষ হইত। ইক্ষুর রস হইতে প্রচুর পরিমাণে চিনি ও গুড় প্রস্তুত হইত এবং বিদেশে চালান হইত। কেহ কেহ এরূপও অনুমান করিয়াছেন যে অধিক পরিমাণে গুড় হইত বলিয়াই এদেশের নাম হইয়াছিল গোড়। তুলা ও সর্ষপের চাষও এখানে বহুল পরিমাণে হইত। পানের বরজও অনেক ছিল। বহু ফলবান বৃক্ষের রীতিমত চাষ হইত। ইহার মধ্যে নারিকেল, সুপারি, আম, কাঁঠাল, ডালিম, কলা, লেবু, ডুমুর প্রভৃতি বিশেষভাবে উল্লেখযোগ্য।

যাহারা চাষ করিত জমিতে তাহাদের স্বত্ত্ব কিরূপ ছিল, বাজা অথবা জমিদারকে কি হারে খাজনা দিতে হইত, ইত্যাদি বিষয়ে কোন সঠিক বিবরণ জানা যায় না। সম্ভবত রাজাই দেশের সমস্ত জমির মালিক ছিলেন এবং যাহারা চাষ করিত বা অন্য প্রকারে জমি ভোগ করিত তাহাদের কতকগুলি নিদিষ্ট কর দিতে হইত। রাজা মন্দির প্রভৃতি ধর্ম-প্রতিষ্ঠান এবং ব্রাহ্মণকে প্রতিপালন করিবার জন্য জমি দান করিতেন। এই জমির জন্য কোন কর দিতে হইত না এবং গ্রহীতা বংশানুক্রমে ইহা চিরকাল ভোগ করিতেন। অনেক সময় ধনীরা রাজদরবার হইতে পতিত জমি কিনিয়া এইরূপ উদ্দেশ্যে দান করিতেন এবং তাহাও নিষ্কর ও চিরস্থায়ী বলিয়া গণ্য হইত।

তখনকার দিনে নল দিয়া জমি মাপ করা হইত। বিভিন্ন সময়ে এবং বিভিন্ন অঞ্চলে নলের দৈর্ঘ্য ভিন্ন ভিন্ন রকমের ছিল। 'সমতটীয়-নল' এবং 'বৃষভশঙ্কর-নল'র উল্লেখ পাওয়া যায়। সম্ভবত প্রথমটি সমতট প্রদেশ এবং দ্বিতীয়টি বৃষভশঙ্কর উপাধিধারী সেন-সম্রাট বিজয়সেনের নাম হইতে উদ্ভূত। প্রাচীন গুপ্তযুগে জমির পরিমাণ-মূচক কুল্যাবাপ ও জোণবাপ এই দুইটি



সংজ্ঞা ব্যবহৃত হইত। কুল্যাবাপ শব্দটি কুল্য অর্থাৎ কুলা হইতে উৎপন্ন; এবং এক কুলা বীজদ্বারা যতটুকু জমি বপন করা যায় তাহাকেই সম্ভবত কুল্যাবাপ বলা হইত। অবশ্য ক্রমে ইহার একটি পরিমাণ নির্দিষ্ট হইয়াছিল। কুল্যাবাপ শব্দটি এখনও একেবারে লোপ পায় নাই। কাছাড় জিলায় এখনও কুল্যাবায় এই মাপ প্রচলিত আছে। ইহা ১৪ বিঘার সমান। কুল্যাবায় যে কুল্যাবাপেরই রূপান্তর সে বিষয়ে কোন সন্দেহ নাই, কিন্তু প্রাচীনকালে কুল্যাবাপের পরিমাণ কত ছিল তাহা বলা কঠিন। কেহ কেহ মনে করেন যে ইহা প্রায় তিন বিঘার সমান ছিল। কিন্তু অনেকের বিশ্বাস যে কুল্যাবাপ ইহার অপেক্ষা অনেক বড় ছিল। কুল্যাবাপের আটভাগের একভাগকে দ্রোণবাপ বলা হইত। পরবর্তী কালে কুল্যাবাপের পরিবর্তে পাটক অথবা ভূপাটক শব্দের ব্যবহার দেখিতে পাওয়া যায়। এক পাটক ৪০ দ্রোণের সমান ছিল। এতদ্ব্যতীত আটক অথবা আটবাপ, উন্মান অথবা উদান এবং কাক অথবা কাকিনিক প্রভৃতি শব্দ জমির পরিমাণ সূচিত করিবার জন্য ব্যবহৃত হইত—কিন্তু ইহার কোনটি কি পরিমাণ ছিল তাহা জানা যায় না।

## ২। শিল্প

বাংলা কৃষি-প্রধান দেশ হইলেও এখানে নানাবিধ শিল্পজাত দ্রব্য প্রস্তুত হইত। বস্ত্র-শিল্পের জন্য এ দেশ প্রাচীনকালেই প্রসিদ্ধিলাভ করিয়াছিল। কোটিল্যের অর্থশাস্ত্রে ক্ষৌম, ছুকুল, পত্রোর্ণ ও কার্পাসিক এই চারিপ্রকার বস্ত্রের উল্লেখ আছে। ক্ষৌম শব্দের সূতায় প্রস্তুত মোটা কাপড়; কাশী ও উত্তর বঙ্গে ইহা নিষ্পন্ন হইত। এই জাতীয় সূক্ষ্ম কাপড়ের নাম ছুকুল। কোটিল্য লিখিয়াছেন বঙ্গদেশীয় ছুকুল শ্বেত ও স্নিগ্ধ, পুণ্ড্রদেশীয় ছুকুল শ্যাম ও মণির আয় স্নিগ্ধ। পত্রোর্ণ রেশমের আয় একজাতীয় কীটের লালায় তৈরী। মগধ ও উত্তর-বঙ্গে এই জাতীয় বস্ত্র প্রস্তুত হইত। কার্পাসিক অর্থাৎ কাপাস হুলার কাপড়ের জন্য ও বঙ্গ প্রসিদ্ধ ছিল। এইরূপে দেখা যায় যে খুব প্রাচীনকালেই বাংলার বস্ত্রশিল্প যথেষ্ট উন্নতিলাভ করিয়াছিল। খৃষ্টীয় প্রথম শতাব্দে বাংলা হইতে বহু পরিমাণ উৎকৃষ্ট সূক্ষ্ম বস্ত্র বিদেশে চালান যাইত। বাংলার যে মসলিন ঊনবিংশ শতাব্দী পর্য্যন্ত সমগ্র জগতে বিখ্যাত ছিল, অতি প্রাচীন যুগেই তাহার উদ্ভব হইয়াছিল।

প্রস্তর ও ধাতুশিল্প যে এদেশে কতদূর উন্নতিলাভ করিয়াছিল তাহা

শিল্প অধ্যায়ে দেখান হইয়াছে। যুৎশিল্পেরও কিছু কিছু পরিচয় পাহাড়পুর প্রভৃতি স্থানের পোড়ামাটির কাজে এবং অসংখ্য তৈজসপত্রে পাওয়া যায়। সেকালে বিলাসিতার উপকরণ যোগাইবার জন্য স্বর্ণকার মণিকার প্রভৃতির শিল্পও উন্নতিলাভ করিয়াছিল। কৰ্ম্মকার ও সূত্রধর গৃহ, নৌকা, শকট প্রভৃতি নিৰ্ম্মাণ করিত এবং দৈনন্দিন জীবনযাত্রার নানা উপকরণ যোগাইত। ক'ষ্ঠশিল্প যে একটি উচ্চ সূক্ষ্মশিল্পে উন্নীত হইয়াছিল শিল্প অধ্যায়ে তাহার কিছু পরিচয় দেওয়া হইয়াছে। হস্তীদন্তের কাজও আর একটি উচ্চশ্রেণীর শিল্প ছিল।

বাংলার শিল্পীদের সংঘবদ্ধ জীবনের কিছু কিছু পরিচয় পাওয়া যায়। নগরশ্রেষ্ঠী, প্রথম-সার্থবাহ, প্রথম-কুলক প্রভৃতি এইরূপ সংঘের প্রধান ছিলেন ইহা পূর্বেই (১০৮ পৃঃ) বলা হইয়াছে। বিজয়সেনের দেওপাড়া লিপিতে উক্ত হইয়াছে যে রাণক শূলপানি 'বারেন্দ্র-শিল্পি-গোষ্ঠী-চূড়ামণি' ছিলেন। বরেন্দ্রে শিল্পিগণের এই গোষ্ঠী যে একটি বিধিবদ্ধ সংঘ ছিল এরূপ অনুমান করাই সম্ভব। এইরূপ সংঘবদ্ধ শিল্পিজীবনের ফলেই বাংলাদেশের নানা শিল্পীর ক্রমশ বিভিন্ন বিশিষ্ট জাতিতে পরিণত হইয়াছে। তন্তুবায়, গন্ধবর্ণিক, স্বর্ণকার, কৰ্ম্মকার, কুম্ভকার, কংসকার, শংখকার, মালাকার, তক্ষণ, তৈলকার প্রভৃতি প্রথমে বিভিন্ন শিল্পী-সংঘ মাত্র ছিল, পরে ক্রমে ক্রমে সমাজে এক একটি বিশিষ্ট স্থান অধিকার করিয়া এক একটি বিভিন্ন জাতিতে পরিণত হইয়াছে—সকলেই এই মত গ্রহণ করিয়াছেন। সুতরাং বাংলার এই সমুদ্র জাতি-বিন্যাস হইতে তৎকালের বিভিন্ন শিল্প, বাস্তব ও ব্যবসায়ের প্রকৃষ্ট পরিচয় পাওয়া যায়।

### ৩। বাণিজ্য

শিল্পের উন্নতির সঙ্গে সঙ্গে বাংলায় বাণিজ্যেরও প্রসার হইয়াছিল। বাংলায় বহু নদ নদী থাকায় শিল্পজাত দ্রব্যাদি দেশের নানা স্থানে প্রেরণের যথেষ্ট সুবিধা ছিল। এই কারণে বাংলার নানা স্থানে হাট ও গঞ্জ এবং নূতন নূতন নগর গড়িয়া উঠিয়াছিল। স্থলপথে যাইবার জন্য বড় বড় রাস্তা ছিল এবং প্রাচীন নগরগুলিও বাণিজ্যের প্রধান কেন্দ্রে পরিণত হইয়াছিল। হট্টপতি, শৌদ্ধিক, তরিক প্রভৃতি কৰ্ম্মচারীদের নাম হইতে বুঝা যায় যে, শিল্প ও বাণিজ্য হইতে রাজ্যের যথেষ্ট আয় হইত।

বাংলার বাণিজ্য কেবল দেশের মধ্যেই সীমাবদ্ধ ছিল না। স্থল ও জল পথে ভারতের অন্যান্য প্রদেশের সহিত ইহার দ্রব্য বিনিময় হইত। খুব

প্রাচীনকাল হইতেই সমুদ্রপথেও বাংলার বাণিজ্য-ব্যবসা চলিত। খৃষ্টীয় প্রথম শতাব্দীতে একজন গ্রীক নাবিক লিখিত একখানি গ্রন্থ হইতে জানা যায় যে গঙ্গানদীর মোহনায় গঙ্গে নামক বন্দর ছিল,—বণিকেরা সেখান হইতে জাহাজ ছাড়িয়া হয় সমুদ্রের উপকূল ধরিয়া দক্ষিণ ভারত ও লঙ্কাদ্বীপ যাইত, অথবা সোজামুজি সমুদ্র পাড়ি দিয়া সুবর্ণভূমি অর্থাৎ ব্রহ্মদেশ, মলয় উপদ্বীপ, যবদ্বীপ, সুমাত্রা প্রভৃতি দেশে যাইত। সূক্ষ্ম মসলিন কাপড়, মুক্তা ও নানাপ্রকার গাছ-গাছড়া এদেশ হইতে চালান যাইত। পরবর্তী কালে তাম্রলিপ্তি—বর্তমান তাম্রলুপ্ত—বাংলার প্রধান বন্দর হইয়াছিল। এখান হইতে বাঙ্গালীর জাহাজ দ্রব্যসম্ভার পরিপূর্ণ হইয়া পৃথিবীর সুদূর প্রদেশে যাইত এবং তথা হইতে ধন ও দ্রব্যাদি সংগ্রহ করিয়া ফিরিত।

খৃষ্টপূর্ব দ্বিতীয় শতাব্দীতে অথবা তাহার পূর্বে স্থলপথে আসাম ও ব্রহ্মের মধ্য দিয়া বাংলার সহিত চীন আনাম প্রভৃতি দেশের বাণিজ্য সম্বন্ধ ছিল। দুর্গম হিমালয়ের পথ দিয়াও, নেপাল, ভূটান ও তিব্বতের সহিত বাংলার বাণিজ্য চলিত।

এইরূপ শিল্প ও বাণিজ্যের প্রসারের ফলে বাংলার ধনসম্পদ ও ঐশ্বর্য্য প্রচুর বাড়িয়াছিল।

## ৪। প্রাচীন মুদ্রা

ভারতবর্ষের অন্যান্য প্রদেশের ন্যায় সম্ভবত খৃষ্টজন্মের চারি পাঁচশত বৎসর পূর্বেই বাংলায় মুদ্রার প্রচলন আরম্ভ হইয়াছিল। কারণ ভারতবর্ষের সর্ব-প্রাচীন ছাপ-কাটা (punch-marked) মুদ্রা বাংলায় অনেক পাওয়া গিয়াছে, এবং এখানকার সর্বপ্রাচীন মৌর্য যুগের লিপিতে মুদ্রার উল্লেখ আছে।

বাংলায় কুষাণযুগের মুদ্রা অল্প কয়েকটি পাওয়া গিয়াছে। কিন্তু গুপ্ত-যুগের স্বর্ণ ও রৌপ্য মুদ্রা বহু সংখ্যায় পাওয়া যায়। এই যুগে যে এই সমুদয় মুদ্রার বহুল প্রচলন ছিল তাহাতে সন্দেহ নাই। প্রাচীন লিপিতে দীনার ও রূপক এই দুই প্রকার মুদ্রার নাম পাওয়া যায়। সম্ভবত স্বর্ণ মুদ্রার নাম ছিল দীনার ও রৌপ্য মুদ্রার নাম ছিল রূপক। ১৬ রূপক এক দীনারের সমান ছিল।

গুপ্তযুগের অবসানের পরে বাংলার স্বাধীন রাজগণ গুপ্তমুদ্রার অনুকরণে স্বর্ণমুদ্রা প্রচলিত করেন—কিন্তু তাঁহাদের কোন রৌপ্যমুদ্রা পাওয়া যায় নাই। এই সমুদয় স্বর্ণমুদ্রার গঠন অনেক নিকৃষ্ট এবং ইহাতে খাদের পরিমাণও অনেক বেশী।

পালরাজগণ প্রায় চারিশত বৎসর এদেশে রাজত্ব করেন, কিন্তু তাঁহাদের মুদ্রা বড় বেশী পাওয়া যায় নাই। পাহাড়পুরে তিনটি তাম্রমুদ্রা পাওয়া গিয়াছে,—ইহার একদিকে একটি বৃষ ও অপর দিকে তিনটি মাছ উৎকীর্ণ। কেহ কেহ অনুমান করেন যে এগুলি পাল-সাম্রাজ্যের প্রথম যুগের মুদ্রা। 'শ্রী বিগ্র' এই নামযুক্ত কতকগুলি তামা ও রূপার মুদ্রা পাওয়া যায়। অনেকে মনে করেন যে এগুলি বিগ্রহপালের মুদ্রা। পালযুগের লিপিতে দ্রুম্য নামক মুদ্রার উল্লেখ আছে, সেই জন্য ঐ মুদ্রাগুলি বিগ্রহদ্রুম্য নামে অভিহিত হয়। এই স্বল্পসংখ্যক মুদ্রা ব্যতীত পালযুগের আর কোন মুদ্রা আবিষ্কৃত না হওয়ায় এই যুগের অর্থনৈতিক অবস্থা আমাদের নিকট অনেকটা জটিল হইয়া উঠিয়াছে। সেনযুগের লিপিতে পুরাণ ও কপদকপুরাণ নামে মুদ্রার উল্লেখ আছে। সম্ভবত একই প্রকার মুদ্রা এই দুই নামে পরিচিত ছিল। কিন্তু সেনরাজগণের কোনও মুদ্রা এপর্যন্ত পাওয়া যায় নাই। মৌনহাজুদ্দিন লক্ষ্মণসেনের দানশীলতার উল্লেখ করিয়া লিখিয়াছেন যে, তিনি কাহাকেও লক্ষ কোড়ির কম দান করিতেন না। ইহা হইতে অনুমান হয় যে তখন মুদ্রার পরিবর্তে কোড়ি অথবা কড়ির প্রচলন ছিল। কিন্তু তাহা হইলে কপদক-পুরাণের অর্থ কি? কেহ কেহ বলেন যে ইহা কড়ির আকারে নির্মিত রৌপ্যমুদ্রা। কিন্তু এরূপ একটি মুদ্রাও এযাবৎ পাওয়া যায় নাই। এইজন্য কেহ কেহ মনে করেন যে কপদক-পুরাণ বাস্তবিক কোন মুদ্রার নাম নহে, একটি কাল্পনিক সংজ্ঞা মাত্র, এবং ইহাতে নির্দিষ্টসংখ্যক কড়ি বুঝাইও। এই রৌপ্যমুদ্রার পরিমাণ এবং মূল্য নির্ধারণ হইত, কিন্তু বাস্তবিক পক্ষে তদনুযায়ী কাড় গুণিয়া দ্রব্যাদি কেনা হইত।

ব্যবসায় বাণিজ্যে উন্নত বাংলাদেশে কড়ির ব্যবহার ছিল ইহাতে আশ্চর্য্য বোধ করিবার কোন কারণ নাই। ভারতবর্ষে কড়ি প্রচলনের কথা ফা-হিয়ান উল্লেখ করিয়াছেন। বাংলার চর্যাপদেও ইহার উল্লেখ আছে। ১৭৫০ অব্দে কলিকাতা সহরে ও বাজারে কড়ির ব্যবহার প্রচলিত ছিল। কিন্তু তথাপি গুপ্তযুগের পরবর্তী বাংলার প্রসিদ্ধ রাজবংশগুলির, বিশেষত পাল ও সেন রাজগণের, আমলে মুদ্রার অভাবের প্রকৃত কারণ কি—এ প্রশ্নের কোন সন্তোষজনক উত্তর দেওয়া সম্ভবপর নহে।

# বিংশ পরিচ্ছেদ

## শিল্পকলা

### ১। স্থাপত্য-শিল্প

প্রাচীন বাংলার স্থাপত্য-শিল্পের ইতিহাস লেখা অতিশয় কঠিন, কারণ হিন্দু-যুগের প্রাসাদ, স্তূপ, মন্দির, বিহার প্রভৃতির কোন চিহ্ন এক প্রকার নাই বলিলেই চলে। ফা-হিয়ান ও হুয়েন সাংয়ের বিবরণ এবং প্রাচীন লিপি আলোচনা করিলে কোন সন্দেহ থাকে না যে, হিন্দু যুগে বাংলায় বিচিত্র কারু-কার্যখচিত বহু হস্তা ও মন্দির এবং স্তূপ ও বিহার প্রভৃতি ছিল। কিন্তু এ সমুদয়ই ধ্বংস হইয়া গিয়াছে। প্রাচীন প্রশস্তিকারেরা উচ্চুসিত ভাষায় যে সমুদয় বিশাল গগনস্পর্শী মন্দির ‘ভূ-ভূষণ’, ‘কুল-পর্বত-সদৃশ’ অথবা ‘সূর্য্যের গতিরোধকারী’ বলিয়া বর্ণনা করিয়াছেন আজ তাহার চিহ্ন মাত্রও নাই। দ্বাদশ শতাব্দীতেও সঙ্ক্যাকরনন্দী বরেন্দ্রভূমিতে যে সমুদয় ‘প্রাণ্ড-প্রাসাদ’, মহাবিহার এবং কাঞ্চন-খচিত হস্তা ও মন্দির দেখিয়াছিলেন, তাহা সবই কালগর্ভে বিলীন হইয়াছে। বাংলার স্থপতি-শিল্পের কীর্ত্তি আছে কিন্তু নিদর্শন নাই।

এদেশে প্রস্তর শুলভ নহে, তাই অধিকাংশ নির্মাণ কার্য্যেই ইটের ব্যবহার হইত। আর্দ্রবায়ু, অতিরিক্ত বৃষ্টি, বর্ষা ও নদীপ্লাবনের ফলে ইষ্টক নীড়ই ধ্বংসপ্রাপ্ত হয়। বৈদেশিক আক্রমণকারীর অত্যাচারেও অনেক বিনষ্ট হইয়াছে। প্রকৃতি ও মানুষ উভয়ে মিলিয়া বাংলার প্রাচীন শিল্পসম্পদ ভূপৃষ্ঠ হইতে প্রায় বিলুপ্ত করিয়া দিয়াছে।

সামান্য কয়েকটি ভগ্নপ্রায় মন্দির এই বিশ্বগ্রাসী ধ্বংসের হস্ত হইতে কোন রকমে আত্মরক্ষা করিয়া এখনও দাঁড়াইয়া আছে। জঙ্গল-পরিপূর্ণ মৃৎ-স্তূপ খনন করিয়া পুরাতত্ত্ব-অনুসন্ধিৎসুগণ কোন কোন অতীত কীর্ত্তির জীর্ণ ধ্বংসাবশেষ আবার লোকচক্ষুর গোচর করিয়াছেন। ইহারাই বাংলার অতীত শিল্প-সম্পদের শেষ নদর্শন। ইহাদের উপর নির্ভর করিয়াই বাংলার স্থাপত্য-শিল্পের সংক্ষিপ্ত ইতিহাস রচনা করিতে হইবে। কিন্তু এ ইতিহাস নহে, ইতিহাসের কঙ্কাল মাত্র। বাংলার প্রাচীন শিল্প-সমৃদ্ধি এবং তাহার অতুলনীয় কীর্ত্তি ও গৌরবের ক্ষীণ প্রতিধ্বনিও ইহার মধ্য দিয়া ফুটিয়া উঠিবে কিনা সন্দেহ।

## ক। স্তূপ

বৌদ্ধস্তূপই ভারতের সর্বপ্রাচীন স্থাপত্য নিদর্শন। ভগবান বুদ্ধের অস্থি বা ব্যবহৃত বস্তু রক্ষা করিবার জন্তই প্রথমে স্তূপের পরিকল্পনা হয়। পরে বিশেষ বিশেষ ঘটনা চিরস্মরণীয় করিবার জন্তও যে যে স্থানে তাহা ঘটিয়াছিল সেখানে স্তূপ নির্মিত হইত। বৌদ্ধদের পূর্বেও হয়ত এই প্রথা ছিল—এবং পরে জৈনরাও স্তূপ নির্মাণ করিত। কিন্তু বৌদ্ধগণের মধ্যেই স্তূপ বিশেষ বিখ্যাত ছিল। বৌদ্ধগণ স্তূপকে পবিত্র মন্দিরের স্থায়ী জ্ঞান করিত এবং পরবর্ত্তীকালে তাহারা স্তূপকেও পূজা ও অর্চনা করিত। স্তূপ নির্মাণ ও উৎসর্গ করা অতিশয় পুণ্য কার্য্য বলিয়া বিবেচিত হইত। এই সমুদয় কারণে যেখানেই বৌদ্ধধর্ম প্রসারলাভ করিয়াছে সেইখানেই ক্ষুদ্র ও বৃহৎ অসংখ্য স্তূপ নির্মিত হইয়াছে। বাংলাদেশেও অনেক স্তূপ নির্মিত হইয়াছিল।

স্তূপের তিনটি অংশ। সর্বপ্রাচীন স্তূপে অনুচ্চ গোলাকৃতি অধোভাগের উপর গম্বুজাকৃতি মধ্যম অথবা প্রধান অংশ এমনভাবে নির্মিত হইত যাহাতে অধোভাগের কতকটা স্থান মুক্ত থাকে এবং ইহার উপর দিয়া গম্বুজের চারিদিকে ঘুরিয়া আসা যায়। এই উন্মুক্ত অংশ ভক্তগণের প্রদক্ষিণ পথ স্বরূপ ব্যবহৃত হইত। গম্বুজের উপর প্রথমত চতুষ্কোণ হস্তিকা ও তাহার উপর একটি গোলাকৃতি চক্র থাকিত।

কালক্রমে স্তূপের আকৃতি ক্রমশই দীর্ঘাকার হইতে থাকে। অধোভাগ অনেকটা পিপার আকার ধারণ করে এবং মধ্যভাগের অর্ধবৃত্তাকার গম্বুজও ক্রমশ দীর্ঘ হইতে দীঘতর হয়। উপরের গোলচাকার সংখ্যাও বাড়িয়া যায় এবং পর পর ছোট হইতে হইতে সর্বশেষ চাকাটি প্রায় বিন্দুতে পরিণত হয়। স্তূপের এই তিন অংশের নাম মেধি, অণ্ড ও ছত্রাবলী। ক্রমে এই তিন অংশের নীচে একটি অধোভাগ সংযুক্ত হয়। এই অধোভাগ চতুষ্কোণ, এবং ইহার প্রতি দিকের মধ্যভাগে খানিকটা অংশ সম্মুখে প্রসারিত থাকে। কোন কোন স্থলে এই প্রসারিত অংশের খানিকটাও আবার সম্মুখে প্রসারিত হয়। এইরূপ এক বা একাধিক প্রসারের ফলে অধোভাগ ক্রমশ ক্রসের আকার ধারণ করে। ক্রমশ নীচের এই ক্রসাকৃতি অধোভাগ ও মেধি এবং উপরের অসংখ্য ছত্রাবলীই প্রাধান্য লাভ করে, এবং এতদ্বয়ের মধ্যকার অংশ অণ্ড—এককালে যাহা স্তূপের প্রধান অংশ বলিয়া বিবেচিত হইত—আর দর্শকের মনোযোগ আকর্ষণ করে না। স্তূপগুলিও প্রায় মন্দির চূড়া বা শিখরের আকার ধারণ করে।

হুয়েন সাং লিখিয়াছেন যে পুণ্ড্রবর্ধন, সমতট ও কর্ণসুবর্ণের যে যে স্থানে

গৌতম বুদ্ধ ধর্মোপদেশ দান করিয়াছিলেন সেই সেই স্থানে মৌর্যসম্রাট অশোক নির্মিত স্তূপগুলি তিনি দেখিয়াছিলেন। ইহা হইতে প্রমাণিত হয় যে ছয়েন সাংয়ের সময়ও বাংলায় এমন বহু প্রাচীন স্তূপ ছিল যাহা লোকে অশোকের তৈরী বলিয়া বিশ্বাস করিত। কিন্তু বাস্তবিকই গৌতমবুদ্ধ যে এই সমুদয় স্থান পরিদর্শন করিয়াছিলেন, এবং ইহার স্মরণার্থ অশোক এই সকল স্তূপ নিৰ্ম্মাণ করিয়াছিলেন, অথবা প্রমাণ না পাওয়া পর্য্যন্ত কেবল ছয়েন সাংয়ের উক্তির উপর নির্ভর করিয়া ইহার কোনটিই বিশ্বাস করা যায় না। অশোকের কথা দূরে থাকুক, ছয়েন সাংয়ের সময়কার কোন স্তূপের ধ্বংসাবশেষও অতীবন্ধি বাংলায় আবিষ্কৃত হয় নাই।

বাংলায় যে সকল স্তূপ দেখা যায় তাহা সাধারণত ক্ষুদ্রাকৃতি। পুণ্য অৰ্জ্জনের জন্ত দরিদ্র ভক্তগণ এইগুলি নিৰ্ম্মাণ করিত।

ঢাকা জিলার আসরফপুর গ্রামে রাজা দেবখড়্গের ( ৩১পৃ ) তাম্রশাসনের সহিত যে ব্রঞ্জ বা অষ্টধাতুনিৰ্ম্মিত একটি স্তূপ পাওয়া গিয়াছে তাহাই সম্ভবত বাংলার সর্বপ্রাচীন স্তূপের নিদর্শন। ইহার চতুষ্কোণ অধোভাগ ও হৃদয়াকার এবং গোলাকার মেধির চতুর্দিকে নানা দেবদেবার মূর্তি উৎকর্ণ। স্তূপটির মেধি ও অণ্ড একটি ঘণ্টার মত দেখায়। পাহাড়পুর ও চট্টগ্রামের অন্তর্গত কেওয়ারিতে আরও দুইটি ধাতুনিৰ্ম্মিত স্তূপ পাওয়া গিয়াছে।

১০১৫ অব্দে লিখিত একখানি বৌদ্ধগ্রন্থের পুঁথিতে বরেন্দ্রের মৃগস্থাপন-স্তূপের একটি চিত্র আছে। চীন দেশীয় পরিব্রাজকগণ সপ্তম শতাব্দীতেও এই স্তূপটি দেখিয়াছিলেন। এই চিত্র হইতে সেকালের স্তূপের আকৃতি বেশ বোঝা যায়। এই স্তূপের অধোভাগ ৬য়টি স্তরে বিভক্ত এবং প্রতিস্তরটি একটি প্রস্থটিতে পদ্মের আকার। অণ্ড অংশ ঈষৎ দীর্ঘাকৃতি এবং ইহার চতুর্দিকে চারিটি কুলুঙ্গির অভ্যন্তরে চারিটি বুদ্ধমূর্তি। চতুষ্কোণ হৃদয়াকার উপর বহু সংখ্যক ছত্র।

বৌদ্ধগ্রন্থের পুঁথিতে বাংলার আরও দুই তিনটি স্তূপের ছবি আছে। ইহার একটি 'তুলান্ধ্রে বর্দ্ধমান স্তূপ'। ইহার অধোভাগ নানা কারুকার্য শোভিত ও চারিটি স্তরে বিভক্ত, এবং ইহার মেধি উর্দ্ধ ও অধোমুখ দুইদল বিকশিত পদ্মের আকৃতি।

পাহাড়পুর ও বহুলাড়ায় ( বাঁকুড়া ) বহু ক্ষুদ্র ক্ষুদ্র ইষ্টকস্তূপের অধোভাগ আবিষ্কৃত হইয়াছে। এগুলি গোল, চতুষ্কোণ, অথবা ত্রুসের আকার। বিহারের প্রাচীন স্তূপ ও পূর্বোক্ত বাংলার স্তূপের চিত্রের অধোভাগের সহিত ইহাদের অনেকের নিকট সাদৃশ্য দেখা যায়। সুতরাং এই সমুদয় অধোভাগের উপর যে

সমুদয় স্তূপ নির্মিত হইয়াছিল তাহা দেখিতে বিহারের স্তূপ এবং যুগস্থাপন অথবা বর্ধমান-স্তূপের ন্যায় ছিল এরূপ অনুমান করা যাইতে পারে।

জোগী-গুফা নামক স্থানে পাথরের একটি ছোট স্তূপ পাওয়া গিয়াছে। ইহার মেখি ও অণ্ড অংশের উচ্চতা তাহাদের ব্যাসের তিনগুণ। স্তূপের মেখি অণ্ড ও ছত্রাবলী নিলিয়া ইহা একটি সুদীর্ঘ চূড়ার ন্যায় দেখায়, ইহাকে স্তূপ বলিয়া প্রথমে কিছুতেই মনে হয় না। ইহাকে বাংলার স্তূপের শেষ বিবর্তন বলিয়া গ্রহণ করা যাইতে পারে।

### খ। বিহার

সপ্তম শতাব্দীর পূর্বেই যে বাংলায় বৌদ্ধ ভিক্ষুগণের বাসের জন্য অনেক বিহার ছিল এবং ইহার কোন কোনটি বেশ বড় ও কারুকার্যখচিত ছিল, চীন দেশীয় পরিব্রাজকগণের বিবরণ হইতেই তাহা জানা যায়। স্তূপের ন্যায় এগুলিও ধ্বংস হইয়াছে। কিন্তু রাজসাহীর অন্তর্গত পাহাড়পুর নামক স্থানে একটি বিশাল বিহারের ধ্বংসাবশেষ আবিষ্কৃত হওয়ায় প্রাচীন বাংলার এই শ্রেণীর স্থাপত্যের সম্বন্ধে কতকটা ধারণা করা সম্ভবপর হইয়াছে।

একখানি তাম্রশাসন হইতে জানা যায় যে পঞ্চম শতাব্দীতে এখানে একটি জৈন বিহার ছিল। সম্ভবত কালক্রমে ইহা নষ্ট হইয়া যায়। অষ্টম শতাব্দীতে ধর্মপাল এখানে যে প্রকাণ্ড বিহার নির্মাণ করেন, সোমপুর বিহার নামে তাহা ভারতের সর্বত্র এবং ভারতের বাহিরেও বৌদ্ধজগতে বিশেষ প্রসিদ্ধি লাভ করে। এই প্রকাণ্ড বিহারের চতুষ্কোণ অঙ্গনটি প্রতিদিকে ১০০ গজ দীর্ঘ ছিল। অঙ্গনটি উচ্চ প্রাচীরে ঘেঁষা ছিল এবং অঙ্গনের চারিদিকেই এই প্রাচীর গায়ে ভিক্ষুগণের বাসের জন্য ক্ষুদ্র ক্ষুদ্র কক্ষ নির্মিত হইয়াছিল। এই সমুদয় কক্ষের সংখ্যা ১৭৭। প্রতি কক্ষ প্রায় সাড়ে তের ফিট দীর্ঘ ছিল। কক্ষগুলির সম্মুখ দিয়া আট নয় ফুট চওড়া প্রশস্ত বারান্দা সমস্ত অঙ্গনটি ঘিরিয়া বিস্তৃত ছিল; এবং চারিদিকে চারিটি সিঁড়ি দিয়া বারান্দা হইতে অঙ্গনে নামা যাইত। প্রাচীরের উত্তর দিকে এই বিহারের প্রধান প্রবেশ পথ অথবা সিংহ দরজা ছিল। ইহার পশ্চাতেই একটি প্রকাণ্ড স্তম্ভযুক্ত প্রশস্ত দালান ছিল। এই দালান হইতে আর একটি ক্ষুদ্রতর স্তম্ভযুক্ত দীলানের মধ্য দিয়া পূর্বোক্ত কক্ষ শ্রেণীর সম্মুখস্থ বারান্দায় পৌঁছান যাইত। দক্ষিণ, পূর্ব ও পশ্চিম বারান্দার ঠিক মধ্যস্থলে, অঙ্গনে নামিবার সিঁড়ির পশ্চাতেও এইরূপ কয়েকটি অতিরিক্ত কক্ষ ছিল। সমুদয় কক্ষগুলি হইতে জল নিঃসারণের জন্য



পয়ঃপ্রণালীর ব্যবস্থা ছিল। বিস্তৃত অঙ্গনের ঠিক মধ্যস্থলে একটি প্রকাণ্ড মন্দির ছিল। এই মন্দির ও চতুষ্পার্শ্বস্থ কক্ষগুলির মধ্যবর্তী বিস্তৃত আজিনায় ছোট ছোট স্তূপ, মন্দির, কূপ, স্নানাগার, রন্ধনশালা, ভোজনালয় প্রভৃতি ছিল। ভারতবর্ষে এ পর্য্যন্ত যত বিহারের ধ্বংসাবশেষ আবিষ্কৃত হইয়াছে তাহার মধ্যে এই সোমপুর বিহারই সর্বাপেক্ষা বৃহৎ। এই বিহারটি যখন সম্পূর্ণ ছিল তখন ইহার বিশালত্ব ও সৌন্দর্য্য লোকের মনে বিস্ময় উৎপাদন করিত। একখানি সমসাময়িক লিপিতে ইহা “জগতাং নৈত্রিকবিশ্রাম-ভূ” (জগতে নয়নের একমাত্র বিরামস্থল অর্থাৎ দর্শনীয় বস্তু) বলিয়া বর্ণিত হইয়াছে। ইহার ‘মহাবিহার’ নাম সার্থক ছিল।

সম্প্রতি কুমিল্লার নিকটবর্তী ময়নামতী নামক অনুচ্চ পর্বতমালায় কয়েকটি বিহারের ধ্বংসাবশেষ আবিষ্কৃত হইয়াছে। উহার খনন কার্য্য এখনও আরম্ভ হয় নাই, কিন্তু প্রাথমিক পরীক্ষার ফলে একজন পুৰাতত্ত্ববিৎ সিদ্ধান্ত করিয়াছেন যে পাহাড়পুরের বিহার ও মন্দির অপেক্ষাও বৃহত্তর বিহার ও মন্দিরাদি এখানে ছিল।

এই সমুদয় ধ্বংসাবশেষ হইতেই প্রাচীন বাংলার বিহার সম্বন্ধে কতক ধারণা করা যায়।

### গ। মন্দির

বাংলার প্রাচীন কালের মন্দির প্রায় সকলই ধ্বংস হইয়াছে একথা পূর্বেই বলা হইয়াছে। কিন্তু কোন কোন বৌদ্ধ গ্রন্থের পুঁথিতে কয়েকটি প্রাচীন মন্দিরের ছবি আছে। কতকগুলি প্রস্তর মূর্তিতেও মন্দির উৎকীর্ণ হইয়াছে। এই সমুদয় প্রতিকৃতির সাহায্যে বাংলার প্রাচীন মন্দিরের গঠন প্রণালী আলোচনা করিলে ছাদের আকৃতি অনুসারে ইহা নিম্নলিখিত চারি শ্রেণীতে বিভক্ত করা যায়।

১। এই শ্রেণীর মন্দিরের ছাদ উপর্যুপরি কতকগুলি সামান্তরাল চতুষ্কোণ স্তরের সমষ্টি। প্রতি দুই স্তরের মধ্যবর্তী প্রদেশ অন্তর্নিবিষ্ট থাকায় এই স্তরগুলি বেশ পৃথক পৃথক দেখা যায়। স্তরগুলি যত উর্দ্ধে উঠিতে থাকে ততই ছোট হয়। গুপ্তযুগের ভাস্কর্য্যে এই শ্রেণীর মন্দির উৎকীর্ণ হইয়াছে। ইহার পরিণতি দেখা যায় উড়িষ্যার মন্দির সম্মুখস্থ জগমোহনে। উড়িষ্যায় এই প্রকার ছাদযুক্ত মন্দির ভদ্র অথবা নীড় দেউল নামে অভিহিত হইয়াছে।

২। দ্বিতীয় শ্রেণীর মন্দিরের ছাদ উড়িষ্যার মন্দিরের স্থায় শিখর ঢাকা। চতুষ্কোণ গর্ভ গৃহের প্রাচীর গাত্র হইতে উচ্চ শিখরের চারিটি ধার উঠিয়া ঈষৎ বাঁকা হইতে হইতে অবশেষে প্রায় সংলগ্ন হইয়া যায়। এই সংযোগস্থল একটি গোলাকার প্রস্তর খণ্ড (আমলক শিলা) আবদ্ধ করা হয় এবং শিখরের গাত্রে কারুকার্য খচিত অনেক লম্বালম্বি পংক্তি থাকে। এই শ্রেণীর মন্দিরের নাম রেখ-দেউল।

৩-৪। প্রথম শ্রেণীর ভদ্র দেউলের সর্বোচ্চ স্তরের উপর একটি স্তূপ বা শিখর স্থাপিত করিয়া এই দুই শ্রেণীর মন্দিরের সৃষ্টি হইয়াছে। কোন কোন স্থলে এই স্তূপ বা শিখর কেবল সর্বোচ্চ স্তরের উপরে নহে, প্রতিস্তরের কোণে এবং সম্মুখ ভাগেও দেখা যায়।

বৌদ্ধ পুঁথির চিত্র ও প্রস্তর মূর্তি হইতে জানা যায় যে প্রাচীন বাংলায় এই চারি শ্রেণীরই মন্দির ছিল। তবে শেষোক্ত দুই শ্রেণীর কোন প্রাচীন মন্দির অপৰ্য্যাপ্ত আবিষ্কৃত হয় নাই। কিন্তু পরবর্তীকালে নিশ্চিত দিনাজপুরের অন্তর্গত কাম্বুনগরের মন্দির চতুর্থ শ্রেণীর মন্দিরের একটি উৎকৃষ্ট নিদর্শন বলিয়া গণ্য করা যাইতে পারে। ব্রহ্মদেশে এই রূপ মন্দির আছে। বাঁকুড়ার একেশ্বর মন্দিরের অঙ্গনে নন্দীর যে ক্ষুদ্র একটি মন্দির আছে, প্রথম শ্রেণীর মন্দিরের তাহাই একমাত্র নিদর্শন। এতদ্ব্যতীত বাংলায় যে কয়েকটি প্রাচীন মন্দির আছে তাহা সকলই দ্বিতীয় শ্রেণীর। ইহাব মধ্যে বর্ধমানের অন্তর্গত বরাকরে একটি, ও বাঁকুড়ার অন্তর্গত দেউলার দুইটি, মোট তিনটি প্রস্তরে গঠিত, অবশিষ্ট কয়েকটি ইষ্টক-নির্মিত। এই মন্দিরগুলির শিখর পূর্বোক্ত বর্ণনামুযায়ী ও উড়িষ্যার মন্দিরের অনুরূপ। হিন্দু যুগে এই শ্রেণীর মন্দির উত্তরভারতের সর্বত্র দেখা যাইত।

বরাকরের মনং মন্দিরটি ইহাদের মধ্যে সর্ব প্রাচীন। ইহার অপেক্ষাকৃত উচ্চ গর্ভগৃহ, অল্প শিখরভাগ এবং আমলক শিলার আকৃতি অনেকটা ভূবনেশ্বরের প্রাচীন পরশুরামেশ্বর মন্দিরের স্থায়, এবং ইহা সম্ভবত ঐ সময় অর্থাৎ অষ্টম শতাব্দীতে নির্মিত।

পরবর্তীকালের মন্দির গুলিতে খোদিত কারুকার্য অনেক বেশী। শিখরের কোণগুলি পালিশ করায় ইহা অধিকতর গোলাকার দেখা যায় এবং শিখর গাত্রে ক্ষুদ্র ক্ষুদ্র শিখরের প্রতিমূর্তি উৎকীর্ণ করা হয়। মন্দিরের প্রবেশ পথের সম্মুখস্থ পুরু দেওয়ালের মধ্যে একটু ছোট নাটমন্দিরের মত কক্ষ যোগ করাও এগুলির আর একটি বিশেষত্ব। দেউলিয়ার (বর্ধমান) মন্দির, বহুলারার

( বাঁকুড়া ) সিদ্ধেশ্বর মন্দির, সুন্দরবনের জটার দেউল এবং দেহারের ( বাঁকুড়া ) সরেশ্বর ও সল্লেশ্বরের মন্দির বিশেষভাবে উল্লেখযোগ্য। প্রথম তিনটি ইষ্টক ও শেষোক্ত দুইটি প্রস্তরে নির্মিত। সিদ্ধেশ্বর মন্দিরের কারুকার্য বাংলা মন্দিরশিল্পের সর্বোৎকৃষ্ট নিদর্শন বলিয়া গ্রহণ করা যাইতে পারে।

পাহাড়পুরের বিহারের অঙ্গনের ঠিক কেন্দ্রস্থলে একটি বিশাল মন্দিরের ধ্বংসাবশেষ আবিষ্কৃত হইয়াছে। ইহার উর্দ্ধভাগ বিলুপ্ত হওয়ায় এই মন্দিরটি কোন শ্রেণীর অন্তর্গত ছিল তাহা জানিবার উপায় নাই। কিন্তু ইহার নীচের যেটুকু অবশিষ্ট আছে তাহা ভারতবর্ষের অন্যান্য মন্দির হইতে সম্পূর্ণ পৃথক।

মন্দিরটি ত্রিতল। ইহার ঠিক কেন্দ্রস্থলে একটি চতুষ্কোণ বর্গাকৃতি অংশ সোজা উপরে উঠিয়া গিয়াছে। ইহার চারিধারের প্রাচীর অতিশয় স্থূল ও দৃঢ়, এবং প্রাচীরের অভ্যন্তরস্থ স্থান ফাঁকা হইলেও সেখানে প্রবেশ করিবার কোন উপায় নাই। ত্রিতলে এই বর্গাকৃতি অংশের প্রতি প্রাচীরের সম্মুখ ভাগে একটি নাট মন্দির ও মণ্ডপ এমনভাবে নির্মিত হইয়াছে যাহাতে ইহার দুইপার্শ্বে প্রাচীরের খানিক অংশ মুক্ত থাকে। ইহার ফলে এই চারিটি প্রসারিত অংশের মধ্যে বর্গাকৃতি অংশের চারিটি কোণ বাহির হইয়া আছে এবং সমস্তটা একটি ক্রসের আকার ধারণ করিয়াছে। এই ক্রসের সীমারেখার অনুযায়ী একটি প্রদক্ষিণ পথ ও তাহার আবেষ্টনী মন্দিরের চারিদিকে ঘিরিয়া আছে। দ্বিতলের পরিকল্পনা ত্রিতলেরই অনুরূপ—কিন্তু ইহার প্রতিদিকের সম্মুখভাগ খানিকটা প্রসারিত করিয়া আরও দুইটি কোণের সৃষ্টি করা হইয়াছে। একতল দ্বিতলের অনুরূপ, কেবল ইহার উত্তরদিকের একটু অংশ বাড়াইয়া সিঁড়ির যায়গা করা হইয়াছে। সমগ্র মন্দিরটি উত্তর-দক্ষিণে ৩১৬ ফিট এবং পূর্ব-পশ্চিমে ৩১৪ ফিট দীর্ঘ। যে অংশ অবশিষ্ট আছে তাহার উচ্চতা ১০ ফিট।

এই বিশাল মন্দিরের উপরিভাগ কিরূপ ছিল তাহা জানিবার উপায় নাই। কেহ কেহ অনুমান করেন যে বর্গাকৃতি অংশের উপরে মূল মন্দির ছিল। আবার কেহ কেহ বলেন যে সাধারণ মন্দিরের গর্ভগৃহের স্থায় কোন কক্ষ এই মন্দিরে ছিল না—কেবল বর্গাকৃতি অংশের সম্মুখস্থ চারিটি নাট মন্দিরে চারিটি দেবমূর্তি ছিল। জৈন চতুর্সম্মুখ মন্দির ও ব্রহ্মদেশের কোন কোন মন্দিরে এইরূপ ব্যবস্থা দেখিতে পাওয়া যায়।

সম্ভবত বর্গাকৃতি অংশের উপর এক উচ্চ শিখর ছিল, এবং যাহাতে এই বিশাল শিখরের ভার বহন করিতে পারে সেই জন্তই বর্গাকৃতি অংশ এমন সুদৃঢ়ভাবে একেবারে নীচ হইতে গাঁথিয়া তোলা হইয়াছিল। এই বিশাল

মন্দিরের উপযোগী উচ্চ শিখর বর্তমান থাকিতে ইহা বহুদূর হইতে গিরিচূড়ার জায় দেখা যাইত, এবং ইহার সৌন্দর্য্য, বিশালতা ও গাভীর্ঘ্য লোকের মনে কিরূপ বিস্ময় উৎপাদন করিত, আজ আমরা কেবলমাত্র কল্পনায় তাহা অনুভব করিতে পারি।

মন্দিরটি ইট কাদার গাঁথনিতে তৈরী, অথচ সহস্রাধিক বৎসর পরে আজিও এই ইটের দেওয়াল ৭০ ফিট উচু পর্য্যন্ত অবশিষ্ট আছে ইহাই আশ্চর্য্যের বিষয়। দেওয়ালের মাঝে মাঝে কারুকার্য্যখচিত ইটের কার্ণিশ এবং দেওয়ালের গায়ে আবদ্ধ পোড়া-মাটি ও প্রস্তর ভাস্কর্য্যের তিনটি সারি এখনও ইহার অতীত শিল্পকলার নিদর্শনরূপে বর্তমান। মন্দিরটি অষ্টম শতাব্দীতে নিৰ্ম্মিত, কিন্তু ইহার গাত্রসংলগ্ন কোন কোন ভাস্কর্য্য গুপ্তযুগের। সম্ভবত কোন প্রাচীন মন্দিরের ধ্বংসাবশেষ হইতে এগুলি আহৃত হইয়া পরবর্ত্তীকালের মন্দির গাত্রে সংলগ্ন করা হইয়াছে।

পাহাড়পুরের মন্দিরের পরিকল্পনা ভারতবর্ষে আর কোনও স্থানে দেখা যায় না, কিন্তু যবদ্বীপ ও ব্রহ্মদেশে কোন কোন মন্দির অনেকটা এইরূপ এবং ইহারই অনুকরণে নিৰ্ম্মিত হইয়াছে বলিয়া মনে হয়। পূর্ব্বোক্ত বাংলার তৃতীয় ও চতুর্থ শ্রেণীর মন্দিরের শিখরও ব্রহ্মদেশে দেখিতে পাওয়া যায়। সুতরাং বঙ্গদেশের অধুনা বিলুপ্ত মন্দির-শিল্প সুদূর প্রাচ্যের হিন্দু উপনিবেশ-গুলিতে বিশেষ প্রভাব বিস্তার করিয়াছিল এই নিদ্রাস্ত্র সম্পূর্ণ যুক্তিসঙ্গত। বাংলায় প্রাচীন মন্দির খণ্ড বেশী নাহ, কিন্তু এই সমুদয় মন্দিরের অংশ বিশেষ—স্তম্ভ, চাকট প্রভৃতি—নানা স্থানে পাওয়া গিয়াছে। দিনাজপুর রাজবাড়ীতে কারুকার্য্যখচিত একটি প্রস্তর স্তম্ভ আছে। ইহার গাত্রে উৎকীর্ণ লিপি হইতে জানা যায় যে স্তম্ভটি গোড়াধিপ প্রতিষ্ঠিত একটি শিব মন্দিরের অংশ। এই মন্দিরটি নবম শতাব্দীতে নিৰ্ম্মিত হইয়াছিল। পাবনা জিলার হাণ্ডিয়াল গ্রামে চারিটি প্রস্তর স্তম্ভ পাওয়া গিয়াছে—ইহাও বিচিত্র কারুকার্য্যে শোভিত। দিনাজপুরের গরুড় স্তম্ভ ও কৈবর্ত স্তম্ভও এই প্রসঙ্গে উল্লেখযোগ্য। বিক্রমপুরের নানাস্থানে প্রস্তর ও কাষ্ঠের স্তম্ভ পাওয়া গিয়াছে। কাষ্ঠের স্তম্ভগুলি জীর্ণ হইলেও তাহার গাত্রে উৎকীর্ণ বিচিত্র কারুকার্য্য এখনও দেখিতে পাওয়া যায়, এবং ইহার শিল্পকলা অতিশয় উচ্চ শ্রেণীর। এইরূপ কয়েকটি কাষ্ঠের স্তম্ভ, ব্রাকেট প্রভৃতি ঢাকা যাদুঘরে রক্ষিত আছে, এবং এইগুলি প্রাচীন বাংলায় দারু-শিল্পের উৎকৃষ্ট নিদর্শন। ইহা হইতে আরও প্রমাণিত হয় যে বাংলায় কাষ্ঠ নিৰ্ম্মিত অনেক মন্দির ছিল। কালক্রমে

সৈণ্ডলি ধ্বংস হইয়াছে, কিন্তু তাহার যে দুই একটি ক্ষুদ্র অংশ প্রায় সহস্র বৎসর পরেও টিকিয়া আছে তাহা হইতেই এই মন্দিরগুলির সৌন্দর্য্য সম্বন্ধে কতকটা ধারণা করা যাইতে পারে। স্তম্ভগুলি বাস্তবিকই বাংলার বিলুপ্ত মন্দির-শিল্পের স্মৃতিস্তম্ভ।

বাণগড়ের ধ্বংসাবশেষ মধ্যে আবিষ্কৃত একটি বিশাল কারুকার্য্যচিত্র পাথরের চৌকাঠ এখন দিনাজপুর রাজবাড়ীতে আছে। প্রাচীন গোড়ে ও রাজসাহী জিলায় কয়েকটি পাথরের চৌকাঠের অংশ পাওয়া গিয়াছে। এগুলির কারুকার্য্যও খুব উচ্চদরের। স্তম্ভের আয় এই সমুদয় চৌকাঠও প্রাচীন মন্দির-শিল্পের স্মৃতি বহন করিতেছে।

## ২। ভাস্কর্য্য

ভারতবর্ষে চিরকাল দেবমন্দিরই স্থাপত্য ও ভাস্কর্য্য শিল্পের প্রধান কেন্দ্র ছিল। প্রাচীন বাংলায় বহু মন্দির ছিল, তাহা পূর্বেই বলা হইয়াছে; সুতরাং ভাস্কর্য্যেরও বহু উন্নতি হইয়াছিল। মন্দিরের সঙ্গে সঙ্গে ইহার অধিকাংশই লুপ্ত হইয়াছে। কিন্তু অনেক স্থলে মন্দির বিনষ্ট হইলেও তন্মধ্যস্থ দেবমূর্তি রক্ষিত হইয়াছে। বাংলায় যে বহুসংখ্যক দেব দেবীর মূর্তি পাওয়া গিয়াছে পূর্বেই তাহার উল্লেখ করিয়াছি। এই সমুদয় মূর্তি হইতে বাংলার প্রাচীন চারুশিল্পের কতক পরিচয় পাওয়া যায়। কিন্তু ইহার অধিকাংশই নবম শতাব্দীর পরবর্ত্তীকালের। ইহার পূর্বে একমাত্র পাহাড়পুর মন্দির গাত্রেই অনেক ভাস্কর্য্যের নিদর্শন একত্র পাওয়া যায়। যে সমস্ত ভাস্কর্য্যের নিদর্শন ইহারও পূর্ববর্ত্তীকালের বলিয়া নিঃসন্দেহে গ্রহণ করা যায় তাহার সংখ্যা খুবই অল্প।

## ক। প্রাচীন যুগ

চন্দ্রবর্ম্মার রাজধানী পুষ্করণা (বাঁকুড়া জিলার পোকর্ণা) ও সুপ্রসিদ্ধ প্রাচীন নগরী তাম্রলিপ্তিতে প্রাপ্ত কয়েকখানি উৎকীর্ণ পোড়া-মাটি বাংলার সর্বপ্রাচীন ভাস্কর্য্যের নিদর্শন। ইহার একখানিতে একটি যক্ষিনীর মূর্তি আছে। ইহার গঠন প্রণালী ও বগন ভূষণ গুজ যুগের মূর্তির অনুরূপ (খৃঃ পূঃ প্রথম ও দ্বিতীয় শতাব্দী)। মহাস্থানে একটি পোড়া-মাটির মূর্তি কেহ কেহ মৌর্য্য যুগের বলিয়া মনে করেন, কিন্তু ইহা এতই অস্পষ্ট যে এসম্বন্ধে কোন সঠিক ধারণা করা কঠিন। মহাস্থানের আর একটি পোড়া-মাটির মূর্তি সম্ভবত গুজযুগের।

রাজসাহী জিলার অন্তর্গত কুমারপুর ও নিয়ামপুরে প্রাপ্ত দুইটি সূর্য্যমূর্ত্তি এবং মালদহ জিলার হাঁকরাইল গ্রামের বিষ্ণুমূর্ত্তির পোষাক পরিচ্ছদ ও গঠন প্রণালী কুষাণ যুগের মূর্ত্তির অনুরূপ। বাণগড়ে প্রাপ্ত কয়েকটি পোড়া-মাটির মূর্ত্তিতে কুষাণ অথবা তাহার অব্যবহিত পরবর্ত্তীযুগের শিল্প লক্ষণ দেখিতে পাওয়া যায়।

বিহারের বুদ্ধ মূর্ত্তি সারনাথের গুপ্তযুগের মূর্ত্তির অবিকল অনুকরণ বলিলেও চলে। কাশীপুর ( সুন্দরবন ) ও দেওরার (বগুড়া) সূর্য্যমূর্ত্তি দুইটিতেও গুপ্তযুগের শেষকালের (ষষ্ঠ শতাব্দী) শিল্প লক্ষণ বিদ্যমান। ইহাদের মধ্যে কাশীপুরের মূর্ত্তিটি অধিকতর সৌষ্ঠব সম্পন্ন। গুপ্ত যুগের পূর্ব্ব-পর্য্যায় মূর্ত্তিগুলিতে যেরূপ সংযম ও গাম্ভীর্যের সঙ্গে কমনীয়তা ও ভাবপ্রবণতার অপূর্ব্ব সমাবেশ দেখা যায় এই মূর্ত্তিটিতে তাহা বেশ ফুটিয়া উঠিয়াছে। মহাস্থানের নিকটবর্ত্তী বলাইধাপ ভিটায় সোণার পাতে ঢাকা অষ্টধাতু নিষ্পিত একটি মঞ্জুশ্রী মূর্ত্তি পাওয়া গিয়াছে। এই মূর্ত্তিটি প্রাচীন বাংলায় ভাস্কর্য্যের শ্রেষ্ঠ নিদর্শন বলিয়া গ্রহণ করা যাইতে পারে। ইহার গঠনপ্রণালী গুপ্তযুগের আদর্শের অনুরূপ। এই মূর্ত্তির কমনীয় অথচ শাস্ত সমাহিত ভাবে পরিপূর্ণ মুখশ্রী, অঙ্গপ্রত্যঙ্গের লাবণ্য ও সুষমা, করাস্কুল ও অধরযুগলের ব্যঞ্জনা ও সমগ্র দেহের ভাবপ্রবণতা দেখিলে প্রাচীন বাংলায় চারুশিল্পের কতদূর উৎকর্ষ হইয়াছিল তাহার ধারণা করা যায়।

এই সমুদয় মূর্ত্তি হইতে প্রমাণিত হয় যে ঋষ্টাঙ্গের আরম্ভ বা তাহার পূর্ব্ব হইতেই বাংলার ভাস্কর্য্যের চর্চ্চা ছিল এবং বাংলার শিল্পী গুপ্তযুগ পর্য্যন্ত ভারতের সাধারণ শিল্পধারার সহিত যোগ রক্ষা করিয়াই চলিত। ষষ্ঠ শতাব্দীর পূর্ব্ব বাংলার ভাস্কর্য্যে কোন বিশিষ্ট প্রণালী বা পরিকল্পনার পরিচয় পাওয়া যায় না। এই পরিচয় প্রথম পাওয়া যায় দেবখড়্গের রাণী প্রভাবতীর লিপিবদ্ধ সর্ব্বাঙ্গী ও তাহার সহিত প্রাপ্ত একটি ক্ষুদ্র সূর্য্য মূর্ত্তিতে। এই দুইটি সপ্তম শতাব্দীর শেষভাগে নিষ্পিত। গুপ্ত শিল্পের প্রভাব থাকিলেও ইহাতে পরবর্ত্তী পালযুগের শিল্প-বৈশিষ্ট্যের সূচনা দেখিতে পাওয়া যায়। চব্বিশ পরগণার অন্তর্গত মণিরহাটে প্রাপ্ত একটি শিবমূর্ত্তিও এই শ্রেণীর অন্তর্গত। এই তিনটি মূর্ত্তিই ধাতু নিষ্পিত।

### খ। পাহাড়পুর

পাহাড়পুরের মন্দির গাত্রে যে খোদিত প্রস্তর ও পোড়া-মাটির ফলক আছে তাহা হইতেই সর্ব্বপ্রথমে বাংলার নিজস্ব ভাস্কর্য্য শিল্পের বৈশিষ্ট্যের পূর্ণ পরিচয়

পাওয়া যায়। বিষয়বস্তু ও শিল্পকৌশলের দিক দিয়া বিচার করিলে পাহাড়পুরের ভাস্কর্য্য দুই বা তিন শ্রেণীতে ভাগ করা যায়। প্রথমটি লোক-শিল্প এবং দ্বিতীয়টি অভিজাত-শিল্প। তৃতীয়টি এ ছয়ের মাঝামাঝি।

প্রস্তরের কয়েকটি ও পোড়া-মাটির সমুদয় ফলকগুলি প্রথম শ্রেণী অথবা লোক-শিল্পের অন্তর্ভুক্ত। রামায়ণ মহাভারতের অনেক কাহিনী ইহাতে খোদিত হইয়াছে। কৃষ্ণের জন্ম-কথা এবং যে সমুদয় লীলা বাঙ্গালীর চিরপ্রিয় এবং বাংলার ঘরে ঘরে প্রচলিত, তাহার বহু দৃশ্য ইহাতে আছে। পঞ্চতন্ত্র ও বৃহৎকথার জনপ্রিয় গল্প ইহার হস্ত রমের আধার যোগাইয়াছে। সাধারণ মানুষের সুখ দুঃখ ও জীবনযাত্রার দৈনন্দিন কাহিনী ইহাতে বিশেষভাবে ফুটিয়া উঠিয়াছে। মেয়েরা নানা ভঙ্গীতে নৃত্য করিতেছে, শিশুকে ক্রোড়ে লইয়া জননী কূপ হইতে জল তুলিতেছে অথবা জলের কলসী সহ গৃহে ফিরিতেছে, কৃষক লাঙ্গল কাঁধে করিয়া মাঠে যাইতেছে, বাজিকর কঠিন কঠিন বাজি দেখাইতেছে, শীর্ণকায় সাধু সন্ন্যাসী কাঁধের উপর কাষ্ঠখণ্ডের সাহায্যে তৈজসপত্র বহন করিয়া লম্বা দাড়ি ঝুলাইয়া ছাজ দেহে চলিয়াছে, পরচুলপরা দরোয়ান লাঠি ভর দিয়া দাঁড়াইয়া দাঁড়াইয়া বিমাইতেছে; প্রেমমালাপে মত্ত যুবক যুবতী, পুরুষ ও স্ত্রী বাগ্‌করগণ ও তাহাদের বাগ্‌যন্ত্র, পূজানিরত ব্রাহ্মণ, অস্ত্র শস্ত্রে সজ্জিত পুরুষ ও নারী, ধনুর্কাণহস্তে রথারোহী যোদ্ধা, পর্ণমাত্র পরিহিত শবর স্ত্রী পুরুষের প্রেমমালাপ, ধনুহস্তে শবর, মৃত জন্তু হস্তে লইয়া বীরদর্পে পদক্ষেপ-কারিণী শবর রমণী,—এইরূপ অসংখ্য দৃশ্য শিল্পী খোদাই করিয়াছে। সুপরিচিত পশু পক্ষী পত্র পুষ্প গাছ পালাও শিল্পীর দৃষ্টি এড়ায় নাই। দৃশ্যমান জগতের বাহিরেও শিল্পীর কল্পনা বিস্তার লাভ করিয়াছে। ব্রহ্মা, বিষ্ণু, শিব, গণেশ, বোধিসত্ত্ব পদ্মপাণি, মঞ্জুশ্রী, তারা প্রভৃতি দেবদেবীর মূর্তি আছে কিন্তু ইহার সংখ্যা খুব বেশী নহে। দৈত্য, দানব, নাগ, কিম্বর, গন্ধর্ব্ব ও বহু কাল্পনিক জীবজন্তু শিল্পীর হস্তে মূর্তি পরিগ্রহণ করিয়াছে।

যে সকল ভাস্কর এই সমুদয় দৃশ্য খোদিত করিয়াছিল তাহাদের শিক্ষা ও সমাজ খুব উচ্চ শ্রেণীর নহে। উৎকর্ণ পুরুষ ও নারীমূর্তির গঠন অতি সাধারণ এমন কি কুংসিং বলাও চলে। তাহাদের অঙ্গপ্রত্যঙ্গ সৌষ্ঠবহীন এবং অনেক সময় অস্বাভাবিক, পরিধেয় বসন ভূষণ অতিশয় সংক্ষিপ্ত ও সাধারণ; তাহাদের গতি বা ভঙ্গীর মধ্যে কোন লাবণ্য বা সুষমা নাই এবং অন্তর্নিহিত কোন ভাব বা চিন্তা তাহাদের মুখশ্রীতে ফুটিয়া ওঠে নাই। যে সূক্ষ্ম সৌন্দর্য্যানুভূতি উচ্চ শিল্পের প্রাণ এই সমুদয় মূর্তিতে তাহার সম্পূর্ণ অভাব। কিন্তু উচ্চাঙ্গের

সৌন্দর্য্যবোধ বা প্রকাশের ক্ষমতা না থাকিলেও সংসার ও সমাজের সহিত এই সমুদয় ভাস্করের ঘনিষ্ঠ পরিচয়, নিকট সম্বন্ধ ও নিবিড় সহানুভূতি ছিল, এবং তাহাদের শিক্ষা দীক্ষা অপরিণত হইলেও পুরুষানুক্রমে লব্ধ কৌশল ও স্বাভাবিক নিপুণতার সাহায্যে তাহারা সরল অকৃত্রিমভাবে ইহার পরিচয় দিতে সমর্থ হইয়াছে। সংখ্যায় অগণিত যে সমুদয় সাধারণ শ্রেণীর নরনারী উচ্চতর শিল্প বা সৌন্দর্য্যবোধের দাবি করিত না তাহাদের জন্মই এই সমুদয় শিল্প রচনা। তাহারা যে এই দৈনন্দিন জীবনযাত্রার পরিচিত দৃশ্যাবলী এবং কাল্পনিক ও বাস্তব জগতের চিত্র বিশেষভাবে উপভোগ করিত তাহা নিঃসন্দেহে বলা যাইতে পারে। এই হিসাবে পাহাড়পুরের এই দৃশ্যাবলী বাংলার প্রাচীন লোক-শিল্পের চমৎকার দৃষ্টান্ত বলিয়া গ্রহণ করা যাইতে পারে। ছুংখের বিষয় হিন্দুযুগে ইহাই তাহার প্রথম ও শেষ নিদর্শন। বাংলার এই জাতীয় শিল্প-প্রতিভা মধ্যযুগের পূর্বে আর আত্মপ্রকাশ করে নাই।

কিন্তু বাংলায় যে উচ্চ শ্রেণীর শিল্পীও ছিল পাহাড়পুরের দ্বিতীয় শ্রেণীর পাথরের ফলকে উৎকীর্ণ মূর্তিগুলিই তাহার প্রমাণ। এগুলির সংখ্যা খুব বেশী নহে, এবং ইহারা প্রধানত কৃষ্ণ, বলরাম, শিব, যমুনা প্রভৃতি দেবদেবীর মূর্তি। ইহার মধ্যে একটি পুরুষ ও নারীর প্রণয় চিত্র অনেকই রাধাকৃষ্ণের যুগলমূর্তি বলিয়া ব্যাখ্যা করিয়াছেন। মূর্তির মস্তকের পশ্চাতে দিব্য জ্যোতির চিহ্ন আছে, অতএব ইহা সাধারণ মনুষ্য মূর্তি নহে। কৃষ্ণের জীবনের অনেক দৃশ্য এই মন্দির গায়ে আছে। সূত্রাং খুব সম্ভবত ইহা কৃষ্ণ ও তাহার প্রেমসীমার মূর্তি। কিন্তু প্রণয়সী যে রাধা একরূপ মনে করিবার বিশেষ কোন কারণ নাই। কৃষ্ণ-রাধার প্রেমের কাহিনী মহাভারত ও প্রাচীন পুৰাণাদিতে পাওয়া যায় না এবং ইহা যে এই সময়ে প্রচলিত ছিল তাহারও কোন সন্তোষজনক প্রমাণ নাই। সূত্রাং অনেকে মনে করেন যে ইহা কৃষ্ণের পার্শ্ব রুক্মিণী অথবা সত্যভামার মূর্তি।

এই মূর্তির সহিত পূর্বোক্ত প্রথম শ্রেণীর অন্তর্গত অনুরূপ কয়েকটি প্রণয়ীযুগলের মূর্তি তুলনা করিলেই শিল্প-হিসাবে এ ছয়ের প্রভেদ বুঝিতে পারা যাইবে। মুখশ্রী, দাঁড়াইবার ভঙ্গী, নারীমূর্তির ঈষৎ বক্র লোলায়িত দৃষ্টিভঙ্গী ও সলাজ-হাস্ত-ক্ষুরিতাধর, হস্তপদাদির গঠন-সৌষ্ঠব, পরিধেয় বসনের রচনা-প্রণালী, এবং সর্বোপরি নর-নারীর প্রেমের যে একটি মাধুর্য্য ও মহিমা এই মূর্তির মধ্য দিয়া ফুটিয়া উঠিয়াছে,— এই সমুদয় বিষয় বিবেচনা করিলে ইহার শিল্পীর শিক্ষা দীক্ষা ও সৌন্দর্য্যানুভূতি যে পূর্বোক্ত শিল্পিগণের অপেক্ষা অনেক



উচ্চস্তরের সে বিষয়ে সন্দেহ থাকে না। বলরাম ও যমুনার মূর্তির সহিত যম, অগ্নি প্রভৃতির এবং দক্ষিণ প্রাচীর-স্থিত শিবমূর্তির সহিত অগ্ন্যগ্ন শিবমূর্তির তুলনা করিলেও স্পষ্ট প্রতীয়মান হইবে যে পাহাড়পুরের প্রথম ও দ্বিতীয় শ্রেণীর ভাস্কর্য্যের মধ্যে ব্যবধান গুরুতর ও প্রকৃতিগত। দ্বিতীয় শ্রেণীর মূর্তিতে গুপ্তযুগের গঠন সৌষ্ঠব, অঙ্গের লাবণ্য ও সুষম, গতিভঙ্গীর বৈচিত্র্য ও সাবলীল ভাব, অন্তর্নিহিত ভাবের বিকাশে উদ্ভাসিত মুখশ্রী প্রভৃতির স্পষ্ট নিদর্শন দেখা যায়। বাংলার যে সমুদয় শিল্পী এগুলি গড়িয়াছিল গুপ্তযুগের শিল্পী তাহাদের আদর্শ ছিল এবং স্বাভাবিক প্রতিভা ও কঠোর সাধনা দ্বারা তাহারা তদনুযায়ী শিক্ষা লাভ করিয়াছিল। প্রথম শ্রেণীর শিল্পীদের শিক্ষা ও আদর্শ ছিল সম্পূর্ণ পৃথক। বাংলার পল্লীতে পল্লীতে প্রাচীনকাল হইতে যে শিল্পধারা সহজ ও স্বাভাবিক বিবর্তনের ফলে গড়িয়া উঠিয়াছিল তাহারা শিশুকাল হইতেই অভ্যস্ত হইয়া তাহাকে রূপ দিয়াছিল।

পাহাড়পুরে কতকগুলি খোদিত প্রস্তর আছে যাহাতে প্রথম শ্রেণীর অপটুতা ও দ্বিতীয় শ্রেণীর শিক্ষা ও সৌন্দর্য্যবোধ উভয়ই আংশিকভাবে বর্তমান। কৃষ্ণের কয়েকটি বাল্যলীলা ও কতকগুলি দেবদেবী ও দিকপালের মূর্তি এই শ্রেণীর অন্তর্গত। কৃষ্ণের কেশিবধ ইহার একটি উৎকৃষ্ট দৃষ্টান্ত। বালকৃষ্ণের মূর্তি এবং ইহার সাবলীল গতিভঙ্গী দ্বিতীয় শ্রেণীর শিল্পীর অননুযায়ী, কিন্তু ইহার মুখ চোখের গঠনে পারিপাট্যের যথেষ্ট অভাব। ইন্দ্রের মূর্তির মধ্যেও যথেষ্ট সৌষ্ঠব ও সৌন্দর্য্য আছে কিন্তু ইহার চোখ ও মুখের গঠন অত্যন্ত অস্বাভাবিক। এই সমুদয় কারণে এই খোদিত প্রস্তরগুলি একটি পৃথক বা তৃতীয় শ্রেণীর অন্তর্ভুক্ত করা যাইতে পারে। সম্ভবত বাংলার প্রাচীন শিল্প ও গুপ্তযুগের নূতন আদর্শ এই দুয়ের সংমিশ্রণে ইহার উৎপত্তি হইয়াছিল।

প্রথম শ্রেণীর খোদিত পোড়া-মাটি ও পাথরগুলি যে পাহাড়পুর মন্দিরের সমসাময়িক সে বিষয়ে সকলেই একমত, কিন্তু কেহ কেহ মনে করেন যে দ্বিতীয় ও তৃতীয় শ্রেণীর খোদিত পাথরগুলি অপেক্ষাকৃত প্রাচীন। সম্ভবত এগুলি কোন মন্দিরগাত্রে সংলগ্ন ছিল, পরে পাহাড়পুর মন্দিরে ব্যবহার করা হইয়াছে। কিন্তু এই বিভিন্ন শ্রেণীর শিল্প যে বিভিন্ন যুগের নিদর্শন তাহা নিঃসংশয়ে বলা কঠিন। কারণ একই সময়ে বাংলায় বিভিন্ন আদর্শের শিল্প প্রচলিত ছিল ইহা অসম্ভব নহে। বাংলায় গুপ্তরাজত্ব প্রতিষ্ঠার পর হইতেই গুপ্তশিল্পের প্রভাবও যে এদেশে ছড়াইয়া পড়িয়াছিল এরূপ অনুমান করা যায়। তাহার ফলে একদল সম্পূর্ণভাবে এই নূতন আদর্শ গ্রহণ করিয়াছিল, আর একদল নূতন

আদর্শ কতকাংশে গ্রহণ করিলেও প্রাচীন পন্থা একেবারে ত্যাগ করে নাই। এই দুইদল এবং অবিকৃত প্রাচীনপন্থীগণ একই সময়ে বর্তমান থাকিতে পারে এরূপ কল্পনা একেবারে অযৌক্তিক নহে।

### গ। পালযুগের শিল্প

নবম, দশম, একাদশ ও দ্বাদশ—এই চারি শতাব্দের শিল্প পালযুগের শিল্প নামে অভিহিত করা যাইতে পারে। কারণ যদিও দ্বাদশ শতাব্দে সেন রাজগণ বাংলায় আধিপত্য প্রতিষ্ঠা করিয়াছিলেন এবং বর্ষা চন্দ্র প্রভৃতি ক্ষুদ্র ক্ষুদ্র রাজবংশও এই যুগে স্বাধীনভাবে রাজত্ব করিয়াছেন, তথাপি এই চারি শতাব্দের শিল্প মোটামুটি একই লক্ষণাক্রান্ত, এবং পাল রাজ্যেই ইহার অভ্যুদয় ও বিকাশ ঘটিয়াছিল।

এই যুগের শিল্পের বিষয়বস্তু কেবলমাত্র দেবদেবীর মূর্তি। বাস্তব সংসার ও সমাজের সঙ্গিত ইহার প্রত্যক্ষ কোন সম্বন্ধ নাই। বিভিন্ন ধর্মগ্রন্থে দেব দেবীর যে ধ্যান আছে সর্বতোভাবে তাহার অনুসরণ করিয়া শিল্পীকে এই সমুদয় নির্মাণ করিতে হইত। সুতরাং শাস্ত্রের অনুশাসন নিগড়পাশের আয় শিল্পীর স্বাধীন ইচ্ছা নিয়ন্ত্রিত করিত। শিল্পী বা শিল্পের কোন অব্যাহত গতি ছিল না। প্রকৃত শিল্প বিকাশের পক্ষে ইহা একটি প্রধান অসুবিধা। তথাপি শিল্পী যে তাঁহার সৃষ্ট মূর্তির মধ্য দিয়া তাঁহার কলানৈপুণ্য ও সৌন্দর্য্যবোধ প্রকাশ করিয়াছেন ইহাই তাঁহার কৃতিত্ব।

উপকরণ বিষয়েও শিল্পীর খুব স্বাধীনতা ছিল না। অষ্টধাতু ও কালো কষ্টিপাথর,—সাধারণত ইহাই ছিল মূর্তি নির্মাণের প্রধান উপাদান। রৌপ্য এবং স্বর্ণও মূর্তি নির্মাণে ব্যবহৃত হইত, কিন্তু এরূপ মূর্তির সংখ্যা খুবই কম। কাষ্ঠ নির্মিত মূর্তিও কয়েকটি পাওয়া গিয়াছে।

পালযুগের চারিশত বৎসরে শিল্পের অনেক বিবর্তন হইয়াছিল। কিন্তু এই বিবর্তনের ইতিহাস সঠিকরূপে জানিবার উপায় নাই। অধিকাংশ মূর্তিরই নির্মাণকাল মোটামুটি ভাবেও জানা যায় না। এ পর্য্যন্ত আবিষ্কৃত বহু শত মূর্তির মধ্যে মাত্র পাঁচখানিতে সময়বিজ্ঞাপক লিপি উৎকীর্ণ আছে। ইহার মধ্যে একখানি দশম, দুইখানি একাদশ ও দুইখানি দ্বাদশ শতাব্দের। কোন এক শতাব্দীর মাত্র একখানি বা দুইখানি মূর্তির সাহায্যে সেই শতাব্দের বিশিষ্ট শিল্পলক্ষণ স্থির করা দুঃসাধ্য। সুতরাং কেবল মাত্র

শিল্পের ক্রমগতির সাধারণ রীতির দিক দিয়া বিচার করা ছাড়া বাংলার এই যুগের শিল্পবিবর্তনের ইতিহাস জ্ঞানিবার আর কোন উপায় নাই। কিন্তু এই সাধারণ রীতিগুলি যথাযথভাবে স্থির করা সহজ নহে, এবং অনেক সময়ে শিল্পীর ব্যক্তিত্ব ও অল্প অনেক বিশিষ্ট কারণে সাধারণ রীতির ব্যতিক্রম বা বিপর্যয় ঘটে। সুতরাং কেবল মাত্র এই রীতি অবলম্বনে রচিত বিবর্তনের ইতিহাস সর্বথা নির্ভরযোগ্য নহে। বাংলার শিল্প সম্বন্ধে এইরূপ ইতিহাস রচনার চেষ্টা খুব বেশী হয় নাই। যে দুই একজন করিয়াছেন তাঁহাদের মতামত খুব স্পষ্ট নহে এবং সর্বসাধারণে গৃহীত হয় নাই।

রচনা বিজ্ঞান, গঠন প্রণালী, ও সৌন্দর্য্য বিকাশের দিক দিয়া বিচার করিলে এই সমুদয় মূর্তির মধ্যে অনেক শ্রেণীভেদ করা যায়। কিন্তু এই সমুদয় প্রভেদ কতটা স্থান বা কালের প্রভাবে এবং কতটা শিল্পীর ব্যক্তিগত ক্রটি বা অল্প কোন কারণে ঘটিয়াছে তাহার নির্ণয় করা কঠিন। এই সমুদয় কারণে কোন নিশ্চিত সিদ্ধান্ত সম্ভব না হইলেও বাংলার এই যুগের ইতিহাস আলোচনা করিতে গিয়া অনেকেই শিল্প বিবর্তনের এইরূপ দুই একটি মূলসূত্র অবলম্বন করিয়াছেন। বিবর্তনের দিক দিয়া মূল্য খুব বেশী না হইলেও বিশ্লেষণের দিক হইতে এইগুলি শিল্পের ইতিহাস আলোচনায় প্রয়োজনীয় সন্দেহ নাই।

সাধারণত মূর্তিগুলি একটি বড় প্রস্তরখণ্ডের মধ্যস্থল হইতে কাটিয়া বাহির করা হয়। মূল মূর্তিটি কেন্দ্রস্থলে এবং পারিপার্শ্বিক মূর্তিগুলি ও বিভূষণাদি এবং চালচিত্র ইহার দুই পার্শ্বে ও উপরে থাকে। প্রথমে মূর্তিগুলির গভীরতার এক অর্দ্ধ মাত্র পাষাণের উপর উৎকীর্ণ হইত, কিন্তু ক্রমেই এই গভীরতার মাত্রা বৃদ্ধি হয়। পরিশেষে মূল মূর্তিটি প্রায় সম্পূর্ণ আকার লাভ করে এবং এই উদ্দেশ্যে ইহার চতুষ্পার্শ্বস্থ পাথর কতকটা একেবারে কাটিয়া ফেলিয়া দেওয়া হয়। আবার প্রথম প্রথম মূল মূর্তিটিই শিল্পীর প্রধান লক্ষ্য থাকে ও দর্শকের প্রায় সমগ্র মনোযোগ আকৃষ্ট করে। ক্রমশ পারিপার্শ্বিক মূর্তিগুলি ও নানাবিধ কারুকার্য্যে বিভূষিত চালচিত্র অধিকতর প্রাধান্য লাভ করে এবং সুদক্ষ শিল্পীর হস্তে মূলমূর্তির শোভাবর্দ্ধন করে। কিন্তু সর্বশেষে কোন কোন স্থলে এই সব পারিপার্শ্বিক মূর্তি ও অলঙ্কারের প্রাচুর্য্য এত বৃদ্ধি পায় যে মূল মূর্তিটিই অপ্রধান হইয়া পড়ে। অনেকেই মনে করেন যে এই দুইটি পরিবর্তনই খুব সম্ভব প্রধানত কাল-প্রবাহের ফলে ঘটিয়াছে; অর্থাৎ উৎকীর্ণ মূর্তির অতিরিক্ত গভীরতা এবং পারিপার্শ্বিক মূর্তি ও চালচিত্রে অলঙ্কারের

অতিরিক্ত ও অযথা বাহুল্য শিল্পীর অপেক্ষাকৃত অপ্রাচীনতার প্রমাণ। কিন্তু ইহা যে একটি সাধারণ সূত্র হিসাবে গ্রহণ করা যায় না রাজা গোবিন্দচন্দ্রের নামাঙ্কিত লিপিবদ্ধ বিষ্ণু ও সূর্যমূর্তির সহিত রাজা তৃতীয় গোপালের চতুর্দশ বৎসরে উৎকর্ষিত সাদাশিব মূর্তির তুলনা করিলেই তাহা বুঝা যাইবে।

একজন প্রসিদ্ধ শিল্পসমালোচক বাংলার এই যুগের শিল্প-বিবর্তন সম্বন্ধে আলোচনা করিয়া ভিন্ন ভিন্ন শতাব্দের শিল্পের লক্ষণ বা বৈশিষ্ট্য নির্দেশ করিয়াছেন। তাঁহার মতে নবম শতাব্দে দেহের কমনীয়তা, সুডোল গঠন ও শাস্ত সমাহিত মুখশ্রী; দশমে শক্তিব্যঞ্জক দৃঢ় বলিষ্ঠ দেহ; একাদশে ক্ষীণ তনু, সুকোমল ভাবপ্রবণতা, মুখমণ্ডলের অপরিণত দীর্ঘতা ও দেহের উদ্ধভাগের লাবণ্য ও সুসমা; এবং দ্বাদশে ভাবব্যঞ্জনহীন মুখশ্রী, অঙ্গ প্রত্যঙ্গের কৃত্রিম আড়ষ্টতা ও বসন ভূষণের প্রাচুর্য্য;—ইহাই এই চারিযুগের বাংলার শিল্পের প্রধান লক্ষণ। নিছক শিল্পের হিসাবে বাংলার মূর্তিগুলিকে মোটামুটি এইরূপ-ভাবে শ্রেণীবদ্ধ করা সম্ভবপর, কিন্তু এই চারিটি শ্রেণী যে পর পর চারিটি শতাব্দের প্রতীক এই মত গ্রহণ করা কঠিন। পূর্বোক্ত গোবিন্দচন্দ্র ও তৃতীয় গোপালের সময়কার মূর্তির তুলনা করিলেই তাহা বুঝা যাইবে। প্রথম মহীপাল ও গোবিন্দচন্দ্র সমসাময়িক। কিন্তু এই দুই রাজার নামাঙ্কিত লিপিবদ্ধ দুইটি বিষ্ণুমূর্তি উপরোক্ত শ্রেণী বিভাগে এক পর্যায়ে পড়ে না।

কালানুযায়ী বিশ্লেষণ সম্ভবপর না হইলেও পালযুগের শিল্প সম্বন্ধে সাধারণভাবে কয়েকটি সিদ্ধান্ত করা যায়। শিল্পীগণ পাথরের বা ধাতুর উপর খোদাই করিয়া যে অসাধারণ দক্ষতা লাভ করিয়াছিল তাহাতে কোন সন্দেহ নাই। লতা, পাতা, জীব, জন্তু ও নানারূপ নকসার কাজ অনেক মূর্তিতে এমন নিপুণ ও সূক্ষ্মভাবে সম্পাদিত হইয়াছে যে বহুবর্ষব্যাপী শিক্ষা ও সাধনা এবং পুরুষানুক্রমিক অভ্যাস ব্যতীত ইহা কদাচ সম্ভবপর হইত না। এই যুগের মূর্তিগুলি যত্নপূর্বক পরীক্ষা করিলে বাংলার লুপ্ত চারুশিল্প সম্বন্ধে একটি স্পষ্ট ধারণা করা যায় এবং বাংলাদেশে যে অন্তত পাঁচ ছয় শত বৎসর একটি জীবন্ত ও উচ্চাঙ্গের শিল্পধারা অব্যাহতভাবে প্রবাহিত ছিল ইহাতে কোন সন্দেহ থাকে না।

মনুষ্যমূর্তিগঠনই শিল্পের উৎকর্ষের সর্বশ্রেষ্ঠ পরিচয় ও প্রমাণ। বাংলার শিল্পী এ বিষয়ে কতটা সফলতা লাভ করিয়াছিল, বাংলার দেবদেবী মূর্তিই তাহার একমাত্র প্রমাণস্থল। ধর্মপ্রাণ ব্যক্তির নিকট দেবদেবীর মূর্তি মাত্রেই সুন্দর। রাধাকৃষ্ণের নাম সম্বলিত কবিতা ও সংগীত মাত্রেই যেমন একশ্রেণীর

লোককে মুগ্ধ করে, দেবদেবীর যে কোন চিত্র বা মূর্তিই তেমন অনেকের নিকট অপরূপ সৌন্দর্যের আকর বলিয়া প্রতীয়মান হয়; এমন কি কালীঘাটের পটের ছবিও কেহ কেহ উচ্ছ্বসিত ভাষায় বর্ণনা করিয়াছেন। কিন্তু ইহা ভক্তের দৃষ্টি, শিল্পের অনুভূতি নহে। শিল্পের প্রকৃত বিচার করিতে হইলে তাহা কেবল ভাব ও সৌন্দর্যের অভিব্যক্তির দিক দিয়াই করিতে হইবে। দেবদেবীর মূর্তিই যে আমাদের অতীত শিল্পের একমাত্র নিদর্শন, ইহা এই শিল্পের প্রকৃত ইতিহাস জানিবার একটি অন্তরায়। কিন্তু এই অন্তরায় অগ্রাহ্য বা অস্বীকার না করিয়া ইহার সাহায্যেই যতদূর সম্ভব শিল্পের পরিচয় দিতে হইবে। স্মরণ রাখিতে হইবে যে, ভারতের অন্যান্য প্রদেশেও দেবদেবীর মূর্তির মধ্য দিয়াই শিল্পের বিকাশ হইয়াছে। প্রাচীন ও মধ্যযুগের যুরোপীয় শিল্পীগণও দেবদেবীর মূর্তির মধ্য দিয়াই অনবচ্ছিন্ন সৌন্দর্যের সৃষ্টি করিয়া জগতে অমরত্ব লাভ করিয়াছেন। প্রাচীন যুগের ‘ভেনাস ডি মিলো’ এবং মধ্যযুগের র্যাফেল ও টিসিয়ান অঙ্কিত ম্যাডোনা ও ভেনাসের মূর্তি দেবীরূপে কল্পিত হইলেও ভাব ও সৌন্দর্যের অভিব্যক্তির জগুই ইহা শিল্প জগতে সর্বোচ্চস্থান অধিকার করিয়াছে।

সারণাথে গুপ্তযুগের যে সমুদয় মূর্তি আছে পালযুগের শিল্পে তাহার প্রভাব দেখা যায়। কিন্তু বাংলার শিল্প অনেক বিষয়ে পরিবর্তিত হইয়াছে। প্রথমত, গুপ্তযুগের সাবলীল স্বচ্ছন্দ ভঙ্গীর পরিবর্তে বাংলার মূর্তিগুলির কতকটা আড়ম্বর ও জড়তা বিশেষভাবে লক্ষ্য করিবার বিষয়। দ্বিতীয়ত, গুপ্তযুগের মূর্তিতে একটি আয়ত-নিহিত অতীন্দ্রিয় ভাবের অভিব্যক্তিই শিল্পীর প্রধান লক্ষ্য, দেহের সুসমা ও লাভণ্য অপ্রধান ও এই ভাবেরই দ্ব্যতক মাত্র। বাংলার মূর্তিগুলিতে এই আধ্যাত্মিক ভাব অপেক্ষা ইন্দ্রিয়গ্রাহ্য আনন্দ ও ভোগের ছবিই যেন বেশী করিয়া ফুটিয়া উঠিয়াছে। একের আদর্শ শাস্ত্র সমাহিত অন্তর্দৃষ্টি, অস্ত্রের আদর্শ কাস্ত ও কমনীয় বাহ্যিক রূপ। বাংলার মূর্তিতে যে আধ্যাত্মিক ভাবের বিকাশ নাই তাহা নহে, কিন্তু তাহার প্রকাশ ভঙ্গীতে সাধারণত অন্তরের সংযম অপেক্ষা ভাবপ্রবণতার উচ্ছ্বাসই বেশী বলিয়া মনে হয়। তবে পালযুগের শ্রেষ্ঠ মূর্তিগুলিতে এই দুই আদর্শের সমন্বয় দেখিতে পাওয়া যায়। এই মূর্তিগুলি “কোমল অথচ সংযত, ভাবপ্রবণ অথচ ধ্যানস্থ, লীলায়িত অথচ দৃঢ়প্রতিষ্ঠ।” বাংলার শিল্প গুপ্তযুগের শিল্পের অপেক্ষা নিকৃষ্ট হইলেও সমসাময়িক পশ্চিম, মধ্য ও দক্ষিণ ভারতের শিল্প অপেক্ষা শ্রেষ্ঠ। কারণ এই সমুদয় শিল্পে সাধারণত গুপ্তযুগের আধ্যাত্মিক ভাব এবং পালযুগের

সৌন্দর্য্য ও লাভণ্য উভয়েরই অভাব পরিলক্ষিত হয়। ফলে মধ্যযুগের এই মূর্তিগুলি প্রাণহীন ও অসুন্দর, এবং ধর্ম্মমত ও ধর্ম্মানুষ্ঠানের পাষণময় রূপ ব্যতীত শিল্পহিসাবে ইহার বিশেষ কোন সার্থকতা নাই। অবশ্য কদাচিৎ এই সমুদয় অঞ্চলেও সুন্দর মূর্তি দেখা যায়,—দৃষ্টান্তস্বরূপ এলিফাণ্টা দ্বীপের মূর্তিগুলির উল্লেখ করা যাইতে পারে। কিন্তু সাধারণত এই সমুদয় দেশে মধ্যযুগের মূর্তিগুলি ত্রীহীন। কেবল বিহারে ও উড়িষ্যায় বাংলার ত্রায় সৌন্দর্য্যের আদর্শ শিল্পে বর্ত্তমান দেখা যায়। বাংলার পাল যুগের শিল্পের প্রভাব এই দুই প্রদেশে এমন কি যবদ্বীপ ও পূর্ব ভারতীয় দ্বীপপুঞ্জ পর্য্যন্ত বিস্তৃত হইয়াছিল।

এপর্য্যন্ত যে সমুদয় আলোচনা করা হইয়াছে তাহা এই যুগের শিল্প সম্বন্ধে সাধারণভাবে প্রযোজ্য। কোন কোন মূর্তিতে যে ইহার ব্যতিক্রম দেখা যাইবে তাহা বলাই বাহুল্য, কারণ কোন দেশের অথবা কোন যুগের শিল্পই কয়েকটি সাধারণ নিয়মের মধ্যে সীমাবদ্ধ করা যায় না। পালযুগের শিল্প সম্বন্ধে সঠিক ধারণা করিতে হইলে এই যুগের মূর্তির সতিত ঘনিষ্ঠ পরিচয় আবশ্যক। বর্ত্তমান গ্রন্থে মূর্তিগুলির বিস্তৃত বিবরণ বা আলোচনা সম্ভবপর নহে বলিয়াই আমরা সংক্ষেপে এই যুগের শিল্পের গতি ও প্রকৃতি সম্বন্ধে সাধারণ মন্তব্য করিয়াছি। এই সকল মন্তব্য বিশদ ও পরিশুট করিবার জন্ত কয়েকটি মূর্তির উল্লেখ করিতেছি।

শিল্পের দিক দিয়া দেখিতে গেলে বিষ্ণু ও তাঁহার পার্শ্বপাশ্বিক দেব-দেবীর মূর্তিগুলিই প্রাধান্য লাভ করে। শিয়ালদির বিষ্ণুমূর্তির মুখে শিল্পী বেশ একটু নূতন ও বৈশিষ্ট্য ফুটাইয়াছেন। বিষ্ণুর উপরের দুই হস্তের অঙ্গুলির বক্রভাব কোমলতা ও কমনীয়তার সূচক, যদিও চক্র ও গদা এই দুই সংহারকারী অস্ত্র ধরিবার সতিত তাহার সামঞ্জস্য নাই। ইহা হইতে বুঝা যায় যে, দুই হস্তের ত্রায় সমান্তরাল পদযুগলের উপর দণ্ডায়মান সরল রেখার ন্যায় দেহ-গঠন শিল্পীর কৌশলের অভাব নহে, কঠোর নিয়মানুবর্ত্তিতাই সূচিত করে। পার্শ্বচারিণী দুইজনের বন্ধিম দেহভঙ্গী হইতেও ইহা প্রমাণিত হয়। এই দুই পার্শ্বচারিণীর মূর্তি লাভণ্য ও সুসমার সহিত গাম্ভীর্য্য ও ভক্তির সংমিশ্রণে অপরূপ শোভা ধারণ করিয়াছে। বজ্রযোগিনীর মৎস্তাবতার মূর্তিতে বিষ্ণুর মুখের কমনীয় কাস্তি, অধর যুগলের হাসিরেখা ও দেহের সুডৌল গঠন এমন কৌশলে সম্পাদিত হইয়াছে যে, বিষ্ণুর অধোভাগ মৎস্তের আকার হইলেও এই অসঙ্গতি শিল্পের সৌন্দর্য্যের হানি করে নাই। বাঘাউরার প্রস্তর নিশ্চিত ও রঙ্গপুরের

ধাতু নির্মিত বিষ্ণু মূর্তিও উচ্চশ্রেণীর শিল্পকলার নিদর্শন। এই দুই মূল মূর্তির কৃত্রিম দাঁড়াইবার ভঙ্গীর সহিত পার্শ্বচারিণীগণের সহজ সাবলীল ভাব বিশেষভাবে তুলনীয়।

বাঘরার বলরাম মূর্তির মুখে শিল্পী একটি স্বাভাব্য ও ব্যক্তিগত বৈশিষ্ট্যের ছাপ দিয়াছেন। ইহার সরল অনাড়ম্বর পশ্চাদ্ভাগে মূল মূর্তি এবং তাহার পার্শ্বচারিণী ও বাহনের মূর্তি কয়টির সৌন্দর্য্য উজ্জ্বল হইয়া ফুটিয়াছে। ছাতিনগ্রামের সরস্বতী মূর্তির অঙ্গসৌষ্ঠব, বসিবার ভঙ্গী ও অপূর্ব মুখশ্রী, এবং তাহার পারিপার্শ্বিক মূর্তি ও বিভূষণাদি উচ্চশ্রেণীর শিল্পের পরিচায়ক। নাগইল ও বিক্রমপুরে প্রাপ্ত দুইটি গরুড়মূর্তিতে শিল্পী যে দাশ্য ও ভক্তির মাধুর্য্য প্রকটিত করিয়াছেন তাহা যথেষ্ট কৃতিত্বের পরিচায়ক।

শিবমূর্তির মধ্যে শঙ্করবঁধার নটরাজ শিবের মূর্তি বিশেষভাবে উল্লেখযোগ্য। শিবের তাণ্ডব নৃত্যের সহিত উর্দ্ধমুখ বৃষের উচ্ছ্বসিত নৃত্য শিল্পীর অপূর্ব সৃজনশক্তির পরিচায়ক। নৃত্যের গতিভঙ্গী ও উদ্দামতা এই মূর্তির মধ্য দিয়া অপরূপ রূপ পরিগ্রহ করিয়াছে। গণেশপাড়ার শিবমূর্তির অঙ্গসৌষ্ঠবে, কমনীয় মুখশ্রীতে এবং হস্তধৃত প্রস্ফুটিত পদ্মের স্বাভাবিক আকৃতিতে শিল্পী সূক্ষ্ম সৌন্দর্য্যানুভূতি ও স্বাভাব্যতার পরিচয় দিয়াছেন। বাংলায় চলিত কথায় কার্তিকই সৌন্দর্য্যের আদর্শ। উত্তরবঙ্গে প্রাপ্ত একটি ময়ূরবাহন কার্তিকে শিল্পী এই সৌন্দর্য্যের পরিচয় দিয়াছেন। শেষোক্ত দুইটি মূর্তিতেই অলঙ্কারের বাহুল্য দেখা যায়। শিল্পীর কৌশলে ইহা মূর্তিহ্রয়ের সৌন্দর্য্য বৃদ্ধি করিয়াছে কিন্তু নিকৃষ্ট শিল্পীর হস্তে এইরূপ প্রাচুর্য্যে সৌন্দর্য্যের হানি হয়।

ঈশ্বরীপুরীর গঙ্গামূর্তি বাংলার এই যুগের শিল্পের একটি উৎকৃষ্ট নিদর্শন। ইহার স্বাভাবিক লীলায়িত পদক্ষেপ ও বিশিষ্ট মুখশ্রী, এবং পার্শ্বচর মূর্তি দুইটির সুন্দর সরল দেহভঙ্গী সমগ্র মূর্তিটিকে অপরূপ সুষমা প্রদান করিয়াছে।

খালিকৈরের বৌদ্ধ তারাও এই শ্রেণীর আর একটি সুন্দর মূর্তি। কঠিন পাথরের মধ্য দিয়া রক্তমাংসের দেহের কমনীয়তা ও নমনীয়তা ফুটিয়া উঠিয়াছে। চৌরাকসবার লোকেশ্বর মূর্তিতে বুদ্ধের করুণাভাব অপূর্ব অভিব্যক্তি লাভ করিয়াছে।

## ৩। চিত্র-শিল্প

পালযুগের পূর্বের কোন চিত্র অতাবধি বাংলায় আবিষ্কৃত হয় নাই। কিন্তু খুব প্রাচীনকাল হইতেই যে এদেশে চিত্রাঙ্কনের চর্চা ছিল সে বিষয়ে কোন সন্দেহ নাই। ফাহিয়ান তাম্রলিপ্তির বৌদ্ধ বিহারে অবস্থানকালে বৌদ্ধমূর্তির ছবি আঁকিতেন। সুতরাং তখন তাম্রলিপ্তিতে যে চিত্র-শিল্প পুরাতন ও সুপরিচিত ছিল এরূপ অনুমান করা যাইতে পারে।

সাধারণত মন্দির ও বৌদ্ধবিহার প্রভৃতির প্রাচীরগাত্র চিত্র দ্বারা শোভিত হইত। পরবর্তী কালের শিল্পশাস্ত্রে স্পষ্ট এইরূপ অনুশাসন আছে এবং ভারতের অনেক স্থানে ইহার চিহ্ন এখনও বর্তমান আছে। বাংলার অনেক মন্দির ও বিহারে সম্ভবত বহু চিত্র ছিল, মন্দির ও বিহারের সঙ্গেই তাহা ধ্বংসপ্রাপ্ত হইয়াছে।

একাদশ ও দ্বাদশ শতাব্দে লিখিত কয়েকখানি বৌদ্ধগ্রন্থের পুঁথিতে অঙ্কিত বজ্রযান-তন্ত্রযান মতোক্ত দেবদেবীর ছবি ব্যতীত প্রাচীন বাংলার আর কোন ছবি এপর্যন্ত পাওয়া যায় নাই। ইহার মধ্যে রামপালের রাজত্বের ৩৯শ বর্ষে ও হরিবর্মার ১৯শ বর্ষে লিখিত দুইখানি অষ্টসাহস্রিকা প্রজ্ঞাপারমিতার পুঁথি বাংলার প্রাচীন চিত্রবিদ্যা আলোচনার প্রধান অবলম্বন।

রেখাবিন্যাস ও বর্ণসমাবেশ এই দুয়ের উপরই চিত্র-শিল্পের প্রতিষ্ঠা এবং এ দুয়ের প্রাধান্য অনুসারেই চিত্রের দুইটি প্রধান শ্রেণীবিভাগ কল্পিত হইয়াছে। অঙ্গচিহ্ন ও এলোরার চিত্রশিল্পে এই দুই শ্রেণীরই চিত্র দেখা যায়, এবং পরবর্তী-কালে ভারতের সর্বত্রই ইহার প্রভাব পরিলক্ষিত হয়। পশ্চিম ভারতবর্ষের চিত্রে রেখাবিন্যাসই প্রাধান্য লাভ করিয়াছে, কিন্তু বাংলার চিত্রে বর্ণসমাবেশ ও রেখাবিন্যাস উভয়েরই প্রভাব পূর্ণমাত্রায় বিদ্যমান। পশ্চিমভারতের চিত্রের সহিত তুলনা করিলে ইহাও বুঝা যায় যে বাংলার শিল্পী রেখাবিন্যাসে অধিকতর দক্ষতা দেখাইয়াছেন এবং ইহার সাহায্যে যে সৌন্দর্য্য ও মাধুর্য্যের অবতারণা করিয়াছেন পশ্চিম ভারতের চিত্রে তাহা ছলভ। বাংলার এই চিত্র-শিল্পের প্রভাব আসাম, নেপাল ও ব্রহ্মদেশে বিস্তৃত হইয়াছিল।

পরিকল্পনার দিক দিয়া বাংলার চিত্র ও প্রস্তরে উৎকীর্ণ মূর্তির মধ্যে প্রভেদ বড় বেশী নাই। উভয়েরই বিষয়বস্তু ও রচনা পদ্ধতি, এমন কি ভঙ্গী ও অঙ্গসৌষ্ঠব প্রায় একই প্রকারের। কেন্দ্র স্থলে মূল দেবদেবী, এবং তাহার পার্শ্বে আনুষঙ্গিক মূর্তিগুলি ও কদাচিৎ অলঙ্কাররূপে ব্যবহৃত দৃশ্যাবলী।



কেবল দুই এক স্থলে মূল মূর্তিটি এক পার্শ্বে উপবিষ্ট। এই সব চিত্রে প্রায় এক-অর্ধে কেবল মূল মূর্তিটি এবং অপর অর্ধে অষ্ট সব পারিপার্শ্বিক মূর্তিগুলির সমাবেশ করিয়া মূল মূর্তির প্রাধান্য সূচিত হইয়াছে।

রাজা রামপালের রাজত্বের ৩৯শ বর্ষে লিখিত অষ্টসাহস্রিকা প্রজ্ঞা-পারমিতার পুঁথিখানিতে যে কয়েকটি ছবি আছে তাহা বাংলার চিত্রশিল্পের শ্রেষ্ঠ নিদর্শনরূপে গ্রহণ করা যাইতে পারে। সাধারণ কয়েকটি বর্ণ এবং সুক্ষ্ম রেখাপাতের সাহায্যে শিল্পী এই সমুদয় চিত্রের মধ্যে একটি লীলায়িত মাধুর্য্য ও অনবদ্য সৌন্দর্য্যের সৃষ্টি করিয়া মধ্যযুগের শিল্পজগতে উচ্চস্থান অধিকারের যোগ্যতা অর্জন করিয়াছেন। বাংলার চিত্রশিল্পের নমুনা মুষ্টিমেয় হইলেও, ইহা যে স্বর্ণমুষ্টি তাহা নিঃসন্দেহে বলা যাইতে পারে।

কেবলমাত্র রেখার সাহায্যে চিত্র অঙ্কনে বাংলার শিল্পী কতদূর পারদর্শিতা লাভ করিয়াছিলেন, সুন্দরবনে প্রাপ্ত ডোমনপালের তাম্রশাসনের অপর পৃষ্ঠে উৎকীর্ণ বিষ্ণুর রেখাচিত্র তাহার দৃষ্টান্ত। প্রাচীন বাংলার তাম্রপটে উৎকীর্ণ এইরূপ আরও দুইটি রেখাচিত্র পাওয়া গিয়াছে।

### ৪। বাংলার শিল্পী

বাংলার শিল্পীগণের সম্বন্ধে আমরা বিশেষ কিছুই জানি না। তিব্বতীয় লামা তারনাথ লিখিয়াছেন যে ধীমান ও তাঁহার পুত্র বিৎপালো প্রস্তর ও ধাতুর মূর্তিগঠন এবং চিত্রাঙ্কনে বিশেষ পারদর্শী ছিলেন এবং তাঁহাদের শিষ্য প্রশিষ্যগণ একটি স্বতন্ত্র শিল্পী সম্প্রদায় গঠন করিয়াছিলেন। এই শিল্পীদ্বয়ের নির্মিত কোন মূর্তি বা তাঁহাদের সম্বন্ধে অন্য কোন বিবরণ জানা যায় নাই। কিন্তু বাংলায় যে শিল্পী-সংঘ ছিল বিজয়সেনের দেওপাড়া প্রশস্তিতে তাহার উল্লেখ আছে। ইহার ৩১টি অতিবৃহৎ পংক্তির অক্ষরগুলি যেরূপ সুন্দরভাবে পাথরে উৎকীর্ণ হইয়াছে তাহা উৎকৃষ্ট শিল্প কার্য্য বলিয়া গণ্য করা যায়। যে শিল্পী ইহা উৎকীর্ণ করিয়াছিলেন প্রশস্তির শেষ শ্লোকে তাঁহার পরিচয় আছে। তিনি ধর্ম্মের প্রপৌত্র, মনদাসের পৌত্র, বৃহস্পতির পুত্র, বরেন্দ্রের শিল্পী-গোষ্ঠী-চূড়ামণি রাণক শূলপাণি। ইহা হইতে অনুমিত হয় যে বরেন্দ্রে (এবং সম্ভবত বাংলার অন্যান্য অঞ্চলে) একটি শিল্পী-সংঘ ছিল এবং শূলপাণি এই সংঘের প্রধান ছিলেন। রাণক এই উপাধি হইতে মনে হয় যে তিনি রাজ্যের একজন সম্ভ্রান্ত লোক ছিলেন। কিন্তু ভট্ট ভবদেবের 'প্রায়শ্চিত্ত-প্রকরণ' গ্রন্থ অনুসারে নর্ত্তক,

তক্ষক, চিত্রোপজীবী, শিল্পী, রক্ষোপজীবী, স্বর্ণকার ও কৰ্ম্মকার সমাজে হেয় বলিয়া পরিগণিত হইতেন, এবং কোন ব্রাহ্মণ এই সমুদয় বৃত্তি অবলম্বন করিলে তাঁহাকে প্রায়শ্চিত্ত করিতে হইত। শূলপাণি সম্ভবত বংশানুক্রমে শিল্পীর কার্য্য করিতেন। প্রস্তরে অক্ষর উৎকীর্ণ করাও যে প্রকৃত শিল্পীরই কার্য্য ছিল সিলিমপুরের প্রস্তর লিপির একটি শ্লোকে তাহার উল্লেখ আছে। এই লিপির উপসংহারে উক্ত হইয়াছে যে প্রণয়ী যেমন তন্মনা হইয়া বর্ণবিন্যাসে নিজের প্রণয়িনীর চিত্র অঙ্কিত করেন, শিল্পবিৎ সোমেশ্বর তেমনি এই প্রশস্তি লিখিয়াছিলেন। এই একটি সংক্ষিপ্ত বাক্যে শিল্পের প্রকৃতি ও অন্তর্নিহিত ভাবটি অতি সুন্দর ভাবে ব্যক্ত হইয়াছে। গভীর অনুরাগ ও আসক্তিই যে শিল্পের প্রেরণা তাহা বাংলার শিল্পীগণ জানিতেন। বাংলার শিলালিপি ও তাম্রশাসন হইতে আমরা আরও কয়েকজন এইরূপ শিল্পীর নাম পাই যথা :—

- (১) ভোগটের পৌত্র, সুভটের পুত্র তাতট
- (২-৩) সৎ-সমতট নিবাসী শুভদাসের পুত্র মজ্জদাস, ও তৎপুত্র বিমলদাস
- (৪) সূত্রধার বিষ্ণুভদ্র
- (৫-৬) বিক্রমাদিত্য-পুত্র শিল্পী মহীধর ও তৎপুত্র শিল্পী শশিদেব
- (৭) শিল্পী কর্ণভদ্র
- (৮) শিল্পী তথাগতসর

ইহাদের কয়েকজন স্পষ্টতঃ শিল্পী উপাধিতে ভূষিত হইয়াছেন। মোটের উপর এরূপ অনুমান করা অসঙ্গত হইবে না যে, উল্লিখিত আট জন এবং শূলপাণি ও সোমেশ্বর প্রভৃতি যে কেবল প্রস্তর ও তাম্রপটে অক্ষর উৎকীর্ণ করিতেন তাহা নহে—তাঁহারা উচ্চশ্রেণীর শিল্পী ছিলেন এবং ধাতু ও প্রস্তরের মূর্ত্তি প্রভৃতিও গঠন করিতেন।

প্রস্তর ও ধাতুর মূর্ত্তিনিৰ্ম্মাণ ব্যয়সাপেক্ষ। সুতরাং অর্থশালী লোকই এই সমুদয় প্রতিষ্ঠা করিতেন। শিল্পীগণও এই সম্প্রদায়ের আদেশে এবং শাস্ত্রানুশাসন ও লোকাচারের নির্দেশমত মূর্ত্তি প্রস্তুত করিতেন। ইহাতে তাঁহাদের শিল্পরচনার শক্তি ও স্বাধীনতা যে, অনেক পরিমাণে খর্ব্ব হইত তাহা পূর্বেই বলা হইয়াছে। বিশেষতঃ এই শিল্পীগণ ইহাদের অনুগ্রহে জীবিকা নির্ব্বাহ করিতেন, শিল্পের সৌন্দর্য্যবোধ অপেক্ষা ধর্ম্মনিষ্ঠাই ছিল তাঁহাদের মনে অধিকতর প্রবল; সুতরাং বাংলার এই শিল্পীগণের

পরিস্থিতি প্রকৃত শিল্পের উৎকর্ষের অনুকূল ছিল না। ইহা সত্ত্বেও তাঁহারা যে সূক্ষ্ম সৌন্দর্য্যবোধ ও দক্ষতার পরিচয় দিয়াছেন তাহাতে প্রমাণিত হয় যে তাঁহাদের মধ্যে শিল্পের একটি সহজ ও স্বাভাবিক অনুভূতি ছিল। ধনী ও অভিজাতবর্গের অনুগ্রহে ও পৃষ্ঠপোষকতায় পরিপুষ্ট এই সমুদয় শিল্পীর রচনা সমাজের উচ্চশ্রেণীর মনোরঞ্জন ও প্রয়োজননের অনুকূল হইত। লোকশিল্পের যে দৃষ্টান্ত পাহাড়পুরে পাওয়া যায় পরবর্তী যুগেও হয়ত তাহা ছিল, কিন্তু এযাবৎ তাহার কোন পরিচয় পাওয়া যায় নাই।

## একবিংশ পরিচ্ছেদ

### বাংলার বাহিরে বাঙ্গালী

ভারতবাসীরা পূর্ব্ব এশিয়ায় ও পূর্ব্ব-ভারতীয় দ্বীপপুঞ্জে যে বিপুল বাণিজ্য-ব্যবসায়, বহু সংখ্যক রাজ্য ও উপনিবেশ স্থাপন, এবং হিন্দু সভ্যতার বহুল প্রচার করিয়াছিল, তাহার মধ্যে বাঙ্গালীর কৃতিত্ব কম ছিল না। একরূপ মনে করিবার যথেষ্ট কারণ আছে। স্থলপথে ভারতবর্ষ হইতে ঐ সমুদয় দেশে যাইতে হইলে বঙ্গদেশের মধ্য দিয়াই যাইতে হইত। আর্য্যাবর্ত্ত হইতে যাহারা জলপথে যাইতেন তাঁহারাও তাম্রলিপ্তি বন্দরেই জাহাজে উঠিতেন। এই সমুদয় কারণে এবং বঙ্গদেশের লোকেরা সর্ব্বাপেক্ষা নিকটে থাকায় তাহাদের পক্ষেই একরূপ যাতায়াতের সুবিধা বেশী ছিল।

এই সিদ্ধান্ত কেবল অনুমানমূলক নহে। ইহার প্রমাণস্বরূপ উল্লেখ করা যাইতে পারে যে ব্রহ্মদেশের প্রাচীন শিল্প ও স্থাপত্য যে প্রধানত বাঙ্গালীরই সৃষ্টি, পণ্ডিতেরা তাহা একবাক্যে স্বীকার করেন। প্রাচীন ব্রহ্মদেশের এক অঞ্চল গোড়নামে অভিহিত হইত। মলয় উপদ্বীপের এক শিলালিপি হইতে রক্ত-মুক্তিকাবাসী বুদ্ধগুপ্ত নামক এক মহানাবিকের কথা জানা যায়; পণ্ডিতেরা অনুমান করেন যে এই রক্তমুক্তিকা বা রাজ্যমাটি বাংলায় অবস্থিত ছিল। শৈলেন্দ্রবংশীয় রাজগণের গুরু ছিলেন একজন বাঙ্গালী, এবং যবদ্বীপের ও পার্শ্ববর্তী অগ্ন্যাদ্বীপের বৌদ্ধধর্ম্মের প্রচার ও প্রসারে বাংলার যথেষ্ট প্রভাব দেখিতে পাওয়া যায়। শৈলেন্দ্ররাজগণের সহিত পালসম্রাট দেবপালের যে সৌখ্য ছিল তাহা পূর্ব্বই উল্লিখিত হইয়াছে (৪৪ পৃ)। যবদ্বীপের কতকগুলি মূর্ত্তিতে

উৎকীর্ণ লিপি তৎকালে বাংলা প্রদেশে প্রচলিত অক্ষরে লিখিত। কাশ্মিড়িয়ার একখানি সংস্কৃত লিপিতে প্রাচীন গোড়ীয় রীতির ছাপ এতই স্পষ্ট যে কোন কোন পণ্ডিতের মতে ইহার রচয়িতা হয় বাঙ্গালী ছিলেন, নচেৎ বহুকাল বঙ্গদেশে থাকিয়া তথাকার সাহিত্যে অভিজ্ঞ হইয়াছিলেন। এই সমুদয় আলোচনা করিলে স্পষ্টই বুঝা যায় যে, এশিয়ার পূর্বখণ্ডে ভারতীয় রাজ্য ও সন্ত্যতা বিস্তারে বাঙ্গালীর প্রভাব যথেষ্ট পরিমাণে ছিল।

সিংহল দ্বীপ বাঙ্গালী রাজকুমার বিজয় ও তাহার সঙ্গীগণ জয় করিয়াছিলেন, এই কাহিনী সিংহলদেশীয় গ্রন্থে সবিস্তারে বর্ণিত হইয়াছে, কিন্তু ইহা কতদূর ঐতিহাসিক সত্য তাহা বলা যায় না।

দুর্গম হিমালয় গিরি পার হইয়া বহু বৌদ্ধ আচার্য্য ও পণ্ডিত তিব্বতে গিয়া তথাকার ধর্মসংস্কারে সহায়তা করিয়াছিলেন। তিব্বত দেশীয় গ্রন্থে তাঁহাদের জীবনী ও বিস্তৃত বিবরণ আছে। ইহাদের মধ্যে ষাঁহারা বাঙ্গালী ছিলেন বলিয়া মনে করিবার সঙ্গত কারণ আছে তাঁহাদের কয়েকজনের বিবরণ সংক্ষেপে লিপিবদ্ধ করিতেছি।

অষ্টম শতাব্দে তিব্বতের রাজা খু-অং-ল্দে-ব্ংসান গোড় দেশীয় আচার্য্য শাস্তিরক্ষিতকে তিব্বতে নিমন্ত্রণ করেন। শাস্তিরক্ষিত (অথবা শাস্তুরক্ষিত) নালন্দা মহাবিহারের অধ্যক্ষ ছিলেন। তিনি রাজনিমন্ত্রণে দুইবার তিব্বতে গমন করেন এবং তথাকার বৌদ্ধ ধর্ম সংস্কার করেন। তাঁহার ভগ্নীপতি বৌদ্ধ আচার্য্য পদ্মসম্ভবও রাজনিমন্ত্রণে তিব্বতে গিয়া তাঁহার সাহায্য করেন। তিব্বতের রাজা ইহাদের উপর খুব প্রসন্ন হন। তিনি মগধের ওদন্তপুরী বিহারের অনুকরণে রাজধানী লাসায় ব্ংস-য়া নামক একটি বিহার নির্মাণ করেন এবং শাস্তিরক্ষিতকে ইহার অধ্যক্ষ নিযুক্ত করেন। শাস্তিরক্ষিত ও পদ্মসম্ভব তিব্বতের বিখ্যাত লামা সম্প্রদায়ের প্রবর্তন করেন, এবং অনেক বৌদ্ধ গ্রন্থ তিব্বতীয় ভাষায় অনুবাদ করেন। তাঁহারা তিব্বতীয় ভিক্ষুগণকে বৌদ্ধধর্মের প্রকৃত তথ্যগুলি যথাযথ শিক্ষা দিয়া তাঁহাদিগের দ্বারা দেশের নানা স্থানে ধর্ম প্রচার করান। শাস্তিরক্ষিত ১৩ বৎসর উক্ত অধ্যক্ষের পদে ছিলেন। পরে তাঁহারই পরামর্শে তাঁহার শিষ্য কমলশীলকে তিব্বতের রাজা আমন্ত্রণ করেন। কিন্তু কমলশীল তিব্বতে পৌঁছবার পূর্বেই শাস্তিরক্ষিতের মৃত্যু হয়। ইহার পূর্বেই পদ্মসম্ভব তিব্বত ত্যাগ করিয়া অগ্ন্যাশ্রম দেশে গিয়া বৌদ্ধ ধর্ম প্রচার করেন। কমলশীল তিব্বতে গুরুর আরঙ্গ কার্য সম্পন্ন করেন।

যে সকল বাঙ্গালী বৌদ্ধ আচার্য্য তিব্বতে গিয়াছিলেন তাঁহাদের মধ্যে

দীপঙ্কর ত্রীজ্ঞান সমধিক প্রসিদ্ধ। ইনি অতীশ নামেও সুপরিচিত এবং এখনও তিব্বতে তাঁহার স্মৃতি পূজিত হয়। তিব্বতীয় গ্রন্থে তাঁহার জীবনী সম্বন্ধে অনেক তথ্য লিপিবদ্ধ আছে। আমরা সংক্ষেপে তাহার বিবরণ দিতেছি।

বঙ্গল (বাংলা) দেশে বিক্রমণিপুরে গোড়ের রাজবংশে ৯৮০ অব্দে দীপঙ্করের জন্ম হয়। বাল্যকালে তাঁহার নাম ছিল চন্দ্রগর্ভ। তাঁহার পিতার নাম কল্যাণত্মী এবং মাতার নাম প্রভাবতী। তিনি প্রথমে জেতারি ও পরে রাহুলগুপ্তের নিকট নানা বিদ্যা অধ্যয়ন করেন। উনিশ বৎসর বয়সে তিনি ওদন্তপুরী বিহারে বৌদ্ধ সঙ্ঘের আচার্য্য শীলরক্ষিতের নিকট দীক্ষা গ্রহণ করেন এবং গুরু তাঁহাকে দীপঙ্কর ত্রীজ্ঞান এই নাম দেন। বারো বৎসর পরে তিনি বৌদ্ধ ভিক্ষু বলিয়া গৃহীত হইলেন। এই সময় সুবর্ণদ্বীপের প্রধান ধর্ম্মাচার্য্য চন্দ্রকীর্ত্তি বৌদ্ধজগতে বিশেষ প্রসিদ্ধ ছিলেন। তাঁহার নিকট শিক্ষা লাভ করিবার মানসে দীপঙ্কর একখানি বাণিজ্য জাহাজে কয়েক মাস সমুদ্র যাত্রা করিয়া সুবর্ণদ্বীপে উপস্থিত হন। সেখানে বারো বৎসর অধ্যয়ন করিয়া দীপঙ্কর সিংহল ভ্রমণ করিয়া মগধে গমন করেন। রাজা মহীপাল তাঁহাকে বিক্রমশীল বিহারে নিমন্ত্রণ করেন, এবং রাজা নয়পাল তাঁহাকে ইহার প্রধান আচার্য্য পদে নিযুক্ত করেন। এই সময় তিব্বতের রাজা য়ে-শেষ-হোড বৌদ্ধ ধর্ম্ম সংস্কার করিবার জন্ত ভারতবর্ষ হইতে কয়েকজন আচার্য্য নিয়া যাইবার জন্ত দুইজন রাজকর্ম্মচারী প্রেরণ করেন। ইহারা নানা দেশ ঘুরিয়া বিক্রমশীল বিহারে উপস্থিত হইলেন এবং ক্রমে জানিতে পারিলেন যে, দীপঙ্করই মগধের বৌদ্ধ আচার্য্যদের মধ্যে সর্ব্বশ্রেষ্ঠ। কিন্তু তিনি তিব্বতে যাইতে রাজী হইবেন না জানিয়া, তাঁহারা তিব্বতে ফিরিয়া গিয়া রাজার নিকট সমুদয় নিবেদন করিলেন। রাজা য়ে-শেষ-হোড দীপঙ্করকে নিমন্ত্রণ করিবার জন্ত মূল্যবান উপঢৌকন সহ কয়েকটি দূত পাঠাইলেন। দূতমূখে তিব্বতের রাজার প্রস্তাব শুনিয়া দীপঙ্কর যাইতে অস্বীকার করিয়া বলিলেন যে তাঁহার স্বর্ণের কোন প্রয়োজন নাই এবং খ্যাতি প্রতিপত্তির জন্তও তিনি লালায়িত নহেন। রাজদূতগণ তিব্বতে প্রত্যাগমন করিবার অল্পকাল পরেই রাজা য়ে-শেষ-হোড এক সীমাস্ত রাজার হস্তে বন্দী হইলেন। শত্রু-কারাগারে তাঁহার মৃত্যুর অব্যবহিত পূর্বে তিনি দীপঙ্করকে তিব্বতে যাইবার জন্ত পুনরায় কল্পণ মিনতি জানাইয়া এক পত্র লেখেন। তিব্বতের নূতন রাজা চ্যান-চুব এই পত্র সহ কয়েকজন রাজদূত দীপঙ্করের নিকট প্রেরণ করেন। দীপঙ্কর ধর্ম্মপ্রাণ রাজার শোচনীয় মৃত্যুতে ব্যথিত হইয়া তাঁহার অন্তিম অনুরোধ পালন পূর্ব্বক তিব্বত-গমনে স্বীকৃত হইলেন।

নেপালের মধ্য দিয়া তিব্বতের সীমান্তে পৌঁছিলে রাজার সৈন্যদল তাঁহাকে অভ্যর্থনা করিল। মানস সরোবরে এক সপ্তাহ কাটাইয়া তিনি সদলবলে থোলিং মঠে উপস্থিত হইলেন। তথা হইতে রাজধানীতে পৌঁছিলে রাজা স্বয়ং মহাসমারোহে তাঁহাকে অভ্যর্থনা করিলেন। অতঃপর তিব্বতের নানা স্থানে ভ্রমণ করিয়া তিনি বিস্তুদ্ধ মহাযান ধর্ম প্রচার করেন এবং তথাকার বৌদ্ধধর্মের সংস্কার করেন। তিনি তের বৎসর তিব্বতে থাকিয়া প্রায় দুইশতখানি বৌদ্ধগ্রন্থ রচনা করেন। ১০৫৩ অব্দে ৭৩ বৎসর বয়সে তিব্বতেই তাঁহার মৃত্যু হয়।

কেবল বিদেশে নহে, ভারতবর্ষের অন্তর্গত প্রদেশেও অনেক বাঙ্গালী জ্ঞানবীর ও কর্মবীর যথেষ্ট কৃতিত্ব অর্জন করিয়াছেন। বাংলার বাহিরে নালন্দা ও বিক্রমশীল এই দুই প্রসিদ্ধ বৌদ্ধ বিহারে অনেক বাঙ্গালী আচার্য্য খ্যাতি লাভ করিয়াছেন ও সর্বাধ্যক্ষের পদ অলঙ্কৃত করিয়াছেন। চীন দেশীয় পরিব্রাজক হুয়েন সাং যখন নালন্দায় যান তখন বাংলার ব্রাহ্মণ-রাজবংশীয় শীলভদ্র এই মহাবিহারের প্রধান আচার্য্য ও অধ্যক্ষ ছিলেন। হুয়েন সাংয়ের বিবরণ হইতে শীলভদ্রের জীবনী সম্বন্ধে অনেক কথা জানিতে পারা যায়। শীলভদ্র ভারতের নানা স্থানে ঘুরিয়া বৌদ্ধধর্ম শিক্ষা লাভ করেন। তিনি নালন্দায় ভিক্ষুগণের ধর্মপালের শিষ্যত্ব গ্রহণ করেন এবং তাঁহার নিকট দীক্ষা লাভ করেন। তাঁহার পাণ্ডিত্যের খ্যাতি দূরদেশেও বিস্তৃত হইয়াছিল। এই সময় দাক্ষিণাত্যের একজন ব্রাহ্মণ পণ্ডিত মগধে আসিয়া ধর্মপালকে তর্কযুদ্ধে আহ্বান করেন। শীলভদ্রের বয়স তখন মাত্র ৩০ বৎসর, কিন্তু ধর্মপাল তাঁহাকেই ব্রাহ্মণের সাহিত তর্ক করিতে আদেশ দিলেন। শীলভদ্র ব্রাহ্মণকে পরাজিত করিলেন। মগধের রাজা ইহাতে সন্তুষ্ট হইয়া শীলভদ্রকে একটি নগরের রাজস্ব উপহার দিলেন। ভিক্ষুর ধনলোভ উচিত নহে—এই যুক্তি দেখাইয়া শীলভদ্র প্রথমে ইহা প্রত্যাখ্যান করিলেন, কিন্তু রাজার সনির্বন্ধ অনুরোধ এড়াইতে না পারিয়া তিনি এই দান গ্রহণ করিলেন এবং ইহার দ্বারা একটি বৌদ্ধ বিহার প্রতিষ্ঠা করিলেন। ক্রমক্রমে শীলভদ্র নালন্দা মহাবিহারের প্রধান আচার্য্য পদ লাভ করিলেন। হুয়েন সাং ৬৩৭ অব্দে নালন্দায় গমন করেন। তখন এখানে ছাত্র সংখ্যা ছিল দশ হাজার এবং বৌদ্ধগণের আঠারটি সম্প্রদায়ের বিভিন্ন ধর্মশাস্ত্র ব্যতীত বেদ, হেতুবিজ্ঞা, শব্দবিজ্ঞা, চিকিৎসাবিজ্ঞা, ও সাংখ্য প্রভৃতি এখানে অধ্যীত হইত। হুয়েন সাং বলেন যে এক শীলভদ্রই একা এই সমস্ত বিজ্ঞায় পারদর্শী ছিলেন, এবং সংঘবাসিগণ তাঁহার প্রতি অশ্রদ্ধা বশত তাঁহার নাম উচ্চারণ না করিয়া তাঁহাকে

‘ধর্মনিধি’ বলিয়া অভিহিত করিতেন। ছয়েনসাং চীনদেশ হইতে আসিয়াছেন শুনিয়া শীলভদ্র তাঁহাকে সাদরে শিষ্যরূপে গ্রহণ করেন এবং যোগশাস্ত্র শিক্ষা দেন। আ ৬২৪ অব্দে শীলভদ্রের মৃত্যু হয়।

শীলভদ্র ব্যতীত আরও দুইজন বাঙ্গালী—শাস্তিরক্ষিত ও চন্দ্রগোমিন্—নালন্দার আচার্য্যপদ লাভ করিয়াছিলেন। শাস্তিরক্ষিতের কথা পূর্বেই বলা হইয়াছে। চন্দ্রগোমিন্ বরেন্দ্রে এক ক্ষত্রিয়বংশে জন্মগ্রহণ করেন। তিনি সাহিত্য, ব্যাকরণ, ন্যায়, জ্যোতিষ, আয়ুর্বেদ, সঙ্গীত ও অশ্বাশ্ব শিল্পকলায় বিশেষ বাৎপন্ন ছিলেন এবং আচার্য্য অশোকের নিকট বৌদ্ধধর্মের দীক্ষা লাভ করেন। তিনি প্রথমে দাক্ষিণাত্য ও সিংহল দ্বীপে বাস করেন এবং চান্দ্র-ব্যাকরণ নামে একখানি ব্যাকরণগ্রন্থ রচনা করেন। তিনি নালন্দায় গমন করিলে প্রথমে তথাকার আচার্য্যগণ তাঁহার প্রতি বিশেষ শ্রদ্ধা প্রকাশ করেন নাই। কিন্তু নালন্দার প্রধান আচার্য্য চন্দ্রকীর্ত্তি তাঁহার পাণ্ডিত্যে মুগ্ধ হন। তিনি নালন্দায় একটি শোভাযাত্রার ব্যবস্থা করেন। ইহার সম্মুখভাগে তিনখানি রথ ছিল। ইহার একখানিতে চন্দ্রগোমিন্, আর একখানিতে মঞ্জুশ্রীর মূর্ত্তি, এবং তৃতীয় খানিতে স্বয়ং চন্দ্রকীর্ত্তি ছিলেন। ইহার পর হইতে নালন্দায় চন্দ্রগোমিনের খ্যাতি ও প্রতিপত্তি বাড়িয়া যায় এবং যোগাচার মতবাদ সম্বন্ধে বিচার-বিতর্ক করিয়া তিনি বিশেষ প্রসিদ্ধি লাভ করেন।

নালন্দার ন্যায় বিক্রমশীল বিহারেও অনেক বাঙ্গালী আচার্য্য ছিলেন। দীপঙ্করের কথা পূর্বেই বলা হইয়াছে। অভয়াকরগুপ্ত এই মহাবিহারের সর্বাধ্যক্ষের পদ লাভ করিয়াছিলেন এবং তিনি এখনও তিব্বতে একজন পণ্ডেন-রিণ্‌পোছে অর্থাৎ রাজগুণালঙ্কৃত লামারূপে পূজিত হন। গোড় নগরীর নিকটে তাঁহার জন্ম হয় এবং তিনি বৌদ্ধ পণ্ডিতরূপে খ্যাতিলাভ করেন। তিনি প্রথমে রামপালের রাজপ্রাসাদে বৌদ্ধ আচার্য্য নিযুক্ত হন এবং ওদন্তপুরী বিহারের মহাযান সম্প্রদায়ের নেতৃত্ব লাভ করেন। কালক্রমে তিনি বিক্রমশীল মহাবিহারের প্রধান আচার্য্য পদে নিযুক্ত হন। ঐ বিহারে তখন তিন হাজার ভিক্ষু বাস করিতেন। তিনি তিব্বতে গিয়াছিলেন কিনা সঠিক বলা যায় না, কিন্তু বহু গ্রন্থ তিব্বতীয় ভাষায় অনুবাদ করিয়াছিলেন। রামপালের রাজ্যাবসানের পূর্বেই তাঁহার মৃত্যু হয়। তাঁহার সম্বন্ধে অনেক গল্প প্রচলিত আছে। তিনি দিবসের প্রথম দুইভাগে শাস্ত্র-গ্রন্থ রচনা করিতেন, তৃতীয় ভাগে ধর্মব্যাখ্যা করিতেন এবং তারপর দ্বিপ্রহর রাজি পর্য্যন্ত হিমবন শ্রমশানে দেবার্চনা করিয়া শয়ন করিতেন। সুখবতী নগরীর বহু ক্ষুধিত

শিক্ককে তিনি অন্নদান করেন। চরসিংহ নগরের এক চণ্ডাল রাজা একশত নর-বলি দিবার সংকল্প করেন, কিন্তু তাঁহার অমুরোধে প্রতিনিবৃত্ত হন। একবার একদল 'তুরুক' ভারতবর্ষ আক্রমণ করিলে তিনি কয়েকটি ধর্ম্মানুষ্ঠান করেন এবং তাহার ফলে তুরুকেরা ভারতবর্ষ ছাড়িয়া যাইতে বাধ্য হয়। অবশ্য এই গল্পগুলি কতদূর সত্য বলা কঠিন।

তিব্বতীয় লামা তারনাথ জেতারি-নামক আর একজন বাঙ্গালী আচার্য্যের কিছু বিবরণ দিয়াছেন। জেতারির পিতা ব্রাহ্মণ আচার্য্য গর্ভপাদ বরেন্দ্রের রাজা সনাতনের গুরু ছিলেন। বরেন্দ্রেই জেতারির জন্ম হয়। অল্প বয়সেই জ্ঞাতিগণ কর্তৃক বিতাড়িত হইয়া জেতারি বৌদ্ধধর্ম্ম গ্রহণ করেন, এবং বৌদ্ধশাস্ত্রে, বিশেষত অভিশ্রুপিটকে, বিশেষ ব্যুৎপত্তি লাভ করেন। রাজা মহাপাল (মহীপাল ?) তাঁহাকে বিক্রমশীল বিহারের পণ্ডিত—এই গৌরবময় পদসূচক একখানি মানপত্র দান করেন। তিনি বহুদিন এই বিহারের আচার্য্য ছিলেন এবং তাঁহার দুই ছাত্র রত্নাকরশাস্ত্রী ও দীপঙ্কর শ্রীজ্ঞান পরে এই মহা-বিহারের সর্ব্বাধ্যক্ষ পদ লাভ করিয়াছিলেন। তারনাথের মতে তিনি একশত গ্রন্থ রচনা করেন। ইহার অনেকগুলিই তিব্বতীয় ভাষায় অনূদিত হইয়াছিল।

দীপঙ্করের আর একজন অধ্যাপক জ্ঞানশ্রীও বাঙ্গালী ছিলেন। তিনি বিক্রমশীল মহাবিহারের দ্বারপণ্ডিত ছিলেন। কাশ্মীরে জ্ঞানশ্রীভদ্র নামে এক বৌদ্ধ আচার্য্যের খ্যাতি আছে, তিনি ও এই জ্ঞানশ্রী সম্ভবত একই ব্যক্তি। তিনি বহু গ্রন্থ লিখিয়াছেন এবং তিব্বতীয় ভাষায় ইহার অনেকের অনুবাদ হইয়াছিল।

বৌদ্ধ আচার্য্য ব্যতীত বাংলার অনেক শৈব গুরুও বাংলার বাহিরে প্রসিদ্ধি লাভ করিয়াছিলেন। দক্ষিণরাঢ়া নিবাসী উমাপতিদেব (অপর নাম জ্ঞানশিব-দেব) চোলদেশে বসবাস করেন এবং স্বামিদেবর এই নামে পরিচিত হইয়া রাজা প্রজা উভয়েরই শ্রদ্ধা ও সম্মানভাজন হন। এই সময়ে চোলরাজ দ্বিতীয় রাজা-ধিরাজের (১১৬৩-১১৯০) একজন সামন্তরাজা সিংহলদেশীয় সৈন্যের আক্রমণে ভীত হইয়া উমাপতিদেবের শরণাপন্ন হন। উমাপতিদেব ২৮ দিন শিবের আরাধনা করেন এবং তাহার ফলে সিংহলীয় সৈন্য চোলরাজ্য ত্যাগ করিয়া পলাইয়া যায়। কৃতজ্ঞ সামন্তরাজা উমাপতিদেবকে একখানি গ্রাম দান করেন এবং উমাপতি ইহার রাজস্ব তাঁহার আত্মীয়দের মধ্যে ভাগ করিয়া দেন।

জব্বলপুরের নিকটবর্তী প্রাচীন ডাহলমণ্ডলে গোলকীর্মঠ নামে এক



বিখ্যাত শৈব প্রতিষ্ঠান ছিল। কলচুরিরাজ প্রথম যুবরাজ ( আ ৯২৫ অব্দ ) এই মঠের অধ্যক্ষকে তিন লক্ষ গ্রাম দান করেন। ইহার আয় হইতে মঠের ব্যয় নির্বাহ হইত। বাঙ্গালী বিংশশতাব্দীতে ত্রয়োদশ শতাব্দীর মধ্যভাগে এই মঠের অধ্যক্ষপদ লাভ করেন। দক্ষিণ রাঢ়ার অন্তর্গত পূর্বগ্রামে তাঁহার জন্ম হয়। বেদে অগাধ পাণ্ডিত্য হেতু তিনি বিশেষ প্রসিদ্ধি লাভ করিয়াছিলেন। চোল ও মালবরাজ তাঁহার শিষ্য ছিলেন এবং কাকতীয়রাজ গণপতি ও ত্রিপুরীর কলচুরিরাজ তাঁহার নিকট দীক্ষাগ্রহণ করিয়াছিলেন। তিনি মন্ত্রশিষ্য রাজা গণপতির রাজ্যে বাস করিতেন। গণপতি এবং তাঁহার কন্যা ও উত্তরাধিকারিণী রুদ্ৰাঙ্গা তাঁহাকে দুইখানি গ্রাম দান করেন। বিংশশতাব্দীতে এই দুইখানি গ্রাম একত্র করিয়া বিংশেশ্বর-গোলকৌ নামে অভিহিত করেন এবং তথায় মন্দির, মঠ, বিদ্যালয়, অন্নসত্র, মাতৃ-শালা ও আরোগ্যশালা প্রতিষ্ঠা করেন। তিনি এই গ্রামে ৬০টি ব্রাহ্মণ পরিবার বসতি করান এবং তাঁহাদের ভরণপোষণের জন্য উপযুক্ত ভূমি দান করেন। অবশিষ্ট ভূমি তিনভাগে বিভক্ত করা হয়। একভাগ শিবমন্দির, আর একভাগ বিদ্যালয় ও শৈবমঠ, এবং তৃতীয় ভাগ অবশিষ্ট প্রতিষ্ঠানগুলির ব্যয় নির্বাহের জন্য নির্দিষ্ট হয়। বিদ্যালয়ের জন্য আটজন অধ্যাপক নিযুক্ত হন। তিনজন ঋক্, যজু ও সাম এই তিন বেদ পড়াইতেন, আর বাকী পাঁচজন সাহিত্য, গ্রন্থ ও আগম শাস্ত্রের অধ্যাপনা করিতেন। অন্যান্য প্রতিষ্ঠানগুলির জন্যও যথোচিত কর্মচারী ও সেবক প্রভৃতি নিযুক্ত হয়। গ্রামের লোকের জন্য একঘর করিয়া স্বর্ণকার, কপ্পকার, শিলা-কার, সূত্রধর, কুম্ভকার, স্থপতি, নাপিত প্রভৃতি স্থাপিত করা হয়। বিংশেশ্বরশত্ৰু জন্মভূমি পূর্বগ্রাম হইতে কয়েকজন ব্রাহ্মণ আনায়ে গ্রামের আয় ব্যয় পরীক্ষা ও হিসাবরক্ষকের কার্যে নিযুক্ত করেন। গ্রামের বিবিধ প্রতিষ্ঠান-গুলি যাহাতে ভবিষ্যতে উপযুক্তরূপে পরিচালিত হয় তাহার জন্য তিনি অনেক বিধিব্যবস্থা করেন। বিংশেশ্বরশত্ৰু আরও বহু সংকার্যের অনুষ্ঠান করেন এবং বিভিন্ন স্থানে মঠ, মন্দির ও শিবলিঙ্গ প্রতিষ্ঠা করিয়া তাহার ব্যয় নির্বাহের জন্য উপযুক্ত জমি দান করেন। বিংশেশ্বর নামে তিনি একটি নগরী স্থাপন করেন। শিলালিপিতে এই সময়ের যে সবিস্তার উল্লেখ আছে তাহা পাঠ করিলে প্রাচীন যুগের বাঙ্গালীর জীবনযাত্রা, সমাজের প্রতি কর্তব্য এবং ধর্মসংস্কার প্রভৃতির আদর্শ আমাদের নিকট উজ্জ্বল হইয়া ওঠে।

বাঙ্গালী বৎস-ভার্গব গোত্রীয় ব্রাহ্মণ বসাবণ হরিয়ান ( পঞ্জাবের হিস্‌সার জিলার অন্তর্গত হরিয়ান ) প্রদেশের সিংহপল্লী গ্রামে বসতি স্থাপন করেন।

তাঁহার জ্যেষ্ঠপুত্র ঈশানশিব সংসার ত্যাগ করিয়া বোদাম যুতের ( যুক্তপ্রদেশের বদাউন ) শৈব মঠে বাস করেন। কালক্রমে তিনি এই মঠের অধ্যক্ষ হন এবং একটি শিবমন্দির প্রতিষ্ঠা করেন। গোড়দেশীয় অবিস্মারক কৃষ্ণগিরি পাহাড়ে ( বঙ্গের অন্তর্গত কাহেরি ) ভিক্ষুদের বসবাসের জন্য একটি গুহা খনন করান। তিনি ৮৫৩ অব্দে একশত দ্রুম্য দান করেন। এই গচ্ছিত অর্থের সুদ হতে উক্ত গুহা-বিহারবাসী ভিক্ষুগণকে বস্ত্র দিবার ব্যবস্থা করা হয়।

কয়েকজন বাঙ্গালী পাণ্ডিত্য ও কবিত্বের জন্য বাংলার বাহিরে বিশেষ খ্যাতি অর্জন করিয়াছিলেন। শক্তিস্বামী নামে একজন বাঙ্গালী কাশ্মীররাজ ললিতাদিত্যের মন্ত্রী ছিলেন। তাঁহার পুত্র কল্যাণস্বামী যাজ্ঞবল্ক্যের তুল্য বলিয়া কথিত হইয়াছেন। কল্যাণস্বামীর পৌত্র জয়স্তু একজন কবি ও বাগ্মী ছিলেন এবং বেদ বেদাঙ্গাদি শাস্ত্রে পারদর্শী ছিলেন। অনেকে মনে করেন যে তিনি ও ‘নায়মঞ্জরী’ প্রণেতা জয়স্তুভট্ট একই ব্যক্তি। এই জয়স্তুের পুত্র অভিনন্দ কাদম্বরী-কথাসার গ্রন্থ রচনা করেন। ইহাতে বাণভট্ট প্রণীত কাদম্বরীর সারমর্ম কবিতায় বর্ণিত হইয়াছে। ভট্টকোশল গ্রাম নিবাসী বাঙ্গালী লক্ষ্মীধর একজন সুপরিচিত কবি ছিলেন। তিনি মালবে গমন করেন এবং পরমাররাজ ভোজের ( ১০০০-১০৪৫ ) সভা অলঙ্কৃত করেন। তিনি চক্রপাণি-বিজয় নামক একখানি কাব্য প্রণয়ন করেন। দক্ষিণ রাঢ়ার অন্তর্গত নবগ্রাম-নিবাসী হলায়ুধও মালবে বাসস্থাপন করেন। তাঁহার রচিত ৬৫টি শ্লোক মাক্কাভা ( প্রাচীন মাদ্রাসতী ? ) নগরের এক মন্দির গাত্রে উৎকীর্ণ হয় ( ১০৬৩ অব্দ )। মদন নামে আর একজন বিখ্যাত বাঙ্গালী কবি বাল্যকালে মালবে গিয়া তাঁহার কবিত্ব শক্তির জন্য বাল-সরস্বতী উপাধি প্রাপ্ত হন এবং পরমাররাজ অর্জুন-বর্মার (১২১০-১২১৮) গুরুপদে অধিষ্ঠিত হন। তিনি ‘পারিজাতমঞ্জরী’ নামক কাব্য রচনা করেন। চন্দেলরাজ পরমর্দির সভায় বাঙ্গালী গদাধর ও তাঁহার দুই পুত্র দেবধর ও ধর্মধর এই তিনজন কবি বাঁস করিতেন। রামচন্দ্র কবিভারতী নামে আর একজন বাঙ্গালী সুদূর সিংহলদ্বীপে প্রতিপত্তি লাভ করেন। বীরবতী গ্রামে তাঁহার জন্ম হয় এবং অল্পবয়সেই তিনি তর্ক, ব্যাকরণ, শ্রুতি, স্মৃতি, মহাকাব্য, আগম, অলঙ্কার, ছন্দ, জ্যোতিষ ও নাটক প্রভৃতিতে পারদর্শী হন। রাজা দ্বিতীয় পরাক্রমবাহুর রাজ্যকালে ( ১২২৫-৬০ ) তিনি সিংহলে গমন করিয়া বৌদ্ধ আচার্য্য রাহুলের শিষ্যত্ব গ্রহণ ও বৌদ্ধধর্মে দীক্ষা লাভ করেন। রাজা পরাক্রমবাহু তাঁহাকে বৌদ্ধাগমচক্রবর্তী

এই সম্মানজনক উপাধিতে ভূষিত করেন। রামচন্দ্র ভক্তিশতক, বৃন্দমালা ও বৃন্দরত্নাকর-পঞ্জিকা এই তিনখানি গ্রন্থ রচনা করেন। শেষোক্ত গ্রন্থের রচনাকাল ১২৪৫ অব্দ।

গোড়দেশীয় করণ-কায়স্থগণ সংস্কৃত ভাষায় জ্ঞান ও লিপি-কুশলতার জন্য আর্য্যাবর্ষের সর্বত্র বিখ্যাত ছিলেন ও প্রাচীন লিপি উৎকীর্ণ করিবার জন্য নিযুক্ত হইতেন। চন্দেল্ল, চাহমান ও কলচুরি রাজগণের অনেক লিপি ইহাদের দ্বারা উৎকীর্ণ হইয়াছে। এতদ্বিহীন বিহার ও যুক্তপ্রদেশের কয়েকখানি লিপির লেখকও বাঙালী ছিলেন।

এতক্ষণ আমরা কেবল ধর্ম্মাচার্য্য, কবি ও পণ্ডিত সম্বন্ধে আলোচনা করিয়াছি। কিন্তু ক্ষত্রিয়োচিত কার্য্যেও অনেক বাঙালী বাংলার বাহিরে প্রসিদ্ধি লাভ করিয়াছেন। গদাধর বরেন্দ্রের অন্তর্গত তড়া গ্রামে জন্মগ্রহণ করেন এবং রাষ্ট্রকূটরাজ তৃতীয় কৃষ্ণ (৯৩৯-৯৬৭) ও খোড়িগের অধীনে পার্শ্বিক-তপোবন নামক ভূখণ্ডের অধিপতি হন। মাজাজ প্রদেশের অন্তর্গত বেলারী জিলার কোলগল্লুগ্রামে তাঁহার রাজধানী ছিল। তিনি এই স্থানে একটি মঠ প্রতিষ্ঠা করিয়া ব্রহ্মা, বিষ্ণু, শিব, পার্শ্বতী, পার্শ্বিক, গণেশ ও সূর্য্য প্রভৃতি দেবদেবীর মূর্ত্তি স্থাপন এবং কূপ তড়াগাদি খনন করেন। একখানি প্রস্তর লিপিতে তিনি গোড়-চুড়ামণি, বরেন্দ্রীর ছোটকারী এবং মুনি ও দুর্ভিক্ষমল্ল (দুর্ভিক্ষের দমনকারী) বলিয়া অভিহিত হইয়াছেন। ১১৯১ অব্দে উৎকীর্ণ একখানি লিপিতে গোড়বংশীয় রাজা অনেকমল্লের উল্লেখ আছে। তিনি গাঢ়ওয়াল অঞ্চলে রাজত্ব করিতেন এবং কেরারভূমি ও তল্লিকটবর্গী প্রদেশ জয় করেন। সপ্তম শতাব্দীতে শক্তি নামক ভরদ্বাজ বংশীয় একজন বাঙালী ব্রাহ্মণ দর্বাভিসারের অধিপতি হন। এই স্থান পঞ্জাবের চন্দ্রভাগা ও বিতস্তা নদীর মধ্যস্থলে পার্শ্বত্যা অঞ্চলে অবস্থিত। তাঁহার পৌত্র শক্তিস্বামী কান্দীর-রাজ ললিতাদিত্য মুক্তাপীড়ের মন্ত্রী হইয়াছিলেন। বাঙালী লক্ষ্মীধরের পুত্র গদাধর চন্দেল্লরাজ পরমর্দীর (১১৬৭-১২০২) সাক্ষিবিগ্রহিক পদ লাভ করিয়াছিলেন। লক্ষ্মীধর ন'মে আর একজন বাঙালী ও তাঁহার বংশধরগণ সাত পুরুষ যাবৎ চন্দেল্লরাজগণের অধীনে কর্ম্ম করেন। ইহার মধ্যে তিনজন—যশঃপাল, গোকুল ও জগদ্ধর—রাজমন্ত্রীর পদ লাভ করিয়াছিলেন। দেড়শত বৎসরের অধিক কাল (আ ১১০০-১২৫০) এই বাঙালী পরিবার চন্দেল্ল রাজ্যে উচ্চ রাজকার্য্যে নিযুক্ত থাকিয়া বাঙালীর শাসন কার্য্যে দক্ষতার পরিচয় দিয়াছেন। পঞ্চম শতাব্দীর একখানি লিপি হইতে জানা যায় যে 'গৌর' দেশের এক ক্ষত্রিয় রাজপুত্রানার

উদয়পুরে একটি রাজ্য স্থাপন করেন। এই গৌর সম্ভবত গোড় দেশ এবং এই রাজপরিবার সম্ভবত বাঙ্গালী ছিলেন।

চাহমানরাজ তৃতীয় পৃথীরাজের নাম ইতিহাসে সুপরিচিত। মুহম্মদ ঘোরীকে প্রথম যুদ্ধে পরাজিত করিয়া পরে দ্বিতীয় যুদ্ধে কিরূপে তিনি পরাজিত ও নিহত হন মুসলমান ঐতিহাসিকগণ তাহা সবিস্তারে বর্ণনা করিয়াছেন। কিন্তু হম্মীর-মহাকাব্যে এই যুদ্ধের অন্য রকম বিবরণ পাওয়া যায় এবং এই প্রসঙ্গে উদয়রাজ নামক একজন বাঙ্গালী বীরের কীর্তি উজ্জল বর্ণে চিত্রিত হইয়াছে। উদয়রাজ পৃথীরাজের সেনাপতি ছিলেন। পৃথীরাজ ঘোরীর সহিত বহুযুদ্ধে জয়লাভ করেন। কিন্তু একবার ঘোরী পৃথীরাজের রাজ্য আক্রমণ করিয়া দিল্লী অধিকার করেন। পৃথীরাজ উদয়রাজকে সসৈন্যে অগ্রসর হইতে আদেশ করিয়া নিজে অল্প সৈন্য লইয়া শত্রুর সহিত যুদ্ধে প্রবৃত্ত হন এবং পরাজিত ও বন্দী হন। উদয়রাজ সসৈন্যে উপস্থিত হইলে ঘোরী তাহার সহিত যুদ্ধ না করিয়া বন্দী পৃথীরাজসহ দিল্লীর দুর্গে আশ্রয় গ্রহণ করেন। গোড়বীর প্রভুর পরাজয়েও হতাশ না হইয়া দিল্লী আক্রমণ করেন এবং একমাসকাল যুদ্ধ করেন। ঘোরীর অমাত্যগণ উদয়রাজের পরাক্রমে ভীত হইয়া শাস্তি স্থাপনের নিমিত্ত পৃথীরাজকে মুক্তি দিবার পরামর্শ দিলেন। ঘোরী তাহা না শুনিয়া পৃথীরাজকে বধ করিলেন। প্রভুর মৃত্যু সংবাদ শুনিয়া উদয়রাজ দিল্লী অধিকার করিবার জন্য প্রাণপণে শেষ চেষ্টা করিয়া মৃত্যুমুখে পতিত হইলেন। হম্মীর-মহাকাব্যের এই কাহিনী কতদূর বিশ্বাসযোগ্য বলা কঠিন, কিন্তু উদয়রাজের বীরত্বকাহিনী একবারে নিছক কল্পনা এরূপ অনুমান করাও সম্ভব নহে। হিন্দুযুগের অবসানে একজন গোড়ীয় বীর সুদূর পশ্চিমে তুর্কসেনার সহিত সংগ্রামে আত্মবিসর্জন করিয়া প্রভুভক্তির চরম প্রমাণ দিয়াছিল, বিদেশীয় কবির এই কল্পনাও বাঙ্গালীর পক্ষে কম শ্লাঘার বিষয় নহে।

বাংলার বাহিরে বাঙ্গালী কিরূপ খ্যাতি ও প্রতিপত্তি অর্জন করিয়াছিল তাহার যে কয়েকটি মাত্র দৃষ্টান্ত আমরা বিশ্বস্তসূত্রে জানিতে পারিয়াছি তাহাই লিপিবদ্ধ হইল। কালসমুদ্রে এইরূপ আরও কত বিস্ময়কর কাহিনী ও কীর্তিগাথা বিলীন হইয়াছে কে বলিতে পারে? পঞ্জাবের পার্বত্য অঞ্চলে অবস্থিত সুরকোট, কেওস্থল, কাষ্টওয়ার ও মণ্ডী এই কয়টি রাজ্যের রাজগণ বাংলার গোড়-রাজবংশ-সম্ভূত, এইরূপ একটি বদ্ধমূল সংস্কার দীর্ঘকাল যাবৎ এই অঞ্চলে প্রচলিত আছে। কাষ্টওয়ার রাজ্যের প্রতিষ্ঠাতা কাহনপাল সম্বন্ধে প্রচলিত জনশ্রুতি এই যে তিনি গোড়ের রাজবংশে জন্মগ্রহণ করেন এবং

কতিপয় অনুচরসহ উক্ত পার্শ্বত্যা অঞ্চলে গমন করিয়া একটি রাজ্য স্থাপন করেন। পালবংশীয় সম্রাটগণ এই প্রদেশে আধিপত্য বিস্তার করিয়াছিলেন, এবং পরবর্ত্তীকালে তাঁহাদের বংশীয় কেহ এখানে ক্ষুদ্র ক্ষুদ্র রাজ্যের প্রতিষ্ঠা করিয়া থাকিতে পারেন। সুতরাং পূর্বোক্ত জনশ্রুতি একেবারে অমূলক বা অসম্ভব বলিয়া উড়াইয়া দেওয়া যায় না। তবে বিশ্বস্ত প্রমাণ না পাইলে ইহা ঐতিহাসিক সত্য বলিয়াও গ্রহণ করা যায় না।

## দ্বাবিংশ পরিচ্ছেদ

### বাংলার ইতিহাস ও বাঙ্গালীজাতি

প্রকৃত ইতিহাস বলিতে আমরা যাহা বুঝি প্রাচীন বাংলার সেক্ষপ ইতিহাস লেখার সময় এখনও আসে নাই। কখনও আসিবে কিনা তাহাও বলা যায় না। আমাদের দেশে এই যুগে লিখিত কোন ঐতিহাসিক গ্রন্থ নাই। সুতরাং প্রাচীন লিপি, মুদ্রা ও অতীতের অন্যান্য স্মৃতি চিহ্নই এই ইতিহাস রচনার প্রধান উপকরণ। এ পর্য্যন্ত যে সমুদয় উপকরণ আবিষ্কৃত হইয়াছে তাহার সাহায্যে যতদূর সম্ভব পুরাতন ঐতিহাসিক কাহিনী বিবৃত করিয়াছি। কিন্তু ইহা বাংলার ইতিহাস নহে, তাহার কঙ্কালমাত্র। ভূগর্ভে নিহিত অগ্ন্যাঙ্ক প্রাচীন লিপি, মুদ্রা প্রভৃতি, অথবা রামচরিতের স্থায়ী গ্রন্থ বহু সংখ্যায় আবিষ্কৃত হইলে হয়ত এই ইতিহাসের কঙ্কালে রক্তমাংসের যোজনা করিয়া ইহাকে সুগঠিত আকার প্রদান করা সম্ভবপর হইবে। কিন্তু তাহা কতদিনে হইবে, অথবা একেবারে হইবে কিনা, তাহা কেহ বলিতে পারে না।

আজ বাংলার ইতিহাসের উপকরণ পরিমাণে মুষ্টিমেয়। কিন্তু মুষ্টি হইলেও ইহা ধূলিমুষ্টি নহে, স্বর্ণমুষ্টি। ইহার সাহায্যে আমরা বাঙ্গালীর রাজনৈতিক, সামাজিক, অর্থনৈতিক ও ধর্মজীবনের প্রকৃতি, গতি ও ক্রম-বিবর্তন জানিতে পারি না, এমন কি তাহার সম্বন্ধে স্পষ্ট ধারণাও করিতে পারি না, একথা সত্য। কিন্তু তথাপি এই সমুদয় সম্বন্ধে যে ক্ষীণ আভাস বা ইঙ্গিত পাই তাহার মূল্য খুবই বেশি। আমাদের দেশের প্রাচীন ইতিহাস সম্বন্ধে আমাদের অজ্ঞতা যে কত গভীর ছিল, এবং গত একশত বৎসরে এ বিষয়ে আমাদের জ্ঞান কতদূর অগ্রসর হইয়াছে, ঐমুহূর্ত্তে বিদ্যালঙ্কার প্রণীত

রাজাবলী গ্রন্থের সহিত এই ইতিহাসের তুলনা করিলেই তাহা বুঝা যাইবে। ঊনবিংশ শতাব্দীর প্রারম্ভে কতকগুলি নিছক গল্প ও অলৌক কাহিনীই ইতিহাস নামে প্রচলিত ছিল। বাঙ্গালীর অতীত কীর্তি বিশ্ব্বতির নিবিড় অন্ধকারে ডুবিয়া গিয়াছিল।

আজ ইতিহাসের একটু টুকরা মাত্র আমরা জানি। কিন্তু হীরার টুকরার মতই ইহার ভাস্বর দীপ্তি অতীতের অন্ধকার উজ্জ্বল করিয়াছে। বিজয়সিংহের কাল্পনিক সিংহল বিজয় কাহিনীই বাঙ্গালীর সাহস ও বীরত্বের একমাত্র নিদর্শন বলিয়া এতদিন গণ্য ছিল। আজ আমরা জানিতে পারিয়াছি যে বাঙ্গালীর বাহুবল সত্য সত্যই একদিন তাহার গর্বের বিষয় ছিল। বাঙ্গালী শশাঙ্ক কান্যকুব্জ হইতে কালঙ্গ পর্য্যন্ত বিজয়াভিযান করিয়া যে সাম্রাজ্যের ভিত্তি প্রতিষ্ঠা করিয়াছিলেন, বাঙ্গালী ধর্ম্মপাল ও দেবপাল তাহার পরিকল্পনা সম্পূর্ণ করিয়া সুদূর পঞ্চনদ অবধি বাহুবলে বাঙ্গালীর রাজশক্তি দৃঢ়ভাবে প্রতিষ্ঠা করিয়াছিলেন। ক্ষীণদেহ বাঙ্গালী ধর্ম্মপাল কান্যকুব্জের রাজসভায় সম্রাটের আসনে বসিতেন আর সমগ্র আর্য্যাবর্ত্তের রাজন্যবৃন্দ প্রণত হইয়া তাহার অভিষেক করিতেন। গঙ্গাতীরে মোর্ঘ্যসম্রাট অশোকের কীর্ত্তিপুত্র পাটলিপুত্র নগরীর রাজসভায় পাল সম্রাটগণের আদেশানুবর্ত্তী হইয়া ভারতের দূর দূরান্তর প্রদেশ হইতে আগত সামন্ত রাজন্যবর্গ বহুমূল্য উপঢৌকন সহ নম্রশিরে দণ্ডায়মান হইয়া পাল সম্রাটের প্রতীক্ষা করিতেন। ইহা স্বপ্ন নহে, সত্য ঘটনা। আজ বাঙ্গালী ভীকু দুর্বল বলিয়া খ্যাত, ভারতের সামরিক শক্তিশালী জাতির পংক্তি হইতে বাদ—কিন্তু আমাদের অতীত ইতিহাস মুক্তকণ্ঠে ইহার বিরুদ্ধে সাক্ষ্য দিতেছে।

মানসিক ও আধ্যাত্মিক শক্তিতেও বাঙ্গালী বলীয়ান ছিল। ভারতবর্ষের অন্যান্য প্রদেশ হইতে বিতাড়িত বৌদ্ধধর্ম্ম বাঙ্গালীর রাজ্যেই শেষ আশ্রয় লাভ করিয়া চারিশত বৎসর টিকিয়াছিল। এই সুদীর্ঘকাল বাঙ্গালী বৌদ্ধজগতের গুরুস্থানীয় ছিল। উত্তরে দুর্গম হিমগিরি পার হইয়া তিব্বতে তাহারা ধর্ম্মের নূতন আলো বিকীর্ণ করিয়াছিল। দক্ষিণে ছল্লজ্যা জলধির পরপারে সুদূর সুবর্ণদ্বীপ পর্য্যন্ত বাঙ্গালী রাজার দীক্ষাগুরুপদে অভিষিক্ত হইয়াছিল। জগদ্বিখ্যাত নালন্দা ও বিক্রমশীল বিহার বাংলার বাহিরে অবস্থিত হইলেও চারিশত বৎসর পর্য্যন্ত বাঙ্গালীর রাজশক্তি, মনীষা ও ধর্ম্মভাবের দ্বারাই পরিপুষ্ট হইয়াছিল।

বাণিজ্য সম্পদে একদিন বাঙ্গালী ঐশ্বর্য্যশালী ছিল। তাম্রলিপ্তি হইতে

তাহার বাণিজ্যপোত সমুদ্র পার হইয়া দূর দূরান্তরে যাইত। বাংলার সুলভ-শিল্প সমুদয় জগতে প্রসিদ্ধি লাভ করিয়াছিল।

সংস্কৃত সাহিত্যেও বাঙ্গালীর দান অকিঞ্চিৎকর নহে। জয়দেবের কোমল কান্ত পদাবলী সংস্কৃত সাহিত্যের বৃকে কোমল মণির ন্যায় চিরকাল বিরাজ করিবে। যতদিন সংস্কৃত ভাষা ও সাহিত্যের চর্চা থাকিবে ততদিন গোড়ী রীতি এবং বল্লালসেন, হলায়ুধ, ভবদেবভট্ট, সর্বানন্দ, চন্দ্রগোমিন, গোড়পাদ, ত্রীধরভট্ট, চক্রপাণিদত্ত, জীমূতবাহন, অভিনন্দ, সঙ্ঘ্যাকরনন্দী, ধোয়ী, গোবর্দ্ধনাচার্য্য ও উমাপতিধর প্রভৃতির রচনা সমগ্র ভারতে আদৃত হইবে। বাংলার সিদ্ধাচার্য্যগণের মূল গ্রন্থগুলি যদি কখনও আবিস্কৃত হয় তবে বাঙ্গালীর প্রতিভার নূতন এক দিক উদ্ভাসিত হইবে।

শিল্পজগতে মধ্যযুগে বাঙ্গালীর স্থান অতিশয় উচ্চে। ভারতের প্রাচীন শিল্পকলা যখন ধীরে ধীরে লোপ পাইতেছিল, যখন লাবণ্য ও সুসমার পরিবর্তে প্রাণহীন ধর্মভাবের ব্যঞ্জনাই শিল্পের আদর্শ হইয়া উঠিয়াছিল তখন বাঙ্গালী শিল্পীই মূর্ত্তিগঠনে ও চিত্রকলায় প্রাচীন চারুশিল্পের কমনীয়তা ও সৌন্দর্য্য ফুটাইয়া তুলিতে সমর্থ হইয়াছিলেন। সোমপুরে বাঙ্গালী যে বিহার ও মন্দির নির্মাণ করিয়াছিল সমগ্র ভারতে তাহার তুলনা মিলে না। বাংলার স্থপতি-শিল্প ও ভাস্কর্য্য সমগ্র পূর্ব্ব এশিয়ায় প্রভাব বিস্তার করিয়াছে।

এইরূপে যে দিকে দৃষ্টিপাত করা যায়, প্রাচীন যুগের বাঙ্গালীর কীর্ত্তি ও মহিমা আমাদের নয়নসম্মুখে উদ্ভাসিত হইয়া ওঠে। আমাদের ধারাবাহিক ইতিহাস না থাকিলেও ইতস্তত বিক্ষিপ্ত কয়েকটি বিবরণ হইতে সেকালের যে পরিচয় পাওয়া যায় বাঙ্গালীমাত্রেই তাহাতে গৌরব বোধ করার যথেষ্ট কারণ আছে। এই স্বল্প পরিচয়টুকু দিবার জন্তই এই গ্রন্থের আয়োজন। হয়ত ইহার ফলে বাঙ্গালীর মনে অতীত ইতিহাস জানিবার প্রবৃত্তি জন্মিবে এবং সমবেত চেষ্টার ফলে পূর্ণাঙ্গ ইতিহাস লেখা সম্ভবপর হইবে।

আমরা এই গ্রন্থে বাঙ্গালী এই সাধারণ সংজ্ঞা ব্যবহার করিয়াছি। কিন্তু যে যুগের কাহিনী এই ইতিহাসে লিপিবদ্ধ হইয়াছে, সে যুগের বাঙ্গালী আর আজিকার বাঙ্গালী ঠিক একই অর্থ সূচিত করে না। যে ভূখণ্ড আজ বঙ্গদেশ বলিয়া পরিচিত, প্রাচীন যুগে তাহার বিশিষ্ট কোন একটি নাম ছিল না এবং তাহার ভিন্ন ভিন্ন অংশ ভিন্ন ভিন্ন নামে অভিহিত হইত একথা গ্রন্থারম্ভেই বলিয়াছি। আজ যে ছয় কোটি বাঙ্গালী একটি বিশিষ্ট জাতিতে পরিণত হইয়াছে, ইহার মূলে আছে ভাষার ঐক্য এবং দীর্ঘকাল একই দেশে এক

শাসনাধীনে বসবাস। ধর্ম ও সমাজগত গুরুতর প্রভেদ সত্ত্বেও এই দুই কারণে ভারতের অন্যান্য প্রদেশের অধিবাসী হইতে পৃথক হইয়া বাঙ্গালী একটি বিশিষ্ট জাতি বলিয়া পরিগণিত হইয়াছে। যে প্রাচীন যুগের কথা আমরা আলোচনা করিয়াছি, সে যুগে বাংলায় এমন একটি স্বতন্ত্র বিশিষ্ট প্রাদেশিক ভাষা গড়িয়া ওঠে নাই যাহা সাহিত্যের বাহনরূপে গণ্য হইতে পারে—সুতরাং তখন সারা বাংলায় প্রচলিত ভাষা মোটামুটি এক এবং অন্যান্য প্রদেশের ভাষা হইতে পৃথক হইলেও তাহা জাতীয়তা গঠনের বিশেষ সহায়তা করিয়াছিল এরূপ মনে হয় না। সমগ্র বাংলা পাল ও সেন রাজগণের রাজ্যকালে তিন চারিশত বৎসর যাবৎ মোটামুটি একই শাসনের অধীনে থাকিলেও কখনও এক দেশ বলিয়া বিবেচিত হয় নাই। হিন্দুযুগের শেষ পর্য্যন্ত গোড় ও বঙ্গ দুইটি পৃথক দেশ সূচিত করিত। ইহার প্রত্যেকটিরই সীমা ক্রমশ ব্যাপক হইতে হইতে সমগ্র বাংলাদেশ তাহার অন্তর্ভুক্ত হইয়াছিল—কিন্তু হিন্দুযুগের অবসানের পূর্বে তাহা হয় নাই। তখন পর্য্যন্ত সমগ্র বাংলা দেশের কোন একটি ভৌগোলিক সংজ্ঞা গড়িয়া ওঠে নাই। কঠোর জাতিভেদ প্রথা তখন ব্রাহ্মণ ও অন্যান্য জাতির মধ্যে একটি সুদৃঢ় ব্যবধানের সৃষ্টি করিয়াছিল, এবং বাংলার ব্রাহ্মণ সম্ভবত বাংলার অন্য জাতির অপেক্ষা ভারতের অন্যান্য প্রদেশস্থ ব্রাহ্মণের সহিত অধিকতর ঘনিষ্ঠ সম্বন্ধে সম্বন্ধ ছিল। এই সমুদয় কারণে মনে হয় যে হিন্দুযুগে বাঙ্গালী অর্থাৎ সমগ্র বাংলা দেশের অধিবাসী একটি বিশিষ্ট জাতিতে পরিণত হয় নাই।

কিন্তু তখন গোড়-বঙ্গের অধিবাসীরা যে দ্রুতগতিতে এক জাতিতে পরিণত হইবার দিকে অগ্রসর হইতেছিল তাহাতে সন্দেহ নাই। দীর্ঘকাল এক রাজ্যের অধীনে এবং পরস্পরের পাশাপাশি বাস করিবার ফলে তাহাদের সম্বন্ধ ক্রমশই ঘনিষ্ঠ হইয়া উঠিতেছিল এবং তাহারা ভারতের অন্যান্য প্রদেশ হইতে পৃথক হইয়া কতকগুলি বিষয়ে বিশিষ্ট স্বাতন্ত্র্য অবলম্বন করিতেছিল। দৃষ্টান্ত স্বরূপ তাহাদের মৎস্য মাংস ভোজন, কোনপ্রকার শিরোভূষণের অব্যবহার, তান্ত্রিক মত ও শক্তি পূজার প্রাধান্য, প্রাচীন বঙ্গ ভাষা ও লিপির উৎপত্তি এবং শিল্পের বৈশিষ্ট্য প্রভৃতির উল্লেখ করা যাইতে পারে। এ সমুদয়ই তাহাদিগকে নিকটবর্তী অন্যান্য প্রদেশের অধিবাসী হইতে পৃথক করিয়া একটি বৈশিষ্ট্য দান করিয়াছিল। এই বৈশিষ্ট্যের ফলেই হিন্দুযুগের অবসানের অনতিকাল পরেই তাহারা একটি জাতিতে পরিণত হইয়াছিল, এবং ক্রমে তাহাদের এক নাম ও সংজ্ঞার সৃষ্টি হইয়াছিল। বিদেশীয় তুরুস্কারাজগণ



তাহার বাণিজ্যপোত সমুদ্র পার হইয়া দূর দূরান্তরে যাইত। বাংলার সুলভবস্ত্র-শিল্প সমুদয় জগতে প্রসিদ্ধি লাভ করিয়াছিল।

সংস্কৃত সাহিত্যেও বাঙ্গালীর দান অকিঞ্চিৎকর নহে। জয়দেবের কোমল কান্ত পদাবলী সংস্কৃত সাহিত্যের বৃকে কৌস্তুভ মণির ন্যায় চিরকাল বিরাজ করিবে। যতদিন সংস্কৃত ভাষা ও সাহিত্যের চর্চা থাকিবে ততদিন গোড়ী রীতি এবং বল্লালসেন, হলায়ুধ, ভবদেবভট্ট, সর্বানন্দ, চন্দ্রগোমিন, গোড়পাদ, জীধরভট্ট, চক্রপাণিদত্ত, জীমূতবাহন, অভিনন্দ, সঙ্ঘ্যাকরনন্দী, ধোয়ী, গোবর্দ্ধনাচার্য্য ও উমাপতিধর প্রভৃতির রচনা সমগ্র ভারতে আদৃত হইবে। বাংলার সিদ্ধাচার্য্যগণের মূল গ্রন্থগুলি যদি কখনও আবিস্কৃত হয় তবে বাঙ্গালীর প্রতিভার নূতন এক দিক উদ্ভাসিত হইবে।

শিল্পজগতে মধ্যযুগে বাঙ্গালীর স্থান অতিশয় উচ্চে। ভারতের প্রাচীন শিল্পকলা যখন ধীরে ধীরে লোপ পাইতেছিল, যখন লাবণ্য ও সুসমার পরিবর্তে প্রাণহীন ধর্ম্মভাবের ব্যঞ্জনাই শিল্পের আদর্শ হইয়া উঠিয়াছিল তখন বাঙ্গালী শিল্পীই মুক্তিগঠনে ও চিত্রকলায় প্রাচীন চারুশিল্পের কমনীয়তা ও সৌন্দর্য্য ফুটাইয়া তুলিতে সমর্থ হইয়াছিলেন। সোমপুরে বাঙ্গালী যে বিহার ও মন্দির নির্মাণ করিয়াছিল সমগ্র ভারতে তাহার তুলনা মিলে না। বাংলার স্থপতি-শিল্প ও ভাস্কর্য্য সমগ্র পূর্ব্ব এশিয়ায় প্রভাব বিস্তার করিয়াছে।

এইরূপে যে দিকে দৃষ্টিপাত করা যায়, প্রাচীন যুগের বাঙ্গালীর কীর্ত্তি ও মহিমা আমাদের নয়নসম্মুখে উদ্ভাসিত হইয়া ওঠে। আমাদের ধারাবাহিক ইতিহাস না থাকিলেও ইতস্তত বিক্ষিপ্ত কয়েকটি বিবরণ হইতে সেকালের যে পরিচয় পাওয়া যায় বাঙ্গালীমাত্রেই তাহাতে গৌরব বোধ করার যথেষ্ট কারণ আছে। এই স্বল্প পরিচয়টুকু দিবার জন্তই এই গ্রন্থের আয়োজন। হয়ত ইহার ফলে বাঙ্গালীর মনে অতীত ইতিহাস জানিবার প্রবৃত্তি জন্মিবে এবং সমবেত চেষ্টার ফলে পূর্ণাঙ্গ ইতিহাস লেখা সম্ভবপর হইবে।

আমরা এই গ্রন্থে বাঙ্গালী এই সাধারণ সংজ্ঞা ব্যবহার করিয়াছি। কিন্তু যে যুগের কাহিনী এই ইতিহাসে লিপিবদ্ধ হইয়াছে, সে যুগের বাঙ্গালী আর আজিকার বাঙ্গালী ঠিক একই অর্থ সূচিত করে না। যে ভূখণ্ড আজ বঙ্গদেশ বলিয়া পরিচিত, প্রাচীন যুগে তাহার বিশিষ্ট কোন একটি নাম ছিল না এবং তাহার ভিন্ন ভিন্ন অংশ ভিন্ন ভিন্ন নামে অভিহিত হইত একথা গ্রন্থারম্ভেই বলিয়াছি। আজ যে ছয় কোটি বাঙ্গালী একটি বিশিষ্ট জাতিতে পরিণত হইয়াছে, ইহার মূলে আছে ভাষার ঐক্য এবং দীর্ঘকাল একই দেশে এক

শাসনাধীনে বসবাস। ধর্ম ও সমাজগত গুরুতর প্রভেদ সত্ত্বেও এই দুই কারণে ভারতের অন্যান্য প্রদেশের অধিবাসী হইতে পৃথক হইয়া বাঙ্গালী একটি বিশিষ্ট জাতি বলিয়া পরিগণিত হইয়াছে। যে প্রাচীন যুগের কথা আমরা আলোচনা করিয়াছি, সে যুগে বাংলায় এমন একটি স্বতন্ত্র বিশিষ্ট প্রাদেশিক ভাষা গড়িয়া ওঠে নাই যাহা সাহিত্যের বাহনরূপে গণ্য হইতে পারে—সুতরাং তখন সারা বাংলায় প্রচলিত ভাষা মোটামুটি এক এবং অন্যান্য প্রদেশের ভাষা হইতে পৃথক হইলেও তাহা জাতীয়তা গঠনের বিশেষ সহায়তা করিয়াছিল এরূপ মনে হয় না। সমগ্র বাংলা পাল ও সেন রাজগণের রাজ্যকালে তিন চারিশত বৎসর যাবৎ মোটামুটি একই শাসনের অধীনে থাকিলেও কখনও এক দেশ বলিয়া বিবেচিত হয় নাই। হিন্দুযুগের শেষ পর্য্যন্ত গোড় ও বঙ্গ দুইটি পৃথক দেশ সূচিত করিত। ইহার প্রত্যেকটিরই সীমা ক্রমশ ব্যাপক হইতে হইতে সমগ্র বাংলাদেশ তাহার অন্তর্ভুক্ত হইয়াছিল—কিন্তু হিন্দুযুগের অবসানের পূর্বে তাহা হয় নাই। তখন পর্য্যন্ত সমগ্র বাংলা দেশের কোন একটি ভৌগোলিক সংজ্ঞা গড়িয়া ওঠে নাই। কঠোর জাতিভেদ প্রথা তখন ব্রাহ্মণ ও অন্যান্য জাতির মধ্যে একটি সুদৃঢ় ব্যবধানের সৃষ্টি করিয়াছিল, এবং বাংলার ব্রাহ্মণ সম্ভবত বাংলার অন্য জাতির অপেক্ষা ভারতের অন্যান্য প্রদেশস্থ ব্রাহ্মণের সহিত অধিকতর ঘনিষ্ঠ সম্বন্ধে সম্বন্ধ ছিল। এই সমুদয় কারণে মনে হয় যে হিন্দুযুগে বাঙ্গালী অর্থাৎ সমগ্র বাংলা দেশের অধিবাসী একটি বিশিষ্ট জাতিতে পরিণত হয় নাই।

কিন্তু গোড়-বঙ্গের অধিবাসীরা যে ক্রমগতিতে এক জাতিতে পরিণত হইবার দিকে অগ্রসর হইতেছিল তাহাতে সন্দেহ নাই। দীর্ঘকাল এক রাজ্যের অধীনে এবং পরস্পরের পাশাপাশি বাস করিবার ফলে তাহাদের সম্বন্ধ ক্রমশই ঘনিষ্ঠ হইয়া উঠিতেছিল এবং তাহারা ভারতের অন্যান্য প্রদেশ হইতে পৃথক হইয়া কতকগুলি বিষয়ে বিশিষ্ট স্বাভাব্য অবলম্বন করিতেছিল। দৃষ্টান্ত স্বরূপ তাহাদের মৎস্য মাংস ভোজন, কোনপ্রকার শিরোভূষণের অব্যবহার, তান্ত্রিক মত ও শক্তি পূজার প্রাধান্য, প্রাচীন বঙ্গ ভাষা ও লিপির উৎপত্তি এবং শিল্পের বৈশিষ্ট্য প্রভৃতির উল্লেখ করা যাইতে পারে। এ সমুদয়ই তাহাদিগকে নিকটবর্তী অন্যান্য প্রদেশের অধিবাসী হইতে পৃথক করিয়া একটি বৈশিষ্ট্য দান করিয়াছিল। এই বৈশিষ্ট্যের ফলেই হিন্দুযুগের অবসানের অনতিকাল পরেই তাহারা একটি জাতিতে পরিণত হইয়াছিল, এবং ক্রমে তাহাদের এক নাম ও সংজ্ঞার সৃষ্টি হইয়াছিল। বিদেশীয় তুর্কস্বরাজগণ

তাহাদের এই জাতীয় বৈশিষ্ট্য লক্ষ্য করিয়া তাহাদিগকে একই নামে অভিহিত করেন। ইহারই ফলে গোড়া ও বঙ্গালদেশ মুসলমানযুগে সমগ্র বাংলা দেশের নামস্বরূপ ব্যবহৃত হয় এবং 'গোড়ীয়' ও 'বঙ্গালী' সমগ্র দেশবাসীর পক্ষে প্রযোজ্য এই দুইটি জাতীয় নামের সৃষ্টি হয়। ইহাই বঙ্গালী জাতির উৎপত্তির সংক্ষিপ্ত ইতিহাস।

---

# নির্দেশিকা

অঙ্গ ১২, ১৫  
 অতীশ ৫৯, ২১৬  
 অতুনা ১২৯  
 অতুতলাগির ৮১-৮৩, ৯৯, ১০০, ১২৫  
 অনন্তবর্ষী চোড়গঙ্গ ৬৬, ৬৯  
 অনর্থরাযব ৮  
 অনিরুদ্ধ ( ব্রহ্মরাজ ) ১০৫  
 অনিরুদ্ধ ভট্ট ৮২, ১২১, ১২৫, ১৭৫  
 অনৈক্য ২২২  
 অবিন্যাস ২২১  
 অভয়াকর গুপ্ত ১২৩, ২১৮  
 অভিধান চিন্তামণি ৬  
 অভিনব ৪৫, ১১৯, ২২১  
 অমোঘবর্ষ ৪৯  
 অম্বষ্ঠ-বৈজ্ঞ ১১৭  
 অলংসিধু ১০৫  
 অষ্টিক ১০  
 অষ্টো-এসিরাটিক ১০  
 আইন-ই-আকবরী ২  
 আচ ৭৯  
 আচার্য ১২  
 আত্রেরী ৪, ৭  
 আকঙ্ক খান ২৬  
 আধ্যাত্মগ্রন্থমূলক ৬, ২৭-২৯, ১৫১  
 আলেকজান্ডার ১৬-১৮  
 আসরফপুর ১৯৪  
 ইংসিং ১৯, ১১৬, ১৫২  
 ইন্দ্রদ্রুমপাল ৭১  
 ঈশান ১২৫  
 ঈশানদেব ১০৪  
 ঈশানবর্ষী ২২  
 ঈশ্বরদোষ ৬০  
 উড়িষ্যা ৪২, ৬৬  
 উৎকল ৮, ২৩, ২৯  
 উদয়ন ১২১

উদয়রাজ ২২৩  
 উদয়হুন্দরী কথা ৩৭, ৪৫  
 উজ্জ্বল কেশরী ৬০  
 উপবঙ্গ ৬  
 উমাপতিদেব ২১৯  
 উমাপতি ধর ৮৫, ৮৬, ১২৭  
 ঐতরেয় আরণ্যক ৯  
 ঐতরেয়-ব্রাহ্মণ ৯  
 গুপ্তপুত্র ৪০, ১১৮  
 কঙ্কাল ২৯  
 কন্জিথ ১০৫  
 কপিণী ( নদী ) ৬  
 কমলানীল ২১৫  
 কয়ল-কায়ল ১৭৬  
 করতোয়া ৪, ৫  
 করতোয়া মাহাত্ম্য ৪  
 কর্ণ ১৫, ১৭  
 কর্ণ ( কলচুরিরাজ ) ৫৯, ৭২  
 কর্ণ ৮৮ ২১০  
 ১৭৫ ৮, ১২১, ১১, ১৯  
 কর্ণ ট ৬৭  
 কর্ণট ১৫  
 কর্ণাস্ত ৩১  
 কলচুরি ৫১, ৫৯, ৭২  
 কলিঙ্গ ১২, ১৫  
 কল্যাণবাসী ২২১  
 কল্লণ ৩০  
 কাণুপা ১২৪  
 কাঙ্ক্ষদেব ৫২, ৫৩  
 কাস্তকুল ৮  
 কাম-মহোৎসব ১৮১  
 কাষোজ ৪৩, ৫১, ১৯২  
 কাষোজ জাতি ৫২  
 কালিদাস ১১২  
 কালীগঙ্গা ৪

কাশ সেন ৯৬	গদাধর ২২১, ২২২
কাটিয়াস ২২৩	গাঙ্গেশ্বর ৫৭, ৭৩
কাহ্নপাল ২২৩	গাহড়বাল ৬৭, ৭০, ৮০, ৮৪, ৮৫
কিরাত ১৫	গুরবমিশ্র ৪১, ৪৮, ১১৮
কোন্ডিল শা ৪	গুজর ৩৫, ৪৩
কোন্ডিবর্মান ২২	গোকর্ণ ৩৫, ৩৬
কুকুরপাদ ১২৪	গোকুল ২২২
কুমারচন্দ্র ১২৩	গোকুলেশ্বর ১০৪
কুমারদেবী ৬৭	গোপচন্দ্র ২১
কুমারপাল ৬৯, ৯৯	গোপাল (১ম) ৩৩, ৩৪, ৯৮
কুমারবজ্র ১২৩	গোপাল (২য়) ৫০, ৯৯
কুমাণ ১৮	গোপাল (৩য়) ৬৯, ৯৯
কুক ( দ্বিতীয় ) ৫০	গোপীচাঁদ ১২৪, ১২৯
কুকপাদ ১২৪, ১৩০	গোবর্দ্ধন ( রাজা ) ৭০, ৭২
কেওমুল ২২৩	গোবর্দ্ধন ( কবি ) ৮৬, ১২৭
কেদার ৩৫	গোবিন্দচন্দ্র ৩২
কেদারমিশ্র ৪১, ১১৮	গোবিন্দ, তৃতীয় ( রাষ্ট্রকূটরাজ ) ৩৭
কেশব দেব ১০৪	গোবিন্দচন্দ্র ( বাংলার রাজা ) ৫৪, ৫৬, ৫৭, ১২০
কেশবসেন ৯৪, ৯৫, ১০০, ১০৩, ১০৪, ১০৬	গোবিন্দচন্দ্র ( গাহড়বাল রাজা ) ৬৭
কৈবর্তজাতি ১৭৮	গোবিন্দপাল ৭০, ৮২, ৮৪, ৯৯, ১০১
কোকিল ৪৯	গোরক্ষনাথ ১২৪, ১২৯, ১৩০
কোন্ডোদ ২৩, ২৯	গোড় ১-৩, ৭, ৮, ২২, ২৯-৩১, ৯৭
কোটালিপাড়া ৫	গোড়পাশ ১১৭, ১১৮
কোটিং ১০৮	গোড়বহো ৩০, ৩২
কোল ৯	গোরগোবিন্দ ১০৪, ১০৫
কোটিলীয় অর্থশাস্ত্র ৭	চক্রপাণিদত্ত ১২০
কৌশিকী ৫	চক্রাযুধ ৩৭
ক্রীপুর ২০	চক্রকৌশিক ৫৭
ক্রমেশ্বর ১১৯	চতাল ৯
খড়গবংশ ৩১	চতুর্ভূজ ১১৮
খড়গোত্তম ৩১	চন্দ্ররাজ্য ৫১
খরবাণ ১০৪	চন্দ্র ২০
খ্রী-স্বং-লুং-বৎসান ৪৫, ২১৫	চন্দ্রকীর্তি ২১৬, ২১৮
খল্লিউই ১৬-১৮, ১০৭	চন্দ্রগুপ্ত ১৮-২০
খল্লানদী ৩, ৫	চন্দ্রগোবিন্দ ১১৭, ১১৮, ২১৮
খল্ল ১৮	চন্দ্রদেব ৬৭
খল্লাম ২৩	চন্দ্রদীপ ৬, ৫৩
খল্লপতি ২২০	চন্দ্রবর্ষ কোট ১৯

চন্দ্রবর্মা ১১, ১৩৭

চন্দ্রসেন ৯৫

চন্দ্রা ৮

চর্যাপদ ১২৮-১৩০, ১৭২

জগদ্ধর ২২২

জয়দেব ৩১, ৮৬, ১২৬-১২৮

জয়নাগ ২৯

জয়ন্ত ৩০, ৩১, ২২১

জয়পাল ৪১, ৪৭

জয়সেন ৯৫, ৯৬

জয়সীদ ৩০, ৩১

জয়সিংহ ১৫

জাতিখড়া ৩১

জাতিবর্মা ৬৩, ৭২, ৭৪, ৭৫

জালন্ধরিপাদ ১২৯, ১৩০

জিতেন্দ্র ১২১

জিনেন্দ্রবুদ্ধি ১২০

জীমুতবাহন ১২১, ১৮৩

জ্যোতি ১২২, ২১৯

জ্ঞানশিবদেব ২১৯

জ্ঞানশ্রী ২১৯

জ্ঞানশ্রীমিত্র ১২৩

জ্যোতিবর্মা ৭৪

টলেমী ১৮

টোডরম

ডাকার্ণব ১২৯

ডোম ৯

ডোম্বনপাল ৮৬, ৯৬

ঢেকুরী ৬০

ভাগ্যভসুর ২১৩

ভবকাই-ই-নাদিরী ৮৩, ৮৭

ভবলুক ৩, ৭

ভাণ্ডা ৩

ভাতট ২১৩

ভাস্কর ১, ৩, ৭, ১৫, ২৯, ২১৪

ভারনাথ ৩২, ৩৩, ৪০, ৫৩, ৯৬, ২১৯

ভিম্মদেব ৬৯

ভিত্তা ( জিনোভা ) ৪, ৫

ভূজ ৫০

ভেঙ্গুর ১২৯

ভেলিগাটি ৩

ত্রিভুবনপাল ৪১

ত্রৈলোক্যচন্দ্র ৫৩

বগুভুক্তি ৭, ২৩

বমুজমাধব ১০৪

বমুজার ১০৪

বসন্তবিস্ম ৩৪

বর্ডপালি ৪১, ১১৮,

বশরথদেব ১০৩, ১০৪

বানান ৫

বানানীল ১২৩

বানানাগর ৮, ৮২, ৯৯, ১২৫

বানোদরদেব ১০২, ১০৩, ১০৬

বিশ্বজয় প্রকাশ ৬

বিবাকর চন্দ্র ১২৩

বিশ্ব ১০৩, ১০৪, ১০৬

বিদ্যা-স্মৃতি-উৎসব ৬২

বীপকর শ্রীজ্ঞান ৫৯, ১২৩, ২১৬, ২১৯

বীর্ষতমা ১২

ভূগাপুঞ্জী ১৮০

ভূগাপুঞ্জী ১

দেবখড়া ৩১

দেবভক্ত ২৪

দেবধর ২২১

দেবপাল ৩৫, ৪১, ৪২, ৪৩, ৪৭, ৯৯

দেববংশ ১০২

দ্যুত-প্রতিপদ ১৮১

দেবিনী ১০

ধর্মধর ২২১

ধর্মপাল ৮, ১৭, ৩৪-৪১, ৪৭, ৯৮

ধর্মপাল ( দণ্ডভুক্তিরাজ ) ৫৬, ৫৭

ধর্মাবিতা ২১

ধর্মদেবী ৪

ধর্ম্যগ্রাম ৯৭

ধর্মী ৮৩, ১২৬

দমোদ্রা ৯৭

নন্দবংশ ১৭

নরপাল ৫৯, ৯৯

নরথু ১০৫

নরেন্দ্রগুপ্ত ২৩

নাগবোধি ১২৩

নাগভট ৩৭, ৩৮

নাঙ্গলবন্ধ ৪

‘নাথ’ ১২৪

নাক্তদেব ৬৭, ৭৮, ৭৯, ৮২

নাব্য ৬

নারায়ণ ১২১

নারায়ণদেব ১০৪

নারায়ণপাল ৪৮, ৯৯

নালন্দা ৪৪, ২১৭

নিবান জাতি ১০, ১১

নীতিবন্দী ১১৯

পঞ্চগৌড় ৮

পট্টকের ৬০, ১০৫

পণ্ড বাহুদেব ১৫

পদ্মনা ১২৯

পদ্মসম্ভব ২১৫

পদ্মানন্দী ৩-৫

পবনদূত ৯৭, ৯৮, ১২৬

পরবল ৩৯

পলপাল ৭১

পশুপতি ১২৫

পাটলিপুত্র ১৬

পাণিনি সূত্র ৭

পাণ্ডুরা ৩

পালিবোধরা ১৬

পাহাড়পুর ৪০, ১৩৭, ১৮৫, ১৯৪, ১৯৫, ১৯৮,

২০১ ২০৪

পীঠী ৯৫, ৯৬

পুণ্ড ১, ৬, ৯, ১১, ১২, ১৫, ২৮, ৩০

পুণ্ড বর্জন ৪, ৬, ২০, ২৯ ৩০

পুতলি ১২০

পুনর্ভবা ৪, ৫

পুরুবোদ্ধম ১০২, ১২৬

পুলিঙ্গ ৯

পুরুষণ ১১

পূর্ণচন্দ্র ৫১

পৃথুরী ২১

পেরিমান ১৮

প্রজাবর্ষণ ১২৩

প্রতিহার ৩৫

প্রতীতমেন ৯৬

প্রবোধচন্দ্রোদয় ৭

প্রাদির ১৬

প্রিহজু ৫১

মিনি ১৬

মুতর্ক ১৬

কঙ্কগ্রাম ৯৭

কাহিয়ান ১১৬

ফুতু-উন-সলাটিন ৯২

বখতিয়ার ৮৭-৯৪, ১০১

বঙ্গাল ১, ২, ৬

বজ্রবর্ষা ৭২

বজ্রভূমি ১২

বৎসরাজ ৩৫

বশ্যট ৩৪

বরাকর ১১৭

বরেন্দ্র, বরেন্দ্রী ১, ৭, ৮

বর্জন ৭৯

বলি ১২

বল্লা চরিত ৮১

বল্লাসেন ৮১, ৮৩, ৮৪, ৯৭, ১০০, ১২৫

১২৬, ১৭০

বসাবন ২২০

বহলারা ১৯৭

বাংলা লিপি ১৩২

বাকপাল ৩৯, ৪৭

বাকলা ৬

বাগভট ২৫-২৮, ১১৬

বাৎস্তায়ন ১৮৩

বালক (লেখক) ১২১

বালপুত্রদেব ৪৪

বাহুদেব ১৫, ১০২	ব্রহ্মপুত্র ৪, ৫
বিক্রমপুর ৬, ৫৪, ৬০, ৭৪, ৭৫, ৯৪, ৯৭, ১০৩	ব্রহ্মবৈবর্তপুরাণ ১৬৭-১৬৯, ১৭৮
বিক্রমশীল ৪০, ২১৭	ব্রাহ্মণ ১৭২
বিক্রমশীল-বিহার ৪০, ১৪৩, ২১৮	ভবদেব ভট্ট ৭৩, ৭৪, ১১৮, ১২১, ১৭১, ১৭৫
বিক্রমাদিত্য ৬০, ৭৭	ভাগীরথী ৩
বিশ্বহপাল (১ম) ৪৭, ৯৯	ভাগ্যদেবী ৫০, ৫১
বিশ্বহপাল (২য়) ৫১, ৯৯	ভার্জিল ১৮
বিশ্বহপাল (৩য়) ৫৯, ৯৯	ভাষ্করবর্মা ২৪, ৫৯
বিজয় ১৪	ভীষ ৬৩, ৬৫
বিজয়পুর ৯৭, ৯৮	ভীষপাল ১২০
বিজয়রাজ ৭৯	ভোজ ৪৩, ৪৯
বিজয়সেন ৭০, ৭৮, ৮০, ৮১, ৮৪, ৯৭, ৯৮, ১০০	ভোজবন্দী ৭৫
বিভূতিচন্দ্র ১২৪	ভ্যালেরিয়ান ২৬
বিসলদাস ২১৩	মণিতসেন ২৬
বিসলমতি ১২০	মণ্ডী ২২৩
বিলাসদেবী ৭৯, ৯৭	মৎস্তেন্দ্রনাথ ১২৪, ১৩০, ১৪৭
বিশাখদত্ত ১১৯	মথন ( মহা ) ৬৪, ৬৭, ৬৮
বিশ্বরূপসেন ৯৪, ৯৫, ১০০, ১০৩	মদন ২২১
বিশ্বাদিত্য ৬০	মদনপাল ৭০, ৭৯, ৯৯
বিশেষর শঙ্কু ২২০	মধুমথনদেব ১০২
বিক্রপুর্বাণ ১৭৮	মধুসেন ৯৫
বিক্রপুত্র ২১৩	মরনামতী ( পাহাড় ) ১০৫, ১০৬, ১২৬
বীর ৭৯	মহানামতী ২৫
বীরদেব ৪৪	মদলিন ১৮
বীরশ্রী ৭২	মহাবংশ ১৪
বুড়ীগঙ্গা ৪	মহাবীর ১২
বুদ্ধগুপ্ত ২১৪	মহাশিবগুপ্ত ৬০
বুদ্ধসেন ৯৫, ৯৬	মহাসেনগুপ্ত ২২, ২৩
বৃহৎ সংহিতা ৬	মহাহানগড় ৬
বৃহদ্রথপুরাণ ১৬৭-১৬৯, ১৭৮	মহীধর ২১৩
বৈজ্ঞ ৭৬	মহীপাল ( ১ম ) ৫১, ৫৫, ৫৯, ৯৯
বৈজ্ঞদেব ৬৯	মহীপাল ( ২য় ) ৬০, ৬২, ৯৯
বৈদ্যগুপ্ত ২০	মহেন্দ্রপাল ৪৯
বোধিভদ্র ১২৪	মাধব ১২০
বৌদ্ধগান ও দোহা ১২৮	মানব ২৯
বৌদ্ধধর্ম ধর্মসূত্র ৯, ১৩৪	মানবধর্মশাস্ত্র ১১
ব্রহ্ম-কবির ৭৬	মানসোদাস ১৩১
ব্রহ্ম-ভিক্ষুতীর ১০	মাক্তি ১৭৮



মিথিলা ৮

মীনন'থ ১২৯

মীনহ'জুদ্দিন ৮৩, ৮৭-৯৭, ১০১

মুরারি ১১৯

মুগহাশ্বনকূপ ১৯, ১২৪

মেঘনা ৪

মৈজের রক্ষিত ১২০

মোক্ষাকর গুপ্ত ১২৪

মৌর্য ৬, ১৮

মুকপাল ৬০

মুন্না ৩, ৪

মুবাতি ১২

মুখঃপাল ২২২

মুশোখর্ষণ ২১

মুশোবর্ষা ( কনোজরাজ ) ৩০-৩২, ৫১

মুশোবর্ষা ( চন্দেলরাজ ) ৫১

মুগী ১৭৮

মুখরাজ ৪৫, ৫১

মুখোঁক ১২১

মুখোবনত্রী ৫৯, ৭২

মুখবক্সমল ১০৬

মুখশূর ৫৬, ৫৭

মুখশূর - ৯

মুখোদেবী ৩৯

মুখাকরশক্তি ২১৯

মুখ-প-চন্ ৪৫

মুখব ৭৯

মুখতরঙ্গিণী ৮

মুখবলভ ৪

মুখমহল ৩

মুখবালভট ৩১, ৩৪

মুখেল ৫৫

মুখেল চোল ৫৪-৫৭, ৭৮

মুখাপাল ৪৮, ৫০-৫২, ৯৯

মুখাবর্ধন ২৪-২৬

মুখ্যত্রী ২৪, ২৭

মুখ্য ১, ৭, ৮, ১২

মুখিকসেন ৯৬

মুখচন্দ্র কবিতারতী ২২১

মুখচরিত ৩৪, ৬১-৬৬

মুখোদেবী ৮৩

মুখপাল ৬০, ৬১, ৬৩, ৬৫-৬৯, ৭৯, ৮০.

৯৯, ১২০

মুখাবতী ৬৫, ১৮৪

মুখেশ্বর সেতুবন্ধ ৪৩

মুখশী ১০

মুখোক ৬৩

মুখোহিতাগিরি ৫৩

মুখশ্বজাজ ৫১

মুখশ্ব-সংবৎ ৯৯, ১০১, ১০২

মুখশ্বসেন ৮৩-১০৩, ১১৩, ১২৬

মুখশ্বাবতী ৭, ৮৪, ৯৩, ৯৭

মুখশ্বকর্ণ ৫৯

মুখশ্বাধর ২২১, ২২২

মুখশ্বনিরা ৮৮, ৮৯

মুখোদেবী ৫০

মুখসেন ৯৬

মুখহচন্দ্র দেব ৫৩

মুখিতচন্দ্র ৩২

মুখিতাধিত্য ৩০

মুখি-পা ১২৪

মুখিত ২২২

মুখিতামা ২২১ ২২২

মুখর ২৫

মুখগাচাণ্ডা ১১৭

মুখর ৯

মুখরীপাল ১০৪

মুখর ৮৫, ৮৬, ১২৭

মুখাক ১৭, ২৩-২৮, ১৫১, ১৭৫

মুখোদেব ২১৩

মুখিতদেব ১২২

মুখিতরক্ষিত ২.৫, ২১৮

মুখিতাগলি ৩

মুখিতাগ সো ১২০

মুখিতাজ ৬৫

মুখিতাজী ২৬

শীলভদ্র ৩১, ১২২, ১৪২, ২১৭  
 শুভাকর ১২৪  
 শূত্রক ৬০  
 শূরপাল ( ১ম ) ৪৮, ৯৯.  
 শূরপাল ( ২য় ) ৬০, ৬৩, ৯৯  
 শূলপাণি ২১২  
 শৈলোদ্ভব ২৩  
 শ্রামলবর্মা ১৭৪  
 শ্রীকৃষ্ণ ১৮  
 শ্রীচন্দ্র ৫৩, ৫৪  
 শ্রীধরদাস ১২৬  
 শ্রীধরভট্ট ১১৯  
 শ্রীমার শ্রীবল্লভ ৪৪  
 শ্রীমুখ্যামিত্য ২১  
 শ্রীহরিকাল দেব ১০৬  
 শ্রীহর্ষ ৮১, ১১৯  
 সত্ব্তিকর্ণামৃত ১০০, ১২৬  
 সন্ধ্যাকামন্দী ৬১, ১১৯  
 সপ্তগ্রাম ৩  
 সমভট্ট ১, ৬, ১৯, ২০, ২২, ৩১  
 সমাচারদেব ২১  
 সমুদ্রগুপ্ত ১৮, ১৯  
 সমুদ্রসেন ১৫  
 সরস্বতী ৩  
 সরহপাদ ১২৪  
 সর্বানন্দ ১২৬  
 সামন্তবর্ষণ ৭৩  
 সামন্তসেন ৭৬-৭৮, ১৩৫  
 সামলবর্মা ৭৫  
 সারস্বত ৮  
 সিংহপুর ৭২, ৭৩  
 সিংহবর্মা ১৯  
 সিদ্ধেশ্বর ১৯৮

সীহবাহ ১৪  
 সীহসেবলী ১৪  
 স্নকেত ২২৩  
 স্নধরাদিত্র ১৮১  
 স্নল্লরবন ৫, ১৯৮  
 স্নবর্ণস্র ৫৬  
 স্নবর্ণবণিক ১৭৮  
 স্নরপাল ১২০  
 স্নরেশ্বর ১২০  
 স্নক্ষ ৭, ১২ ১৫  
 সোনার গাঁ ৪  
 সোমপুর ৪০, ১৪৩  
 স্নরজ পুরাণ ৩৬  
 স্নর্ণগ্রাম ৯৭  
 হরি ৬৫, ৭৪  
 হরিকেল ১, ৬, ৫২, ৫৩  
 হরিতসেন ৯৬  
 হরিবর্মা ৭৩-৭৪, ১৭৪  
 হর্ষ ৩১  
 হর্ষচরিত ২৪, ২৫  
 হর্ষবর্দ্ধন ২৪-২৯  
 হলায়ুধ ৮৬, ১২৫, ২২১  
 হস্তায়ুর্কেষ ১১৬  
 হাড়ি ৯  
 হাড়িপা ১২৯  
 হারবর্ষ ৪৫  
 হপ ৪২, ৪৩  
 হরেনলাং ২৪-২৮, ৩১, ১১৬, ১৫১, ১৫২, ১৮২,  
 ২১৭  
 হেমন্তসেন ৭৭, ৭৮  
 হোমো-আলপাইনাস ১০  
 হোলি ১৮১

ক্রম সংশোধন—৮১ পৃষ্ঠায় ১৮ পংক্তিতে 'বল্লভ রচিত' স্থানে 'বল্লভ-চরিত' এবং ১০৪ পৃষ্ঠায় ১৮ পংক্তিতে 'কেশবসেন দেব' স্থানে 'কেশবদেব' পড়িতে হইবে।

## নিবেদনং

নমামি জননীমাদৌ পূজ্যাং বিধুমুখীমহং  
হিঙ্গা মাং সার্কিবর্ষীয়ং বিধুলোকমিতো গত্যাং ।  
গঙ্গামণিং মাতৃকল্পাং দেবীং বন্দে ততোনতঃ  
মাতৃস্নেহেন বাল্যাত্মাং যা সদা প্রত্যপালয়ং ॥ ১


দ্বীপৰ্ণবস্মুচন্দ্রাদে শাকৈ পৌষে শুভে দিনে  
জন্মভূমে: পুরাবৃত্তং গ্রন্থার্থ্যামিদমানতঃ ।  
নিবেদয়ামি মাতৃভ্যাং গাং গত্যাভ্যামহং মুদা  
জননী জন্মভূমিশ্চ স্বর্গাদপি গরীয়সী ॥ ২

বঙ্গালসংজ্ঞকে দেশে রম্যে সর্বগুণোজ্জ্বলে  
মূলধর-বিনির্গতে খান্দারপাড়া-গ্রামাগতে ।  
মুদগলশ্চ ঋষের্গোত্রে কুলীনে বৈষ্ণবজায়ে  
কবিরাজ-যাদবেন্দ্র-বিষ্ণুরামাদি-পাবিতে ॥ ৩

বিষ্ণুদাসকুলে খ্যাতে জাতো হগধরঃ শ্রিয়া  
মজুমদার ইতি জ্ঞাতঃ দাসগুপ্তসংজ্ঞকঃ ।  
শ্রীমান্ রমেশচন্দ্রোহং শর্ম্মোপাধিস্তদাত্মজঃ  
ততীযুর্ভবপাথোধিঃ মাত্রোরাশিষমর্থয়ে ॥ ৪



কৈবর্ত স্তম্ভ ( খীবর দৌঘি )



ব্রজের শিব-মূর্তি ( বরিশাল )







কার্তিকেয় ( কলিকাতা বাহুব )



অবলোকিতেশ্বর ( কলিকাতা বাহুব )



ব্রহ্মের মন্দির ( ঝেওয়ারি )




ব্রহ্মের বিষ্ণু-মূর্তি ( রংপুর )





চিত্র নং ৩। শিব (গণেশপুর)



ইন্দ্রাণী (রাজসাহী যাত্রঘর)



নটরাজ (ঢাকা যাত্রঘর)







সবস্বতী-মর্ত্তি ( ছাতিনগ্রাম )






যমুনা-মূর্তি ( পাহাড়পুর





বিষ্ণু-মূর্তি ( বগুড়া )





৪নং মন্দির (বরাকর)







দ্বারপাল ( পাশাউপুর )





নন্দি (পাহাড়পুর)





কৃষ্ণ কতুক-কেশা-বধ ( পাহাড়পুর )





মৎস্যাবতার ( বজ্রযোগিনী )









চিত্র নং ১০

দিল্লীর মন্দির

বাড়ি। ১।



বৌদ্ধ মন্দির



গঙ্গা (পালকাতা যাত্রার)



**বাংলা লিপির উৎপত্তি ও অক্ষরবিকাশ** [ ১০ নং টিফ  
( ১৩২-৩৩ পৃষ্ঠা দৃষ্টব্য )

	বৃঃ পূঃ শতাব্দী ৩য়	খৃষ্টীয় শতাব্দী							
		৫ম	৬ষ্ঠ	৭ম	৮ম	৯ম	১০ম	১১শ	১২শ
অ	𑂂	𑂂	𑂂	𑂂	𑂂	𑂂	𑂂	𑂂	𑂂 𑂂
আ	𑂂𑂂	𑂂𑂂	𑂂𑂂𑂂𑂂	𑂂𑂂𑂂	𑂂𑂂𑂂	𑂂𑂂𑂂	𑂂𑂂𑂂𑂂	𑂂𑂂𑂂	𑂂𑂂
ই	𑂂𑂂	𑂂𑂂	𑂂𑂂𑂂𑂂	𑂂𑂂𑂂𑂂	𑂂𑂂𑂂𑂂	𑂂𑂂𑂂𑂂	𑂂𑂂𑂂𑂂	𑂂𑂂𑂂	𑂂𑂂𑂂
ঈ	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂
উ	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂𑂂𑂂	𑂂𑂂	𑂂𑂂𑂂	𑂂𑂂
ঊ	𑂂𑂂	𑂂𑂂			𑂂𑂂				𑂂𑂂
ঋ		𑂂𑂂			𑂂𑂂				𑂂𑂂
এ	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂
ঐ			𑂂𑂂	𑂂𑂂	𑂂𑂂	𑂂𑂂			𑂂𑂂
ও	𑂂𑂂	𑂂𑂂𑂂	𑂂𑂂𑂂	𑂂𑂂	𑂂𑂂	𑂂𑂂			𑂂𑂂
ঔ				𑂂𑂂	𑂂𑂂	𑂂𑂂			𑂂𑂂𑂂
অনুস্বার	𑂂𑂂	𑂂𑂂			𑂂𑂂	𑂂𑂂		𑂂𑂂𑂂	𑂂𑂂𑂂
বিসর্গ		𑂂𑂂							𑂂𑂂𑂂𑂂
ক	𑂂𑂂	𑂂𑂂𑂂𑂂𑂂𑂂𑂂𑂂	𑂂𑂂𑂂𑂂𑂂𑂂𑂂𑂂	𑂂𑂂𑂂𑂂𑂂𑂂𑂂𑂂	𑂂𑂂𑂂𑂂𑂂𑂂𑂂𑂂	𑂂𑂂𑂂𑂂𑂂𑂂𑂂𑂂	𑂂𑂂𑂂𑂂𑂂𑂂𑂂𑂂	𑂂𑂂𑂂𑂂𑂂𑂂𑂂𑂂	𑂂𑂂𑂂𑂂𑂂𑂂𑂂𑂂
খ	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂𑂂
গ	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂𑂂
ঘ	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂
ঙ		𑂂𑂂	𑂂𑂂		𑂂𑂂	𑂂𑂂	𑂂𑂂	𑂂𑂂	𑂂𑂂𑂂
চ	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂𑂂
ছ	𑂂𑂂	𑂂𑂂							𑂂𑂂
জ	𑂂𑂂	𑂂𑂂𑂂	𑂂𑂂𑂂	𑂂𑂂𑂂	𑂂𑂂𑂂	𑂂𑂂	𑂂𑂂	𑂂𑂂𑂂	𑂂𑂂𑂂
ঝ	𑂂𑂂		𑂂𑂂				𑂂𑂂	𑂂𑂂	𑂂𑂂
ঞ	𑂂𑂂	𑂂𑂂	𑂂𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂
ট	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂𑂂
ঠ	𑂂𑂂	𑂂𑂂		𑂂𑂂	𑂂𑂂	𑂂𑂂	𑂂𑂂	𑂂𑂂	𑂂𑂂

# বাংলা লিপির উৎপত্তি ও ক্রমবিকাশ [ ১৪ নং ছবি ]

( ১৩২-৩৩ পৃষ্ঠা দ্রষ্টব্য )

	খঃ পুঃ শতাব্দী ৩য়	খৃষ্টীয় শতাব্দী							
		৫ম	৬ষ্ঠ	৭ম	৮ম	৯ম	১০ম	১১শ	১২শ
উ	𑂣	𑂢	𑂡	𑂠	𑂟	𑂞	𑂝	𑂜	𑂛
ঢ	𑂣						𑂞	𑂟	𑂠
ণ	I	𑂢	𑂡	𑂠	𑂟	𑂞	𑂝	𑂜	𑂛
ত	𑂣	𑂢	𑂡	𑂠	𑂟	𑂞	𑂝	𑂜	𑂛
থ	𑂣	𑂢	𑂡	𑂠	𑂟	𑂞	𑂝	𑂜	𑂛
দ	𑂣	𑂢	𑂡	𑂠	𑂟	𑂞	𑂝	𑂜	𑂛
ধ	𑂣	𑂢	𑂡	𑂠	𑂟	𑂞	𑂝	𑂜	𑂛
ন	𑂣	𑂢	𑂡	𑂠	𑂟	𑂞	𑂝	𑂜	𑂛
প	𑂣	𑂢	𑂡	𑂠	𑂟	𑂞	𑂝	𑂜	𑂛
ফ	𑂣	𑂢	𑂡	𑂠	𑂟	𑂞	𑂝	𑂜	𑂛
ব	𑂣	𑂢	𑂡	𑂠	𑂟	𑂞	𑂝	𑂜	𑂛
ভ	𑂣	𑂢	𑂡	𑂠	𑂟	𑂞	𑂝	𑂜	𑂛
ষ	𑂣	𑂢	𑂡	𑂠	𑂟	𑂞	𑂝	𑂜	𑂛
ম	𑂣	𑂢	𑂡	𑂠	𑂟	𑂞	𑂝	𑂜	𑂛
য	𑂣	𑂢	𑂡	𑂠	𑂟	𑂞	𑂝	𑂜	𑂛
র	𑂣	𑂢	𑂡	𑂠	𑂟	𑂞	𑂝	𑂜	𑂛
ল	𑂣	𑂢	𑂡	𑂠	𑂟	𑂞	𑂝	𑂜	𑂛
ব	𑂣	𑂢	𑂡	𑂠	𑂟	𑂞	𑂝	𑂜	𑂛
শ	𑂣	𑂢	𑂡	𑂠	𑂟	𑂞	𑂝	𑂜	𑂛
ষ	𑂣	𑂢	𑂡	𑂠	𑂟	𑂞	𑂝	𑂜	𑂛
স	𑂣	𑂢	𑂡	𑂠	𑂟	𑂞	𑂝	𑂜	𑂛
হ	𑂣	𑂢	𑂡	𑂠	𑂟	𑂞	𑂝	𑂜	𑂛

# বাংলা লিপির উৎপত্তি ও ক্রমবিকাশ

১৪ ও ১৫ নং চিত্রের ব্যাখ্যা

যে সমুদয় লিপি হইতে বিভিন্ন শতাব্দীর অক্ষর গৃহীত হইয়াছে তাহাদের নাম নিয়ে দেওয়া হইল।

খৃঃ পূঃ ৩য় শতাব্দী—অশোক অনুশাসন

খৃষ্টীয় ৫ম „ —প্রথম কুমারগুপ্তের বাইগ্রাম তাম্রশাসন

„ ৬ষ্ঠ „ —ধর্মাদিত্যের কোটালিপাড়া তাম্রশাসন

„ ৭ম „ —দেবখঞ্জের আশরফপুর তাম্রশাসন

„ ৮ম „ —ধর্মপালের খালিমপুর তাম্রশাসন

„ ৯ম „ —নারায়ণ পালের বাদাল স্তম্ভলিপি

„ ১০ম „ —প্রথম মহীপালের বাণগড় তাম্রশাসন

„ ১১শ „ —তৃতীয় বিগ্রহপালের আমগাছি তাম্রশাসন

„ ১২শ „ —বিজয় সেনের দেওপাড়া শিলালিপি

( অ, অনুস্বার, বিসর্গ, ক্ষ, খ, গ, ঘ, চ ট, ড, ণ দ, প, ভ, র ও ত্র, ল, শ, ষ—এই কয়েকটি অক্ষরের দ্বিতীয় রূপ ডোমন-পালের স্তম্ভরবন তাম্রশাসন, ত, ধ, ব স—এই তিনটি অক্ষরের দ্বিতীয় রূপ লক্ষ্মণসেনের আহুলিয়া তাম্রশাসন, উ অক্ষরটি বল্লালসেনের নৈহাটি তাম্রশাসন, এবং ঔ অক্ষরটি লক্ষ্মণসেনের গোবিন্দপুর তাম্রশাসন হইতে গৃহীত ) ।

প্রধানত JRASBL. IV পত্রিকার ৩৬৯—৩৭২ পৃষ্ঠায় প্রকাশিত চিত্র অবলম্বনে এই চিত্র দুইটি পরিকল্পিত হইয়াছে।

সাধারণত প্রাতি পংক্তিতে মূল অক্ষরটির বিভিন্ন শতাব্দীর রূপ দেখান হইয়াছে। তবে নিম্নলিখিত ব্যতিক্রমগুলি দ্রষ্টব্য।

১। আ, ই প্রভৃতি স্বরবর্ণের সহিত আকার ইকার প্রভৃতি দেখান হইয়াছে। মূল স্বর-বর্ণগুলি নিয়ে নির্দিষ্ট করা হইতেছে—অবশিষ্ট অক্ষরগুলি স্বর-সংযুক্ত ব্যঞ্জন বর্ণ।

আ — ২য়, ৩য়, ৫ম, ৮ম, ১০ম, ১২শ, ১৫শ অক্ষর

ই — ২য়, ৩য়, ৫ম, ৮ম—১০ম, ১২শ, ১৩শ ও ১৫শ

ঈ — ৩য়

উ — ২য়, ৩য়, ৫ম, ৭ম, ৯ম, ১১শ, ১৫শ, ১৭শ, ২০শ

ঊ — ৫ম

এ — ১ম, ৩য়, ৫ম, ৭ম, ৯ম, ১১শ, ১২শ, ১৬শ

୭ — ୧୫, ୧୧୩

৬ - ৪র্থ

২। কয়ের সহিত  $\kappa$  এর রূপ দেখান হইয়াছে।

৩। ও অক্ষরটি সর্বত্রই ক ও গয়ের সহিত সংযুক্ত।

৪। ছয়ের দ্বিতীয় ও তৃতীয় অক্ষরটি চ্ছ

৫। জয়ের ৩য়, ৬ষ্ঠ, ৮ম, ১২শ ও ১৪শ অক্ষরটি জ্ঞ।

৬। যথেষ্ট ২য় অক্ষরটি জ্ঞা।

৭। এ—কেবল ১ম অক্ষরটি এ, অবশিষ্ট অক্ষরগুলি ঞ অথবা ঙ।

৮। ঠায়ের ২য়, ৩য়, ৪র্থ ও ৮ম অক্ষরটি ঠ।

৯। ডায়ের ২য় ও ৩য় অক্ষর ও এ৭ং ৪র্থ অক্ষর ড়া।

১০। রয়ের অক্ষরগুলি যথাক্রমে র, র, প্র, ক, র, প্র, ক, র, প্র, গ, র, প্র, গ, র, প্র, ক, র, প্র, ক, র, প্র, গ, র, র, ত্র।

**श्रीमान् केशवनाथ साधारण पाथकः.**

## Jhikira, Howrah

**Attention No. \_\_\_\_\_ Call No. \_\_\_\_\_**











